

近代中國史料叢刊續編第一〇〇輯
沈雲龍主編

平定關隴紀略

易孔昭
胡孚駿
劉然亮編

卷一——卷三

文海出版社

有限公司

印行

近代中國史料叢刊續編第一〇〇輯
沈雲龍主編

平定關隴紀略

易孔昭
胡孚駿
劉然亮編

卷四——卷六

文海出版社

有限公司

印行

近代中國史料叢刊續編第一〇〇輯
沈雲龍主編

平定關隴紀略

易孔昭
胡孚駿
劉然亮編

卷七——卷十

文海出版社
有限公司
印行

近代中國史料叢刊續編第一〇〇輯
沈雲龍主編

平定關隴紀略

卷十一——卷十三

易孔昭
胡孚駿
劉然亮編

文海出版社
有限公司
印行

平定關隴紀略

近代中國史料叢刊續編 第一百輯

目錄

平定關隴紀略	卷一——卷三	易孔昭	胡孚駿編
平定關隴紀略	卷四——卷六	易孔昭	胡然亮編
平定關隴紀略	卷七——卷十	易孔昭	胡然亮編
平定關隴紀略	卷十一——卷十二	易孔昭	胡然亮編
同治甲戌日兵侵台始末		佚	名編
同治甲戌日兵侵台始末		佚	名編
督河奏疏	卷一——卷六	許振禕	許振禕著
督河奏疏	卷七——卷十	許振禕	許振禕著
輔軒抗議		余乾	余乾耀著
張園尺牘		王	韜著

平定關隴紀略序

洪惟我

穆宗毅皇帝纘承丕業震揚武威殄粵逆於東南翦捻寇於克
豫而竟全功於關隴薄海內外鏡清砥平伊古以來從
未有中興之盛如今日者初關中漢回以眦睚相讐殺
回乃煽其蠅醜麇聚爲亂關隴諸郡邑後先告變陸名
城掠村堡勢如燎原

朝廷命帥督師勦辦數年中亦嘗挫彼凶鋒捷書屢奏卒
未能一鼓盪平者雖由花門之狡悍異於他寇亦其時

其勢有處於甚難也何以言之回讐漢民甚所至荼毒慘酷異常死者既暴骨如莽生者復轉徙之他蝗旱繼之癘疫又繼之浩劫之餘孑遺有幾方是時千里蕭條彌望焦土籌餉則餉無可籌購糧則糧無可購卽謀轉饋於他境而夫役車馬招雇亦艱軍火器械又不時繼提飢疲之羸卒日角逐摺拄於十萬豺虎之叢而曰必取勝焉是固未可得之數矣

天子乃眷西顧盡念遺黎

命左文襄公由閩浙移督陝甘佩

欽差大臣關防督辦軍務

甫莅秦中適值捨酋窺竄 畿輔爰返西征之節而爲
入衛之師躡蹤窮追蹙之海隅聚而殲旃凱旋入覲

溫慰有加

垂詢西事公以五年歲事對於是整旅西上轉戰而前俘金積
之凶渠撫枹罕之降虜河湟之堅巢繼拔酒泉之踞逆
旋燔白玉關以東揮戈電掃一舉廓清計其時適及五
稔與

前席敷奏之言若合符節是不獨揚天聲於

昭代樹偉績於千秋卽其籌筆之神亦可謂一時特見已

或曰同一勦回前則如彼其難公則如此其易意者亦
適有天幸歟是大不然公之領兵而西也慮各直省協
助之餉不以時應陳請

欽派戶部侍郎出駐西安專理西餉其有逾期欠解者檄催之
又慮或有急需餉難猝辦飭臺局委員不時籌借商款
以資周轉而餉以時給矣其籌軍食廣設採買之局給
價厚而收之平其雇民役轉運倍予以值人以故爭趨
之又飭各防軍闢污萊勤播種田疇久荒之後加以墾
治乃大有秋而食以常充矣其行軍也分三道並進使

諸回各自顧莫相應援而後出奇以撓之蹈瑕以攻之
招降以攜之當幾決策因應無窮而勝算乃獨操矣蓋
公之臨事必熟思審處務期於至當運之以精心復行
之以果力乃舉人所謂難者悉轉而爲易焉尙書曰慮
善以動中庸曰凡事豫則立公有之矣夫是以雄師所
指戰必克而攻必取夷大難而集大勳也豈倖致哉光
緒四年昌濬奉幫辦新疆事宜之

命駐節蘭州是時內地大定已歷數年農趨於田商趨於市
熙熙穰穰陶然自樂此非我

國家宏仁煦育公之悉心綢繆曷克臻此然則當日易危
爲安其所以戡定而撫綏之者安可無一編以紀之爰
集奏牘屬候補道黔陽易孔昭仿紀事本末體纂輯爲
書未竣事余與易君先後去隴布政使邵陽魏光燾迺
以屬候補知府江夏胡孚駿候補知縣醴陵劉然亮踵
爲之遂觀厥成錄本見寄受而讀之據事直書但取覈
實不鶩文藻當時之

廟謨將略軍事虜情釐然具備雖未足備

國史採擇或亦攷求時事者所不可廢乎惜乎公已騎箕

不及一質之而是正譌誤也書此爲之黯然光緒丁亥
歲孟秋湘鄉楊昌濬撰於閩浙節署

凡例

一紀畧與國史相表裏諸家因事制宜體例各有不同按之史法要以編年紀月仿歷朝紀事本末之例爲當然或一役歷數時一時興數役按月分編閱者每嫌紛雜是書以年爲綱日月前後一律依次順敘庶綱領得而眉目因之亦清史法存而

國故不致無補

一是書一以章奏爲程因事敘事不敢臆斷妄著一字庶以存信實而昭法戒父老傳聞道途謳頌一切靈應怪異之

語概不收入懼於

國史不符反致淆真

一左公甫入關中卽返追擒逆由豫晉而肅清

畿甸及平定關內復剿安夷合南北而規復新疆毳幕十三年廓清萬餘里原可合編成書以彰大

朝廷中興之盛是書因以平定關隴紀畧命名斯平擒安各匪事蹟雖係一人之事不得拉雜入中以相混淆

一史法於文武大臣書姓名不書銜諡君前臣名之義也紀畧非史實備史之未備自來紀畧諸書均直書姓名惟前

明方潛夫全邊畧記一書先書名而小字書姓於旁是書於文武大臣亦直書名畧更方氏例先書姓而小字書名於旁以免同官同姓者之相混惟是書以左公爲主自不得直書其名凡遇左公處均於左字下空二字以德均功以功均位義在然也

上諭及奏章中仍直錄焉

一入關伊始卽定計三路進兵分南北兩翼而自將中路中路惟楚軍隨節而入所調客軍及先在關隴各軍多列分南北是書無論西東豫皖及先在關隴者分勦合勦均別

以南北路字樣庶頭緒不紛而閱者一目了然

一平定關隴固左公偉畧而亂關隴者實有川粵各匪在其先經多劉諸公極力勦辦甫就撲滅而回匪變亂實乘此機是書自同治元年髮逆竄陝發端一以原亂所由生一以存諸公戰績且令後人洞悉原委知關隴亂如此無益知平定之非易也

一行軍餉先於兵糧先於餉自古皆然關隴地廣數千里亂後十室九空兵餉糧糗一無可籌雖各省按章協濟而舟楫不通專恃車馬轉饋尤在在有鞭長莫及之勢左公每

於軍行前路預設轉運以足軍食關隴之平轉運之力居多茲故概從實錄以傳信

一善後事宜隨時辦理如請設學院分文闡添置州縣裁減制兵安插降回及各大端自依章奏列入其未列奏報者均以各處稟報爲憑俾後世有所稽考

平定關隴紀畧卷一

關隴之難始於髮逆甚於捻匪而糜爛於回回之亂乘髮捻而起及其平也乃後於髮捻五年回平而關隴清關隴清而天下晏然矣溯查回人寄居中國已歷千有餘年前代叛服不具述

國朝順治五年涼州回米喇印丁國棟起兵涼州渡河而東殘蘭州寇鞏昌盡陷洮岷河諸城及爲官軍所敗就撫不兩月復叛於甘州害巡撫總兵以下各官進陷肅州官軍圍攻潰而東走旁鈔張掖武威村堡總督孟喬芳及總兵張勇討

之凡數月而伏誅乾隆四十六年循化廳新教阿渾馬明心之徒蘇四十三聚眾仇殺老教回因而作亂總督勒爾謹捕馬明心誅之其氛愈熾大學士阿桂率

京師火器健銳營兵二千自河南工所赴剿殲之於華林山凡三月而亂平乾隆四十八年蘇四十三餘黨伏羌縣阿渾田五以復仇爲名殺掠復起踞通渭之石峰堡分屯伏羌之鹿盧山靜甯之底店山據險號召總督李侍堯率本省兵討之田五受創死其黨馬四主張文慶殺掠如故侍堯不能制上命大學士阿桂率京兵二千及福康安海蘭察來甘會剿

醜類盡除未期年而滅從未有蔓延兩省勞師一紀閩帥屢
易始臻底定若此次之甚者也蓋自乾隆以來重熙累洽關
隴腹地不覩兵革者近百年回民以生以息戶口之蕃亦臻
極盛其人既習於彼教秀良者少罕讀禮義之書儕輩徵逐
徒以強忍驚悍相高尙值咸豐之初粵逆俶擾捻匪繼之東
南攻戰無虛日奸回恃其眾也潛蓄異謀特關中無釁未敢
發也迨同治元年三月間髮逆藍大順由川竄擾商州商南
孝義一帶另股由南陽竄雒南入南山全陝俱震維時陝兵
多赴調未歸巡撫瑛棨暨西安將軍托明阿固原提督孔廣

順商令副都統烏蘭都率西安馬隊叅將阿揚阿遊擊孟柏林領撫標城守營及甯夏各兵從尹家衛中路三兆地方進剿復派撫標官兵並所募團防勇華陰勇交都司張鵬飛守備梁元倉巡檢魏榮封軍功縣丞銜陳茂經從尹家衛之西路韋曲進剿漁化廩紳士梅錦堂石倉民人胡茂義亦集團以助四月十八日戰於三兆畧有擒斬賊以馬隊兩面包鈔愈聚愈眾官兵止八百名勢甚懸絕阿揚阿身受重傷士卒傷亡亦多孔廣順飛調張鵬飛等接應始克收隊賊亦未敢進追十九日賊從杜曲入犯復以兵勇民團禦之賊勢遂卻

追至十餘里後股之賊繼至兵團齊奮斬執旗賊首一名並
長髮賊九名短髮五十餘名奪獲黃色龍旗一杆軍械數十
件搗到僞示數張久之賊由尹家衛夜竄藍田署知縣戴鼎
元率紳民固守官軍亦探蹤追剿二十二日賊竄藍田渭南
交界之厚子鎮續到另股逆匪竄入雒南署雒南判縣張國
鈞會同防守之遊擊烏訥什率弁兵力解城圍生擒長髮老
賊唐小登娃錢得淮二名奪白大旗一面僞印封一副僞示
一張賊向東南竄去時又有漢中賊鄧添亡欲渡漢江經漢
中鎮道截擊陣斬淹斃約數百名餘賊仍欲西竄一時眾匪

環逼陝中之兵勉敷城守剿辦則全恃鄉團而各處紛紛請援茫無以應瑛棨等會銜據實具奏請

勅下陝甘督臣沈兆霖撥兵三千名交甘肅提督馬德昭率赴陝西助剿並請

嚴催河南湖北各省官兵迅速來陝以期早蕩妖氛奉

上諭湖南湖北之兵迭經諭令星速赴援著官文等仍卽飭令何紹彩一軍並派金國琛抽調防兵無分晝夜馳赴陝省分投援剿舒保多隆阿皆係楚省驍將隨州廬郡均已克復而陝省軍情如此緊急該省係餉源所在非有勁兵名將難

冀保全著官文會商會國藩於多隆阿舒保兩員中酌量何員入陝爲最宜卽一面奏聞一面派令率其所部星速入陝多隆阿如能前往其所畱皖省兵勇卽著交李續宜統帶鄭元善前派赴大峪口之兵一千名著卽迅催出境會同陝兵夾擊陝西係沈兆霖兼轄著速飭馬德昭卽遵前旨挑選精兵二三千名赴陝欽此

諭旨雖甚嚴切而軍情旦暮不同難以遙度程途遙遠亦豈能剋期速至該逆竄近渭南經厚子鎮團練擊敗於二十二日出良田坡進撲縣城於二十四日失守知縣曹士鶴並其

妻萬氏同時殉難進剿之軍馳往方至黃家園該逆於二十
五路由縣城前來撲營經民團陳茂經陳茂紀張龍驤張新
緒巡檢魏榮封等奮力擊退二十六日復至兵勇接仗畧勝
而該逆大股踵至我軍僅九百餘人不及賊眾十分之一雖
民團極稱驍健斃賊數百而賊覘定叢刺陳茂經張龍驤並
其子新緒皆中鎗殞命適臨潼縣知縣繆樹本派軍功安定
邦帶團勇接應河北團總訓導趙權中軍功馮元佐亦率其
團於北岸遙爲聲援賊始收隊回城安定邦亦力竭陣亡該
逆見鄉團精銳卽於是晚悉數竄至華州之赤水知州濮垚

方帶勇親督堵擊而別股已繞陷州城比及聞信馳回則又東竄華陰縣之華陰廟州城得以收復瑛棨等方會商守禦欲將由河南撤回之協領圖克唐阿叅領訥勒和春所帶馬隊二百人截留潼關協同哈連陞扼守而不意回民乘此空虛揭竿起事東自同州西至華州渭南所在騷動矣陝中旣苦髮逆之擾而回難忽發於倉猝不特籌勦無兵卽起事之由亦未盡悉其不能不暫行撫慰者勢也亦情也詎知刼運將開關隴之禍乃獨在此回乎緣回漢雜居俗尙各別睚眦小忿本人情所不能無而回民好勝過於漢民阿渾慕之往

往因小忿而起大爭及鳴官剖斷回民卽得直而猶以爲屈苟誠有所屈則其情愈不可知蓄憾旣多圖報益切而其中之黠者輒假此以聯眾謀爲不軌漢民受其害亦思有以報之而殺戮之禍遂烈初渭河以北回漢不睦互相械鬪而漢不勝回致數處村莊遭回民焚燬殺戮乃大荔縣回復出而助虐兩縣漢回各不能平愈鬪而愈厲渭南紳士中書趙炳堃接管前河南藩司嚴樹森所募回勇數百名爲防禦粵匪捻匪計乃該回勇爲奸回所誘恃有河南原發器械遂先戕害趙紳聚眾爲亂又有華陰漢民欲將華州之秦家村回莊

焚燬經華州學正孫敦會前往勸阻業已聽勸允息而華陰
亂民於四月二十四日仍將秦家村並沿河回莊焚燬由是
渭南大荔河北漢回各村互相燒殺不可復遏矣此風旣開
效尤者眾至二十九日耀州富平等處漢民亦藉端至耀屬
之寺溝堡殺斃回民數十人且焚其禮拜寺復至同官之韓
家原開放鎗礮圍繞搜殺論當時起釁之由漢民不得爲無
罪蓋漢民平日恃眾欺壓回民肆口謾罵不知膽怯而勢散
而回民軍械旗幟出於素藏圍城結壘居然匹敵此則思亂
之心已非一朝一夕亦非盡由漢民激之者也平日地方官

不善撫馭至是時士吏初聞回變急圖解散安撫刊刷諭示
派遣員紳四出五月初四日督辦團練大臣前都察院副都
御史張芾率臨潼知縣繆樹本紳士蔣若訥回紳馬百齡姪
孫濤等親往渭南等處和解初六日又委臬司劉鴻恩候補
知府呂儁孫分往河北鄰近地方勸諭防其繼起初八日劉
鴻恩稟報咸陽涇陽等處已先有回民傳帖幸當時趕緊開
導將告示張貼始各釋然張芾緘稱由高陵臨潼北岸一帶
勸諭回民已遵教化惟渭南大荔勢若燎原一時恐難禁止
已諭曉事回紳前往倉渡地方勸諭等語省城復飭回紳武

舉馬三元軍功擺連城暨漢紳二人續往各處當時未經滋事之處皆已遵諭息爭無如奸回肆毒迫脅萬端良回不從輒遭屠戮旬日之間各處蠶起渭河南北州縣膏腴盡皆焚掠適另股髮逆自雒南被剿後竄至山陽縣城旋經失陷知縣恒春未知下落該匪遂踞城內無兵往剿而漢南川匪又由牟家壩竄至青石關漢中防剿之兵亦不能回顧省城自四月十三日戒嚴文武員弁分段站守引領盼援而豫撫鄭元善所派之楊飛熊楚督官文所派之何紹彩各軍久不見至逆回愈撫愈熾大荔一股竟敢圍攻同州府城西關舊住

回民不少城內亦有回戶紳民十數家當王閣村等處回逆起事時府城西關紳商漢民密約夜間齊至回紳民家同時殺戮淨盡城內聞知亦卽奮臂大呼四街漢民麇集分詣回戶同時勦洗府縣阻止不聽時有駐紮城外之潼關營官亦回教也登陴守關極力防禦城外回民誘脅不從而漢紳民亦必刦而殺之地方官護救不及臬司劉鴻恩候補府呂雋孫同在城內督同知府朱元慶等率潼關赴援兵百名及城中募勇數百名登陴守禦回逆圍攻九晝夜始退而近城四鄉漢民村堡焚掠一空該逆等踞王閣村羌白鎮普陀原倉

頭長陀灣馬家堡蘇家溝等處爲老巢分股四掠遂至攻撲
省城猖獗倍於髮逆百計推誠迄難綏撫張芾自初旬緘報
之後久無信息及遣人往探則云五月十一日已至油坊街
被回匪任老五馬玉良馬燕膺馬進昌等擁往倉頭以去其
地皆有回卡不敢深入等語時省城附近村堡同遭焚殺六
月初三日撲犯西關經武弁孟柏林等擊退初四日該匪先
撲東關經署陝安鎮總兵閻丕敏出城列隊該匪復繞至西
關有金勝寺駐紮之紳士梅錦堂團勇迎擊正酣戰間被該
匪繞出廟後拋擲火器登時將寺焚燒團勇心亂陣腳稍動

幾爲該匪所乘孟柏林從旁刺殺該匪始退西北另來一股
意在牽制馬德昭之軍比經提督馬德昭孔廣順督隊奮擊
斃回四百餘名奪騾馬十餘頭軍械多件蓋回逆初經戰陣
膽技未諳故官軍以少擊眾克獲小捷非有勝算可操也外
援之至者僅楊飛熊派縣丞張寶禧帶甯夏兵千名而前奉
諭旨提督成明帶京兵馬隊二千名赴陝聞第一起已近潼
關其餘尙無信息奏奉

諭旨著多隆阿仍遵前旨嚴催雷正綰統帶兵勇星速入關
會同瑛棨等懾以兵威勒令該回民將爲首滋事之人獻出

懲辦其被脅勉從者酌量散遣惟回匪傳單已蔓延西安同州十數州縣旗幟鮮明礮械齊備該逆蓄謀已久勢燄正張恐雷正綰一軍不敷分剿多隆阿有督辦陝西軍務之責仍著該將軍督率後隊各營相繼前進該省望援甚迫務當刻期抵陝以解倒懸鄖西髮逆現旣回竄逼近商南鄖郡情形已鬆金國琛早已到鄖足資防守著官文等速飭何紹彩就近馳赴西安以厚兵力並著瑛榮查明張蒂等消息具奏等因蓋未知回匪甘心叛逆無可挽回也是時渭河南北實已嘯聚十數處裹脅日多旗幟器械鎗礮馬匹日見添備官軍

困守孤城外援不至屢經大敵兵力難支加以東西北三路蔓延數百里逆燄滔天道路梗塞惟南路稍可通行文報均須迂道固守兩月以來米麵鹽炭日用之物日乏一日外添避難男婦萬餘人尤須賑恤愈形匱竭不得不急爲籌辦因聞草灘店地方囤積鹽炭尙多當經雇覓車輛由馬德昭帶隊前往護運僅得鹽炭十七載中途遇回匪兩路鈔劫幸官軍力戰卻退未爲所奪時六月十三日也十六日正欲派隊再運而回匪已於黎明大股麇集逕撲北關馬德昭營壘分股一攻東北叅將王錫爵都司汪潮海二營一股鈔我後路

並擾哨關經馬德昭派令都司王允德馬德俊帶兵分路救
應自督各隊迎剿閻丕敏亦自東關帶隊而來城上開放大
礮擊中騎賊十餘名賊勢稍卻復圍王錫爵汪潮海二營馬
德昭先行馳救孔廣順由南路親督大隊合擊並飭副將王
夢麟西安協領柯克僧額分兩路直入逆隊斃匪數百名其
圍立解乘勝直前中軍之圍亦解各軍自卯至酉鏖戰六時
幸獲全勝傷亡尙不甚多次日回匪大股分兩路撲西北兩
關馬德昭逆察其意在西路遂派營總色勒崇額帶領馬隊
馳救西路孟柏林之營一面調派游擊吳功成都司馬德俊

並會閩丕敏所部宋永興分帶各隊兩路應援馬德昭親率各隊由東北隅一帶迎頭截擊匪眾遂卻又見後面大股蜂擁而來馬德昭見我兵太單遂傳令收隊該匪竟追撲而來我軍回禦鎗礮迭轟城上亦開大礮匪勢不支退數里外高岡屯踞其另股鈔掠近城村堡之匪亦經孔廣順及色勒崇額馬隊擊敗日暮始各遠去連日撲城之匪幸皆挫敗而粵匪鄧逆竄至城固之上元觀亦經官軍擊敗惟各路援軍不至終無可恃之具復經會銜陳奏奉

上諭嚴催多隆阿雷正綰入關並飭成明剋期渡河英桂派

兵爲後路應援至於漢回互鬪此時回匪已攻城戕官劫畱官紳張芾等同州一帶逆回身著黃袍旗書逆語被脅不從之回卽遭焚殺是該回匪逆蹤昭著斷無再行專主撫議之理多隆阿抵陝後卽著先將該逆痛加剿除毋爲撫議所誤其被脅良回仍宜分別解散毋得概行誅殺以分順逆而定人心欽此而

宸衷猶未釋然後

命吳振械由滇至陝會同瑛榮將應如何辦理並現在詳細情形迅速馳奏以慰廬念

朝廷之仁愛如此而逆回豺狼成性好亂無厭自外

生成甘羅斧鑕卽良回遭其毒虐亦不得不勉強服從屠戮之慘天日爲昏陝省距城二十餘里有長安縣屬之六村堡者著名富足居民萬餘避難之民附之又添數千餘口牆厚濠寬可資守禦逆回羨之招集匪眾數萬層層圍困晝夜環攻又以所掠車輛積繞堡牆不放一線之鬆堡民力守數日火藥已盡僅以沸湯米粥向外澆潑省城聞之當卽派解軍火交馬德昭於二十三日繞道送至該堡馬德昭亦恐派弁有失自率馬步親護之至則被逆回圍住省城得信卽飛派

隊伍馳往接應始得解圍回營馬德昭救民情切復於二十四日夜督率本營馬步及孔廣順所撥馬隊闔不敏步隊再往援剿時防潼關之協領圖克唐阿及儘先協領訥勒和春奉調回省二人皆驍勇善戰派令隨同進剿二十五日寅刻行至楊家城距六村數里該匪已糾黨前來迎拒鏖戰逾時斃匪不少該匪見圖克唐阿驍勇以數千人圍之左衝右突賊輒隨之身中矛傷猶能格鬪忽一賊刺中其腹顛於馬下羣匪叢刺登時殞命訥勒和春亦被圍汪潮海馬德昭馬德俊分路衝入救之汪潮海左腿中矛幸訥勒和春潰圍而出

該匪馬隊如山壓下勢甚猖獗訥勒和春大怒翻身殺入力竭陣亡匪眾紛紛圍逼官軍退至數里外孟柏林連開數礮匪眾始退查點我軍將弁除圖訥外尙有佐領德盛額防禦法福哩倭仁阿驍騎校色勒善雲騎尉珠爾松額五名馬步兵勇二百餘人六村堡亦於是晚被賊攻破堡中屠戮殆盡自是民間無完堡矣而成明所領京兵雖錄奉

嚴旨咨催尙駐蒲州之嚴家莊而以不時撥兵過河使賊疲於奔命以待多雷各軍此時居民逃徙食草俱無軍食深爲可慮等情咨覆由是同州官民益失所望瑛瑩等奏奉

上諭嚴催並責多隆阿雷正綰迅速入關著勝保籌撥馬步
三四千名派得力員弁管帶趕緊入關歸成明調度分投援
剿毋稍延誤並著瑛緊查明張芾下落具奏維時藍逆大股
由西鄉竄近漢江直抵洋縣知縣汪漣率兵勇固守莠民乘
間開城遂致失守升任四川藩司毛震壽所部楊光澍等川
軍進撲賊巢朱啞二逆伏誅鄧逆亦有傷亡之說獨回匪猖
狂日甚援兵不至徒抱殷憂而跟隨張芾出城之回丁馬錫
祿自賊中逃回省城稟稱張芾等於五月十一日在油坊街
被回匪任老五馬玉良馬燕膺馬進昌于快三等擁至倉頭

地方張芾繆樹本蔣若訥同在糧食鋪內住下回紳馬百齡
另住一處張芾之姪孫俊秀張濤並跟隨人等及帶去團勇
二十餘人又另住一處各不見面回匪於十二日先將張濤
並跟隨防勇殺死馬錫祿原係回教故能獲免至十三日午
刻逆首任老五等將張芾繆樹本蔣若訥三人擁至河灘同
時遇害張芾罵不絕日被害尤慘等情回匪之甘心叛逆不
可理論如此經瑛榮等具奏奉

旨候補直隸州知州臨潼縣知縣繆樹本照知府例山西候
補知縣紳士蔣若訥照同知例俊秀張濤照縣丞例前都察

院副都御史張芾照侍郎例從優

賜卹伊子二品蔭生張師劬著賞給舉人准其一體會試並著於省城建立張芾專祠繆樹本等准其一併附祀以慰忠魂此八月初旬事也回紳馬百齡之叔馬應麟亦呈稱家人王升逃回報稱馬百齡被回匪移至普陀原聞張芾等被害亦罵回被殺已奏請照道員例

賜卹矣旣而馬百齡無恙回城復行奏請撤銷回惡滔天凶殘已極幸雷正綰已抵商州而督辦大臣勝保亦奏報剋日馳抵潼關不意成明統帶京兵於八月初一日進剿同州之

回接仗失利移軍朝邑僅畱縣丞張寶禧一軍駐紮同州又探聞南陽竄賊仍在內鄉縣浙川廳等處盤踞遊弋意在復窺陝境有句結回逆之勢勝保因奏請

勅下多隆阿一軍仍遵前旨以全力勦辦此股粵匪俾大軍不致有牽掣之虞並請

勅下山西撫臣英桂於蒲州一帶迅速添兵防勦以固晉疆而咨雷正綰專顧商雒相機由盧氏鎮平一帶節節兜勦以遏南陽竄賊之路並飭成祿馬升王致祥等陸續抵關整頓軍實先固要隘八月初十日勝保全軍由潼關西進察看自

渭南至西安如梁天坡臨口灞橋輿橋等處回匪踞爲巢穴
聲息相通因督軍兼程而行所過地方荒煙蔓草無從覓食
井中皆有積屍求水亦不可得飢軍日馳百餘里奏牘所言
洵可想見十三日卯刻自渭南啓行探聞渭北倉頭回匪潛
渡馬賊二三千名意圖鈔截後路軍械遂預派副將劉景芳
吉林馬隊協領高福分帶兵勇在渭河以西作爲殿軍埋伏
以備賊果沿河尾追而來並在尖路山溝之上分股鈔襲經
劉景芳高福等擊退而該逆實先於初九日圍撲臨潼縣城
知縣朱百珏督率團勇登陴固守迭放連環鎗礮匪不敢逼

退踞附城數里民堡十一日記名總兵成祿太原鎮總兵馬陞已革知府廖慶謀等率先鋒軍到臨潼該逆勾結渭北十三村及灞橋一帶股匪眾約二萬餘膽敢撻鋒來撲經成祿等擊退直壓至三輔等處賊巢正欲乘勢攻擊詎渭北逆眾馬隊紛來鈔襲我軍之後成祿等見勢收隊該匪層層兜裹直至縣城正相持間適勝保大軍趕到叅將王永勝文林都司董有富帶定威禧順三營步隊由北路樹林向西兜擊眾將士大呼陷陣一齊掩殺匪勢不支向西敗退追勦二十餘里計斃匪千餘生擒回目馬友德等二十五名正法獲牲畜

軍械無算全軍卽於臨潼安營相機進剿其先派援朝邑之遊擊王永慶馬步各軍據報亦已獲捷十六日回匪圖收前戰之屍復糾臨口至臨潼灞橋三輔一帶回眾前來再圖抗拒派王致祥李高啓李德正率步隊伏臨潼山北烏勒興阿宋景詩馬鳳全等以馬隊分三路接應俟其銳氣旣竭再行進戰相持旣久賊果分五股奮力衝突我軍堅持不動而驚之以火箭賊眾驚亂官軍乘之遂獲大捷臨口大股由東北來援又經馬隊截擊賊復大敗向老巢狂奔是日共斃賊數百名潼渭之回少挫據報南陽竄匪尙踞鎮平皖匪扮作官

軍在襄郟一帶焚掠張洛刑一股突然西竄多隆阿由南陽
前進奉

旨探蹤迎擊南陽竄匪俾不得西竄陝境會官文奏請以何
紹彩駐紮荆紫關屏蔽三省全國琛各軍畱守蘄黃皆不得
入陝逆回凶醜愈熾渭北一帶蟻聚蜂屯復以大股圍攻涇
陽百計爬越暗挖地道官民竭力守禦被地雷轟塌城牆二
丈有餘經知縣莫元賡暨在籍候補京堂聶灃等督率兵勇
堵擊幸獲保全而賊數日增外援無望城中日形困乏亦難
久守鳳翔一帶回匪紛紛繼起漢民慘遭焚殺其地毗連甘

境甘回紛至鳳翔府久被圍攻僅恃紳民聚團防守漢南川
匪未靖又添郭刀乃一股由川直驅而來竄入平利縣境團
紳庶吉士邢景周守備陳珏武生朱揚鍾勦匪陣亡毛震壽
於洋縣勦辦藍逆偵得該逆趕造擋牌呂公車藤牌等器聲
言東竄知其意在出撲二十四日四更飭各營分路埋伏城
中果出賊二萬餘人分股向大營而來鏖戰至午未之交大
獲全勝斃賊千餘名生擒二百餘名拔出難民千餘該逆自
陷渭南華州以來至是始受微創而省城薪糧久乏復派隊
往草店搬運遭回匪迭次搶撲鏖戰至竟日之久傷亡兵勇

三百餘人幸多隆阿已抵商南其先派之雷正綰進至省城
穆圖善亦至商州人心略定無何姜台凌大股捻匪由宜陽
永甯竄至陝州山西復有調多隆阿之請漢南粵捻數萬逼
近浙川廳並擾及荆紫關一帶石達開餘黨又由川省竄擾
竹山竹谿等縣粵捻大股又欲由荆紫關回竄鄖陽句結二
竹逆匪進攻興安府城再聯絡漢中之賊直擣西安逆首陳
得才大股已繞過浙川廳向荆紫關狂竄多隆阿因兵力不
敷擬調前所畱廬郡四營取道隨州棗陽來會而檄雷正綰
穆圖善率所部折回商南荆紫關陝西軍務僅恃勝保一軍

矣幸

聖明垂念西陲著駱秉章派軍赴漢南助勦郭刀刀等匪陝州之捻則責之豫撫鄭元善並令何紹彩與多隆阿會合夾擊而命雷正綰仍留西安爲勝保聲援勝保自十五十六連日全勝後遂由臨潼督師前進抵斜口鎮回匪分股迎撲當經指揮後隊分兩路包鈔更翻輪戰賊眾奔潰官軍追殺二十餘里所斃不計其數生擒三十餘名逆向渭北狂奔大堡三輔行者橋等處老巢悉行洗蕩灞橋一帶賊巢亦聞風逃遁官軍直抵西安省城城圍立解十九日會銜具奏奉

旨嘉予命勝保督辦陝甘軍務提督雷正綰幫辦陝甘軍務
所有甘肅毗連陝西一帶地方應行防勦事宜並著勝保妥
爲辦理在事出力員弁兵勇著勝保擇尤保奏毋許冒濫欽
此計西安被圍已歷三月至此如解倒懸官軍稍爲休息仍
令分路掃蕩省城附近賊巢遂將灞橋杜曲景陽城東西長
條村等處巢穴一律攻燬六堡寨一帶以次肅清蓋兵威震
懾心膽俱寒偏師所指無不立破也於是籌攻咸陽之馬家
堡及蘇家溝以進解涇陽鳳翔之圍忽接成明稟稱仍有大
股回逆撲犯朝邑雖經登時擊走難保不復圖竄擾等語經

勝保據情具奏奉

上諭同朝等處與晉省一河之隔該大臣仍將同州一路布置周妥自東而西與雷正綰諸軍兩面夾擊將陝事及早了結即可分出兵力分辦髮捻於大局實有裨益等因時雷正綰成祿等軍攻勦馬家堡之賊稟稱大小已十餘戰所殲之賊實有數千而賊仍不見少間有回民數人在馬前哭訴屈抑求爲轉稟及責其頭目來營聽訊又復裹足不前因再刊解散脅從告示隨營張貼亦不得已之苦心非不知回情之詐也乃辨回甫有端倪而迭據探報髮逆分竄商南試馬溝

清油河等處姜台凌大股捻匪又竄雒南三寺坡三要司一帶商州軍情又形吃重因飛飭續調到關之副都統祥恩副將王佐臣叅將梁仕紳遊擊全宗張占標守備丁文學等各帶所部馬步前往堵截旋據雒南縣稟報捻匪聞官軍將至已於閏八月初四日東竄盧氏縣境並據商州及商南縣稟報初二等日多隆阿調回荆紫關之兵與副都統溫德勒克西副將陶茂林等軍會合夾攻將武關外河灘盤踞之髮逆擊退現已竄至腰仗溝因將恩祥等軍撤回省城勝保遂於十四日親赴咸陽相機調度回匪知統帥親至必將猛攻

連日添糾高陵涇陽沙河各巢悍賊齊至咸陽城北併力死
守十八日五更申明約束整齊隊伍卽於是日黎明進隊雷
正縮率諸軍由左成祿帶各營由右烏勒興阿宋景詩帶馬
隊接應距賊巢里許該逆糾集死黨二萬餘列隊抗拒雷正
縮成祿督隊直前迎擊該逆不動分撥悍黨鈔官軍後路官
軍三面齊進直擣中堅鏖戰四時之久馬隊奮不顧身分兩
翼壓下斬白帽黃馬掛賊目多名馬賊先敗馬隊追殺無算
步隊乘勢盪決而前匪眾奔潰我軍躡至巢根敗賊亂竄入
巢守巢之賊登陴死拒鎗礮如雨官軍逼巢施放噴筒火箭

並用火彈拋入牆內人聲鼎沸我軍乘勢一擁而上斃守牆賊數百名當將張家堡藥王洞海家村卞家村四處賊巢同時攻破計斃賊三千餘名大小頭目十餘名生擒百數十名獲大礮十一尊軍械輜重米糧火藥無算附近賊村一律焚燬詎該逆於十九二十等日糾添東北大股五六千名前來報復勢極猖獗我軍馬步大隊迎頭截擊復添營總高福都司馬鳳全已革知府德林等帶領吉林黑龍江馬隊助剿雷正綰親自領隊向前馬隊分兩路包鈔而進步隊由中路截殺該逆腹背受敵登時向東北潰逃我軍追奔三十餘里經

過賊巢數處斃馬賊五六百名步賊二千餘名獲輜重騾馬極多申刻收隊忽據甯陝廳同知龔衡瀚稟報川匪郭刀刀由竹谿竄陷博坪後分股竄入甯陝之火地嶺帶勇官劉大慶接仗失利退守廳城勝保因回省籌兵往剿而鳳翔隴州亦同時並警毛震壽一軍祇能專顧漢中洋縣勢難抽撥及奏

調何紹彩一軍未蒙

俞允遂派副將王佐臣管帶馬步各隊追剿川匪郭刀刀九月初六日在盤屋屬之黑水峪痛加截擊殲斃幾盡復率隊

跟蹤窮追殘敗餘匪梟河西竄我軍搭造浮橋初七日過河
追至蕭家村地方適差赴盩厔之已革副將施鵬督同武舉
趙乾甲軍功馬得昌廩生馬熙等帶領民團二千餘人隨同
助剿該逆晝夜奔竄王佐臣由清華嶺邢家寨等處沿途斬
殺初九日至郿縣之高店鎮復悉力兜剿斬馘不少餘匪約
賸千餘零星四散已入寶雞鳳縣山中欲由小路回川卽飛
咨川督並飭毛震壽分兵截剿而檄王佐臣等軍星夜馳回
咸陽回匪因我軍抽撥南剿復向東路大股馬隊步隊約三
四萬意圖報復悉聚馬家堡巢內時出肆擾雷正綰督兵截

擊雖迭次獲捷究竟兵力太單致調王佐臣及黑龍江誠順馬隊馳回咸陽一面添派總兵馬陞副將譚玉龍及靖安營馬步各隊於九月十一日親督前往復抵咸陽會同雷正綰悉銳進攻偵回逆大股踞畢郢原卽漢時細柳營故址列隊原上綿亘二十餘里我軍分路而進用鎗礮逼住賊陣而以馬隊兩翼包鈔逆回恃眾拒戰三時之久已斃千餘賊陣稍卻我軍乘之援賊大敗次日連夜搭造浮橋十五日五鼓進攻誓以必克以馬步一半擊援匪一半攻巢雷正綰親領馬步各軍於馬家堡東南北三面分列原上擊來援之賊復派

馬陞劉景芳等馬步各軍於馬家堡西南北三面擊巢內踞
守之賊馬家堡匪眾憑牆開礮援賊由涇陽蘇家溝分路而
來踞普馬寨任家嘴馬王厰等處分股而出其眾過萬凶悍
異常雷正綰以鎗礮制勝賊旗紛倒馬賊復往來衝突烏勒
興阿宋景詩劉效忠等馬隊分兩路迎擊約一時許將馬賊
壓下雷正綰令各軍吶喊短兵衝入賊勢不支守巢逆眾見
援匪敗退固守不出馬陞等砍開鹿柵撲至濠邊四面豎立
雲梯猿攀蟻附而上於鎗礮矢石中用火箭噴筒齊放登時
火光四起賊眾大亂乘勢攻入巷戰逾時賊屍堆積越牆奪

路之賊又被官兵追殺無遺立將馬家堡賊巢攻克雷正綰見天時尙早復飭各隊向東埽蕩遂將普馬寨遮馬寨任家嘴冶家村馬王厰穆家船等處賊巢同時攻燬是日共破巢七座斃賊萬餘生擒百餘名獲大車千餘輛騾馬無數大礮二十餘尊鎗械旗幟火藥衣物米糧不可數計西路之咽喉始通可以進攻蘇家溝援救涇陽矣雷正綰正擬移營前進詎回逆大股糾約倉頭等處之賊乘我軍安營未定馬步萬餘由白起營迤北而至四面圍攻雷正綰督成祿諸軍列隊開鎗斃賊不少逆眾抵死不逃圍我前軍勝保因飭烏勒興

阿宋景詩高福永慶等率馬隊兜剿並派叅將王永勝文林都司董有富等領親軍前往策應遊擊李高啓副將譚玉龍亦由後路兜擊賊始敗退追殺十餘里賊向長陀灣蘇家溝逸去是晚探知賊未遠遁仍圖搶踞白起營阻我進兵之路遂挑馬隊於十七日四鼓出其不意繞至長陀灣賊巢之後吶喊而進該逆赤身奪路而走其眾盡殲全巢軍械馬匹盡獲以歸正擬大舉進攻蘇家溝而涇陽糧盡請援遂令提督成祿帶領副將譚玉龍叅將趙德正遊擊項上達守備徐烈松等步隊星夜馳赴三原鈔出賊後又派副都統烏勒興阿

帶領叅將劉祺遊擊馬德麟守備劉效忠軍功雷鳳鳴等徑
至涇陽解圍馬上分帶米麥以濟城中軍食令雷正綰駐咸
陽而自回省城與瑛榮等會籌餉項旋據成明及同州知府
呂儁孫朝邑知縣托克紳稟報十三四兩日倉頭之賊自咸
陽敗回旬結王閣村之賊在平陽堡盤踞經成明王永慶敗
之於十里鋪賊復糾合大股攻撲朝邑東關復經成明王永
慶擊敗繞至西關焚掠官軍追至賊始退向數里外盤踞蓋
皆咸陽失巢之賊也勝保念西路稍鬆宜籌東路遂酌抽高
福宋景詩王永慶等馬隊及王致祥李高啓所帶禧順及定

成前右營並親軍步隊擬於二十九日親率往華陰潼關一帶相機調度忽據潼商道蔣徵陶稟稱署潼關協副將哈連陞統帶兵勇原在華陰縣屬之岳鎮駐紮本月十三日奉檄移至敷水鎮遇馬步回匪三百餘人由西北而來皆下馬跪道迎接哈連陞僅帶數人騎馬前進吩咐不料各賊突起蜂擁哈連陞而去現未回營等語十六日復據該營遊擊陳連升稟稱回匪於十四日大隊紛至將敷水鎮圍住陳連升率兵勇開放鎗礮自卯至酉火藥鉛丸俱盡該匪由西南衝入並分股旁鈔眾寡不敵退至華陰縣城等語勝保因冒雨趨

程前往潼關途次接奉

諭旨責令親往同朝十月初二日抵潼關探報回匪圍攻朝
邑附城大小寨多被攻破又據成明稟報被圍十一晝夜至
二十六日叅將王永慶帶隊出西門擊勦賊以全力抗拒王
永慶與守備張起龍衝入賊陣手刃多名成明急派馬隊由
東門鈔出來擊大獲全勝追殺十餘里共斃賊千餘名等語
而查點潼關各軍自敷水戰後兵勇軍械損失已多因調副
將陳義譚玉龍二營移至潼關時多隆阿尙留豫楚之交與
捻匪十餘萬眾相持未能赴陝勝保因奏請

諭旨准苗練入關助剿適陝甘總督熙麟奉

命赴任抵關因道路未通亦經奏明暫任潼關俟探訪明確再行取道赴甘奉

上諭同朝回匪雖退難保不去而復來勝保旣畱熙麟駐紮潼關卽可分身前往擊賊著卽督飭所部親赴同州無令賊騎渡河擾及晉疆熙麟現抵潼關卽著暫畱駐紮俟穆騰阿到後迅赴陝甘總督新任回匪現有西竄之勢甘省尙稱完善尤當預爲籌畫馬德昭尙未赴任著熙麟於起程時酌量情形如可將馬德昭調回卽同赴甘妥商布置欽此於苗練

助剿一節則未之及可知

聖衷自有權衡矣先是賊圍攻同朝不克六七月間分股渡洛河至澄城縣南鄉焚掠繼又由澄城擾及邵陽縣西南鄉署縣事同知方鼎錄本帶練勇駐縣南與同朝交界之鐵鑿山督運糧草接濟府城聞賊將及境帶勇折回露井鎮扼紮七月十五日回逆撲入境內督隊迎擊於北黨村鎗斃驕馬賊目一名該逆膽落旋卽退竄追剿至澄境而返料知回逆必將集大股復來傳令西南鄉各村紳民將老弱婦女移送金水溝北寄居僅畱精壯勇丁練團守村堡日督團紳益加

訓練回逆屢次窺伺不敢上竄至十月初一日探知方丞回城行祀孤禮兼續籌冬糧製辦寒衣賊眾乃復渡洛河乘夜上竄圍攻北黨村四面縱火適值西南風大作該逆旋即竄擾露井鎮方丞所留幕友同紳士練目分門守禦該逆鎗礮順風上擊傷紳士及練目練勇多名我軍立風雪中鎗礮下擊反不得力該逆由鎮後搶入放火鎮遂失守幕友經團勇保護間道北趨時方丞得信帶練勇馳援中途遇幕友知不及救遂折回縣南五里之金水溝扼險固守一面延紳士編修車順軌齎稟渡黃河赴潼關請勝帥派隊救援縣城初十

日勝保得報卽派駐防朝邑之總兵王永慶帶步隊千名同吉林營總高福黑龍江營總永慶各帶馬隊五百名及投誠叅將宋景詩長鎗隊一千名由朝邑北路沿河上鐵鑷山過金水溝西勦約令方丞帶練勇由北面壓下兩路進擊十四日黎明方丞與邑紳編修王鳳翔遊擊王某分三路督勇下擊該逆探知四路兵勇齊進知不可禦遂於露井鎮一帶縱火焚燒屋宇向西南奔竄逮兵勇駛至僅於鐵鑷山下搜獲落後回逆數名斬之探知大股逆眾已過洛河方丞遂與營總高福永慶等折回露井鎮安撫難民次日聞大帥勝保已

於十三日偕西安將軍穆騰阿由潼關馳抵同州時回匪折
回老巢仍復分股滋擾蒲城白水以圖牽制官軍連日探明
形勢卽於二十五日五鼓先派副都統常海高福及宋景詩
帶領馬隊於新橋口過河進剿並派已革知府袁懷忠叅將
王永發遊擊李高啓都司李得勝從九何泰來等步隊列陣
楊家河以爲接應馬隊過河卽遇賊探數十人見官軍卽行
返走馬隊追至車村將賊營平燬斃賊數百餘悉向王閣村
羌白鎮逃竄糾合匪眾七八千人拚命來撲經官軍擊敗斃
數百名當將王閣村附近回莊焚燬數處直至賊寨濠邊該

逆鎗礮甚密馬隊間有傷亡乃收隊至新橋口屯紮詎該逆
跟踪而至因傳令步隊嚴陣以待將馬隊撤回里許誘令過
河該逆分三路梟水而來將軍穆騰阿帶黑龍江馬隊迎其
左祥恩帶吉林馬隊迎其右迨該逆大股撲近馬步齊開連
環鎗礮盪挾而前逆眾敗走馬隊張兩翼跟踪包鈔而下該
逆中鎗帶箭投河淹斃者難以數計追十餘里而回二十六
日該逆復糾大股分兩路而來馬步約二萬有奇我軍馬步
迎擊計三時之久至酉刻始退王永慶受傷甚重兵勇亦有
傷亡因飭各營由同郡西南相地屯紮滾營而進該逆恐官

軍擣其老巢復糾集王閣村羌白鎮倉頭潘驛各鎮回匪撲
過洛河馬步數千將官軍所紮之營層層圍裹我軍鎗礮連
轟始退二十八二十九等日亦然十一月初一日黎明賊乘
大風由西北而來官軍禦之少卻忽西南大股紛至欲擾後
路官軍極力擊退擒斬百餘名初二日平明風雪交加方傳
令添築營壘不意該逆冒雪而來於七里鋪一帶更番很鬪
官軍馬步迭進斃賊甚多初三日卯刻傾巢而來眾約三萬
分爲五股直撲李高啓陳振清何泰來張寶禧各營官軍馬
步亦分五路迎戰該逆撲近濠邊官軍先開連環鎗礮繼以

刀矛噴筒火彈賊勢稍卻忽見執紅旗賊目數人伏行而進賊復回身轉鬪兇悍更甚各營復用鎗礮密轟其銳少挫步隊以刀矛衝殺馬隊分兩路策應賊見傷亡太多始行退遁自午至申已歷三時陣斬紅衣賊目二名逆黨二千餘名獲騾馬鎗械無數蓋回亂始於王閣村故兇悍亦過於他處幸勝保於抵同後入戰八捷軍威稍振據西路各州縣稟報蘇家溝逆回經雷軍擊敗後沿途團勇截殺甚多餘眾悉竄鳳翔成祿及烏勒興阿等赴涇陽之師至三原獲捷十月初三日進攻永樂店之賊復獲小捷十六日馳至涇陽平賊壘數

處該逆糾合永樂店賊眾萬餘來撲官軍幾爲所困幸烏勒興阿馬隊衝壓賊知不能取勝分竄回巢自是涇陽之圍稍鬆惟咸陽被賊牽制不能卽往會勦耳藍逆竄踞洋縣自九月二十九日陝西藩司毛震壽飭陳天柱易佩紳督隊進勦三十日冒霧潛上牛頭山獲捷追至東城欲奪門而入未果易佩紳阻灤水河誘之賊果來撲川楚陝各軍及署洋縣知縣賈敬修縣丞陳爾莠等團勇齊奮遂獲大捷藍逆墮馬擒之不及斬紅衣黃巾賊目多名賊黨死者千計拔出難民數百名賊自此固守不出官軍兵力太單未能圍攻川匪曹燦

章由五里壩竄石泉之筒車壩毛震壽派守備馬源盛往剿未能得力郭刀刀殘股由徽縣西竄橫川毛震壽派兵追擊匪眾兵單亦未撲滅同州回逆自十一月初旬敗後每日在距城十五里韓村一帶列隊抗拒以圖牽制而以大股由北面繞而之東出沒不時使我軍多備而分其力究未敢直前來犯也會山西巡撫英桂咨報續籌餉銀一萬兩委員起解在途計十五日可以到營比派高福領馬隊往迎護行至八里鋪猝遇回逆大股迫大營聞信續派常海宋景詩繼往鏖戰終宵眾寡不敵戰雖未挫而銀已不可復得委員亦不知

下落矣勝帥向不善籌餉陝庫空虛營中匱乏已久又復失此巨款僅恃紳民捐助以紓目前時官軍方由同州西關至楊家河步步安營該逆先以馬賊數人聲稱求撫暗糾咸陽蘇家溝塔下沙河高陵等處之賊前來援救十一日黎明我兵正在出隊該逆大股齊至由西北西南徑攻李高啓張寶禧營壘而分股撲陳振清范得勝兩營官軍馬步層層策應自卯至午已歷四時始克擊退十二日該逆復糾馬步萬餘由北村過河繞出郡城之北冀截郃陽澄城兩縣所捐糧運官軍分兵截擊該逆恃其人眾分股繞我軍之後左翼馬隊

少挫逆遂緊逼東關官軍各營四集鼓勇力戰鎗礮連環不
斷賊不能當紛紛向西奔潰而是月初五日烏勒興阿成祿
馬步各軍並三原練勇進剿涇陽之賊初獲小勝繼因永樂
店大股援賊數千分三股而來官軍以寡敵眾仍未能十分
痛剿追至永樂店賊巢進攻兩時之久天晚收隊訊據擒賊
供稱王閣村賊首因被大軍屢挫已於鳳翔旬取馬步四千
有餘前赴同州等語適記名總兵黃得魁帶領新募勁旅一
千八百名由豫省至遂於十八十九等日進攻東西連村該
匪數逾萬眾揚塵蔽日黃得魁奮勇當先帶領參將袁懷德

遊擊馬大祥都司鄭永泰謝得勝等新隊向前進擊各營步
隊繼之馬隊分左右包鈔來往約數十回黃得魁大呼陷陣
手刃執旗回目回眾搶屍陣亂我軍乘勢一擁而入賊勢不
支遁入東西連村我軍分路闖入村口賊膽已寒不敢固拒
立將東西連村賊營攻破所獲賊物極多斃賊千餘名馬德
昭營中盤獲奸細供稱日內有聚眾攻省城之舉城防因之
復緊同州大營方擬乘勝擣巢兵力未可遽分不能不望援
軍之速至矣幸多隆阿追勦髮捻所向皆捷楚豫軍務稍鬆
朝廷催令人關遂星夜倍道而行於十一月二十七日馳抵

同州駐軍城外察看情形回逆時逼城下阻遏糧道四鄉盡成焦土城中束手待斃卽於二十八日出隊將東西韓村賊營八座悉數焚燬十二月初一日親往韓村西南察看地勢初二日傳令穆圖善統率傅開德劉連升關行莊桂學高余文科張洪元王萬年劉定邦徐明德等九營步隊前往洛河北岸修壘築營派陶茂林管帶茂字營並統領譚仁芳周滿升朱希廣趙書聲蕭河清各營步隊並副都統溫德勒克西常星阿統領福壽之黑龍江二起富平阿之吉林二起吉勒忠阿之吉林六起西蒙克西克之黑龍江八起雙福之吉林

八起打牲烏拉富魁之吉林二起等馬隊列陣以護自率姜玉順開化營藍斯明飛虎右營孟宗福親兵營以出遙見對河賊營林立於是派陶茂林三營從下游渡河誘其離巢賊果以全力注之派朱希廣二營暗伏過河乘間直撲登時火光四起攻破賊營立將漢民村莊三處奪回賊遂敗走我軍追殺五六里許而四路援賊復至鏖戰兩時之久念前路太單復令穆圖善九營畱五成築營而以五成出隊過河併力進剿賊遂豕突狼奔我軍縱橫截殺回逆屍橫遍野直至二更後收隊過河時穆圖善九營築壘已成各營亦移紮河邊

聯絡聲勢官軍僅營官徐明德勇往直前力竭陣亡奏請
賜卹建祠均蒙

俞允令雷正綰專力西路而以成祿所帶之二千名歸其調
遣大軍專辦東路迅攻王閣村羌白鎮老巢再由華渭進逼
西安旋奏請催穆騰阿速赴新任漢中一帶逆匪則飛咨川
省撥兵助剿而飭毛震壽妥爲籌辦如果甘省稍鬆卽令馬
德昭前往漢中布置旣定一面整頓同州諸軍蓋多隆阿已
先奉

旨督辦陝甘軍務接統勝保諸軍抵同後卽接受關防而勝

保則交卸回京也據勝保咨送各營數目共一萬二百餘名
點驗不過十分之七其中良莠不齊如叅將宋景詩之靖東
營守備松瑞之禧順營守備雷鳳鳴等之馬隊誠順等營王
永慶之慶凱營遊擊張得祿之親軍小紅旗都司卓午臣之
親軍大紅旗皆勝保所收之叛卒降眾並副都統常海烏勒
興阿所帶之吉林黑龍江馬隊分別錄用此外各營悉心挑
選共留二千一百人分爲三營另行委員管帶其餘二千三
百二十八名收械給費遣散歸農乃宋景詩前稱願歸雷正
綰調遣已給札遣往三原忽據邵陽縣方丞鼎錄稟報宋景

詩於初三日行至該縣露井地方各勇思家念切卽改路由東北而去時勝保尙因病畱邵就醫聞信傳至寓所曉以大義宋景詩長跪號泣固執前說多隆阿卽派提督成明副都統金順督帶馬步往邵陽韓城一帶查辦一面飛咨晉撫英桂及暫住蒲州府防河之西安副都統德興阿預爲防備嗣據邵陽韓城等縣稟報宋景詩等於初五日在交界河口搶劫炭船由白馬渡過河沿途買食尙無滋擾情事等語宋景詩過河後卽飛馳回山東原籍因奏請勅下山東撫臣設法處置免貽後患其餘均歸節制悉遵約

東時涇陽縣城於十二月初三日失守文武各官不知下落據所獲奸細供稱該逆因力不能支飛調西路之賊齊來相助故賊衰而復振緣自大荔羌白鎮王閣村起至渭南之喬午莊孝義鎮倉頭鎮連接數十里均係賊巢數月以來未受懲創彼此聯絡毫無顧忌也雷正綰成祿奉檄解圍未能得手咎有應得請

旨交部議處以示薄懲旋於十五日雷正綰等收復涇陽縣城奉

上諭雷正綰處分著加恩寬免成祿改爲降二級調用現在

平利股匪甚爲猖獗馬德昭著卽帶兵由平利一帶進剿俟此股逆匪擊退再行赴甘省堵剿熙麟著仍遵前旨先行帶同黃得魁繞道赴任督同恩麟等妥爲辦理等因旣而鳳翔告急日緊瑛榮前派盧又熊往援被漢中士民挽留不果復派副將王夢麟前往而以其先所部歸慶瑞接帶因慶瑞籍隸陝西卽令辦理團練圍攻鳳翔之回匪旁擾隴州知州邵輔勦回陣亡馬德昭料理南行復經西安紳士稟請奏畱仍駐省城協同防守多隆阿於初二日大捷後初四日復獲全勝陣斬並落河之賊數千名同州之賊膽已寒自此各軍每

日四更出隊一面移營一面分兵進剿各有斬獲回技愈窮迭次上稟求撫經多隆阿嚴斥不許至二十八日前營逼近王閣村老巢僅四里矣二十九日賊復令從前投賊之回弁鮮玉農哈連陞遞稟乞降亦經厲詞批斥除日馬步四更出隊鏖戰竟日已斃千餘賊天晚收隊賊復跟追我軍誘近濠邊賊以全隊來撲營中開放大礮賊眾如山而倒復派隊繞出賊後夾道中埋伏逆眾敗歸至夾道伏兵四起追兵緊躡各路吶喊之聲震天賊心慌亂腹背受敵屍橫遍地加以昏夜自相踐踏死者實難數計次日元旦畧爲休息初二日四

更出隊探報王閣村外阻阱設械挖濠修牆以圖固守傳令各軍一鼓直前賊甫交戰卽敗各軍沿路追殺平濠毀牆而進將近老巢賊以數萬死拒屹立不動相持至日暮方回查王閣村距羌白鎮五里其間連營七八座初三日四更出隊接仗多時賊力不支遂棄營而遁立將賊營全燬雷正綰克復涇陽後以成祿駐守糧草均由三原護送回匪輒圖截奪迭經迎勦幸而獲捷究因互相牽綴困於一隅致馬步各營不能抽撥時興安郡城被髮逆陳得才圍困方咨請川楚各總督就近撥兵會勦漢中一路藍逆盤踞已久甯陝一路復

有川匪曹逆竄入漢陰廳境此時陝省軍務處處吃緊而回
匪之蔓延尤劇近又謀攻盩厔鄠縣兩城以斷省城糧路多
隆阿飛咨雷正綰調四營駐紮咸陽而多隆阿所部多患時
疫至十八九日始漸次痊愈急督進攻王閣村羌白鎮日有
斬獲特逆眾太多未能速克而穆圖善常星阿均中鎗傷醫
治須時至二十九日多隆阿親督各軍分道並進四面設伏
兩巢之賊悉出抗拒約計四萬有奇官軍誘令前進伏起夾
擊僅斃二千餘名二月初一日進逼羌白賊巢將濠溝平毀
嚴申軍令各軍奮勇梯縵而登賊眾瓦解立破其巢卽分兵

直擣王閣村賊懾於軍威不敢出戰各軍四路夾攻直入其
巢賊屍枕藉餘賊奔竄獲軍械車輛騾馬無算計斃賊目十
四名黨眾一萬有奇蓋積威有素莫能禦也事聞各將領員
弁均蒙

嘉獎晉秩陣亡者

賜卹如例值省城賊氛日緊糧道不通瑛榮穆騰阿奏請
飭雷正綰進省雷正綰適患時疫奉

旨在三原加意調攝而回匪竟於正月二十三日馬步數千
進撲省城馬德昭督兵出擊城上連開大礮始行退去猶高

聲詐稱投降二十五日復糾馬步數千由東北正北正東三路進逼經總兵福兆出正東守備陳明昇千總李廣進出東北馬德昭自出正北各路往來衝突城上連開大礮復用新製馬礮轟擊斃黃衣賊目一名餘賊無算協領德堃率領馬隊出西門接應賊始退竄方接仗時竟敢謬稱說和其狂悖無忌一至如此而甘肅土匪已經陝回煽誘各處騷動平涼城漢回互殺回匪已踞瓦亭大道固原州城失陷奉旨調延綏官兵並阿拉善王東西兩旗蒙兵星速赴固熙麟准暫駐慶陽正可督催各處之兵相機辦理其張家川蓮花

城賊巢旣據分飭道員林之望進攻隆德等處臬司楊炳銓
前往駐紮均著飭令妥籌防剿甯陝解圍川匪曹逆一股猶
復分竄盩鄠一帶雷正綰等專辦西路之賊著卽妥籌兼顧
臨潼縣雷防之驍騎校張德斌爲回匪假稱苗練賺城情尤
可惡據瑛榮等奏業已正法梟示究係何處旗員並著查明
具奏等因時省城防守方嚴鳳翔之圍亦急因催王夢麟趕
緊設法前往一面咨請雷正綰分撥數營赴鳳將所奉鳳翔
紳士信函獎勵官紳

上諭錄行該府縣宣諭告以大兵卽日可至以堅防守之心

省城附近皆成賊巢四處游弋經馬德昭不時截殺糧路仍不能通曹逆尙在郿縣一帶僅張在德二營分防隘口藍田被回匪竄擾意圖斷文報而絕軍餉幸陳德隆張志心新募楚勇一千三百名及署副都統伊昌阿均到藍田十九日接仗獲捷卽令幫同防守據報石泉漢陰逆匪經通判金鑑守禦復分股竄距漢中府城三十里與藍大順句通毛震壽駐紮城固兵力太單不敷調遣奉

諭著官文飭令李雲麟會同梁作楫率郿西二竹之兵越境助剿並著駱秉章速飭周達武星馳赴陝會剿飭多隆阿兼

顧省城而多隆阿方更番移營西安副都統德興阿自蒲州率馬步二千名過河駐紮三河口值多隆阿遍體生瘡不能乘騎督陣連日出隊雖迭有擒斬而總兵王萬年副將傅開德均受鎗傷因念兼顧責重飭總兵曹克忠帶烏拉二起馬隊富魁前往省城將瑛榮舊募之楚勇四營新募三營交令統帶責令駐紮長安鄠縣交界之地先通糧路次圖進剿既而賊援踵至多隆阿不能養病遂於三月十七日親往相度見賊之長濠自龐谷莊東至沙窩北至雷化西至喬午鎮綿亘三十餘里東北兩面又有濠溝兩道木城一道西面濠溝

一道十八十九等日移營進逼二十一日四更出隊各營均抵濠邊賊之大隊已布列長濠之外鏖戰多時賊勢漸懈我軍搶上沙梁安營四座堅築礮臺以轟龐谷莊是日張洪元王得勝桂學高帶傷二十二日親至軍前令各軍先破北面長濠直攻雷化鎮接仗已久不能取勝龐軍暫退賊竟出濠跟追約退至五里許馬步突然回撲賊大敗而走二十三日先派陶茂林三營趙旣發四營攻龐谷東面賊以全力注此派穆圖善四營攻北面長濠防賊出襲而以藤牌等營繞過西南當經步隊毀木城拔鹿柵以開其路而分兵於東南北

三面列陣正酣戰間喬午鎮之賊前來接應我軍以火器相抵該援逆未能入濠而我軍已由東北搶進濠牆很鬪逾時巢外之逆奪圍而出追殺甚夥當將雷化鎮攻破步隊血戰竟日勞頓已甚適馬隊趕至賊遂大潰遂毀其濠焚其房屋禾倉僅取騾馬數匹軍械數百件二十四日進攻龐谷莊東面長濠令各軍俟西路得手再由東面搶入各軍遵令攻其西南賊以全力護之傳令從空處下手先搶木城繼平濠塹每軍前進皆以鎗隊護之馬隊直抵喬午之南開鎗吶喊各軍同時並進長濠既破以十二營進攻喬午以二營接應親

督六營進攻龐谷莊正羣賊匯萃之處乃以德興阿馬隊隨
後接應令將士奮力齊攻一時煙塵大起對面不能見人賊
眾自相踐踏死者無數立將龐谷莊攻破並平小莊五六處
同時西路之喬午亦經攻破天色已晚本擬收隊多隆阿念
濠內不可無營隨命趙旣發陶茂林移紮濠內比壘成已三
鼓矣二十五日賊不敢出得於濠內修營八座二十六日一
面添修後路之營一面擊來犯之賊陣斬千計據供受傷亦
過千我軍陣亡年字營營官叅將何成江已隨摺奏請
優卹比時同州一帶回氛已挫西路涇陽涇化雲陽鎮之賊

據雷正綰報亦於十九二十等日官軍連獲大捷王夢麟奉
瑛榮檄馳救鳳翔行至秦渡鎮遇大股回匪眾寡不敵步隊
僅存七人馬隊傷亡尙少不得已折回省城而賊蹤飄忽雖
經官軍出城搜殺不能直攻城垣但四路阻塞終成坐困民
情洶懼哭聲不絕欲通糧道不能不添籌兵力瑛榮前與雷
正綰會商派員往楚省招募陸續已到三營正慮管帶乏人
適多隆阿派令總兵曹克忠來省卽令帶赴鄂縣之梁家橋
紮營與馬德昭聯絡庶糧路可冀通濟省防亦因之稍固牛
東鎮等處從回漢民亦發告示隨營張貼瑛榮原議曹克忠

駐咸陽之三橋以遏西路之衝其紫梁家橋則多隆阿之意也。多隆阿自克喬午鎮各巢後西路援賊大至其大股由孝義鎮至喬午約十里許馬隊旣多旗幟亦異當派陶茂林三營築壘喬午西南以六起馬隊從孝義後路進以截賊之退路趙旣發四營由林中進復繞出其南以截來賊穆圖善六營亦由林內前進以禦孝義東面之賊朱希廣三營由喬午街進以禦南路之賊另派十一營與金順馬隊爲接應申令分路同進賊見官軍四路齊出亦分股抵抗大戰良久賊敗而卻正追殺間復有精銳之賊數千據險設伏而併股迎戰

我軍方鼓噪而前賊伏頓起趙旣發由林內而出斷截孝義賊隊繞出迤南與朱希廣軍會合賊四顧倉皇大敗而走官軍乘勢追殺賊不虞後路有兵忽溫德勒克西馬隊伏起一聲吶喊四路衝殺賊茫無所措盡入羅網殘賊不敢回巢遂收復孝義鎮並平附近村莊七八處起獲哈連升帶去之潼關副將關防一顆僞孫大元帥旗十二面陣斬首從約三四千獲男婦騾馬軍械無算乘勝急攻倉頭鎮一路追殺前進賊因南阻渭河向西奔竄我軍將近賊巢見倉頭土城之外有木城木城外有濠極深而寬濠內鐵蒺藜梅花椿密布方

馬步進攻城上鎗礮如雨料難卽拔而兵力已疲傳令收隊
忽報另股馬步二千餘攻陶茂林新營正急乃令馬隊八起
步隊四營由倉頭北繞該逆後路埋伏而以步隊八營由正
路往應我兵將至陶茂林出隊夾擊賊敗而西伏兵截之斃
騎賊二百餘步賊百餘生擒之賊數十得戰馬六十四匹據
擒賊供稱向來跟隨孫大元帥倉頭阿渾因連日陣亡回人
太多求救於孫大元帥卽調西安咸陽蘇家溝涇陽塔下各
路湊成馬隊四千步隊三千五百前來救應剛到卽敗等語
該逆之重創可知矣四月初一日移營前進築砌礮臺聞土

城之內晝夜喧呶知逆眾計窮必難久守初二日四鼓傳令不得倉頭不准收隊將士皆踴躍用命力攻竟日奮力齊登巷戰多時賊屍滿城得出者亦被馬隊截殺奔走不及者投入渭河是役斃賊極多而倉頭之巢破因以七營填紮一面飛飭潼商道趕備船隻駛至渭河搭橋橋成可與省城通矣是日有回匪四五千由十里鋪至甘家寨圖撲馬德昭營壘已革都司謝連陞守備梁鶴鳴千總姚維先奮勇衝鋒把總馬秉坤武生張占魁軍功黃雲安等衝入賊陣被騎賊圍擊用長矛橫截張占魁黃雲安傷重陣亡各營連放大礮斃賊

多名賊勢稍卻又見穆騰阿馬隊出城始向景陽村退去以後初八初十十一十二等日均有大股在城外滋擾據拏獲奸細供稱該匪廣造雲梯意圖攻城雷正綰所獲奸細亦有賄買漢人赴塔兒底通信密約攻城等語又逃出難民供稱初七日已擡雲梯前來行至白楊村天色已晚等語幸麥已成熟官軍派隊護穫城中稍資接濟而漢南毛震壽之軍被賊衝踏於高家嶺藍逆分股渡河逼近石泉

朝廷新命前江西布政使李桓帶兵赴陝准其自行馳奏駱秉章請飭李雲麟前赴陝南亦奉

諭飭令該郎中由鄂赴陝曹克忠於初十日移營夏店有騎賊直撲牆壘當令一面守牆一面出擊賊始敗退是夜二更又至先撲副新中營擊退之後轉撲副新左營曹克忠督隊出牆賊卽退去十二日至梁家橋所經各處漢民見所貼告示一律反正糧路漸通惟鳳翔危急日甚據官紳稟稱該逆於一里之外挖掘長濠旣深且寬又用車盛土兜圍亦有築牆接圍之處層層包裹密如網羅初三日偷洩城濠萬眾圍逼晝夜不息等語多隆阿擬俟浮橋造成一由高陵節節西勦一擣沙河以顧省城而令馬德昭湊足兵勇三千前往鳳

翔援剿解圍後西馳赴甘時熙麟住慶陽奏報平涼府城被圍已逾數旬白吉銅城之賊逃赴平涼數逾鉅萬甯州亦有賊蹤等語奉

旨責多隆阿兼顧而李雲麟又以丁憂回旗暫代者爲張由庚倉頭等處敗回西竄合附近賊眾分途肆擾意圖攻撲省城百姓收穫方殷輒復被回驚散自四月十二日後每日分股四出搜殺鄉民焚燒麥禾官軍出隊卽更番拒戰十二日之役接仗多時甫經歷下而後隊繼至抵死堅拒馬德昭嚴督各軍衝殺搶上山梁拋擲火器賊始潰退追殺多名千總

李鳴山外委孫獻魁亦力戰被害自是日有戰事而二十五日賊撲西北城關鏖戰自辰至申叅將陳開泰陣亡勇丁傷亡九十餘名省城復形危急據報石逆中旗又已竄至武平之喬莊將取道文縣繞出漢南李桓告病不能赴陝值此時皖北髮逆東趨捻匪回竄豫境楚北防剿稍鬆而漢南官軍失利千總雷雲桂外委戴金山軍功陳國珠李百順等陣亡奉

諭著官文飭何作楫赴陝又熙麟奏援平官軍中途失利慶陽府知府和英及營官任國治同時陣亡均蒙如例

賜卹並准於殉難地方建立專祠勅多隆阿派勁旅數千交
雷正綰赴甘應援並著駱秉章酌調兵勇二三千由白馬關
赴甘助剿多隆阿以南岸軍情吃緊穆圖善十四營及常星
阿等馬隊已抵臨潼進剿沙河老巢北岸趙旣發等十營已
紮交口正與賊眾十餘萬相持值士卒多病時疫五月二十
九日馬賊復擾孝義倉頭等處斷我糧路幸馬隊迎剿克捷
追殺一日之久得馬六十餘匹賊雖敗去其眾實多官軍斷
難抽撥雷正綰商令馮元佐帶練勇三千前赴甘省助剿計
此時可以啓行其所部駐紮三原斷不可動等情覆奏多隆

阿因病體未痊軍士疫氣亦盛致未敢輕率出隊乃回逆探知日夜來撲均經擊退穆圖善臨潼之營亦經賊撲官軍於剿敗後乘勝平賊營十餘座趙旣發駐交口石汧河兵力單薄堅戒勿輕接仗至六月十二日四更逆回梟水來撲經該營越牆設伏遂獲大勝追殺數十里平賊營十三處至十三日辰刻始行收隊惟副將劉連升關行莊因黑夜登壘中擡鎗殞命是日商定移營過河正修築間諜報逆眾萬餘蜂擁而至因一面出隊迎戰約一時許朱希廣衝入賊中被賊四面緊圍趙旣發率隊往援身受重傷猶盡力衝突迄不能入

朱希廣血戰陣亡趙旣發退入新營賊乘勝直前攻逼並紮營以圖久困適大雨河漲交口未移之營亦不能前多隆阿聞信卽於十五日負病冒雨而行十六日至交口傳令列隊搭橋十七日子刻親督親兵等營由中路各營分左右進馬隊從後包鈔銜枚疾走賊不及防大敗而西其圍立解馬隊迎頭蹙之遂多投河而死礮船復用鎗礮連轟死者益眾生擒百數十名內有馬阿渾一名據供逆眾係由西路糾合而來以後連日搜剿所斃不少賊自此不敢再出商定將沙河蕩平再圖高陵事聞陣亡將領均蒙

優卹未幾漢中鎮總兵趙旣發亦因傷重而死附請

優卹並與朱希廣同建專祠同時馬德昭出城督隊馬被鎗
驚前蹶躍起後蹶踏空登時墜落坎中其馬壓左骹之上幸
軍士拚救回城受傷極重經瑛榮奏明並咨請畱省防守而
罷鳳翔之行復經多隆阿附片陳奏七月初二日奉

旨將瑛榮革職以劉蓉補授陝西巡撫未到任以前著臬司
張集馨暫行署理平涼之圍未解仍著多隆阿迅飭馬德昭
督率所部取道鳳翔實力攻擊迅解城圍卽由鳳翔援救平
涼劉蓉身荷厚恩自應感激圖報迅速馳赴漢南將興漢賊

巢埽蕩漢回仇釁已深到任後總當持平辦理劉蓉係駱秉章襄理得力之員惟當促其迅速赴任張集馨以屢次獲咎之員朝廷棄瑕錄用畀以臬司重任茲復令暫署撫篆宜如何力圖報稱一切防勦事宜務與多隆阿穆騰阿和衷商酌期於有濟勿蹈瑛榮覆轍也欽此是時渭河南北兩岸賊巢林立多隆阿因省垣交替之時深恐有失急欲埽蕩而前直達省垣初七日攻破蒲桃窪遂進攻拜家村殲戮無遺焚燬其巢傳令直搗十三村甫破三村而日已暮初十日渡河而南探報逆回在三府里紮營六座並由白鴨嘴至灞河挖濠

二十里長傳令限五日蕩平十一日四鼓親督馬步各營進攻三府里立破其巢殺賊數千其六營亦同時平燬賊退入白鴨嘴復督軍跟踪迅追傳令越濠賊果膽寒紛紛潰敗追殺至十餘里白鴨嘴之巢亦破十二日移營三府里十三日進攻馬烏什將附近十餘村堡一律平燬此處賊巢最大殺斃多名十四日四更傳令攻沙河老巢鏖戰數時迄不少動蓋賊之命脈所關不可輕失者也於是大誓三軍今日不克不准收隊將士奮不顧身雖力戰甚久而賊終不能當向灞河一路竄走官軍進至河邊男婦哭聲震耳多投河自溺遂

將沙河老巢焚燬八日之間南岸迤東賊巢僅存半閣村光大廟數小巢斃賊不可數計生擒至二百餘名而南岸總頭目馬阿渾亦已處極刑矣多隆阿檄飭曹克忠會攻光大廟等處旋據稟報已於十六日將光大廟等處賊巢一律平燬二十二日進抵省城商議防守查點兵勇裁汰老弱以節糜費籌派漢中鎮總兵陶茂林帶兵勇三千馳赴鳳翔解圍卽由鳳翔援救平涼是時渭河以南惟咸陽盩厔之界尙有零賊大股僅高陵未下適奉

上諭據張之萬奏亳捻擾及許境經練兵擊退悉數西趨或

由邾汝趨盧氏犯潼關回匪被剿難保不勾串苗逆約會而
來潼關商雒等處著多隆阿張集馨會商布置以備不虞欽
此比經會商妥議陶茂林援鳳之三千五百人卽日拔隊前
往曹克忠已剿鄆縣之賊回駐省城而以隆興阿馬隊三百
餘騎來往梭巡令總兵慶瑞帶領回兵二百名隨營進攻高
陵會同具覆奉

上諭據查點四關兵勇數目虛冒甚多而每月糧餉則照虛
數支領實堪痛恨業經明降諭旨將瞻徇故縱之已革巡撫
瑛榮發往新疆効力贖罪馬德昭交該將軍暨劉蓉等嚴行

查辦各營營官分別拏問鳳翔被圍已經一載而該文武竭力戰守亦經明降諭旨將出力各員優加獎勵並令將知府張兆棟於解圍後保獎鎮安被藍逆竄陷業將署知縣張勤革職著卽嚴飭福兆盡力克復扶逆陳得才已有竄意卽宜飭川楚各勇由甯沔及城固石泉等處進兵劉蓉由通江入漢奏報諒必在途著卽星速前進統率諸軍先將漢中城圍力解督同李雲麟等將漢南羣醜奮力蕩平仍與多隆阿聯絡聲氣以籌全局欽此旣而陰雨連旬陶茂林起行未果回匪渡河撲營經雷正綰擊退該逆復調僞元帥孫保義率黨

數千渡河圍撲三原雷正綰復奮力擊退奉

旨嘉獎有俟全陝廓清與多隆阿同膺懋賞等因時河州鎮總兵吉順以老病開缺經多隆阿奏請以曹克忠補授亦奉諭旨照准但由臣下請補之處下不爲例耳其四關勇丁多有缺額查明尙無冒領虛數各營自副將以下奉

旨革職交陶茂林帶赴鳳翔勦賊自効右營遊擊趙萬金所管勇丁並無缺額著以叅將卽補回弁馬振麟馬兆麒仍著畱心察看於是省城一切事宜均經奏奉

明諭多隆阿遂督兵出省二十二日馳抵交口復值連日大

雨至二十六二十七等日始克移營至普陀原並檄穆圖善由新豐搭造浮橋而咨雷正綰同時進攻永樂店塔底等處並飭馬陞守咸陽二十三日五鼓先派馬隊伏十三村之北親督各隊由東路穆圖善由南路進馬步約五千餘人三路夾攻久之賊遂不支紛紛西竄遂將大小十三村平燬二十九三十等日移營進逼高陵九月初一日黎明出隊直逼城下傳令扒城該逆潛由南門逸出聚於五里外之興南村我軍以銳乘之登時敗潰遂將高陵縣城收復乃一面移營一面追剿數十里回村按日悉平初四日逆眾盡過涇河我軍

亦進營河北該逆乘我營未定來攻我軍先以馬隊嘗之鋒刃初交賊勢稍卻及各營全濟遂大敗而竄我兵分兩路追殺馳四十餘里至長陀灣該逆避入村堡閉門不及我軍乘之遂將長陀兩村一時攻破雷正綰於初一初二等日亦次第將永樂店塔底攻開而該逆仍與之力抗多隆阿派馬隊助之斃馬賊千餘雷正綰遂督軍梟水過河會同穆圖善追殺共斃賊數千名獲騾馬四百餘匹我軍亦淹沒十餘人次日搭造浮橋移營於長陀灣一面奏請

獎卹適據石泉縣稟報漢中府城城固縣城於八月二十二

二十三等日相繼失守同時甘肅之平涼府城亦被回匪攻陷幸擒匪由洛陽東竄潼關防務稍鬆因將南原兵勇撤回併力西擊訶陝回經痛勦後復虜聚涇南渭北間多隆阿急督軍士搭橋濟師九月初七初八等日進逼蘇家溝老巢飛吞雷正綰由涇陽渡河以扼其西飭曹克忠一軍馳赴咸陽兜勦初十日督大軍分路並進該逆回由渭至涇列隊綿亘十餘里多隆阿親統十七營由左路進而以常星阿各起馬隊爲接應飭穆圖善營帶十四營由右路進而以金順等各起馬隊爲接應各軍依次而進該逆自知無路可逃拚死很

鬪鏖戰兩時步隊力衝馬隊鈔截賊勢窘極紛紛向蘇家溝
渭城老巢遁去當將高陽莊東穆家寨南舍村北舍村蕭城
鈕家堡等處賊壘一律平燬餘匪搜殺無遺乘勝直撲蘇家
溝併力搶入溝口拋擲噴筒火彈煙燄漲天各軍縱橫衝殺
斃賊數千立將蘇家溝老巢攻燬方擬再進忽有騎賊二三
千自渭城狂奔來援登時擊退趁勢尾追將沿路堡卡攻破
直抵渭城老巢此巢城高池深城上鎗礮如雨不能遽下副
將孟宗福冒煙先登總兵姜玉順繼之砍倒守城悍賊大開
城門諸軍一擁而進將逾萬回逆剿滅無遺拔出難民千餘

人得免者不過千餘是日斃賊萬餘獲軍械馬匹無數蓋血戰也事聞

獎卹均得從優陶茂林援鳳之師自八月二十六日出省二十九日抵郿縣有川匪曹背時踞該縣之槐芽鎮四出擄掠阻我軍行陶茂林親督攻勦將該鎮西柿林攻破餘黨潰歸槐芽鎮九月初一日移營進逼初二日悍賊出巢經我軍擊敗遂令填濠架梯而巢之迤東另有外圍三座經我軍破其二殺長髮數百其一壘更爲險峻官軍用牛皮輦梯牢繫而上多被石傷而繼登者眾賊不能禦下城而逃後路截之內

外俘斬略盡值天晚收隊探知東南尙有五堡初三日四鼓分路攻撲一律平燬遂合力進攻槐芽巨巢髮逆悉力抗拒戰約三時斃賊不少內有黃衣賊目一名不知係何名姓至午後其巢始破將餘逆搜殺淨盡鳳郡之餉道始通而回逆自失高陵老巢後逆眾悉數西竄甘境熙麟僻處慶陽恩麟遠在蘭垣無兵防剿固原平涼一帶勢等燎原陝東幸西同兩郡肅清而戶口亦凋敝已極漢南羣盜如故李桓告病後所募義勝三營又經鄖陽鎮府截留漢江以北愈形空虛石泉縣知縣陸堃聞髮逆將圖下竄因約西鄉縣知縣陳爾莪

漢陰廳同知金鑑甯陝廳同知瞿樹鎬會銜團練由鄉民捐備經費每邑挑壯丁萬名以其半畱守而以其半出境防剿稟請委員駐紮石泉居中調發經張集馨奏奉

諭旨嚴催劉蓉赴陝統率漢南諸軍時川軍進攻油坊街深入失利軍士多有傷亡器械亦多遺失乃退紮青石關鎮安藍二逆一股仍踞鳳凰嘴擄掠山陽縣知縣匡久安稟稱該縣分布團勇嚴堵各隘該逆未竄入境福兆前因失利奏參後九月初四日在羅家屯小捷初五日夜參將孟柏林由鳳凰嘴進攻鎮安團勇由西面會合殺斃數十擒李王二頭目

正法拔出難民三百餘人該逆南竄至洋縣西溝盤踞醜類甚繁商南令謝謙探稟擒匪由葉裕竄至賒旗店等處近復竄至棗陽另有擒股擾及禹州南陽一帶又潼商道蔣徵陶報稱皖捻現踞登封山內苗逆大股竄至襄城似欲西犯是西同雖云暫安而警報較前更密僞扶逆陳得才旣踞漢中其黨句合藍大逆分踞城固藍二逆一股擾及商南經孟柏林會同山陽令匡久安連剿獲勝李雲麟前部輕進失利退回縣城被賊追躡匡久安回救不及城遂失陷該逆遂擾及商州勢甚危迫孟柏林復帶隊會民團進剿多隆阿亦派總

兵藍斯玉帶二千人星馳而來及李雲麟大隊抵境後該逆小挫退入山陽縣城而漢中所屬郡縣相繼失守西鄉亦被攻陷幸東北一面經湖北卽補知府周有全會同石泉令陸壘水陸並進將茶鎮攻克梁作楫等軍俱抵興安漢中西北褒沔畱鳳節節空虛該匪自茶鎮敗後攻陷佛坪畱壩竄出新口圍攻蓋屋多隆阿聞警卽派穆圖善率馬步七營姜玉順帶馬步九營由興平進兵並親至興平調度據拏獲奸細供稱藍大順實在其中多隆阿因擬專力攻剿旋奉

上諭著多隆阿飭令雷正綰迅統十營由醴泉直趨固原與

該省之兵合力夾擊力圖克復並准其選用木質關防與熙麟聯銜奏事如有緊要軍情不及咨會之處並著卽行單銜馳奏以重軍務陶茂林一軍著俟鳳翔解圍各屬零匪肅清後該大臣卽飭由汧隴進取與雷正綰聯絡策應而陶茂林於九月十六日帶兵進至油坊街逆回出巢抵禦陶茂林分軍截其歸路而親督各營衝殺賊卽敗走後路之兵復至賊遂驚潰當將油坊街賊巢攻破十九日進剿油坊村見賊勢太眾設疑勝之賊復大敗將第一村攻燬其地距鳳翔三十里中阻白家凹賊巢回營密布陶茂林奇正間用轉戰而前

踏毀賊營數十座二十三日四鼓分兵三路而先以馬隊直撲白家凹誘令出巢俟其將近用步隊兩路包鈔賊退無路驚慌四竄中路已將白家凹攻克追殺二十餘里移營進紮七里河鳳郡城圍遂解雷正縮亦於二十八日起行由邠長馳赴甘省曹克忠出涇化進剿白吉原穆圖善駐咸陽多隆阿自紮醴泉時陶茂林以鳳翔功新奉補授甘肅提督之命餘皆晉秩有差鳳郡守城文武官紳均蒙破格

優獎陶茂林自解城圍後進攻東路回巢十月初八日分兩路進立將各壘踏毀是夜飭各營攜帶火具進攻銀樓村賊

懾於先聲應手而破初九日復破鄭家村賊巢鳳郡東路一律掃蕩岐山等處另股亦經馬隊剿滅曹克忠轉戰而來已抵三水雷正綰攻克拜家河亦進兵永壽惟髮逆竄擾盩厔密邇省城軍餉支絀已極因定勸捐粟麥以糧抵餉先發駐防次及各營之議自鄠縣盩厔至甘肅慶陽一帶次第舉行軍食稍資接濟而盩厔縣城竟於十月初七日被陷髮逆之黨蔓延東南李雲麟約攻山陽縣城該逆東竄官軍追剿連捷軍聲略振據逃出難民供稱賊由鎮安而來計眾二萬有奇今逃散甚多現存一萬七八千已東竄商南之大吉河瓦

房灘等處其地距商南城數十里距荆紫關百餘里該逆之意圖與張總愚合股等語又據商州牧曹熙商南令謝謙等稟前月二十七日山陽竄逆已由瓦房灘抵商南城下盤踞東岡勢甚危急李雲麟率意西行置之不顧奉

嚴旨責令回剿而催劉蓉迅速赴陝曹克忠軍抵白吉原於十八日黎明乘霧進攻分兵一由鍋底鎮一由煙桶坡同時並進斃賊目赫阿渾馬二童玉明等數百名將溝內賊巢悉毀二十日進紮白吉原苦戰連日殘匪向固原逸去白吉原一帶肅清得遺麥數萬石咨商署撫張集馨派委員帶車前

往運數千石回省接濟軍民之食餘畱爲西進各軍軍糧並
撫卹難民之用雷正綰一軍將永壽全境肅清十九日馳抵
邠州立解城圍復將南北兩原援賊擊退會商曹克忠合力
進剿陶茂林亦將鳳郡附近村莊一律掃除移營進政府北
至是陝省回逆逐漸西遁惟南山興漢賊勢浩大官軍尙嫌
單薄藍斯明復中鎗傷籌辦兼資團勇曹逆餘黨經甯陝兵
圍進擊遁至石泉亦經民團截殺生擒賊目二名獲賊冊一
本殘匪二百餘人晝伏夜遁向漳縣鼠竄而去陳逆之黨盤
踞漢江南岸自三花石下至兩河口綿亘二百餘里野無所

掠被圍紳呂道五呂廷紳等聯絡迭擊各有擒斬並夜用鎧
火驚之該逆漸有遁意於是陝南之練勇漸彰雷正綰復於
十月二十一二十二等日進剿邠州西南兩原大佛寺等處
將賊巢盡行攻燬餘賊敗踞長武之亭口該處與白吉原通
乘其喘息未定揮軍直逼麇戰數時奪其要隘餘賊敗竄麟
遊雷正綰遂進紮甘肅之靈臺縣值曹克忠已破白吉原老
巢移營原上與雷正綰聲息相通陶茂林圍攻風伯廟牛鉢
峪等處賊巢均經平毀逆回剿洗無遺亦漸由汧隴赴甘此
時三路援甘之軍同稱得手多隆阿進軍蓋屋布營三匝繞

之藍大順已無隙可竄至是將親督各軍攻勦預將西安將軍關防奏明交德興阿署理並聲明郊長以西分軍勦之商
雖東南兼用團眾而蓋屋則自任之兵力雖尙不敷布置漸
有頭緒無何甘肅之甯夏府並所屬之靈州於是月二十四
二十五兩日相繼失陷其地卽宋之西夏西竄則甘之涼州
蘭州無險可扼東竄則陝之榆延甘之環慶隨處可通熙麟
子居慶陽茫無籌策張集馨因咨商護延榆綏鎮之副將吉
連於鎮標各營內挑選一千名派榆林遊擊慶連統帶前往
定邊屯紮而飭延榆綏道何丙勦榆林府劉廷鑑籌辦軍資

糧餉復咨商雷正綰酌撥勁旅二三營前往定邊協力防剿
初甯夏漢回互鬪漢民團練以備回署甯夏道侯登雲知回
燄方張必難理論督辦頗切乃甯夏將軍慶瑞力持撫議偏
信回目之言奏參侯登雲而嚴勒漢民散團防繳軍械漢民
迫於勢投械而泣回知城中無備卽於二十四夜襲而陷之
侯登雲被戕最酷城中漢民屠戮罄盡滿營另城僅隔數里
慶瑞固佯爲弗聞也次日靈州回聞風而起州城遂相繼陷
回旣得志知滿營無備卽並圖滿城欺慶瑞之無能爲梯絙
而入搜括城中所有細而載之牛彘章京海郎阿等持械未

釋登時遇害慶瑞不得已據實陳奏奉

旨切責因著直隸總督劉長佑挑選勁旅二千由朔平綏遠歸化以趨甯夏著山西巡撫英桂撥楚勇一千飭赴定邊著署西安將軍德興阿整頓士馬嚴密布置爲訥欽一軍策應並催熙麟速赴蘭州接印視事蓋

聖慮周詳深知陝西諸軍不可以再撥也然陝西兵力實單終慮不敷分布幸其時東南軍機極順苗逆伏誅蘇垣克復金陵之圍旣合洪逆無出竄之虞多隆阿時圍盩厔縣城因奏請

五
卷一
三
敕下兩江督臣安徽撫臣分撥數營赴陝並請

敕催前所調石清吉等七營兼程來陝以厚兵力一面親督各營竭力圍攻奈是年冬雪深二尺有餘人皆皸瘃頗難著手而賊中油鹽久乏急思遠遁所幸重圍環合無懈可乘商南川匪聞劉蓉將至褒沔遂游弋漫川關一帶石逆餘黨陳得才踞漢南已久擄掠日甚劉蓉商請多隆阿分兵夾擊多隆阿擬俟盩厔克復藍逆殲除以全軍致討而捻首張總愚陳大喜盤踞南陽東境意圖西竄故潼關之防復急山東撫臣閻敬銘聞甯夏回人變叛定邊空虛派撥東勇一千名交

劉漢秀帶赴定邊得古人救災恤鄰之義時譽歸之此關隴十一月間情形也至十二月十五日陝西巡撫劉蓉帶川兵抵甯羌州號稱統兵三十餘萬漢中賊情洶懣紛紛竄逸漢中府及略陽褒沔諸城遂皆無賊畱壩廳亦報收復同治三年正月中路之賊欲由三花石渡江經李雲麟擊退北路賊由洋縣進趨甯陝晝夜不絕十八日竄至鎮安之老屋巖分股入孝義之雲蓋寺等處副將謝振球督兵勇民團勦之未克曹逆亦竄至郿縣之嘴頭聞陶茂林將至折竄糖坊口據所獲奸細供稱該逆欲援盩屋聞官軍勢大不敢出山欲竄

回江口與石逆餘黨藍逆夥匪合股等語多隆阿派弁偵探
髮逆兩股一東走鎮安一北竄江口其前隊已至金鎖橋距
省僅二百里據鄠縣稟報該縣與長安交界之梁家橋亦有
髮逆窺伺距省僅三十餘里多隆阿因調馬隊回防省城張
集馨與署將軍德興阿署藩司林壽圖西安府呂雋孫妥籌
防守與蓋屋大軍相聯絡多隆阿於正月二十六日約會諸
軍大舉五更齊至城下奮力進攻城上矢石如雨我軍裹創
冒險而登自辰而午逆眾猶抵死相拒營官蕭河清張洪元
蔣萬順張仁德黃金山等俱受重傷將士憤甚不分晝夜連

攻數日一面開挖地道至二月初二日黎明諸軍以地雷爲號分路而上不意城身極厚僅塌數尺各營鼓勇而進相繼受傷營官劉定邦魏大全程興烈劉均成宋作林等傷皆極重幾至束手無策黃金山帶傷出隊左腿復受鎗傷兵勇已傷至三千餘人守禦之堅亦賊中所罕見幸陶茂林肅清鳳郡全軍已抵汧陽曹克忠勦麟遊之匪搜殺殆盡遂進勦雨亭寺雷正綰拔營赴靈臺連獲大捷勦回之軍無須兼顧惟髮逆蹂躪愈近陳得才大股前隊已抵山陽後隊尙踞甯陝而甯夏將軍慶瑞署甘肅提督訥欽皆新任軍事

朝廷實深慮念諭令多隆阿察看要亦更替無人未敢據實
陳覆當局之難如此蓋屋自初二日地雷轟發進攻未克該
逆拒守益堅而圍竄亦愈甚十二日率數百人出東門經官
軍追殺百餘人餘仍回竄入城自是每夜輒有數百人出撲
均未得逞官軍仍於四面加挖地道二十三日東面轟開丈
餘我軍冒煙而登鏖戰多時將守城之賊殲斃砍開月城一
擁而進孰知該逆於外城之中修築內卡防守更嚴正力攻
間多隆阿在礮臺上擊鼓督率攻城賊暗放鳥鎗致多隆阿
頭眼俱受鎗傷而天色已晚仍令連夜環攻不准鬆勁回營

之後因血流過多頭目昏眩自量不能速愈卽將

欽差關防交西安副都統穆圖善暫行署理督辦軍務具疏
馳奏並請

勅下黑龍江將軍令其子雙全赴營隨侍曹克忠亦先於十
六日將雨亭寺花花石一帶賊巢全行平毀奉檄移營隴州
與陶茂林會合疏入大蒙

獎勵並由內務府發出如意拔毒散四料以冀速痊出力陣
亡員弁均蒙從優

獎卹多隆阿雖經交卸而督戰愈急比派兩營駐紮月城之

上傳令四門嚴密遏守二十四日三更穆圖善統率步軍在西南北環攻賊以全力抵拒而我東路之兵於黑暗中填濠拔椿絙梯而上大開東門我軍一擁而入賊眾驚慌東奔西突均經截殺其得出者又被馬隊追斬並斃黃衣賊目多名當將縣城克復生擒僞賢王藍朝元藍朝魯藍朝洪僞都護藍三順藍七順藍十三順藍十四順向能典蔡洪發梁國忠李天順袁大昌王春發蕭老五陳老二萬榮青萬成順朱三元僞先鋒顏忠貴郭貴生劉黑虎王興漢賈福林及小頭目方先勝等八十餘名救出難民無數各營搜捕兩日二十六

日收隊其先期投誠之曾庶全等二百餘人分別畱遣查藍大順與李短搭搭於咸豐九年在雲南昭通府聚眾倡亂蹂躪全川戕官據城經川督駱秉章節節掃蕩李逆就擒該逆遂竄入陝佔踞洋縣連陷佛坪褒斜萬餘聞罄屋殷富竄而踞之以瞰省城至此始就撲滅人心爲之大快惟未得藍逆之屍訊之擒賊其詞各異要之黨羽全除雖倖免亦無能爲矣奏報後奉

上諭多隆阿所部不宜入甘之軍移剿漢南竄匪著於所部酌調兵勇四千名交姜玉順余福象統帶馳赴陝南會同劉

各營迅將曹藍各股匪徒盡力剿洗仍遵前旨追賊出陝
行抵鄂境卽歸官文調遣劉蓉務當激勵諸軍督飭李雲麟
肅清漢南餘賊毋得任令蔓延致負委任張總愚一股竄據
盧氏勢將乘間西趨而陳大喜及漢南竄逆均聚內鄉勢將
句合著多隆阿速飭將領酌帶四千人前往迎擊僧格林沁
駐紮洛陽卽歸僧格林沁調遣穆圖善本係西安副都統省
城不可無兵著多隆阿撥馬隊四五百名交穆圖善統帶其
餘著交蘇倫保常星阿分起管帶赴豫歸僧格林沁調遣以
一事權多隆阿病勢危篤須多用葠者著發去人葠六兩交

該大臣祇領另片奏連日據百姓報稱藍逆受傷十分沈重此股敗匪現趨甯陝圖與藍曹二逆合股卽著劉蓉派兵截擊悉數殄除欽此克復蓋屋之日曹克忠亦將汧隴肅清敗回西竄致有陝境回匪肅清之奏

朝廷知非多隆阿之意遂于詰斥

聖明之不可欺類如此旣而藍斯明孟柏林等於二十八日會擊髮逆於商州之塔寺溝降斬頗多生擒五十餘名訊係僞齊王前隊餘匪由畱仙坪東竄龍駒寨分股另走山陽銀花落匡久安調集民團駐防青石碛該逆懼而回竄其時東

來擒逆已至廬氏縣之漫川鎮又據孝義廳同知呂紳稟稱
自正月二十三日至二月十五日漢南竄匪漫山遍野晝夜
不停眾約十餘萬幸野無所掠悉向鎮安竄去計前後二十
餘日紳團守城防卡捐資堵禦勞困已極又據郿縣令馬綸
篤稟云蓋屋當攻克時有悍賊自西門衝出經官軍追殺甚
多餘逆竄入南山曹背時現紮金雞河洋縣藍逆餘黨現紮
八斗坪二逆現已合股甯陝民團會同彝字營川勇攻破其
巢追至青龍壩再敗之曹逆竄鎮安藍二逆游弋蜀河逼近
洵陽等語時統領彝字營黃鼎已跟踪尾追謝振球亦率隊

夾擊張集馨恐其句合擒匪因咨請山東新到之劉漢秀雷顯揚二營扼紮潼關維時多隆阿傷病已重奉

特諭命穆圖善署理欽差大臣關防並幫辦多隆阿軍務俾該將軍得以安心調理穆圖善署理關防責無旁貸著卽督飭各軍西剿回匪南防髮逆務當籌辦兼顧毋稍疏虞雷正綰督勇援甘責任甚重現在汧隴靈臺肅清涇州各軍後路無虞梗阻該提督尤當督率陶茂林曹克忠激勵各軍鼓行而西盡力剿洗毋得任意延宕干咎欽此

朝廷軫念西陲蓋深望多隆阿速愈肅清髮逆卽可鼓行而

西也而克復蓋屋之日藍大順果易服潛遁三月初六日竄至安康所屬之紫溪河地方據場擄掠經在籍主事管芳率同擬保把總楊烝文童楊宗泗管正綿等各帶獵勇二百餘人預往各路埋伏另派百餘人至陳家臺誘賊出戰佯爲敗走該逆追至長溝伏兵突出截其歸路掩殺頗多紫溪河各賊湧出救援巢內空虛街後伏兵從北面藥王砦掩至直撲其巢該逆譁然四散各團勇四面截殺內有賊目身衣繡金九蟒乘轎奔走經團勇緊追擒獲餘賊拚救團勇慮被復奪登時砍死割取首級並殺悍賊五名生擒長髮老賊張潮陞

一名據供稱左眼下有肉瘤身穿繡蟒者爲藍朝璧卽大順面方麻黑微鬚者係僞統領林姓面長白色無鬚者係僞都統王姓其餘藍八藍九藍五等均被陣斬等語管芳見逆勢已窮與舉人張承燮督率團勇併力夾擊遂將該逆餘黨全數殲斃惟聞藍朝璧眼下並無肉瘤因令向日伺候該逆之王老么麻花二人向眾屍中指認首級果得該逆眞屍再提前獲之藍七並李雲麟傳到夙識該逆之守備孟學文公同辨認僉稱確實無訛再訊獲匪據稱是日因團勇追迫該逆因令僞都統王包包穿其蟒服冒己名乘轎奔走而自率僞

巡捕藍三順等易服雜眾匪中以逃等語詎知惡貫已盈股眾悉盡天實假手團勇以殛之乎初十日甯陝廳叅將謝正球聞曹逆前隊由穆王坪回竄楊泗廟泰山廟一帶當卽派隊馳往賈家營堵禦適僞統領游飛熊羅飛虎曾玉順朱和順四人赴營投誠謝正球派弁察看該匪等情詞懇切始將賊目帶回令先繳刀矛器械查點共七百餘人訊據供稱曹逆大股尙有萬餘與洋縣餘孽二千餘人合隊現在腰竹溝高觀場等處辦糧不趨西安卽竄川境等語十四日彝字營黃鼎探悉該逆竄擾閣老坪急率所部馳往而賊已竄至八

里坪黃鼎料其必竄蒿溝擄糧因會同廖溥明截其前商令張玉文率隊從沙溝口擊其腰尾十七日賊果至蒿溝官軍接仗稍卻傷亡勇丁二十餘人黃鼎親率藤牌從山梁鈔下賊始返奔我軍乘之掩殺百餘人生擒四十餘人張玉文及團紳尹貢生帶隊埋伏深林賊甫下梁伏兵突出截殺頗多合隊追至大莊坪擒斬賊目一名獲其逆婦及老賊十餘人十九日賊悉銳而來密布如林曹逆親身督隊前哨叅將會新茂遊擊趙雲鳳迎戰賊由右路鈔出一股勢將圍裏前哨黃鼎急令左哨馳下左面山梁後哨從右面擊其後賊退至

山腳副將黃友忠執旗衝出賊遂返奔廖溥明率藤牌隊同後哨追之賊旋踞高梁死拒藤牌隊槍上山梁賊眾敗退由高梁顛仆而下跌斃更多後面山梁之賊亦潰我軍三路鈔殺斬二百餘人焚賊巢十餘處斃偽統領先鋒數人偽西字中營一股被我軍圍裹不敢衝突黃鼎豎旗招之偽統領陳占雄率五百餘人降比挑一百四十人俾作前鋒立功自贖其餘悉數資遣遂揮軍直逼文公廟老巢賊據重卡死拒廖溥明復射檄招降曹燦章據鞍痛哭哀動左右由是賊眾不敢輕出黃鼎縱兵奮攻之張玉文在沙溝口聞礮聲亦督隊

截其腰焚賊巢四處該逆退據山梁張玉文會同團紳直衝
文公梁歐陽勛將賊卡焚燒團首尹貢生首先上梁鎗斃僞
百長一人老賊四人賊奔老巢我軍乘勢進據賊卡計投誠
解散已二千餘人勢極窮蹙惟山路叢雜曲徑旁通官軍進
艱苦於覓食之艱耳其另股竄鄆縣之勞峪有逃出難民李
青山苟其清二人供稱係佛坪農民被曹背時裹脅該逆沿
途所擄現有二萬餘人近又擄東流團丁二百餘人防範極
嚴等語然兵團每戰必捷賊亦奔救不遑髮逆之無能爲可
知矣乃甘肅之張家川蓮花城二處回匪復竄隴州之神峪

河圖截各營糧運先是陶茂林既平月明溝等處賊壘進攻劉家店復獲全勝生擒二十二人內有漢民供稱平涼逆首穆三由張家川蓮花城調來救兵兩股一股援救平涼一股回擾汧隴等語是時雷正綰收復靈臺正擬會師進攻平涼忽聞神峪河之警乃商定陶茂林專勦神峪河而分軍助之使賊不敢回竄邠長以保後路而自統諸軍進攻崇信一帶以規平固適曹克忠亦至華亭雷正綰復於平涼之四十里鋪克獲大捷陣斬回目楊自明等數千人有黃衣賊目懼而自縊據擒賊供認實係穆三回氛爲之少挫旣而陶茂林進

勦神峪河亦屢以捷告於是援甘之師已深入甘境而髮逆因回援金陵亦一意東竄惟僞天將馬士榮尙在安康北境游弋藍二順復由鄖西竄擾洵陽之蜀河劉蓉因畱提督蕭慶高何勝必所統之川軍駐紮興安以顧川陝兩省門戶而以新募之楚勇三千人徑趨商州扼要堵勦並奏明親赴盩厔與多隆阿會商軍情就便進省奉

上諭云昨據張之萬奏髮逆已竄內鄉等處是楚豫兩省防勦萬緊前已迭諭劉蓉令其東下追賊以收夾擊之效該撫擬欲進省接篆固爲整頓起見惟賊未受大創安然出境若

無大員總統進剿恐致復行鬆勁賊又回竄陝疆况徽縣兩當賊氛未淨洵陽一帶業有回竄之虞該撫曾否派兵妥籌堵剿漢南防務布置是否周密以上各節均應悉心區畫以期不負委任如該撫已赴西安卽著將應辦事宜迅速籌畫仍察看賊勢軍情出省督兵毋稍延緩致誤戎機李雲麟扼守興安何以任賊東趨不思扼擊著懷遵前旨妥籌會剿毋稍疏虞都察院奏甘肅生員胡第甲監生萬士範等以狃和殃民懇請派兵進剿等詞赴該衙門呈訴所陳護督恩麟養癰成患及逆回猖獗各情形案關軍務緊要必應澈底根究

著多隆阿按照原呈各節秉公查辦據實覆奏等因而多隆阿傷病日劇醫治無效劉蓉於三月二十六日至盩厔大營看視握手流淚不能言語所擬商撥各營事宜仍未能決延至四月十五日未刻竟於盩厔大營因傷病故矣多隆阿自將兵以來營規整肅遺愛在民每戰必勝未嘗挫衄使天假之以年則陝甘軍務早蕝生民塗炭之苦必不至如此之極乃盩厔甫克藍逆伏誅遂因傷重殂謝是非斯人之不幸實陝甘之不幸也惜哉

平定關隴紀略卷一終

平定關隴紀略卷二

同治三年夏四月

欽命陝西巡撫劉蓉由盩厔晉省接受巡撫篆務值多隆阿出缺奉

旨著德興阿補授西安將軍穆圖善陞授荊州將軍暫署

欽差大臣關防與劉蓉同辦陝西軍務固原提督雷正綰仍遵

前旨會同甘肅提督陶茂林河州鎮總兵曹克忠各率所部援甘仍准會同陝甘總督熙麟隨時奏報軍情時訥欽亦交

卸甯夏軍務奉

上諭前據訥欽奏稱卸署直隸提督恐呼應不靈等語當經諭令都興阿趕緊由京起程直赴定邊接統訥欽所部各軍進取甯靈欽此等因雷正綰因卽具奏請

勅撥多隆阿所部數營歸都興阿統率由定邊援剿甯靈並自請

勅撥馬隊數起以厚兵力均蒙

俞允適陶茂林肅清神峪河窰匪殘敗之眾皆赴平涼陶茂林亦率所部由華亭與雷軍會合籌攻平涼府城陝甘總督

熙麟亦委甯夏道三壽由慶陽至軍四月十五日回逆句結
固原悍黨馬步約八千餘名前來迎敵雷正綰傳令後路各
營接應親率魏添應胡大貴鄧全忠陳義等四營迎頭直擊
陶茂林見米家溝川內伏有馬步各逆遂令張在德統領五
營由大路馳伏其前而自率圍隊並陶兆熊所部親兵營由
米家溝前進該逆旌旗林立溝川皆滿我軍勇往直前並放
連環鎗礮噴筒火箭斃賊約千餘名賊遂奔潰上原值伏兵
齊起四面剿擊賊折向大和溝奔竄陶茂林由左橫截張在
德跟蹤追殺雷正綰所帶四營正當川口又令雷恆劉效忠

馬隊並余萬明張在山步營分左右圍擊賊眾大潰屍橫數里敗殘之匪又追殲之紙坊川無一漏網生擒一百三十餘人訊明正法自是平涼城外援絕官軍直逼城下矣曹克忠一軍亦先於初七日進攻長甯驛馬麻鎮賊巢克獲大捷陣斬赫阿渾馬阿渾並賊首匪眾三百餘名生擒馬麻鎮逆首鄔成濳據供係邠州白吉原回日處以極刑而劉蓉自入省後准四品京堂李雲麟咨稱三月二十日率所部至蜀河探蔡逆苦攻龜山民寨幾破是寨爲富商避亂之所救護宜急卽於二十三日乘其不備奮勇擊之擒斬數百名焚賊壘兩

座該逆遂於次日五鼓全數東竄我軍前後夾擊復斃數百
名賊竄鄖西關防鋪二十七日將搶渡甲河李雲麟派隊往
堵一面將藍逆授首全股撲滅並投誠免死各情廣張告示
據賊中投出長髮老匪供稱蔡逆自知勢孤急謀回川有先
與官軍決戰之意現在尖山寨關防鋪堅修卡壘等語四月
初五日久雨初晴李雲麟親率飛捷正後五營由仙河進勦
而令都司劉大富由藍河襲其後該逆分途抗拒鏖戰兩時
知我軍有伏在後賊陣遂亂我軍乘之賊敗走追殺二十餘
里據逃出難民供稱蔡逆將由鎮安竄甯陝與曹逆合股再

竄佛坪等語而不知曹逆已被湘果彝字等營勦滅罄淨於是游弋於鄖西鎮安交界之大小心川將及一月劉蓉方咨李雲麟欲殲之鎮安境內詎李雲麟以無糧折回興安及再咨商穆圖善移調姜玉順赴鄂之十營便道鎮安助勦亦以山路無糧徑由潼關迨啟逆梁成富由鄖西敗竄土門遂與蔡逆合而扶逆東竄後中旂鄭逆未及同竄至是亦附之其眾復四五萬人亦未能決所向突有回民三人投入其中告以附省新麥方登防兵極少該逆遂捲旂疾走不七日竄出大峪口由子午鎮至灃河聯營三四十里五月初八日經總

兵彭基品派隊揆追而自防長安之杜曲鎮復知會金順馬隊橫出鈔截初九日戰於澧河東岸陣斬六七百名賊敗投河淹斃不計其數拔出難民五六百名生擒百餘名該逆退踞秦渡鎮彭基品渡河疾進出其不意四面鈔擊賊驚而四竄殺斃不可數計生擒長髮五名因日暮收隊是夜探該逆竄踞鄠縣西南關彭基品令五更出隊黎明馳抵東關該逆列隊西南繇亘十餘里彭基品調楊得勝王謨謝正球左宏達等三面夾鈔而自率所部大呼陷陣鏖戰半時逆勢不支敗入嶓峪口是日斃悍賊二百餘名投誠三十餘名拔出難

民六十五名生擒僞先鋒陳訓兒僞副帥孫昌齡等二十一
人另股之傍山西竄者經金順衝殺七八百名生擒百餘名
拔出難民數百名適黃鼎亦率所部由江口馳至商定五更
出隊該逆猝不及防傍山西竄我軍追至千戶村賊上山梁
避銳見我軍人少復麾眾回撲並分股穿林包鈔我軍因而
小挫彭基品激勵諸軍奮威復進賊勢始卻同日金順率所
部馬隊追勦於整屋之祖菴鎮克獲全捷逆竄終南鎮分踞
田峪口慈峪口等處劉蓉因檄李百魁英毅六營會同黃鼎
彝字兩營由渭北繞出賊前而催調蕭慶高由子午峪趨鄠

縣適穆圖善之後起六營亦由潼關折回西安遂於五月二十日督兵出省穆圖善亦於二十一日率師會剿既抵鄠縣探悉蔡逆尙踞蓋屋之店子頭田峪口一帶僞啟王及鄭馬諸逆分踞樓觀臺黑水峪西駱峪等處傍山依谷聯絡三四十里乃飛咨曹克忠率新募喻正祥龔子雲兩營並撥李百魁英毅六營黃鼎彝字兩營歸其統轄使迅由岐寶繞赴郿縣劉蓉自率湘果右五營穆圖善率衝勇六營及金順馬隊二起進紮南集賢邵家村一帶逼賊而營二十六日穆圖善率所部馬步剿之於店子頭斬百餘名生擒僞統領甘潤伍

救出難民數百名二十七日我軍分路直抵店子頭賊壘自卯迄午賊不敢出我軍正擬收隊該逆突出二萬餘眾分三路撲來我軍亦分三路應之中路楊得勝蕭德經文星明等三營先與賊遇於平林斬偽都統蔡姓金順揮騎鈔擊斬馘遂多賊黨環集彭基品中營遊擊何萬春被礮子貫腦而殞叅將王謨坐騎亦中鎗軍勢稍卻儘先協領米方多爾濟復中鎗墜馬副都統蘇彰阿面帶鎗傷仍力戰不退副將黃金山憤甚怒馬衝敵手刃悍賊七八名眾軍亦斃賊百餘人終以該逆鎗礮太利精銳往往被傷收隊稍憩賊遂分兩路逼

湘果右營副將李遂勝急令分道迎擊斃賊二百餘名斬紅衣賊八名逆勢遂卻副將彭基秀見中路喫緊揮眾直前賊見其右路敗退分悍黨萬餘潛由大路繞出我軍之後總兵鍾玉勝唐友勝率馬步橫出截擊賊勢復退鍾玉勝衝入賊隊被洋鎗穿脇猶負痛力戰穆圖善見賊趨重右路親督親兵及金順馬隊大呼馳突而前謝正球唐友勝夾擊之賊始大敗回奔我軍追殺五六里斃賊千餘人方欲收隊忽樹林中逆匪數千反撲而來總兵蕭餘勝周東升彭基秀等賈勇迎勦各營亦回軍環擊賊勢披靡奔北鍾玉勝唐友勝復衝

出擊之刺黃衣賊目一名掩殺二百餘名救出難民無數曹克忠率所統各營已抵郿縣之青花鎮二十八日黎明出隊至兩河口坡遇騎賊魚貫而來殲七八十名生擒逆目偽祿天義宋先富並賊眾三十四名騾馬四十九匹追至西溝嶺而還是夜見東路火光起知係啓逆出竄乃傳令各軍分路前進二十九日黎明至蓋屋之南樓村雙廟兒一帶見該逆絡繹就道曹克忠自率馬隊將該逆截斷步隊勇進斃二百餘人追至西駱峪新口峪等處復斃二百餘人獲牲畜三百餘頭啓逆部下偽天將葉毓廣等各率所部詣營降是時

僞扶王陳得才川匪藍二順銳意東竄藍大順曹燦章已先
後撲滅蔡啓鄭馬勢亦衰弱故狼狽相依合而爲一髮逆已
不足患矣而甘肅平涼之回自官軍進逼後閉城固守不敢
復出雷陶兩軍晝夜轟擊賊亦多方備禦迨圍攻旣久糧食
火藥漸不能繼雷正綰等偵知其情暗中多備雲梯約於十
九日黎明同時內薄城下架梯直上城逆始用鎗礮抵拒久
之漸稀各軍奮勇齊登殲斃不少餘逆大開西門向瓦亭奔
竄官軍跟蹤追殺二十日進逼瓦亭其城經回逆增修頗稱
完固而前臨河道後倚高山官軍方籌仰攻殊該逆先已膽

寒遂於二十一夜向北路竄遁驛路因之稍通當平涼未破時有靖遠所屬之李俊堡回目張保澂具稟投誠護理總督恩麟委署甘肅臬司楊柄銓署甯夏鎮總兵穆隆阿等前往查辦旋據稟報張保澂已計取鹽固兩城生擒逆目花萬六等八名搜獲印信十顆楊柄銓等將取道劉家井李俊堡等處徑赴固原等語固原在瓦亭之北固原旣復則北路無虞官軍進剿宜先向張家川蓮花城矣而蔡啓諸逆猶在鄠縣蓋屋之間官軍亦移營進逼六月初七日該逆出攻南北淇水二堡穆圖善率金順及湘果右軍先鋒營馬步馳往援剿

偃旗繞出賊前鏖戰逾時賊敗而卻斃四五百名並斬紅衣賊目五名生擒百餘名先鋒營張步霖由左路盪挾而前掩殺甚眾餘賊數百名被逼乞降忽右路大股突出援應我軍縱馬突圍而出僅生擒二十餘名賊眾遂合隊歸巢嗣是賊不敢擁眾盡出每於夜閒肆掠穆圖善督各起馬隊亦於五更邀擊迭被擒斬獲騾馬麥麩亦多曹克忠於初四日移營棗林村邀截啓逆運糧之眾斬長髮老賊七八十名生擒二百餘名解散者甚眾初八日出隊黑水峪西以新降之葉毓廣爲前導直抵賊堡葉毓廣爬牆先上砍斃數人伏賊分三

路前來我軍奮力衝出天色未明該逆自相攻擊葉毓廣復率眾衝入賊中賊始大潰歸堡十八日曹克忠移營黑水峪西岸築壘甫畢該逆分路來犯啓逆以馬步萬餘衝曹營蔡逆所派馬步七八千由下游渡河直壓龔良臣等營曹克忠派洪殿元王得勝葉毓廣各軍以禦蔡逆之黨飛調英毅彝字等營會勦而自率親兵及周有貴喻正祥龔子雲各部由南路攔擊啓逆該逆未及渡河卽被我軍擊退而進勦蔡逆各軍將該逆壓退三次該逆仍力抗如初曹克忠急馳往助適英毅彝字等營俱至我軍佯退誘之該逆追撲而來我軍

吶喊齊奮殲四百餘名該逆遂向東潰走是夜三鼓曹克忠遣卒渡河偵探獲老賊數人訊知啟逆有移營之舉乃派隊六成渡河馬前而步後十九日黎明齊抵東岸見逆眾向東狂竄急揮馬隊向前包鈔周有貴王得勝從後掩殺斃賊數百名龔良臣直前追勦逆堡中一時火起我軍冒火前進將逆眾截回殲斃千餘名生擒二百餘名獲騾馬軍械無算羣逆搶過就峪河而逸拔出難民甚多是日穆圖善親督馬隊繞過焦家巷察看賊情遇鄭逆攜糧股匪亦追殺數十名再探啟逆已移紮界上寺之西老堡餘黨分屯焦家巷曹克忠

因移紮就峪河西岸劉蓉移駐店子頭龍過寺一帶穆圖善移紮豆村該逆乘我軍移營出六千人沿河列陣以馬隊繞出湘果新後營之後唐友勝因率馬隊由樹林繞出阻其歸路以步隊吶喊撲之該逆遂退馬隊截之於河干勁弩齊發斃十餘名賊敗而返走追我軍方回馬逆復分路而至我軍亦分路應之右路爲蕭餘慶鍾玉勝所擊左路經周東昇彭基秀追勦鎗斃其先鋒馬賊勢微卻乘勢掩之斃賊數十名馬五匹自諸逆合併人數旣多妖箴復熾劉蓉因調湘果中軍蕭慶高前來會勦並咨商李雲麟分駐華陽江口四畝地

各隘二十四日五鼓曹克忠自率將弁往就峪河岸查勘地勢逼近賊巢該逆羣伏未出及沿河東下忽見馬步賊黨千餘人散列黑峪河東比經馳勦斃十餘人擒二十三人解散百餘人餘逆紛潰正擬收隊回營忽蔡逆率數百人已抵河干曹克忠直前縱擊諸將知蔡逆親來爭先包繞鎗矛環擊蔡逆心慌落馬逆黨拚命擁護王得勝棄馬往擒被亂矛傷其左腿周朝班躍馬而前亦被鎗傷其坐馬羣賊環擁蔡逆馳竄我軍窮追及其巢而後返是役斃悍賊近百名生擒三十餘名回營研訊一爲蔡逆之弟僞號八帥主一爲蔡逆之

表兄謝玉春據供蔡逆因官軍緊逼意圖偷渡渭河竄往岐鳳本日因察看渭水不意忽遇官軍等語比經正法軍前因飛催雷正綰抽撥四營移紮鳳翔一面繕諭散其脅從由是賊中自拔來歸者相續蔡逆雖嚴密稽防不爲少止六月二十七日總兵鍾玉勝收降蔡黨僞都統王洪興五百餘名七月初二日記名提督河州鎮總兵曹克忠收降啟黨僞天將王克昌彭學進等四千餘人初三日總兵黃金山招降僞中旗鄭永和等五千餘眾並將所踞淇水二堡獻出初四日曹克忠又收降啟黨僞天將羅啟發徐昌先等八百餘人於是

啟逆之黨僅存三四千人諸逆箝束加嚴用刑尤酷堅壁固守不出適湘果中軍蕭慶高自洋縣前來何勝必亦自棧道至兵力較前稍厚遂商定初六日出隊以何勝必及道銜知府劉縉進擊樓觀臺東堡說經臺玉華宮等處之賊曹克忠所部六營及新舊降卒進擣塔峪堡魯馬堡之賊孟宗福黃金山等六營進攻大峪西堡蕭慶高湘果中軍及彭基品親兵五營進攻焦家巷老巢並飭李百魁英毅六營會剿而令黃鼎彝字兩營繞上塔兒坡爲奇兵劉蓉自率驍騎穆圖善率圍隊並金順馬隊往來策應是日黎明李百魁先至進攻

焦家巷老巢逆眾三四千人列隊以禦勢甚猖獗曹克忠飭王得勝洪殿元留堵魯馬堡而自率親兵及周有貴葉毓廣等馳應逆勢返奔追殺數十名將近堡前該逆第二重隊伍突出我軍佯退一里許適金順蕭慶高馬步踵至兩面夾擊斃賊二百餘人曹克忠見焦家巷軍勢已穩馳回魯馬堡我軍方拔城外木柵而焦家巷援賊亦至奮力卻之蕭慶高攻其北面逆眾出卡迎戰我軍奮勇猛撲拔梅花椿十數重用火器環擊斃老賊三百餘人生擒數十名蕭舉臣何基等直奪其卡英毅軍亦賈勇而進該逆繞濠狂奔我軍大呼乘

之總兵劉玉興追近堡前手刃數人策馬衝入堡門伏矛中其腹落馬我軍奮前搶護堡門旋闔我軍分勦堡外逆眾二千餘人迄無漏網賊目僞都統四僞巡部一亦殲斃焉堡中之逆堅伏不出彭基品各營由田峪東岸渡河方抵焦家巷遙見說經臺逆搖動白旗從後路包鈔而來急以後隊作前隊列陣以待鎗礮之下斃賊數十名鼓而進之賊敗上山坡不敢回巢劉蓉商令各營先勦旁壘穆圖善親督所部進擣大峪西堡逆眾死守不出穆圖善誓眾嚴督忽降將鄭永和自告奮勇願率眾立功奮身負盾先登降眾繼上黃金山攻

其西劉定邦攻其北亦同時緣梯搶登堡門尙閉我軍三面
踰垣而入搜殺無遺其跳縋而出者亦爲圍隊所戮生擒僞
目六人及僞震天福楊必南僞智天燕余忠厚何必達任占
鼇等皆立時正法遂乘勝進攻樓觀東堡何勝必劉精實已
於黎明先至與該逆鏖戰多時遊擊周萬祥都司龍鳳彬陣
亡總兵唐友勝膺受矛傷何勝必之馬亦中鎗子堅持力戰
逆遂敗退回巢我軍焚其迤南之香林山廟宇攻克三明碕
殲其踞匪適大隊馳至分路進攻蕭慶高所部砍開木城拔
毀梅花椿彭基品楊得勝蕭德經等由東北隅緣梯上堡不

期東南兩路之賊分隊來援都司朱得二龐大洪蕭孝林守備陳貴和周世英千總周玉田等均以先登中礮而殞我軍因徐徐撤隊該逆亦不敢復出魯馬堡之賊聞樓觀堡礮聲復出搦戰經曹克忠督隊奮擊復斃百餘名生擒三十餘名該逆仍退匿堡內龔良臣喻正祥龔子雲等進攻塔峪堡龔子雲腿被鎗傷負痛前進黃鼎從山上衝下夾擊正相持閒曹克忠督馬步由北繞出殲二百餘名生擒五十餘名黃鼎復遇賊於山坡亦斃百二十餘名生擒八十四名忽山腳擁出騎賊百餘山林中又擁出步賊二千餘張玉文按隊不動

俟其撲近以火器鎗礮齊轟該逆退走不及墜崖落澗者甚眾揮軍乘之掩殺二百餘人其對面之山梁亦經副將顏明亮楊定春同時掃蕩賊之逸免者少鏖戰竟日精銳雖有傷亡而斃賊實以數千計此初六日劉穆曹三軍會剿髮逆之惡戰也雖未得應手撲滅而賊膽已寒初七日移營就峪河東岸穆圖善所部亦移營與曹蕭聯絡復由西安調取大礮剋期滅賊初十日礮至遂於十一日進攻樓觀各堡是日黎明蕭慶高何勝必彭基品劉縉等軍四面排列以大礮轟牆不意土性堅凝礮不能穿施放三時屹然無恙乃傳飭諸軍

搬取雲梯四面環逼蕭慶高一鼓直前拔毀梅花椿逕抵牆下該逆蜂擁而出我軍刀矛齊進僅斃數十人該逆旋即折回我軍乘勢趕殺砍開木城何勝必亦逼近牆腳牆上礮石交加我軍不避危險將梅花椿全拔奮力猛撲忽西堡出賊二千餘人來援何勝必擊卻之彭基品劉精等裹創進逼都司劉智武陣亡叅將劉世俊被礮子洞穿胷背千總朱遠陸吳相全等均帶重傷弁勇受傷者更眾我軍志在必破不爲稍卻梅花椿已悉數踏平正緣梯登堡之際忽雷電交作大雨傾注諸將尙冒雨力攻無如梯溼牆滑火繩不燃而賊立

牆頭身有所蔽反得以肆其擊射功虧一篑無策可施該逆
殘喘得以苟延亦數之未遽盡也劉蓉穆圖善等商定傳飭
諸軍挖掘長濠濠外復樹之以柵又慮其寅夜兔脫飭諸軍
各以四成巡哨而責令降將鄭永和率眾潛伏以防偷越乃
十二日夜更定後濃雲昏黑大雨傾盆蕭德經楊得勝王謨
文星明等方入林暫避忽見樓觀各堡之逆銜枚東竄我軍
吶喊出撲該逆自相踐踏鼓銳乘之擒斬無算其踞說經臺
之偽將軍李春年偽都統蔣洪順任洪興等先經約期出降
是夕僅投出千餘人據供稱該逆本圖西竄不意官軍三面

圍逼無路逃生祇得分路翻山竄走約會於新場再定去向等語於是前左後及雄毅各軍由田峪口馳出邀截時焦家巷蔡啟諸逆冒雨圖竄就峪口經曹克忠飭黃鼎葉毓廣等軍列隊在前賊乃折由塔峪山路九如溝等處越山而遁穆圖善率劉定邦黃金山金順等馬步冒雨前進三更後擊之於塔峪該逆驚慌失措我軍刀矛排刺墜崖落澗者眾復值大雨驟至鎗礮難施未能盡殪至十三日辰刻始還蕭慶高彭基品諸軍踰東瓜嶺五六里已將匿溝伏林之賊殲盡忽山下悍賊列隊回拒我軍奮勇而前把總余占彪郭青海遇

害楊得勝王謨龔南山等徒步而前大呼陷陣各營齊施火
器賊遂不支我軍乘勢掩殺六七百名生擒三百餘名解散
脅從三千餘人何勝必所部馳出田峪口十餘里悍賊踞山
巔設卡回拒伐巨木橫塞隘道李遂勝劉精蕭餘勝等攻破
卡隘鎗礮仰攻斃賊七百餘人墜崖死者無算該逆越山狂
遁追至川碕子地勢愈峻該逆復將回拒適蕭慶高彭基品
由山坳繞下就勢夾擊該逆膽落奪路狂竄我軍乘勢縱殺
斃長髮四五百人墜死與淹死者尤多追至鐵爐岔輜重馬
匹遺棄盈路時日已暮矣我軍枵腹窮追已歷晝夜一週十

四日蕭慶高率隊亦追及金牛坪一帶兩巖壁立僅通一澗水勢湍急山徑陂陀僅殲數十人該逆向秦嶺馳去連日所斃約以萬計當諸逆合併之初其眾尙四五萬經此次勦斃解散降順計三萬有餘所存不過萬餘人惜未得聚而殲之南山之內歧路紛出未卜該逆所向扼勦猶需另籌耳維時僞扶王陳得才回援金陵晝夜東竄已至麻城穆圖善派往援鄂之二十八營經官文派往麻城防勦各營不相統轄無所稟承劉蓉因奏請

勅下穆圖善前往督辦而以埽除髮逆自任旋奉

上諭著穆圖善赴甘凡以髮逆之患較輕於甘肅之回也雷正綰等自攻平涼瓦亭後卽籌進攻張家川奈自七月十四日起大雨連綿至二十八日始霽而自隆德至張家川山澗層疊逆回於石壁上堅築兩壘俯瞰我軍遂於八月初一日直薄木城分撥勁旅由田家山奪其巢穴該逆馬步萬餘猛出抗拒我軍奮勇前進逆卽返奔我軍進逼木城該逆倉皇失措奔回城內用礮石紛投陳義右腿受鎗子傷猶復力進范銘頭受鎗傷亦裹創力戰無何暴雨忽至不得不傳令收隊是晚商定陶軍列營田家山更移數營紮木城之外初二

日全軍復出逆黨馬步列隊愈多我軍攀拽木城裸體奮進均被鎗礮擊退仍未能克初三日卯刻先授機宜派總兵譚玉龍胡大貴沈懋貴副將趙占魁鄧全忠等循南山列陣以截上山竄路復派總兵張在山陳開泰副將徐尙高趙德正劉勝元袁朝貴等軍越濠很撲副將劉效忠叅將雷恆各帶馬隊往來游駛以誘賊而防援陶茂林督提督張在德知府陶兆熊總兵蕭餘勝副將陶生林等營高據田家山我軍勇氣百倍先將木城焚燬斃賊千餘名各小壘亦一律踏平陶茂林督副將張明亮楊洪春陶世貴等直攻土城西南至申

正該逆鎗礮漸稀遂同架雲梯一擁齊上火器競發該逆火藥房自轟燒斃無數逆遂驚潰開西門奔竄我軍攔途截殺前後夾攻約斃五六千名投井自縊焚斃者更難數計生擒二百三十一名訊明正法獲大礮四尊軍械騾馬無算餘逆向龍山鎮狂奔遂將張家川老巢攻克時都興阿攻克寶豐因兵單逆眾奏請

濟師而河州紳民赴營控訴恩麟派勦河州之趙必達恇怯無能經雷正綰同時具奏奉

上諭著曹克忠迅赴本任不准劉蓉再行奏留雷正綰擬俟

龍山鎮等處克復親督各營直趨隆靜就近察看固原情形
順道北向與都興阿之軍會辦甯靈卽著會同都興阿妥籌
夾擊趙必達劣款著雷正綰查明如果防練疏忽恇怯無能
務卽嚴叅懲辦一面派知兵大員前往接統欽此當張家川
城破之際有龍山鎮援賊數千在土城外助勢及見我軍登
陴始偕縋城之逆向巢狂遁雷正綰與陶茂林商定乘其疲
憊疾馳擊之遂各派隊七成跟蹤追殺該逆奔馳回巢閉城
固守該鎮城堅濠濶周圍將及十里進攻非易乃於各隘口
暫駐更番圍攻該逆見全軍壓境自知難敵遂於初七夜開

門潛遁與蓮花城逆合股我軍追剿僅殲其婦女老弱致該逆未受大創爰籌進剿蓮花城偵察賊情則有鹽關河狄之回糾黨援助雖相距僅十餘里而卡壘重疊設守甚嚴正躊躇間忽接楊柄銓六百里飛稟云八月初四日四鼓陝回孫義寶潛帶賊眾四千餘人直逼固原西門攜帶雲梯蜂擁而上又有城中陝回赫明堂爲之內應大開東門賊眾擁入固原復陷等語逆回之反覆如此驛路復形梗阻大局堪虞不能不回軍勦辦因商定急攻蓮花城剋期掃蕩督戰益急遂於十四十五等日斬隘直前賊眾極力抗拒陶茂林設伏繼

進賊始潰敗遂將邵家堡馬家堡攻克殺賊二千餘人獲電
械牲畜無算十七日黎明督軍進至蓮花城賊傾巢而出兇
悍異常我軍東西攻擊賊漸返奔追殺數百名將近賊巢山
溝伏逆突出約將萬餘拚命狂撲我軍已經深入收隊不及
雷正綰正督軍力戰而賊馬逼近矛戟直刺而來回頭急避
遂於領下刺破寸許深入數分雷正綰恐驚眾心裏創力戰
奈血流過多頭眼昏暈又兼賊勢極眾蜂擁而來力遂不支
致陣亡官弁勇丁一千餘名僅得收隊回營未至覆敗因奏
請

勅下曹克忠率所部諸軍迅速來甘助勦奉

上諭著穆圖善凜遵疊次諭旨迅卽統率所部赴甘會同都興阿雷正綰妥爲籌商應由何路進兵助勦均著相機辦理都興阿一軍已抵靈州花馬池能否與雷正綰聲息相通並著酌度機宜先與雷正綰等軍聲勢聯絡再行節節進兵勿稍大意並著曹克忠一軍迅速入甘與雷正綰等聯絡進攻其鳳寶一帶卽由劉蓉妥籌兼顧江西軍務漸次肅清楊岳斌卽遵前旨將應辦各事宜移交鮑超劉典沈葆楨會籌辦理迅卽酌帶所部剋期赴甘何日起程並著先行馳奏欽此

時八月二十九日也乃蓮花城逆驟勝而驕十八十九等日分遣悍黨撲營陶茂林壘尤近敵堅壁不動俟其力懈出精銳擊之連日斃賊一千有餘雷正綰傷已稍平乃回逆於二十八日分馬步繞越旁面兩山直窺後路營盤或踰溝暗襲或憑高俯壓雷正綰復僞令扶舁出營周視令諸軍示之以弱而嚴陣以待俟其將近復調縣丞雷聲遠設伏夾擊該逆自相驚潰向山陬紛竄連日擒斬亦多數戰之後軍中膽氣益壯商同滾營前進逼城數里列營九月初七日該逆欲襲我軍後路分股由白羊山繞數十里外撲龍山鎮後營我軍

四面圍截賊見出路已斷拚命衝突經我軍陣斬甚多落澗者尤眾而固原復陷之後雷正綰料其必襲平涇預由平涼十營內抽參將馬天祥紮涇州北原之合道街又由行營抽派譚玉龍袁朝貴劉勝元等三營馳回涇州已而固原之賊果至平涼經提督劉正高擊退復分股萬餘踞黨原圍合道街營譚玉龍等用奇設伏殺斃七八百名生擒四十餘名奪獲騾馬甚多該逆旁竄鎮原一帶而去未幾曹克忠督率所部至蓮花城由是軍威益振分派諸營層層進逼挖掘地道該逆亦於城內掘濠轟裂地道各營苦攻半月有餘斃賊不

少十月初六日諸軍齊奮遂將蓮花城攻克短兵巷戰斃賊數千餘逆向鹽關竄去雷正綰因河州逆回猖獗蘭州省城無兵可遣商令陶茂林督率馬步十七營前往省垣復奉上諭勅趙必達一軍及省城一帶防剿兵勇悉聽陶茂林調遣卽將西路一應防剿事宜相機妥辦並迅解河州之圍以冀漸次勘定嗣後軍情事件卽由陶茂林與恩麟聯銜具奏俾免稽延蓮花城爲四達之衢地屬秦州與階州接壤現在髮逆竄擾階州逆蹤環逼尤不可不加意防範曹克忠紀律嚴肅所部各營一律精銳卽著飭令暫紮蓮花城居中控制

其張華之軍卽撥歸曹克忠調遣以便進攻秦州鹽關等處
雷正綰現已回軍平涼卽著審度兵勢恢復固原期與都興
阿合兵夾擊肅清甯靈一路賊匪底定邊陲髮逆竄往階州
劉蓉所派追賊之蕭慶高何勝必兩軍現在行抵何處一切
勦辦情形總不見劉蓉詳細具奏殊不可解著卽恪遵前旨
迅速覆奏欽此緣八月初旬髮逆西竄劉蓉卽派蕭慶高何
勝必湘果兩軍彭基品之親兵兩營李百魁之英毅六營黃
鼎之彝字兩營並龔良臣所部之七營悉數越境躡擊該逆
於八月初八日由略陽敗竄白馬關遁入階境窺伺川疆劉

蓉復飛咨四川總督駱秉章嚴防昭廣江油並檄飭鞏秦階道林之望派兵防守徽成禮和至九月初八日該逆攻陷階州維時蕭慶高何勝必黃鼎等營均奉四川總督駱秉章檄飭分防廣元昭化劍州各隘曹克忠所部之龔良臣七營遵旨赴援甘省於是追剿之師僅存英毅親兵八營劉蓉急咨川督告以賊勢窮蹙利在急擊請飭湘果彝字各營進擣階州並請派總兵周達武率師與陝軍會剿而諸軍本係川軍又值陝庫空乏是以思蜀而厭秦藉詞延宕劉蓉因再咨駱秉章並恭錄

諭旨請卽欽遵會勦以靖三省邊境至十月二十五日始准駱秉章咨復已飭湘果彝字各軍進勦階州踞逆並添派武字達字果義等營確探截擊等語此時匪眾誘脅已聚至三萬之多並將階州城垣增高二尺修製器械廣儲麥糧又勾結鹽關等處逆回遙相援應劉蓉因奏請

勅下四川督臣駱秉章嚴飭總兵周達武知府江忠淑叅將劉鶴齡三軍協同蕭慶高何勝必黃鼎等將此股髮逆悉數撲滅並請

勅下護理陝甘督臣恩麟甘肅提督臣陶茂林卽撥此次赴

蘭之軍嚴防該逆由岷州赴鞏竄犯省城之路均奉

旨如所請旣而甘省所派之張華一軍與賊接仗失利退駐佛耳崖該逆挑選悍黨扼守隘口分紮兩水報恩寺東降水入海山舊城山五處遠近糧食鈔掠一空官軍進勦苦於無從覓食致由褒沔略陽探運周達武由文縣進兵則由緜州昭劍探運劉蓉復飛咨陝甘護督恩麟專派道府大員由附近一帶採辦接濟而是時捻匪張總愚又有由楚竄陝之信復飭鎮西軍鄔太愚駐紮商南富水關隴軍黃加焜駐紮山陽漫川關雄毅軍劉精駐紮山陽竹林關而調彭基品一軍

紫寶鳳交界之黃牛鋪以西防髮逆敗竄東備各路應援英
毅六營改歸劉厚基接統何勝必臥病廣元湘果右軍併歸
蕭慶高節制齊集階州時已十一月初旬矣十五日各路約
會進勦達字營攻其南武字營攻其北該逆出其黨數千抗
拒而以數十騎向彝字營衝撲黃鼎俟其撲近奮威擊之賊
卽驚奔由南面渡河復向達字營搦戰並分隊撲武字營右
路被官軍擊敗斬馘甚多鏖戰至暮而去十六日復出大股
彌滿山谷我軍分路疾馳而下該逆遽退入城而城東險峻
之處該逆堅築三壘並將河水引入城中以防挖掘地道蕭

慶高各營因分紮北山諸隘而商英毅軍扼阻舊城深溝高壘以困之劉蓉復咨商駱秉章奏奉

上諭著四川提督胡中和總統三路官軍以後階州勦辦情形卽由該提督專摺奏報而胡中和至軍尙需時日蕭慶高等探悉該逆於兩水地方屯聚糧食分布悍黨因擬剋期攻奪約諸軍分路挑戰十一月二十九日黎明派新中營蕭德見進攻腰道里逆壘副中營彭義益進攻中墩逆壘前後營毛尙升蕭舉臣進攻綏子山逆壘以兩營列山嘴防援兩營進攻王家寨以兩營並馬隊設伏寇家村口而自率親兵策

應詔該逆固伏不出鎗礮如雨乃佯爲收隊而陰令半收半
伏並派馬隊數騎馳驟於西城外以誘之適舊山之賊搶入
北崖圖鈔後路我軍勦之斃十餘人忽城中之賊出援經伏
兵齊起截殺數十人守備姜福元中鎗陣亡因日暮收隊查
城中之逆日往兩水運糧十二月初八日蕭慶高黃鼎等派
隊攔截斃新老賊數百生擒長髮十餘名獲麪麥十餘馱驢
騾二十餘頭周達武函商移三營於東降水山下阻賊汲運
之路初四日黎明各派隊六成分途以往寨中賊伏匿未動
登高望之遙見賊中人眾紛紜知其必有詭謀迨周達武赴

河干列隊逆遂開門湧出周達武令以鎗礮擊之倏山上賊旗搖展東門之賊蜂擁而來蕭慶高率趙明魁等由毛嘴山截之斃黃衣賊二十餘人賊猶死抗復派蕭啟基攻其右杜榮慎鄧先升彭義益攻其左斬執旗賊六名擒老匪二名逆勢乃卻正追殺間忽聞木魚溝礮聲遣卒探之乃英毅副中營王九齡右軍副中營譚獻定攻破逆卡冒水山及西門之賊正馳往援應適蕭舉臣毛尙陞與右軍王全志周東昇鍾玉勝彭基秀由各澗四出包鈔鎗礮齊施斃賊數十名該逆揮刃止退我軍乘勢壓下復斃賊數十人賊始奔潰是夜三

更據探報逆眾千餘馳赴東降水蕭慶高卽傳令五更出隊
果見該逆在嚴家灣修壘城中之賊出趨范家坪時周達武
方撲東降水逆壘蕭慶高卽派隊四出亂其軍心並逼龍王
廟逆壘拔梅花椿數十重將上牆垣忽西門出賊援應蕭舉
臣喝令眾軍毋退親率精銳進逼逆巢不意劈山礮發逕中
頭顱陣亡幸前左兩營同時獲捷該逆始退入城是役斃賊
數百我軍陣亡之總兵蕭舉臣守備姜福元均奏蒙
賜卹如例該逆因敗北憤甚分股千餘直逼彝字營鏖戰多
時逆屍狼藉蔡逆大呼督陣黃鼎知其志在兩水亦申令將

弁力戰于總徐占彪率勇敢百餘人從鎗矛中奮勇直前竭力衝擊蔡逆亦手刃數賊壓隊來迎我軍志期必克猛力齊奮斃賊過半賊乃退去是夜該逆太字營僞統領李三奇葛輝江僞先鋒李樂山田少儀等率老賊十餘人叩關投誠據供稱是日蔡逆身受重傷並自斬其退縮之統領等語適四川廣元縣知縣梅震煦稟稱探得蔡逆詭謀欲以啟逆留踞階州牽綴官軍而以銀二萬兩向番民買路由南坪出竄番民虞其詐赴周達武營中納款周達武疑而卻之番民復赴劉鶴齡果毅營中具訴諸軍因各派一營前往設伏而留重

兵於階劉蓉亦慮番民難信但飭嚴防其竄蕭慶高復傳諭
十一日黎明出隊偃旗銜枚而往時果毅營築壘南山該逆
分隊往撲周達武江忠淑率眾營兩面夾擊蕭慶高復飭諸
軍分攻墩上龍王廟毛嘴山真武山姜家山木魚溝等處逆
壘各軍逼近逆濠礮聲雷震各勇猛升而前逆壘中火藥傾
下仍未得手而西北兩門援賊復至經我軍重創之而去連
日奪壘未克斃賊數百名並陣斬僞都統曹柳王羅四名僞
先鋒十餘人由該逆乘虛竄至盡得地利故官軍急難著手
也雷正縮回軍平涼妥籌後路於上年十二月初九日派提

督劉正高三營總兵胡大貴五營總兵譚玉龍三營並副將
鄧全忠沈大興袁朝貴參將余萬明等各帶所部及副將劉
效忠雷恆馬隊由瓦亭進攻開城當斬逆匪數百人生擒十
餘人獲牲畜器械甚多初十日親督再進相持之際賊以馬
隊遠駛意圖鈔襲我軍亦以馬隊張兩翼禦之賊勢漸懈我
軍齊奮乘之遂將逆壘十九座一併踏平焚其帳房旗幟斃
悍賊千餘生擒百數十人並僞帥馬朋林耿懷民二名窮追
二十餘里復斃二千餘人因見賊步多於馬大異平昔恐其
別有狡謀急密致曹克忠嚴防旋接曹克忠覆函云初九日

會同張集馨三營將高家堡攻克又於十四日在楊家山大獲全勝陣斬五六千人生擒三百餘人賊分兩股東竄一趨平涼一趨華亭現已派隊尾追等語雷正綰得信卽率親兵及馬步各隊窮追一晝夜馳三百餘里及其竄平之一股於花所鎮地方曹克忠所派陳尙文魏得春率領馬隊趕至華亭該逆見後有追兵復合爲一竄至靈臺扮作官軍闖入縣城該縣遂於十八日未時失守署知縣祝賓賜殉難幕友孟際雲李方玉姚輯瑞楊蘭畦並各家丁同時遇害外委李培滋緝城先遁教諭史繼尹典史徐承澍出城辦糧未回雷正

縮隨卽趕至鎗礮雷轟該逆知不能守奪門出竄被官軍斬殺過半餘逆奔涇州南關官軍復勦之殘逆由荔家堡西竄余萬明截之於黨原擒斬淨盡雷正縮仍回開城據拏獲奸細羅葫蘆供稱此股逆匪係孫逆由郭城驛調來令裹帶乾糧竄陝西意圖牽制又諜知孫逆挑選馬隊萬餘人分爲數股亦將出竄雷正縮因會商曹克忠統率所部攻打蕭何城而以張集馨赴省之三營作後路接應雷正縮自帶親兵並所部數營攻打彰義堡其圍攻固原各營依舊屯紮蓋以二堡係逆眷所在倘該逆親援二堡各營卽可就攻固原也第

是時民人離析土地荒蕪軍中採辦維艱漸有乏食之患乃州縣承辦麥麪有星火之急時勢至此苦亦極矣張集馨交卸陝撫復奉

旨赴甘肅省城會同恩麟籌辦軍務隨帶三營行至隆靜之間以無糧不能前進雷正綰因奏留行營暫駐而洮州土司楊元本宋臣楊業苗裔世轄洮番漸臻富庶至是詣曹克忠行營具稟領帶本部馬隊番兵効力等情比經奏奉

上諭准調取千人歸曹克忠統帶時官軍馬隊尙少不敷馳逐而逆回所恃在馬無以制之適陳得才藍二順兩逆同時

勦滅十餘萬眾悉已於鄂豫投誠因奏明咨調副都統蘇倫保常星阿溫德勒克西富森保四起馬隊迅速赴甘會勦值髮捻有竄逼潼關之警劉蓉奏請

勅下曹克忠回援陝西雷正綰以甘省勦回緊急曹克忠未便赴調惟派出之總兵傅先宗由湖北募到新勇至陝時可酌量截留防勦等情附片陳奏奉

旨悉如所請時同治四年正月十六日也維時圍攻階州諸軍偵知蔡逆有乘臘底出竄之信遂商定預撥勁旅分撲其壘上年十二月二十六日黎明齊抵逆濠攻墩上之壘該逆

亦分路迎敵當斃執旗賊八名逆黨三十餘名正欲搶上卡門忽河邊大股援至蠡擁上山我軍分左右夾攻復斃賊數十名壘中噴筒火毬紛下如雨致我軍亦傷數十人是日劉厚基蕭德綱張華等營攻撲新壘亦未得手據擒賊供稱蔡逆被創之後每於夜間偷赴兩水窺探意圖奪路狂奔蕭慶高等諭令嚴備各造擋牌篋箕鏡鉤各攻具初四日黎明同時並起仍先攻龍王廟墩上各逆壘該逆出隊迎敵我軍孟學文鄧光升杜榮慎等率隊直前一擁齊上砍悍賊三十餘名生擒十名逆潰入卡施放火器蕭德見蕭啟基等揮軍奪

卡各勇左撲右攻愈進愈猛已拔梅花椿十數重該逆拚命力拒值嚴家灣逆壘已經周達武攻破蔡逆心益憤懣親率三千餘眾來援毛福益彭義益蕭德見蕭啟基等從山左右鈔出迎擊蕭慶高令親兵由壘脊衝下陣斬四十餘名乘勝進逼城根該逆不支紛奔下山而去據擒賊供是日陣斃僞孔都統一各僞先鋒周梁張李等四人損折精銳不計我軍亦陣亡叅將劉厚俊千總李鎮川二員及勇丁三十餘名而劉厚基蕭德綱張華黃鼎等分攻文昌宮前村等處進逼壘下拔去花籬亦以壘上鎗礮懸擊未克劉厚基喪其坐騎初

六日該逆於城北半山增築新壘以阻我軍初七日黎明出隊往勦該逆以千餘人分站山坡我軍鎗斃其先鋒十餘人賊勢漸卻武字營由山嘴夾攻我軍爬上山梁登時踏破新壘將壘逆悉數殲除維時中軍左營分哨與右軍中營同攻龍王廟逆壘亦斃其先鋒等數十名逆遂大潰入壘闖校場壩礮聲不絕則東路之匪亦經周達武擊敗入城是晚該逆復於城北山腰添築一壘蕭慶高商定乘其未固一鼓盪平乃飭彭義益蕭德見由左進而留兩哨牽制龍王廟之逆令蕭啟基揚隊墩上綴住舊巢之逆令毛福益伏山右坡下以

禦援逆並知會右軍挑戰派馬隊由木魚溝馳驟而進自督親兵策應約周達武協攻初九日卯刻各軍依令齊進該逆以二千餘眾三路包鈔蕭慶高親援枹鼓各勇奮不顧身搶進逆卡隙地殺戮甚多武字三營復從左襲來將逆眾圍困約半時許賊大潰亂我軍衝至濠邊冒險猛攻拔去鹿角數層彭義益揮眾上牆用火蛋延燒賊柵武字營同時掩入逆黨盡殲將新壘立即踏破蔡逆乃縱城內黃衣隊從西北兩路鈔來墩上之逆亦出巢援應我軍窺定賊間併力環攻大戰兩時之久各路悍逆皆退我軍躡至玉皇廟三官殿城根

蔡逆急撤弔橋未及入城之賊悉經俘斬再查墩上逆壘悉由城中運濟蕭慶高因撥營填紮所破新壘以絕外援然後知會周達武商令各營出隊分道牽制初十日蕭慶高率所部及英毅彝字張華諸軍於梨子山腳逆壘開挖隧道轟陷外卡該逆拚死抵禦互有傷亡蔡逆率其親黨千餘人夤夜來援補造木城黃鼎乘其未竣五鼓出隊直趨壘下李秉忠首先上牆中礮而殞童南山亦中鎗墜地我軍小挫十一日張華引隊先出該逆悉眾來迎蕭德綱劉厚基分兩翼策應彝字英毅兩軍四面包鈔斬殺甚眾生擒黃衣賊八名逆隊

紛紛入壘是夜三更探報該逆復於北山半坡添壘冀衛墩上之巢十二日昧爽我軍整隊前進該逆督大股列隊以伺而挑悍黨伏壘上我軍齊力猛進斃賊數十名其勢已卻我軍乘勢掩殺直至城邊啟逆用鎗礮抗拒急不能近時彭義益蕭德見及武字各營攻撲新壘拔去梅花椿一面施放火器一面挖其壘址該逆礮石紛投擋牌盡裂總兵張怡輝都司鍾九思奮勇爬牆均中礮殞而西門之賊復來援經湘果右軍迎擊毛福益由龍王廟左鈔出蕭慶高由右壓下逆始奔潰十二日三更時忽見坡下逆壘火光燭天知其有失乃

飛令各營精銳執擲牌雲梯前往奮力搶上以火器四面環拋蕭德見督隊爬牆斃賊二百餘人遂將逆壘踏平十四日右軍營務處李遂勝以中後左右四營埋伏自率親兵副中先鋒三營直撲賊卡俟該逆迎拒佯卻以誘之離巢旣遠伏兵齊出殺斃甚多賊敗回城我軍追抵城下拔椿數重燒燬糧房磨房十餘間獲米糧十餘石麥麪無算副將雷齊泰衝近城邊中礮陣亡連日擒斬近千獲牲畜器械尤多墩上逆壘旣平商定進攻兩水賊見我軍三面進逼亦遂連環築壘訊據擒賊供稱文昌宮賊糧亦由城中運送乃議於鐵堡山

黃家壩一帶先行堵塞以斷其路十四日黃昏城中之逆果陸續由舊城山腰趨趙兩水十五日黎明悍賊分股以出由黃家壩一由梨子山而來我軍蹲伏以俟迨賊蜂擁近壘將欲拔離越濠我軍火器齊施兇燄旋熄劉厚基蕭德見及武字營趁勢奮殺該逆前後受敵紛紛奪路逃生是役斃三百餘名擒悍賊三十七名據供蔡逆假子僞四千歲並先鋒統領數名同時殲斃十六日黃鼎率降卒赴鐵堡山上游大呼招降於是僞都統周正貴僞輔軍曾光斗僞統領李三順周興胡興順等十餘人率其部眾舉壘來降黃鼎分隊進紮

其壘挑選精壯二百人分爲兩哨俾作前鋒其餘悉數資遣
十七日武字右路三營亦渡河進紮不意鐵堡山上下賊營
及平字大字日字並西婁東防南璧西奎等賊營逆眾俱宵
遁回城十八日河南及舊城山逆壘亦皆撤退是日胡中和
至各營將領齊集正會商圍逼文昌宮逆壘詎該逆卽於十
九夜由西路翻山潛遁蕭慶高聞信卽派劉厚基蕭德綱黃
鼎劉鶴齡並英毅五營裹帶乾糧跟踪追勦並令先鋒馬隊
由小路迎頭截擊黃鼎疾馳五十餘里追及後隊之賊收降
三千餘名餘逆竄高家村經林之望率團迎擊截住隘口蕭

慶高復派蕭啟基會同彭緒慶馬隊繼往胡中和亦派右軍一營續追旣而蕭德綱張華及英毅彝各營疾趨至高家村前截後勦傷賊已多二十夜四更該逆復由東村越嶺狂奔前隊竄至呂家山遇蕭啟基彭緒慶登時誅戮無遺於是英毅武字果毅各營分兵躡勦張華與黃鼎兩軍由野牛寺前進過竄禮縣之路奔馳六七十里抵洞門前將該逆全股截住適英毅武字果毅諸營踵至該逆飢疲已極經我軍前後鈔擊陣斬僞頭目蔡三蔡同榮蔡起世等千餘名餘黨棄械乞降當各營馳追之際蕭慶高慮城逆繼遁派兵勻紮各壘

晝夜嚴備據拏獲奸細供稱蔡逆急思奔竄見官軍防守周密無隙可乘日夜哭泣等語自是官軍益加戒備迨各路追剿師歸長圍環合髮逆之患已輕所憂專在回逆矣雷正綰於正月十六日派提督沈懋貴由六盤山直擣彰義堡提督譚玉龍劉正高等十一營逼攻固原十八日沈懋貴進至彰義堡該逆倉猝無備驚懼潰逃遂將該處老巢及大小回莊踏平斃老弱七八百名曹克忠亦將蕭何城附近之高家嘴新店子紅城子將臺堡隆德堡等處回巢攻毀將悍黨擒斬略盡其未經助逆之回經回目張保濬約集監生蘇上達等

顛懇繳械投誠文生康英張鐸等聯名結保隆靜一帶略就安帖遂一意規取固原二十三二十四等日滾營直薄西南城回目張保澐亦率領降回助戰連破城外逆壘十五座斬馘千餘四面之圍遂合孫逆枯守城中糧食漸盡我軍晝夜環攻二十六日該逆出城列隊馬步均五六千經我軍縱橫盪抉斃僞元帥馬得力逆鋒頓挫我軍掩殺至城下斃賊約計千餘奪戰馬六十四匹生擒逆目三十二名賊膽因之益落良懦回民曾隨張保澐就撫者陸續縋城來歸備悉陝回計窮甘回各思自全願爲內應約日舉事遂飭張保澐密約

城內六坊阿渾伺機開城擒縛孫逆一面開挖地道多造雲梯二月初一日雷正綰親督各軍於西南隅豎梯登城嚴飭胡大貴饒得勝沈大興鄭天順等攻撲東門沈懋貴徐尙高譚玉龍余炳忠等攻撲西門城上木石如雨傷我勇丁譚玉龍劉正高督率各軍衝冒矢石肉薄孫升內應之回果乘機內變倒戈巷戰守城之賊被我軍斬殺淨盡孫逆自殺家小雜入稠眾中陝回皆自相殘殺僅贖馬賊二三千人奪北門逃逸我軍緊躡追勦張保澂亦率降眾層層截殺斃賊五六百名餘逆向黑城子一帶狂竄是役殄戮計四五千生擒逆

自楊長齡花祿馬得勝花二李自春王有貴海朝蘇得名等二百四十三名獲軍械火藥無數搜出固原道州及提標叅將等官印信三顆固原遂已克復查固原本係重鎮爲提督巡道之所駐城高而堅自同治二年遭陝回穆三叛踞復加修葺上年五月內降回張保澆設法收復由已革提督成瑞副將穆隆阿署臬司楊柄銜辦理善後旋因彈壓無兵被陝逆孫義寶乘虛竄陷僭稱大漢正西王僞封節度總制元帥等官蓄髮易服極爲狂悖此次殲除醜類克復名城固由將帥謀勇兼優而降回張保澆嚮義之心亦稱誠篤雖傷亡副

將熊觀國遊擊陳廷高等二百餘人較尋常戰功實豐且偉
懋賞優卹不亦宜乎曹克忠一軍亦於十七日馳赴馬家嘴
探勦陣斬百有餘級北向搜捕擒殺亦夥遂將新店子紅城
子唐家莊廉家莊曹家岔白家灣等處賊巢一律平毀十八
日進至將臺堡遇陝回馬隊追勦三十餘里斬悍賊三百餘
名生擒馬元喜二蘇德隆等四十三名將張家嘴頭隆德堡
等處賊巢概行掃除進紮隆德堡二十一日探悉陝回馬步
四五千聞蕭河城回乞撫將圍而攻之曹克忠派周有貴王
得勝等營分路進擊而親督親兵並馬隊前往督勦賊敗而

遁追殺五六十里共斃五六百名生擒蘇三誠等六名二十
六日勦賊於夏家堡分路繞擊自率親兵馬隊直前佯退誘
敵賊墮其計立時奔潰追殺十餘里斃賊三百餘名生擒逆
目林環王顯生等八名獲戰馬二十匹當移營隆德堡時蕭
河城回目監生蘇上達率眾詣營願求張集馨准其反正並
據漢民文生康英耆民余彥益馬維翰等具稟公保永無反
覆聲威所播逆勢漸感其由郭城驛竄陝股逆經副將雷恆
等會合陝軍在白吉原三水縣等處悉數殄滅其續竄另股
復經提督周顯承總兵劉效忠趙德正陳義副將李高啟張

占鰲等於二十六二十七等日在甯州之焦村鎮原之蕭鎮及正甯境內連獲大捷張集馨胡大貴等率所部由靜甯州前進疏通省城驛路二月十七日攻克青家驛遂從威戎鎮一帶追勦直至洛門地方沿途節節擒斬殲賊殆盡通渭甯遠隴西會甯境內均無賊蹤既而鞏昌府城遭回逆竄擾雷正綰因咨會張集馨折回會甯適陶茂林收復金縣勦辦靖遠等處逆回連戰皆捷後回至省城商定擇要進勦亦率隊馳抵會甯雷正綰咨會陶軍扼紫安會之間以資控制兼顧省城迨固原克復卽咨張集馨鎮撫固原兼籌防勦於時各

軍所向皆捷特患糧運不繼兵勇有譁潰之虞雷正綰奏奉諭旨勅下陝西藩司林壽圖督辦糧運並懇

天恩將後前承辦軍糧各州縣從優

獎敘蓋深知羅掘之已空而鼓勵之不容已也因一面飛催糧運一面追勦逸賊飭譚玉龍等各率所部由黑城子一帶探蹤緊躡二月初十以後疊將沈家河楊老莊等處賊巢攻克該逆分頭逃竄追至何家灣地方距黑城子十餘里其中逆巢無數與鹽茶廳城踞逆由成吉黑城子逆首黑虎相犄角我軍商定分張兩翼先將附近卡壘翦除師行方無窒礙

自十八日出隊後雷正綰所部將大北山廠一帶掃蕩十餘處曹克忠所部將鎮祺營黃羊坪一帶逆壘踏平盡將逆眾逼歸老巢該逆句結各股眾逾兩萬其勢甚熾三月初八日張集馨率隊自會甯返固原遂議進圍黑城子十二日辰刻我軍出隊攻城該逆傾巢出抗我軍及降回張保隆馬永和等馬隊奮勇衝撲該逆竭力迎抗傷斃至百餘名其勢漸卻我軍乘之斃騎賊三百餘名逆眾返奔我軍踵追抵城下賊騎入城不及向北狂奔我軍追殺二十餘里沿途斬五百餘名生擒逆目趙萬嚮花衛等六十七名追至炭山日暮撤隊

自是晝夜環攻斃賊不少該逆詭詞乞撫我軍察知其詐進
攻益力偵知賊勢日衰剋期往破先令馬隊埋伏東北山後
會同張集馨所部諸軍四面環攻雷正綰自率陳義李高啟
張占鼇及降回張保滙馬隊往來策應十五日寅刻我軍拔
去鹿角束草填濠以進城上木石飛擊頗有傷亡張集馨所
部拋擲火彈焚西門賊卡豎梯蟻附而上周顯承成瑞亦由
東門超躍而登城中大亂我軍火器齊施賊巢火起劉正高
等亦自南門入短兵巷戰殺斃極多餘逆奪北門逃竄我軍
追勦方殷伏兵齊起前截旁鈔前後共斃賊三千餘名生擒

逆首黑虎等一百七十八名救出漢民婦女數百名獲牲畜
三千餘頭軍械無算追殺三十餘里餘逆向李旺堡同心城
奔竄曹克忠一軍亦於三月初八日進攻鹽茶行抵南山遇
逆首馬三混李得倉馬萬明王纏頭等率馬隊六千餘騎由
元套子塘繞至黑草臺溝內鈔襲我軍後路曹克忠自督馬
隊衝擊陣斬四十餘名獲戰馬四十餘匹賊突圍而出至韭
菜坪鏖戰約一時許復斃賊八十餘名獲戰馬亦四十餘匹
我軍分三路齊進賊漸不支乘勢掩殺追過元套子塘官馬
套子柴林溝坳等處約四十餘里斬二百七十八名生擒王

纏頭等四十餘名滾營進薄城下附郭逆黨棄巢潰奔逆首
田成吉等固守堅拒十六日有援賊三千餘眾從鹿溝子來
襲我軍擊之敗而遁是晚傳令毀城以王得勝前進爲先鋒
陳開泰鄧全忠朱友文龔良臣李奉清等由左周有貴陳德
隆趙冠英帥合勝等由右曹克忠自率馬隊及降回王銘忠
蘇家良馬秀等所帶馬步督隊向前四鼓各軍四面列圍城
上鎗礮如雨雜以瓦礮傳令親兵執藤牌水版搬運柴草堆
積南門一面施放火器一面梯縴上城須臾火烈風狂將南
門燒燬賊眾內亂我軍先登之守備周文貴千總陳光明把

總余永盛軍功丁東生周永貴等亦中鎗陣亡曹克忠自督
王得勝等衝煙而入將守堞之賊悉數趕殺城內之逆不敢
抵抗自相踐踏我軍奮勇搜誅殲斃幾盡餘逆奪北門而出
遂將廳城克復曹克忠留陳開泰饒得勝黃開勛三營在城
搜捕自督馬步出北門跟追沿途斬殺甚眾獲賊馬七百餘
匹軍械無算殘匪竄入雙墩兒堡我軍一擁攻入復斃千餘
將該堡登時攻克生擒逆首田成吉馬保馬二的田文秀田
文海田黑彈子李朱彈子等一百二十五名獲戰馬三百餘
匹牲畜不計其數餘逆與黑城子殘回併踞李旺堡同心城

等巢數日之內連克堅城不可謂非破竹之勢也馳奏後
獎卹均獲從優並奉

上諭云雷正綰曹克忠等此次攻克黑城子鹽茶廳兩城勦
辦甚爲奮勉餘逆現踞李旺堡同心城及何家堡一帶著雷
正綰會同曹克忠督飭諸軍乘此聲威次第掃蕩進規靈州
卽與都興阿聯絡進取惟昨據都興阿奏稱逆回犯擾鹽場
堡花馬池等處圖截官軍糧道該處情形緊要兵勇不敷分
布當經諭令雷正綰撥兵援應現在黑城子等城旣經攻克
該逆被勦窮蹙設筵而走險與甯夏匪徒勾結都興阿等營

後路兵力較單若該逆乘間滋擾所關實非淺鮮雷正綰當酌度緩急分撥弁兵馳赴定邊花馬池一帶遏賊奔突爲都興阿後路聲援都興阿穆圖善卽凜遵前旨激勵諸軍將甯夏漢城攻拔卽可騰出兵力交穆圖善統帶先解肅州之圍規復嘉峪關以通赴新疆各城之路前經諭令陶茂林如酌撥數營扼紮安定會甯足資控制卽帶所部馳赴肅州甘郡一帶勦辦毋稍延誤欽此蓋其時肅州東關被口外獵戶竄入焚燒房屋圍困城垣本地回民亦卽變亂經恩麟派道員黎獻率隊赴涼州扼紮而調西路各營馳赴肅州援勦奏請

敕下鶴齡馳赴肅州穆圖善整軍西指並請

敕下烏魯木齊提督成祿赴肅州帶兵故

聖訓及之同時西甯回匪亦攻陷大通縣圍逼西甯府城經
青海辦事大臣玉通奏奉

上諭云西甯花馬回匪變亂皆由玉通平日議撫撤團漫無
準備以致縣城失守郡城危急生民塗炭該大臣一籌莫展
惟知令馬文義等往來調停斷難恃以無恐蔣凝學一軍現
已行抵何處著楊岳斌飛催該道督率所部迅赴西甯該處
有兵一二千名亦卽歸該道調遣以資得力甘肅肅州西甯

賊勢披猖都興阿未能兼顧楊岳斌當兼程前進通籌進剿
機宜力維西路大局蔣凝學如離甘尙遠或由楊岳斌先撥
數營前赴西甯以免疏虞並著恩麟谷商陶茂林暫緩兼顧
他處務當先行撥兵援剿肅州此外如有可撥之兵亦應分
撥肅州以顧全局西甯郡城人心必須鎮定著玉通妥爲激
勸固守待援毋得一誤再誤致干重罪欽此緣西甯回民極
衆而巴燕戎格循化兩廳又有撒拉回教十三工其俗又異
於新舊各教之回同治二年十月間臨洮華寺兩教藉辨教
之新舊滋事漢番良民被其殺掠亦聚團以備經青海大臣

玉通用回民馬文義卽馬朶三前往調停省城亦遣回婦馬
七氏前往和解各允投誠息爭其實桀黠之回暨十三工之
回殺掠仍未盡息逆首馬桂源亦無以制之而南川塔爾寺
阿家呼圖克圖所屬之番以受害最深未甘帖伏幸私相報
復尙未稱兵列隊也至是逆膽愈橫旣陷大通縣復敢圍逼
府城玉通不敢復諱故有是奏然

朝廷固早已知其實矣惟是逆回蔓延官軍逐處勦辦旣患
不敷分布而現有之兵力又苦無糧接濟各將領空言撫慰
焦灼萬分飢餓之餘朝不保夕四月初旬陶茂林所統之中

左前後四營提選二營新中一營及衛隊各勇同時譁潰十
一日竄至隴州之長甯驛沿途搶奪客貨搜索糧食其馬隊
由長甯驛斜趨隴州之撒家店步隊由清水竄往山門鎮陝
撫劉蓉當飭親兵營彭基品與雄毅營劉楷由寶雞就近攔
截一面飛咨陶茂林派員招令歸伍值陶茂林聞訃丁憂乞
回籍守制奉

上諭留甘改爲署任甘肅提督賞銀三百兩治喪著設法招
集潰勇而善撫其未潰之軍

朝廷之於將帥亦相待爲極優矣詎該潰勇不願歸伍竄至

寶雞之縣頭鎮彭基品選派百長童仁興護哨李吉春持名帖前往詰問原由該潰勇語言狂悖將李吉春羈留而以副將高選清官銜回文令童仁興還報內稱陶提督剋減軍糧各營不期而散約有萬人請飭州縣備辦柴麪等語適陝甘總督楊岳斌已抵西安劉蓉商定委派營務處遊擊文朝清撫標中軍副將彭體道馳赴寶雞善爲開導而高選清等到處張貼僞示需索米麪旋即移紮益門鎮肆行擄掠分股竄至盤屋之啞柏鎮而兩當縣境亦有潰勇二千餘人滋擾劉蓉復飛調駐邠之遊擊王守基馬步兩營及駐鳳縣之雄毅

兩營直趨寶雞撥撫標親兵三營派遊擊陳照台胡得成管帶由盩厔前進調駐防商州之鎮西三營會剿而飛飭黃加焜督率隴軍會同在籍道員管湧之練勇嚴防南山一帶嗣陶茂林在安定剿賊失利相繼而潰者益多僅存提選四營衛隊左營退守安定前後潰勇羣趨南山恩麟慮安定兵力太單飛咨雷正綰轉調曹克忠星速馳援而雷正綰曹克忠正勦黑城子鹽茶廳餘逆督率各軍前進該逆踰伏黑城子東西兩山之間而堅踞李旺堡以爲中路雷正綰分軍三路將沿途賊卡一律平毀乘勝攻拔官橋堡餘逆併歸李旺堡

雷正綰慮其復竄分撥各營四面埋伏然後親督數營及張保澄降眾直逼李旺堡城下該逆出城列隊我軍鎗礮環施斃悍逆百餘該逆旋退入城我軍四面圍之城上礮石雨注兵勇頗有傷亡雷正綰重誓各營奮力齊進豎梯上城火器刀矛雷轟電掣該逆膽寒已久莫敢抵禦開西門而逸我軍入城搜殺城內老弱悉盡逸賊經伏兵攔截亦無漏網是役斃逆回數千獲馬匹牲畜無算惟粟麥無多僅敷我軍數日之食曹克忠分勦同心城大小十餘戰皆捷該逆退守城中當經我軍攻克斃賊千有餘名所獲粟麥亦無幾總由野無

可掠彼無道行之亦無所得况官軍運糧千里尙能保其必濟乎金積堡之逆震懾軍威分股竄擾中衛之石空寺勝金關等處攻撲梁生嶽營壘以圖分我兵力商定曹克忠進駐中衛之甯安堡遙爲援應雷正綰將攻甯靈飛咨駐紮慶陽督辦糧運之臬司楊能格飭魏添應一軍由環縣之紅德城紀家原趨鐵邊城防勦東路並咨陝撫續籌撥隊扼定邊以厚陝防函知駐防定邊之前任安徽巡撫翁同書嚴堵北路而自督各營進攻預望城俟各路糧運稍集進兵甯靈會同都興阿分途勦洗以清甘省北路但慮籌備需時耳乃安定

自陶軍繼潰待援孔急幸奉

上諭成祿抵甘後經雷正綰撥給六營鶴齡亦已行抵秦州
目前省防喫緊安定危急成祿迅帶所統六營督同鶴齡所
帶川兵迅卽取道安定先解該城之圍並顧省城防務聯捷
管帶黑龍江馬隊官兵前已探報由晉起程並著成祿飛咨
該大臣迅速赴甘會師前進不准稍涉延緩俟安定等處逆
匪掃蕩卽移師進剿肅州甘郡回逆以期次第廓清等因蓋
雷正綰與曹克忠此時兵機順利有肅清甯靈之勢
朝廷亦深知不宜分撥致誤事機而糧源匱竭籌濟無術則

時之所值難以遙度者也維時南路階州一隅勞師已久雖
間有乞降之逆要皆裏脅難民乘機逃出其長髮老匪自知
必無生理則皆助逆固守防閑嚴密我軍四面環逼誘之不
出攻之力拒乃商定挖掘地道轟其城垣湘果軍掘於西武
字營掘於東北該逆知之亦於城內掘濠以禦轟發數次俱
被知覺未克嗣經武字營施以縱橫曲直之法爲該逆防慮
所未及第其工甚鉅凡一月而始成五月十三日東北兩面
地雷炸裂城塌數丈周達武督帶勇敢親兵於城圯處冒煙
先登大隊踵至巷戰約一時之久賊勢不支至午刻之初遂

將該城克復殲斃計數千餘名逸出之賊經我軍四面攔截無一漏網蔡啟兩逆亦雜眾逆中殄戮指認俱確髮逆已無遺類馳報後奉

上諭云川陝甘三省兵力爲階城一隅牽制已久今旣擒洎埽穴卽可分路移兵胡中和一軍著駱秉章酌量川省情形妥籌辦理雷正綰一軍餉需異常支絀駱秉章素能不分畛域著每月酌量源源協濟以資飽騰昨因擒逆有渡河窺陝之謀諭令楊岳斌酌留數營防守潼關杜賊竄擾秦晉之攻此時蕭慶高等軍已克階州自可調回陝省於潼關等處

要扼紮以便替出楊岳斌之軍全赴甘省林之望所部勇丁
邊經諭令毋庸遣撤往援肅州現在安定等處軍情喫緊著
楊岳斌傳知林之望統帶張華全軍先赴該處會合成祿雷
正綰所派各軍力解安定之圍卽行馳赴蘭州相機前進階
州善後事宜著楊岳斌恩麟飭屬妥爲籌辦半角城預望城
下馬關等處巢窟經雷正綰督飭各軍疊次攻克甚爲得手
卽著該提督與曹克忠各軍分路並進直搗靈州肅清北路
都興阿穆圖善圍攻甯夏郡城日久未下殊屬玩延著卽激
勵兵勇奮力圍攻迅圖歲事不得再事遷延致干重咎昨因

成祿兵力太單諭令雷正綰將派赴安定劉正高等安定七營於解圍後由成祿酌帶而行第雷正綰先後派撥十二營駐防安定一帶現在乘勝進規靈州兵力未厚若由川省酌撥數營進駐安定一帶則雷正綰先後派出各營仍可酌量調回策應著駱秉章斟酌情形妥籌調撥陶茂林營中潰勇由兩當南趨者業經漢南地方官弁分別遣散押送回川後起潰卒亦均遣回原籍其漢南一帶仍飭劉蓉嚴飭各府廳營縣隨時確探防範將餘匪搜捕淨盡雷正綰移軍北進轉運益艱必應寬籌方能源源接濟不致枵腹荷戈著恩麟楊

能格飭屬就近籌運毋令缺乏前因雷正綰營中糧運緊要諭令劉蓉飭林壽圖派員督辦何以尙未辦理著劉蓉督令實心區畫妥籌接濟不得稍存畛域之見致誤事機陶茂林部眾潰散所存無多現在曹克忠營數日增糧餉兩絀該總兵打仗素稱勇往若令飢軍無食譁潰堪虞著劉蓉卽將陝省按月接濟陶茂林餉項軍火改解曹克忠軍營並製造帳房數百架一併解往以備要需毋得遲誤欽此於時雷正綰已攻克預望城下馬關兩城會同楊能格馳奏並附片瀝陳糧價情形緣雷正綰一軍全賴涇州糧臺採辦並陝省協濟

克復固原時稍獲敵糧又於安插良回責其輸助至是青黃不接平固之轉運無人回戶之輸將亦罄砂磧彌望謀食維艱曹克忠一軍向由鞏秦各屬運糧兼賴蕭河城降回輸濟至是亦不能繼及派員赴中衛採買一隅之地所得亦復無多曹克忠因呈請先行

奏參派員接統其情之迫切益可概見矣雷正綰因商飛咨恩麟楊能格迅爲籌運一面妥商進勦機宜時鹽固餘孽分擾紅柳溝安邊大水坑吳慶鎮一帶意圖竄陝馬化澂廣招黨與計圖死抗曹克忠攻克同心城卽半角城並將螺山麻

屹塔大小賊壘平毀殲賊三千有奇追駐甯安堡聲言渡河
援救中衛實乃直趨金積堡滾營力進而中衛之圍亦解遂
由白馬寺滾泉一帶進抵強家沙窩雷正綰則督軍由下馬
關以進沿途掃蕩斬馘亦多遂由靈州之惠安堡白塔石溝
驛連營進紮與滾泉聯絡曹克忠已於閏五月十六十七等
日連獲大捷斬馘二千有餘其地距金積堡僅十五里卡壘
林立渠中之水鹹澀異常飢軍飲之立病踣斃相望初至雜
以糠粃每日尙得一飽繼則草亦掘盡日求一飽不可得該
逆偵知我軍乏食率悍黨連日撲營分股阻截運道曹克忠

苦口拊循將撲營之逆擊敗該逆復結河北之賊來援眾逾數萬我軍以枵腹相持將及半月計惟力攻賊巢或可得其積聚適魏添應四營亦已由東路至遂約定六月初二日進勦當時軍鋒甚銳立破賊卡三座陣斬千餘初四初五等日復毀賊卡五座傷亡略與相等而所破之卡糧亦無多飢餓仍不能免士氣因而益餒初七日卯刻出隊曹克忠攻其西雷正綰親攻其東該逆列隊力抗復出馬隊二三千衝入胡大貴隊內當經劉效忠擊退時總兵劉玉昌已破卡而入魏添應陳義及譚玉龍李高啟龔得勝胡日盛等同時攻入毀

平賊卡五座直奔老巢該逆預伏馬隊萬餘從十里外鈔來巢內步賊悉出我軍腹背受敵鏖戰四時之久終以飢疲力竭傷亡弁勇二千數百名軍火器械遺失不少蓋雷軍自屢勝後各攜家室自預望城拔隊各將家室寄頓韋州至營已遲數日值此糧運不繼而眾心復戀家室其致挫固非無由也曹克忠於是日攻克高章三堡斃賊六七百名強家沙窩賊巢亦已攻破忽見塵埃蔽天雷正縮各軍被賊壓下勢甚兇猛乃令徐徐撤隊該逆復糾黨乘夜撲營士卒飢乏已久力遂不支傷亡弁勇數百名營官周有貴秦久勝朱有文董

逢春差官保朋均陣亡乃退營二十里十三日該逆復以馬隊撲營曹克忠溫言激勵各軍奮力迎擊斃賊數十名獲戰馬二十餘匹雖獲小捷而運道已爲該逆所阻汲道亦斷軍心不無動搖矣雷正綰因自請

交部嚴議而飛咨各路糧運益急曹克忠呈請楊岳斌轉

奏楊岳斌以曹克忠戰功迭著仰懇

天恩寬免議處於是雷正綰曹克忠等均邀免議之恩陣亡員弁均蒙

賜卹惟甘省遭逆回肆擾久無完地幸值官軍屢捷方期逐

次肅清乃陶軍潰變雷曹兩軍因缺糧復挫楊岳斌初至甘肅軍務益形棘手卽陝省亦因之震動矣故劉蓉所奉

上諭有云現在髮捻各逆擾及慶毫等處難保不被擊西竄潼關一帶防務緊要著劉蓉派兵前往扼紮以固邊防等因劉蓉當調劉厚基接統親兵營聽候調遣旋准豫撫吳昌壽咨稱訊據賊供有欲西竄鞏洛直撲潼關圖擾三秦等語遂飭劉厚基前赴潼關東五里之金陡關駐紮嗣聞雷曹兩軍失利已退紮預望城人情震動改飭劉厚基暫緩拔發而調劉玉興黃鼎兩軍由甯羌州拔赴鳳翔分防汧隴邠長各隘

又據潼商道蔣徵陶探報渦河南岸之牛老水賴文光等股由陳州向東南竄去渦河北岸之賊張總愚任柱等股由商州之場橋集往柘城太康一路西竄並據獲犯供稱有窺伺鞏洛之意十四十五等日已由柘康竄至許州尉氏各縣圍攻扶溝縣城該逆現分五旗黃旗張總愚藍旗任柱白旗牛老水黑旗李允五色旗賴文光欲到汝甯陳大喜家會齊再圖西竄現聞郟縣以南已有賊蹤據蔣徵陶探稱該逆竄至郟縣經河南統將陳國瑞跟蹤追剿該逆旋向魯山等語值陝西所有之軍盡防西北回逆劉蓉因奏請

敕下湖廣督臣官文撥兵駐紮浙川荆紫關一帶旋據商州
 副將謝正球稟報捻逆大股由魯山竄南召後股牛洛洪任
 柱等亦至商南防務更急因飭劉厚基五營防武關並飭地
 方會團以助飛飭在籍知縣黃加焜招募兩營扼紫漫川關
 另飭叅將陳照台胡得成管帶省標新兵一千前往金陵關
 將起行時適報雷營潰卒已至鄆縣圖竄南山乃派彭體道
 胡得成赴藍屋侯事竣再往金陵關其湘果英毅鎮西雄毅
 等軍則令分防略陽汧隴鳳寶邠長各隘又聞捻逆至襄樊
 將會合後股西竄旣而果至鎮平經官軍擊退竄赴南陽經

豫軍張曜宋慶追勦一股竄汝甯後股竄確山數日之後新野鄧州均有賊蹤未幾復竄鎮平而陶營潰卒亦竄至隴州之縣頭鎮八月十二日劉玉興率所部往勦斬百餘級擒二十餘人獲原失之關防該潰勇由赤沙渡河圖竄鳳縣忽據探報雷正綰部下雷恆煽惑全軍猝變句結送回赫明堂等竄踞固原平涼進撲涇州陝省四面防勦徵調紛煩實有應接不暇之勢幸據駐紮鳳縣之湘果營總兵蕭德揚稟報十八日陶營潰卒竄至鳳縣之李家莊蕭德揚會同毛福益分路夾擊殺斃騎賊百餘名獲馬數十匹餘眾跪地乞撫查明

係提選中前右後及茂字各營之勇共計勇丁二千七百餘人長夫三百餘人已繳鎗礮器械查出倡首之尹得升李老三兩名立即正法餘俱資遣回籍其由竇雞竄出者經毛福益截擊於姬家坪陣斬三百餘名獲馬匹甚多該匪竄入巖灣場經我軍登時攻破該匪沿山而遁我軍進擊於關爺嶺遊擊蕭積玉陷陣遇害餘匪竄寶雞之嘴頭據獲匪供稱此股係湖北江南河南三省之人眾尙二千有奇意欲竄回鄂境在陝不敢停足等語蕭德揚毛福益各率所部跟追該匪踞華陽附近之茅坪郝家坪等處上下十有餘里值漢中鎮

蕭慶高亦派蕭德見前來會勦商定三路進擊乘夜以往該匪驚亂共殲六七百名乘勝緊追至郝家坪復斃悍匪二百餘名並將匪首王正明趙達廷曾益三吳有亮徐益元賴裕和潘濟盛等擒獲餘匪悉數乞降共計二千三百餘名挑選精銳二百餘人歸伍其餘按籍資遣匪首解省正法陶營潰勇一律肅清距潰變時已歷五月矣而甘肅靖遠之三角城復有香客頭目丁建善陳忠孝二人借燒香爲名聚集數千人於該處之朝陽寺倡立邪教經都司賀得昌等前往解散見該香客頭戴金箍髮束兩髻旗分五色手執兵器方糾工

匠多名製造軍械鎗礮刀矛旗幟並鑄有大礮四尊七月中旬遂率眾攔劫官運麪筋網縛委員兵勇越日始釋楊岳斌於二十四日親督發字南字親兵各營前往勦辦探知過店子地方爲頭目丁建善所踞彭楚漢楊明海各率所部馳至該處天甫黎明一面分派勇丁搜捕餘黨一面圍其住宅宅外刀槍密布門巷曲狹不便施展什長李顯爵手挽藤牌奮勇先入眾勇繼之丁建善持矛突起立將李顯爵戕斃餘黨競前相持一時之久楊明海督勇上屋從屋上穴瓦施放洋鎗丁建善應鎗倒地匪眾紛潰經彭楚漢搜斬無遺計斃一

百餘人生擒二十餘人獲軍械白蓮花帽道衣多件搜出該
匪文牒首列無生老母次皇極老祖又次觀音老母有似白
蓮教訊據丁建善供稱大股均聚三角城糜子灘彭楚漢卽
率馬步前往比至三角城則僅存數十人暨大礮四尊陳忠
孝已擁大股竄往黃草梁及率眾往勦匪眾迎戰者尙有二
三百人被馬隊四面圍裹無一漏網餘匪星散莫究所之獲
匪馬十匹騾驢十五頭器械無算此匪撲滅尙速幸未蔓延
楊岳斌於八月初七日回省雷正綰一軍自敗退預望城後
各營心已不固至十八日全軍潰散雷正綰涕泣勸阻不爲

少止雷正綰勢難孤立不得已退駐固原隨行僅李高啟步
隊四營舊部馬隊二起其餘各營分途四出莫卜所向是時
驛路梗阻文報遲延上至蘭州下迄西安道路傳聞異辭邠
長一路倉皇驚徙陝省撥防置守羽檄紛馳而甘肅馬營監
義崗川兩處逆回復於是時竄張家川並分股擾至隴州之
馬鹿鎮風鶴之警日凡數驚居民奔走倉皇罔知所措幸該
回哱經數日復由清水一帶回竄歸巢其另股竄至慶陽府
屬之甯州圖由三水以入陝境臬司楊能格駐慶辦糧奏請
敕下陝西撫臣劉蓉派撥楊得勝鄔太愚兩軍赴慶防堵值

靈州金積堡之回日夜窺伺延鄜該兩軍分防河上原金湯鎮未可抽調迨逆回蔓延至於蕭鎮荔家堡等處適雷軍提督周顯承譚玉龍於雷軍未潰之先已赴涇州督辦糧運故未與於潰散之列而潰至涇州之四營亦經周顯承譚玉龍招撫該潰勇遂留涇州至是慶防緊急劉蓉因咨商該軍往勦慶防藉以稍固曹克忠一軍自金積失利退駐鹽茶繼又以就地採糧移紮靖遠值金積逆回復擾中衛之勝金關都興阿奏奉

上諭著曹克忠整併數營扼紮勝金關以杜敗匪西竄楊岳

斌旋據藩司林之望稟報八月二十一日陝逆及河狄回匪
廣聚鞏昌圍撲郡城甯遠縣亦於十九日被圍勢甚危迫請
兵援救等情楊岳斌因念該逆甚眾趙桂芳與林之望所部
誠慮不敷堵剿因奏請

敕下曹克忠酌撥數營防守甯遠其全軍悉赴鞏昌至中衛
之勝金關俟南路軍務稍鬆勦可以接濟再行援剿奉
旨報可曹克忠於十月初一日行抵鞏昌營壘未定回逆突
來邀截當經迎擊獲勝初三日夜間傳集各營令黎明各出
隊七成往前探剿至次日黎明該逆已漫山遍野而來三面

屯紮占踞九座山巔遂一面派營埋伏兩路自督數營並降回蘇家良王銘忠等直衝賊隊該逆挑悍逆向前抗拒我軍佯作敗退該逆蜂擁跟追我軍退至山頂卽施放噴筒火蛋親兵三營同聲喊殺齊力回禦陣斬賊首數十顆兩路伏兵望見火光亦兩路鈔來逆眾應接不暇紛紛潰敗我軍乘勝追勦沿途斬九百餘名生擒丁朝貴柯大成七十餘名追至官道溝地方天色向晚始收隊回營是役獲戰馬四百餘匹牲畜不計其數提訊丁朝貴等據供稱圍鞏之眾一萬有奇狄河鹽關本地土著陝省鳳翔逆回皆在其內日前逆首馬

三又在狄河調取强悍一萬初二日已到五千等語卽於軍前正法是夜二更望見近城賊壘到處火起人喊馬嘶似有逃遁之勢派勇往探果見該逆棄營退入南山後鞏城之圍遂解我軍仍紮附城二三里以便勦擊而前此雷營之變陝甘同時震動致楊岳斌所奉

上諭有云現在甘省情形楊岳斌知之必悉雷正綰現在何處各潰勇能否設法羈縻俾令勦賊自效著該督妥籌辦法迅速奏聞以慰馳係等因楊岳斌因傳聞異辭曾派遊擊秦國勝前赴平涼查探至是稟報云雷正綰全軍潰變退駐固

原嗣固原被逆回楊太娃子龔踞再退平涼所帶之李高啟
四營現駐平涼以東之馬連堡姦擄燒殺情形甚慘雷恆所
部馬隊仍同回逆肆擾鄉鎮周顯承譚玉龍等現駐涇州因
招撫潰勇餉項不敷提到慶餉一萬八千兩楊能格移知雷
正綰派弁坐索立逼轉解九月初一日回逆孫老五赫明堂
與雷恆擾至涇州二十里鋪將由涇解平之一萬二千兩並
所運麪筋搶掠一空迨沈大興前來迎提則已歸於烏有詢
及車戶腳夫護解馬勇沿途被殺不少查涇州兵力迅字五
營祇可駐守不能遠離譚玉龍現雖七營其四營係新收潰

勇軍裝旗幟均多不全劉效忠之馬隊原係五百名半無馬
匹胡大貴所統撫新左營八百餘人業已交卸合以親兵共
成兩營亦無帳房軍裝現在涇臺異常奇絀務須源源接濟
等語楊岳斌卽以解存涇州餉銀三萬兩准其動用飛咨陝
撫解濟軍裝火藥檄催提督李助發移駐隆德俾聯聲氣旋
又探明西竄之雷軍潰勇二營亦經聯捷在靜甯招撫另有
三營已投林之望營中無滋擾地方之慮矣均經楊岳斌先
後陳奏上慰

宸廑惟是甘肅糜爛已極正賴官軍攻勦乃陶軍潰散存者

幾希雷軍敗潰之餘聲威頓挫而黎獻進勦肅回初次接仗獲勝嗣聞南山之匪圖竄大通派遊擊楊天興率馬步五百名前往堵禦十月十一夜爲賊所襲我軍失利十六日臨水糧臺又被米拉溝回攻破士卒又因飢餓而潰從前所稱得力之軍自楊岳斌親統諸軍外僅存曹克忠一軍與賊相持於鞏昌矣楊岳斌所統統領吉字全軍河南南陽鎮總兵李助發率所部往隆德十月二十六日行抵會甯縣城探得乾溝驛地方有大股回匪盤踞卽於十一月初四日出隊八成以往是夜四更至其處卽派馬隊由河東前探而以四營分

三路進剿初五日黎明馬隊回報有馬賊七八百人來自河西步賊二千餘人伏於河東木卡乃令左營吳文瑞先由河西敵住馬賊右營劉清和由河東鑿冰開路而上併力截擊前營李青海於街東施放火蛋焚其木卡乘勢衝入殺數十人人生擒十餘人該逆棄所擄之糧向北小路敗竄我軍馬步合隊夾擊復斃數十人獲戰馬十餘匹賊改由郭城驛大路奔走我軍方欲收隊而馬賊復回李助發親督中營迎擊斃賊更多獲帶傷馬二十餘匹賊始狂奔而去山高路滑不能窮追訊據擒逆供稱此股僞元帥係馬四喜從前孫義寶與

雷帥接仗陣亡今係其弟接統前向雷軍投誠是假明春仍欲攻打西安等語訊畢正法駐防安定之總兵劉祥勝於十一月初二日派叅將黃德純帶領三百餘人護送曹營軍裝往馬營監初四日抵韓家埠探知前路有賊整隊以行不數里果遇賊七八百人交鋒獲勝追及六七里見四面山上皆賊未敢再追收隊住紅土窰初五日黎明賊果以大隊來圍我軍因先阻歧路而戰以少敵衆人皆奮力賊不能抗棄糧於地牽騾馬而奔我軍乘之斬百餘人獲騾馬三十餘匹以其糧給百姓其駐紮金縣之楊明海四營並分防甘草店車

道嶺驛路十一月三十日各營均見有零賊窺探知其必將來犯相戒嚴備十二月初一日楊明海亦率馬隊往探至楊坡廟遇賊方與交鋒而大營川一帶又有大股向甘草店前進迨收隊回營始知是日有賊二千餘攻撲甘草店壘營官余華龍上牆施放火蛋額中鎗子陣亡急令副將周保和代理其營是夜該逆於該營之上下修木卡二座初四日楊明海率隊往援遙見逆眾攻營甚急馳抵後內外夾擊賊始敗退立將木卡全行焚燬該逆復以馬隊分路來鈔我軍眾寡不敵陣亡守備向連城並勇丁四十餘名收隊後添派勇丁

助其堅守該逆始遁劉祥勝亦於十一月三十日偵知安定之李家莊有回逆盤踞卽派本營及前後兩營於是夜親率往剿次日黎明抵該堡出其不意一鼓攻入斃賊數十人賊遂敗竄追至紅土窰該逆以大隊踵至我軍稍卻收入空堡申暫憇該逆四面圍攻勢將入堡乃於黃昏時激勵士卒併力衝出繞由嶺路回營查點弁勇傷亡二百餘人蓋自甯靈失利諸軍潰變以來曹克忠牽綴鞏昌諸軍養銳退守犬羊之勢益驕東馳西突無復忌憚由隆靜以達蘭垣計程六七百里山川複沓歧路紛紜楊岳斌僅恃自統諸軍以疏通驛

路保護糧運其不敷分布原勢所必然十二月十七日奏調朱蘭桂等片中云臣抵甘後因糧餉兩絀原欲就現有兵力以圖進取自陶茂林軍潰於前而兵不足雷正綰勇變於後而兵愈不足是以不得已而有增兵之請乃周達武因進勦番匪而不克來蕭慶高因防守陝邊而不果來而鮑超則調赴江西矣李鶴章則奏留江南矣蔣凝學則請假回籍矣金國琛則因事留皖一時未能赴任矣鄰省旣乏援師而東南各軍之

准調赴甘者又復不能應手現在河狄之賊擾於南平固之

賊擾於東甯靈之賊擾於北涼肅之賊擾於西幾於勦不勝
勦防不勝防臣若株守省城則飢軍終成坐困若出省勦辦
則根本時虞動搖外察賊勢內度兵力實屬不敷分撥查記
名提督朱蘭桂記名按察使劉連捷勇略兼備素所深知聞
現在江西防堵該省兵力有餘相應請
旨敕該二員卽率所部馳赴甘省以資援勦等語實不得已
之言抑亦實在情形人所共知者也

平定關隴紀略卷二終

平定關隴紀畧卷三

同治五年丁卯春正月

欽命太子少保兵部尙書都察院右都御史總督陝甘等處
軍務糧餉兼理茶馬管巡撫事世襲一等輕車都尉彪勇巴
圖魯楊岳斌將出省督視諸軍正月初八日具疏陳奏云竊
甘省回股林立通省沸騰生靈荼毒之禍愈慘愈深兵勇供
饋之需愈繁愈窘賊一日不戢其燄民一日不遂其生卽兵
事將迄無了局此實臣之專責而不可以頃刻自逸者也顧
自抵任數月軍政隳壞潰亂踵興整飭撫綏已需時日而又

一制於軍食窘絀一制於省地艱危跬步之間動形掣肘故
雖再次出省終因外無援濟內無主持未敢久離重地伏念
軍情瞬變未可坐圖將士久疲並須激勵況逆回狡狠百出
官軍凍餒交乘尤非尋常軍務所可比論若不躬親督勦恐
難窺賊勢而振軍心籌思再四不得已檄調川北鎮鶴齡帶
領所部援甘川兵一千餘眾於上年十二月二十五日到省
駐紮以重根本並令署藩司林之望署督標中軍副將記名
提督羅宏裕率同在城文武官民及督標各營嚴密防守布
置既定準於初八日出省取道鞏昌與提臣曹克忠面商機

要次至涇州查勘從前收集各營蓋涇軍屢有稟報與固原提臣雷正綰甚爲水火其可否合併之處尙須親自到涇相機辦理一俟部署周軍糧稍可集事卽行調齊兵力隨機剿辦其出省以後各情形沿途隨時具報再臣親帶關防出省所有本衙門日行尋常各案委藩司林之望代拆代行其緊要事件及各路軍情仍送臣行營隨時辦理等語正料理起行之時適准曹克忠咨稱該軍自上年攻克鴛鴦鎮熟羊城等處賊巢後該逆退踞新市十二月初十日偵知該逆又將連夜潛逃卽於十二日出隊往剿直抵新市衝入堡內殲

其餘黨數十人聞該逆向漳縣大路逸去卽派副將傅先宗領馬隊星夜馳追十三日抵漳縣城該逆聞之駭遁我軍乘勢緊躡沿途斃賊數十名追二十餘里至三岔河該逆大股麇集分路來鈔我軍亦分隊應之鏖戰約一時許斃賊數十人賊退去我軍始收隊是夜該逆已向西遠竄甯遠肅清因飭張在山六營進紮通渭之馬營監彭忠國五營進紮棲烏嶺兩軍先後拔發十九日探得通安驛回逆由支山峽向馬營北竄張在山出隊六成往剿二十日令提督陳開泰副將雷長庚喻正祥三營前進而自率副將張明富遊擊曹正海

三營策應值該逆正在民房造飯我軍出其不意一鼓而前
斬殺五百餘人獲騾驢二百餘頭餘賊越山逃去二十二日
探得牛營聚匪甚多二十三日黎明出隊往剿該逆率眾抵
禦我軍一鼓而前聲震山谷一時之久賊始退我軍乘銳直
抵賊巢後路兩軍由西山繼至陳尙友之馬隊亦從後面包
鈔四面夾擊斬馘三千有奇奪騾馬牲畜無算凡此皆曹軍
臘底戰狀至是始准咨到而楊岳斌自統之南字一軍派防
河北二十六日偵知水臯河之回自小橫路三墩子而來約
三千餘人分踞王家溝等處總兵彭楚漢以六成隊伍乘夜

疾馳直抵水阜河之上令賴中發由中路進易朝貴由右張萬慶由左俱會於水阜河之下時已三更遙見該逆分踞民房火光紛紜彭楚漢傳號三路同時殺人該逆倉皇格鬪登時大敗而上下兩路皆爲我軍所扼乃從中間煙筒溝亂竄張萬慶亦從中邀截該逆各不相顧四散奔潰是役斃賊三百餘名生擒十八名所獲牲畜甚富我軍以少擊眾竟獲全捷經楊岳斌併案具奏所有陣亡花翎遊擊周玉元守備張定謙把總張文俊康學海馬福槐伏羲農等均請旨交部議卹拜摺後遂率隊出省比抵鞏昌適聞洮州回逆

攻陷洮州廳城勢甚猖獗因商定提臣先清洮州親帶數營
赴洮相機辦理一面飭駐馬營監各營將該處賊匪隨時迎
剿楊岳斌旋將提督羅進賢所帶之馬步三營留鞏以備曹
克忠進剿馬營之賊而換帶張在山一軍同赴東路曹克忠
遂於二十二日拔營赴洮楊岳斌亦卽由南路赴涇近省各
處逆回聞楊岳斌出省四出擄掠經駐防各營隨時剿辦幸
未得逞二月二十八日彭楚漢營中見有馬賊千餘由棗楚
坡等處東往擄糧卽派副將周鳴高守備裘德成率隊潛伏
該處以待其歸黃昏時該逆果飽掠而來伏兵突起殲數十

名獲騾馬五十餘頭生擒逆目馬從容等七名正法回氛爲
之稍戢曹克忠於正月二十六日抵距洮十里之李岐山率
馬隊往勘地勢該逆驚惶無措回目馬芳卽率領男婦老幼
跪地乞降曹克忠察其情詞懇切諭令先將城內文武官員
及印信關防交送來營並令緦獻首惡呈繳軍械馬匹糧石
牛隻該回目唯唯聽命少頃署洮州同知淡殿臣率領合城
文武暨漢回紳民到營並親齎文武關防印信連日交出滋
事首逆回官丁重選及回民丁重連李四五子等二十八名
繳戰馬一千六百五十二匹軍械六千八百二十餘件弓箭

小刀無數耕牛一百九十四隻各色糧四百餘石木料二千餘條曹克忠將首逆丁重選等訊明分別梟斬軍械馬匹分撥各營牛隻給被害漢民木料給修被燒房屋糧石軍民分食復親督各營挨戶搜查毋匿寸刃編立保甲客回均令徙歸原籍其素行兇惡爲眾所恨之馬力伏等亦就地正法餘俱省釋並於舊日駐洮各營內編立提選七營降回內挑出精壯編立京馬右一營派員統帶酌留五營駐洮其餘俱令隨營助勦事竣之後是月二十二日率軍回鞏其駐紮馬營監之陳開泰各營亦先於郭家灰岔驢馬溝等處屢獲小勝

楊岳斌查明雷軍潰變果由陝回赫明堂等詭謀煽誘以圖濟其竄陝之計及各營潰至涇州經周顯承譚玉龍開導弁勇均恍然醒悟誓同堅守雷正綰亦查悉原委判別忠佞嫌怨各亦冰釋查辦既竣楊岳斌卽馳往慶陽督同陝西藩司林壽圖率陝西候補知府方鼎錄布置防守糧運各事宜適准曹克忠咨稱該軍已由洮反鞏駐紮馬營監會商進止各情方欲率隊回涇分派各營會剿忽接藩司林之望稟報督標回弁馬福等於三月初三日變叛圍逼督署及中軍協署肆行殺掠旋將街市搶掠一空現尙把守城關往來文移均

被拆看急請回省勦辦等語楊岳斌聞變憤恚不食急欲捐軀以報

國家經文武各員多方勸解始止劉蓉聞變飭藩司林壽圖就近往視反覆引喻始星夜馳回涇州緘約陝撫劉蓉卽日馳赴涇州面商機要卽星夜回省懲辦而是時逆酋孫義章崔三穆三等勾通北山賊黨聯結河狄逆眾紛紛蠢動隆德因而失守莊浪被圍靖遠華亭並形危急分股擾及慶陽之西峯鎮及焦村意圖回竄陝境曹克忠留駐馬營監一帶聞省城乏糧已極急籌雜糧運往接濟而飛緘致楊岳斌告以

回酋將前所收降之馬德馨劉玉昌等數員戕害逼脅靜甯
州蕭河城等處降回同時起事其隆德失守之故實因雷正
綰糧臺委員回官馬姓開城構變爲今之計宜姑置蘭州爲
緩圖專用兵於東北杜平固出竄之路通慶涇饋運之途等
語其所商機宜悉與劉蓉昭合劉蓉卽以此意具疏陳奏並
定於四月十八日帶印出省馳赴涇州與督臣面商緩急先
後之宜決進退戰守之策奉

上諭均如所議著曹克忠進駐省垣而曹克忠回鞏後與羅
進賢商定於三月十一日各率所部抵驪馬溝卽有悖逆數

千出抗羅進賢陳開泰及番兵馬隊一並直前斬數十名賊勢不支沿溝而走追至三十餘里該逆四散而去曹克忠令羅進賢等仍回驢馬溝而自率各營直逼華家嶺該逆竟敢列陣以待我軍一鼓而前斃百餘人該逆向北狂奔我軍追殺二十餘里復斃數十人探知前途大小豹子川毛牛川川口三處皆該逆巢窟王得勝奮勇當先曹克忠率隊兜剿當將三處一律平毀斃賊二百餘名十三日我軍正修華家嶺營壘該逆率眾萬餘來撲適羅進賢張志心由驢馬溝率隊馳至內外齊聲奮擊斃賊百餘該逆且戰且退約行六七里

忽有援賊漫山遍野而來曹克忠密調陳尙友王得勝馬步各營並自督親兵一同追殺鏖戰逾時戮屍滿地該逆分東西兩路逃竄我軍亦分路疾進東路賊去已遠西路之賊忽折回抗拒番兵馬隊幾爲所壓幸東路追軍來會賊始繞山而遁是役斃賊二三百人獲騾馬二百餘頭而駐防慶郡在字軍之提督張在山於三月二十六日剿高嶺子馬家河竄匪僅斃數人二十八日復剿之寇家原焚逆壘十四處斬馘四十餘名生擒九名訊據供稱此股逆目係馬點兒由半角城到此辦糧等語連日所獲牲畜旣多遂將騾馬分給各營

撥驢三百餘頭送交慶陽糧臺備運是時東路回氛甚熾而標兵變後近省六十里之金家崖逆回亦不時竄繞彭楚漢偵知其情卽率馬隊馳至該處適遇狄道大股因將馬隊藏匿是夜四更乘其不備舍馬斫營而入斃賊數十名陣亡遊擊劉南瑞並勇丁四名裹糧將罄遂收隊而回十八日辰刻有逆騎百餘步隊四五千名直撲車道嶺營壘楊明海派副將張定元步隊遊擊屈國香馬隊前往迎剿而親督所部策應鏖戰移時張定元大呼衝陣屈國香繼之賊紛紛敗退追斬百餘人正緊追間賊忽回拒鎗密如雨張定元及叅將會

國福中鎗陣亡並傷亡勇丁七名楊明海揮隊橫截賊始退去安定會甯之間無日不有戰事曹克忠分撥提督王得勝九營及副將陳尙友京馬九營駐紮秦安縣屬之蓮花城提督陳開泰六營駐紮通渭縣屬之黃家窰以遏該逆東西竄擾之路自留親兵三營京馬番隊三營仍駐馬營監嗣准楊岳斌咨催統兵晉省曹克忠將整隊西行一面檄調陳開泰六營移紮安定詎該逆探知聚集各路悍黨分途窺伺並在通渭縣東關肆行擄掠曹克忠適病不能興急派總兵傅先宗張志心副將雷長庚都司左世亨等親兵三營及副將張

紹林回守備蘇家良番守備張漸達楊宗秀所部京馬番隊各出七成赴通渭縣勦辦十二日四更由通渭縣行至二十里之金家店天甫黎明乘其不備一喊而入該逆睡中驚起張皇失措當殲四十餘人奔逃者大半受傷所遺馬驢三百餘匹牛羊米豆甚多追殺至李家寨該逆人數倍增我軍乘銳直前復斃數十人平逆巢四處餘逆紛紛東竄我軍跟追二十餘里突遇馬步逆隊五六千人列陣抵拒另有馬賊兩旁鈔來斷我後路傅先宗知爲所陷激勵士卒以死相誓各勇拚命向前鏖戰四時之久計斃賊八九十人並刺殺大頭

目一名賊始退散我軍枵腹竟日至此始得收隊回駐通渭
曹克忠遂晉省城劉蓉於四月十八日由陝赴涇十九日行
抵醴泉接據駐紮隴州之提督劉玉興稟報逆回大股於四
月十五十六等日竄入隴境十七日由溫水溝撲出我軍分
布北山下列陣迎擊鏖戰數時該逆出馬隊從山背包鈔右
營傷亡至二百餘人劉玉興奮力擊退率各營追至城下賊
始返奔是夜該逆併力撲城劉玉興駐營城外督隊拒守署
知州湯敏亦督兵團憑城開礮賊始卻退等語劉蓉飛飭記
名提督邱時成帶領省標馬隊蕭德揚帶領湘果左軍步隊

由鳳翔前往堵剿行抵汧陽該逆已逼縣城遂分布各營堵禦克獲小捷是夜探知該逆聚踞寺溝約於二十一日潛師掩擊行距城五里該逆已蜂擁而來蕭德揚督飭毛福益蕭集山張映衡蕭玉田等直陷賊陣邱時成督率周宏謨邢大發等左右馳突自辰至酉賊始敗去追至新興鋪而返劉蓉慮賊眾兵單復派總兵蕭德見副將王九齡扼紫縣頭鎮據拏獲奸細供稱此股皆陝省西同鳳三郡土著之回因隴中糧食垂盡挈眷東趨現值新麥登場意圖飽掠等語劉蓉因汧隴事急暫駐乾州適藩司林壽圖知府方鼎錄由慶陽回

陝道經乾州劉蓉遂飭林壽圖帶同方鼎錄前往鳳隴商令各軍迎剿遏其竄陝之路林壽圖往晤各軍統領商定機宜先行回省籌辦接濟甘肅東路糧運時劉蓉已飛調潼關防軍劉厚基五營黃鼎三營前赴鳳翔德興阿聞警派佐領色靈阿帶滿城馬隊二百員名楊岳斌亦派副將洪殿元率新練馬隊二百餘匹同時至乾劉蓉均令往鳳翔助剿再咨楊岳斌調取劉效忠馬隊三起由邠長繼進邱時成等卽於二十一夜襲賊於新興鋪該逆向碧草鎮一路奔竄二十二日進至鳳郡之黃里鋪我軍馳往剿之斃賊數十名生擒二十

名通判周宏謨受傷陣亡賊竄洛城河二十三日我軍追賊至郡城之二十里鋪復斃數十名生擒二名訊據供稱此匪前股頭目是陝回崔三潰弁袁奎附之所帶馬隊千餘皆雷恆舊部在後尙有一股是陝回穆三所統有萬餘人潰弁李朝慶附之將由水洛城故關赴隴等語於是蕭德揚邱時成兩軍進紮鳳翔蕭德見王九齡兩軍扼紮縣頭鎮劉玉興仍駐隴州該逆崔三於二十三日退屯董家河孫家堡我軍於是夜以步隊分兩路進攻馬隊亦分路策應當將兩堡攻克斃賊百餘名該逆向老爺嶺逸去蕭德揚督步隊跟追二十

四日至汧陽之倉房溝我軍分張兩翼以待而以健卒數十人向前誘之引過山灣兩翼齊奮矛傷崔三右手該逆勢不能支紛紛敗退我軍追殺數百人獲騾馬牲畜數百頭拔出難民千餘二十五日追至靈臺之新集鎮逆眾四散而潰其後隊穆三一股方踞隴州近城之白牛堡太冲堡刈麥擄馬散住民房劉玉興於二十五日夜銜枚捲甲掩其不備由大路疾進湯敏亦率團由小路往約以舉火爲號三更後兩軍會合鼓譟直前穆三夢中驚寤不測虛實急率眾向西遁去自相踐踏查點屍首約二百餘人所遺牲畜不可數計於是

陝境之內惟北山定邊一帶尙有竄回經鄆太愚段登雲擊
勦猶未盡退而汧隴等處已無賊跡劉蓉前因鳳翔危急擬
由乾州親往督勦緘告楊岳斌以不能踐約之故而楊岳斌
暫留涇州雖奉有先清東南之

諭亦實欲面晤劉蓉妥商機務詎曹克忠晉省後函牘踵至
均稱省城糧食奇絀無從措辦各營譁潰將在目前是以急
欲回省今劉蓉既不能來愈不能安處矣遂於四月二十八
日由涇州起行取道華亭赴鞏籌糧運以濟省垣二十九日
抵華亭適報總兵譚玉明所統之捷字七營奉檄駐防西峯

鎮其後營忽然譁潰格斃各營勇丁二百餘人譚玉明在外
辦糧聞信馳回始行撫定楊岳斌將查獲爲首之勇丁五人
就地梟示責革營官副將方得元以總兵周模善接帶譚玉
明亦卽革退以總兵陳德隆接統蓋當時譁潰相尋故究辦
不可以不嚴也幸同時有張在山一軍駐防慶陽於該軍滋
事之時適有炭山回逆竄至西峯鎮另股擾及柔遠川張在
山卽派副將魏春華劉明泰等往柔遠川截擊而自率親兵
及副將趙占魁遊擊謝炳明占魁郭炳南等馬步馳至西峯
鎮戰於高店敗其騎賊該逆返走追殺二百餘名生擒二十

餘名並獲其騾馬軍械該逆冒雨回竄魏春華等追殺於杜家右首亦獲全捷斃賊數十人獲戰馬十餘匹我軍陣亡守備楊正興一員該逆亦已遠颺故慶防無恙楊岳斌由華亭赴鞏昌布置糧運卽星夜遄行歸省查三月初三日之變自二月以來兵勇糧食絀極而營兵則兼有室家之累不免怨望遂有無賴之弁兵王占鼇等密約十八人至城外二郎岡廟中瀝血飲酒共議聚眾索糧其中回兵馬魁馬文等以爲索糧以後必加重辦不如藉口於裁兵亂伍誘眾搶殺一面勾請狄河北山回匪前來獻城歸教逆謀既定遂先往約回

初三日子刻忽後營城上兵丁傳言下城求糧前左中營紛然嚮應俱集東城門外督標中協羅宏裕聞變急往攔截城守營叅將王金楷繼至馬文帶領數十人早爲內應已將城鎖鑪斷放兵擁入甫遇王羅兩人卽行沿街趕殺追至協署有前營遊擊李玉安前來開導與羅宏裕王金楷俱立協署大堂方經啟口詢問忽後營守備席光斗以草帽覆額督隊直入刀矛叢集三人俱受重傷登時暈倒協署幕友委員盡遭戕害席光斗復與中營千總馬耀祖等羣呼各營千把外額帶隊齊圍督署天甫黎明署門未啟翰林院侍講鍾啟岫

道員吳炳崑移梯升屋方將開導而各兵鎗子如雨勢甚洶
洶時藩臬各官亦至牆外皋蘭縣知縣鄧承偉亦被刦至正
支吾間該兵等已調城外華林山右營標兵由西門登城揚
旂列隊繞從署後撲進各營遂分數路踰牆排門而入卽將
督署及軍需局委員幕友數十人隨丁數十人親兵十餘人
一律殺斃該弁兵一面分派多人露刃列侍逼令藩司拜摺
一面分掠督協各署軍需釐金各局市中各鋪戶並於城上
安置礮位又挨家搜殺署內逃人初四日北山回逆至廟灘
狄河回逆至尖山標兵氣燄益驕橫幸而不至開門延賊者

以北路尙有川兵東路新調春奎等營扼紮而該弁兵又自顧其輜重人心尙有未齊也連日搜括官民馬匹另立野馬隊數百名守備汪棨爲之統帶遠近剽掠臬蘭縣民殺斃餓斃者不可勝計雖屢經司道安撫猶於四月初八夜挨門縱火二十二夜持械下城揚言端節無糧將盡殺司道各官仍歸回教楊岳斌到省後與曹克忠派員會同臬司督飭首縣先後查拏詳訊皆無異詞屢與臬司崇保反覆訊明細加商確將首先謀亂之王占鼇帶隊搶殺之席光斗帶領野馬隊之汪棨等分別處斬一百二十三人馬魁馬文在逃俟獲日

就地正法其餘悉從寬宥以安反側而定眾心其中協副將羅宏裕城守營叅將王金楷前營遊擊李玉安及左營遊擊馮名彩後營遊擊德恩請

旨概行革職留營效力中營都司呂松堯前營守備常九陞請

旨交部嚴加議處留營差遣以觀後效標兵變叛之案已結至省城糧缺之由實因狄河逆回旁鈔分掠剽悍異常致遠近糧路不通軍民同受其困因商定先剿狄河以顧根本值甯靈一帶逆回赴穆圖善軍前就撫因咨商雷正綰所部十

七營專顧平慶等處騰出張在山一軍赴省助剿狄河之回
劉蓉於五月初四日回省逆酋馬生彥孫義章糾集靜隆各
處回股攜帶家眷復竄隴州其前次剿敗之崔三穆三馬萬
祥等股亦回踞固關咸宜關神林鋪曹家灣太冲峪玉馬嘴
高嶺子蒲峪川等處蔓延數十里劉蓉因急檄邱時成黃鼎
等軍兼程前進湯敏於城中盤獲奸細張思永等供稱該逆
約於是夜三更攻城伊卽於城內舉火內應當飭在城各營
加意防備是夜三鼓該逆果蜂擁來撲至天明未見城上舉
火始陸續退去諸軍奉檄赴隴途遇股逆獲勝該逆奪路西

奔蕭德揚追至杜陽河逆黨馬步踵至鏖戰數時洪殿元手刃悍逆諸軍乘之斃賊三四百名獲牲畜器械無數該逆回竄隴州劉玉興出城夾擊該逆相率遁去初八日該逆糾集馬步復來蕭德揚見林中旂幟隱隱知其有伏因令蕭玉田列隊北阜以伺張映衡當其中路劉玉興毛福益蕭德揚見王九齡等列隊河干蕭德揚邱時成洪殿元等往來策應以團勇隨後助威該逆先以林中之伏左右鈔出我軍屹立不動相持數時賊不得戰遂懈我軍鼓銳猛進斃數十名生擒十餘名各以天晚收隊初九日該逆以馬賊當先步賊居後由

小河東鈔出我軍之後諸將見其人眾商定各自爲陣皆堅
忍以待之該逆羣趨太陽溝併力急撲蕭玉田奮勇衝鋒逆
眾環之中洋鎗而殞蕭德揚黃鼎急往截殺賊始敗退是役
傷亡畧與賊等惟賊之負傷者頗多初十日該逆分股東竄
一由白牛峪圖竄寶雞一由溫水溝圖犯汧陽蕭德揚黃鼎
劉玉興等亦移營以往是夜該逆乘營壘未成來犯我軍與
之相持至曉始散十一日復與戰於晁家原鎗中其白巾酋
二名洪殿元右腕亦中鎗傷各收隊而罷該逆竟分竄鳳翔
汧陽以去是時甘肅土匪董福祥高萬鎰等聚踞安化之棗

子扁王家坳范家坳黑虎山一帶其地均與鄜州保安毗連
駸駸擾及陝境幸鄆太愚段登雲楊得勝等越境勦辦克獲
大捷匪謀爲之稍緩而陝西兵力究屬不敷分布劉蓉因奏
請

敕下甯夏將軍穆圖善陝甘督臣楊岳斌分撥馬步各軍馳
赴鳳隴截擊誠以陝回麇集陝疆聚而殲之則無復蔓延之
患僅存甘回自易收撫也時該逆大股尙踞隴境日圖東竄
劉玉興等約於五月十四日分路進攻令毛福益先夜逼賊
而營築壘甫成該逆以馬步數千來撲蕭德見王九齡禦之

張映衡分撲太陽溝蕭德揚分撲高嶺子邱時成洪殿元率馬隊左右包繞該逆先以馬隊來迎爲我軍所敗步隊遂從林中出抗張映衡繞出山腰從上壓下逆遂不支而劉玉興黃鼎兩軍猶與該逆相持未決張玉文乃率藤牌勇衝入其陣該逆始大敗而去是日斃賊約六七百名獲牲畜器械無算黃鼎於十五日移紮太沖峪是夜派都司徐占彪挑率勇敢掩撲賊巢而以隊伍繼進連破數處而太沖峪各村之逆同時竄遁遣卒偵之則已至遂玉村杜陽鎮及汧陽之草碧鎮等處踞抗如初其分竄鳳翔之逆經劉厚基擊敗亦至其

處文報糧運俱梗適劉效忠蕭慶高馬步兩軍漸集約於二十日會剿遂玉村大股黃鼎復於先夜派徐占彪陳金彪潛襲白牛峪探知該逆無備以火器環施揮刃衝入該逆自相踐踏傷亡無數連毀其巢凡七處斃賊數百名及二十日之戰共斃賊伍百餘名蕭德揚復賈餘勇搜捕零匪凡破賊巢十餘處將巢逆剿洗畧盡比回營而天已明乃神泉堡蒲峪川等處之逆率悍黨數千截其歸路蕭德揚揮隊回禦各營亦出隊助之賊復大敗而去因商定蕭慶高劉厚基同駐隴州二十七日蕭德揚率隊前行諸軍分路相繼掃蕩遂玉村

賊巢十餘處追至寬灘河復將穆家莊老巢攻克是日斃賊以千計二十八日乘銳復破曹家灣老巢殲賊三百餘名該逆退竄故關黃鼎及劉厚基另破蒲峪川之巢逆竄咸宜關是日殄賊二千有奇拔出難民數百人附近民堡數十處同時得以解圍方該逆至隴也眾號五萬能戰者居其半逆首馬生彥任老五孫義章李大帥馬星福蘇蛤兒崔三穆三鄒保和海子馬等俱集併力陝疆誓不回顧連旬以來經官軍痛剿能戰之賊已折數千其勢已就衰感劉蓉因飛催王得勝之軍迅速扼剿冀聚殲於故關等處惜甘省糧源早竭軍

食難籌會師遠勦力有未逮耳既而土匪董福祥之眾旬合回逆穆二穆四馬蜡子等由安化擾及保安之雙廟子李家坳等處段登雲出奇狙擊屢有擒斬未幾該匪會撲金湯鎮鄆太愚奮力勦之該匪未獲逞志遂於二十一日率所部至雙廟復獲大勝將李家坳等處賊巢悉數掃除段登雲亦先於十八日勦穆二等股於頭道州亦經獲捷該匪狂奔高萬鎰亦遁維時陝省方患汧隴軍單無他軍可以調撥蔣凝學亦深知之因激勵譚玉龍率舊部之不願歸陳義統轄者各營赴隴助勦緣譚玉龍前在莊浪解圍後楊岳斌派王得勝

接統其軍各營因無糧可領勢將飢潰譚玉龍恐爲所牽單騎馳往涇州經楊岳斌奏奉

嚴旨著劉蓉就近查辦適蔣凝學至涇責以大義勸其立功贖罪譚玉龍深自引咎遂力疾招撫花家莊數營赴隴助剿六月初三日至距隴四十里之赤延鎮其地當華亭上下兩關往來要道探該逆分股盤踞上關白楊林擾及崇信眾約萬餘人正攜糧回巢初四日丑刻遂潛踪往勦秦國輔直抵賊巢拋擲火蛋該逆夢中驚覺我軍奮躍而進立將白楊林各逆巢踏毀餘逆翻山越澗而遁我軍追殺至上關該逆傾

巢而出當令秦國輔胡日盛張士榮方得元彭家元等與之對轟而潛令余炳忠洪桂元從山坳繞襲賊巢相持既久料山坳之兵已至秦國輔等奮勇衝殺該逆聞其巢被襲驚慌回救我軍鼓譟乘之方得元深入賊叢手刃數賊胸受矛傷數處登時陣亡余炳忠受傷亦重氣息微屬幸劉厚基馳至軍心愈奮一湧而入立將上關攻克追至下關復破其巢賊向尖骨山逸去譚玉龍遂移駐下關修築未竟該逆以馬隊數千來撲我軍待其將近始用鎗礮密轟賊見黨眾傷斃已多逡巡引退是日計所斃之賊千餘陣斬白巾黃衣賊首一

名生擒五十餘名據供此股逆首係渭南余馬兩阿渾並男婦約二三萬回陝就糧等語再探尖骨山賊巢外卡隘層疊初八夜與劉厚基約定五鼓出隊以撫標各營攻其右以捷字各營攻其左初九日卯刻劉厚基進抵王家山擣其要隘營官羅宏德唐永明立奪其卡譚玉龍亦焚其左路之卡登高瞭望見賊營棋布遂揮軍長驅入山痛勦進至暖莊川巨巢山險溝深賊騎之出抗者約五六千鏖戰數時尙未得手賊復舍騎步戰短兵相接時譚玉龍左路之軍已逼逆巢該逆極力齊抗愈聚愈衆劉厚基因以礮隊疾進擊斃悍逆數

十人該逆始懼而奔是日計所斃千餘燬巢十餘處生擒二十餘名適安肅道蔣凝學奉調前往秦州行至華亭遇逆回攻城甚急遂駐華亭會剿探得該縣所屬之仙姑山卽尖骨山龍眼鎮四條嶺馬峽口高山堡等處賊巢林立阻我軍行而後路之安口窰亦時有賊騎游弋六月初二日親督隊伍查勘地勢至劉家磨遇馬賊千餘擊之而勝初三日該逆糾集大股屯聚劉家磨一帶將以報初二之役亦爲我軍所敗自是之後無日不有戰事我軍亦未挫敗第慮逆眾兵單因商請雷正綰會師合剿蓋中隔於賊壘未得東與陝軍聯絡

也而陝軍蕭慶高等商定陳德隆所部八營分守故關咸宜
關四巘子蕭德揚黃鼎等軍拔赴上關六月十四日王家溝
宋家堡暖莊村各路逆回傾巢而出其眾約四五千各營分
路截擊鏖戰三時該逆始退各營趕緊築壘該逆忽潛由小
路鈔撲撫標各營劉厚基督隊猛擊各軍亦出隊策應追殺
十餘里斃賊三百餘名我軍亦傷亡百餘人值秋雨連綿泥
深沒踝未能出隊至二十三日始止是日蔣凝學與雷正綰
勦賊於張家原已敗其前隊忽中路被馬賊圍裹遂致失利
幸雷軍副將鍾本起率所部從旁截擊該逆始解圍以去二

十四日蕭慶高約會各路進擊該逆見我軍四路並進大北山暖莊川之賊齊出蕭德揚首先破敵洪殿元率馬隊包鈔該逆上大北山奔竄我軍步步仰攻而左右兩路之賊亦被譚玉龍蕭集山擊敗合追至大北溝搶上山頂並將大北山暖莊川一帶賊巢燬盡俯瞰十字路尖骨山馬峽口各老巢內復出馬步萬餘人蕭德揚譚玉龍整隊待戰逆騎潛由桑樹林內圖襲我後鄧光升等猱伏兩旁溝中俟其已過飛躍而出該逆驚駭當斃數十名而賊眾數倍於我鎗礮雷轟毫無退意乃下山分道截擊譚玉龍坐騎中洋鎗而倒蕭德見

身先士卒張映衡從旁截殺賊始大潰將水磨川竈泥溝逆巢踏平黃鼎進攻杜家嶺追至磨坪川老巢逆眾亦大敗是日共斃賊六七百名二十五日黎明復合各軍會勦該逆鑿於先日之挫糾合愈眾約計二萬有餘分踞暖莊嶺磨坪川一帶設伏大北溝小北溝白窩溝小窩溝意圖包鈔以騎賊向前迎撲暖莊嶺之賊分奔而下我軍前擊旁鈔斃其黨數百名直追至於嶺下黃鼎擊磨坪川之賊方與其馬隊相持毛福益設伏兩旁戮紅衣逆目數名蕭集山復斃逆數十名逆遂敗退是日計斃三百餘名二十六日該逆於四更後自

下關飽掠而歸遇我軍伏發猝不及防爭先奔竄殲二十餘名盡獲其騾馬糧米二十七日我軍先於大小北溝設伏以大軍直攻暖莊川兵刃方交我軍佯退以誘之該逆下山追逐伏兵分路繞從山上壓下大軍回旂擊之逆眾潰亂追殺至山茨峽而還其包家山磨坪川之逆亦同時擊敗是日斃賊四百餘名將乘勝合攻尖骨山老巢而該逆堅壁不出復值秋雨連綿泥深淖密人馬皆爲卻步不得不停軍以待至七月初六日雨止我軍商定各由原路進擊該逆預出馬步數千列於山上蕭德揚譚玉龍向前直撲賊勢頓挫而尖骨

山馬峽口張家原孟家寨各路踞逆傾巢湧出並設伏附近
林中敗賊復添隊回抗王九齡等均受重傷蕭德揚譚玉龍
洪殿元率馬步橫衝將賊截爲兩段逆眾遂亂爭先潰退其
潛伏之賊經我軍誘出而先分兵斷其歸路逆眾愈慌潰莫
能止是役斃賊四百餘名我軍亦傷亡數十人該逆雖經屢
挫而醜類繁多行踪飄忽另股由紅渠川神峪河竄出擾及
隴北之青白嶺西梁灣汧陽之杜陽溝等處糧道復梗適陝
西藩司林壽圖因事至軍將譚玉龍劉效忠調回該逆旋竄
娘娘廟蔓延崇信華亭兵勇不敷勦辦乃由北山飛調楊得

勝之雄毅軍鄔太愚之鎮西軍及穆圖善所派西蒙克西克之馬隊兩起先後繼至劉蓉飛令三路夾擊遂將神峪河尙家店白石川娘娘廟等處賊巢一律焚燬楊岳斌見東南軍情喫緊諸軍未能西趨遂親督諸軍勦辦清水張家川等處踞逆妥籌省防然後起行七月二十日抵通渭接前敵王得勝傅先宗稟報云兩軍連環拔隊分駐陽坪遠門鎮爲犄角十五日辰刻該逆馬步萬餘撲陽坪營壘當經我軍勦退追殺十餘里至王家河日已垂暮收隊回營等語二十一日親督彭楚漢李助發由蓮花城節節搜捕前進二十八日王傅

各營移紮邵家灣彭李各營移紮李家堡距張家川約三十里而該逆已於八月初三夜攜眷先遁而以悍黨堵截後路初四日五更率親兵京馬各營及彭忠國等至川口登山瞭望值瘴霧未收不能見遠下至山腰遇馬步各逆列隊川中我軍馳往勦之該逆堅忍耐戰傅先宗右手被傷適王得勝繼至奮力衝擊鏖戰兩時斃賊二百餘名生擒三十餘名追殺十餘里始回探該逆屯堵六十里外之焦韓店初五日留彭忠國一軍守壘各軍率所部往勦該逆一見官軍卽紛紛退竄我軍追及於張麻鎮斃賊八百餘名獲騾馬驢畜三千

餘頭收隊駐焦韓店其由清水攜糧歸巢之逆亦同日經彭忠國勦敗其糧悉數遺棄向華亭一帶竄走初七日彭楚漢等勦賊於店子峽斃賊甚多生擒逆首吳振彪馬得恭等五名該逆遠颺以去及探卒回報則已分爲兩股一股歸併華亭一股繞竄隆德靜平之間楊岳斌卽派傅先宗統帶馬步七營馳赴通渭攔截隆靜竄逆其華亭一帶踞逆陝軍已扼之於東甘軍雷正綰張在山蔣凝學等扼其北陳德隆扼其西南彭楚漢李助發扼其南王得勝扼其西節節滾營進逼屢獲大捷八月初五日張在山一軍抵華亭縣城該逆乘其

築壘未定迭次迎撲均經擊退十四夜彭楚漢李助發由竹林寺前進襲黃崖堡賊壘亦獲全捷十七日勦之於劉家店十八日陳德隆由張家川追賊至葡萄岸斬獲極多十九日彭楚漢李助發再擊之於劉家店陣斬逆目孫錦雲等數十名同日王得勝攻白岳河巢時已三更踏賊壘四十餘處殲斃一千餘名生擒四十餘名獲騾馬二十餘頭軍械無算我軍陣亡千總林富順都司田子貴把總陳得勝三員勇丁數十名十九二十等日該逆頻至縣城挑戰張在山禦之皆捷至二十日三鼓探知該逆將遁卽會同雷正綰跟追截其尾

隊擒斬各數十名據擒賊供稱該逆擬歸併白岳河再圖分竄等語遂率隊連夜跟追二十一日抵馬峽口該逆拚命回撲自寅至未鏖戰已歷六時我軍裹糧俱罄士卒忍飢苦戰愈進愈遠誤中賊伏血戰多時陣亡總兵杜連升張得勝副將范清元遊擊魏金明勇丁傷亡更眾旋經雷正綰隊伍援應賊始退竄此甘軍進剿華亭戰狀也其東路陝軍劉厚基譚玉龍於十七日抵下關遇該逆馬步數千我軍分據兩邊山腳用鎗礮緊轟斃賊不少劉效忠馬隊復進賊遂狂奔我軍追殺七八里該逆後隊復至我軍齊奮迎擊逆眾復敗追

至五六里計共殺賊五六百名生擒三十餘名維時官軍四面圍逼氛大挫蕭德揚黃鼎等復於二十日移紮磨坪川十字路緊逼逆壘逆愈惶恐遂於是夜翻山分路逃遁約至山寨鎮合隊以眷口老弱先行留悍黨斷後我軍齊抵尖骨山該逆之前隊已去後隊正在紛竄叅將孟學文驟馬馳突截殺殆盡獲鎗礮牲畜萬計當將尖骨山巢穴踏毀蕭德揚黃鼎追及賊隊該逆回馬抗拒往來數十次賊屍枕藉追至三十里鋪馬隊會合截擊復多殲斃餘孽向平涼隆德一帶竄去我軍馬隊亦有傷亡自是汧隴華崇之間已無逆踪未

幾隆德縣城亦經雷正綰督軍克復惟文武官員仍無下落時楊岳斌尙駐水洛城忽探報狄河回逆襲踞鞏昌府城卽飛飭傅先宗由通渭往援一面派陳德隆由甯遠繼進二十三日傅先宗至榜羅遇派防鞏郡之副將喻正祥詢悉情形係二十夜亥時突有狄河回逆由老城東南角爬入喻正祥分西北東三路攻撲鶴齡分東北兩路攻撲互有傷亡戰至天明賊來愈眾自老城衝出鏖戰至未時官軍力不能支而退鞏昌營遊擊江成萬亦戰敗跳城而出赴防營求援知縣孟鍾瀛典史雷姓春糾集百姓退駐鼓樓終日血戰已歷五

晝夜孟鍾瀛力竭自經雷牲春亦頭受重傷隨丁俱亡傅先宗遂星夜馳往二十四日至距城二十里之楊坡寨探知老城之逆三千餘名西北關屯二千有奇西關外亦屯三千有奇乃令江成萬爲鄉導於二十六日丑刻直抵城下適風雨交作不聞馳驟之聲江成萬卽率營兵爬入老城東門探報逆皆熟睡全無準備傅先宗率親兵及丁全德京馬中營列於東門派京馬左右兩營伏西門以防竄走而拒外援派張志心滿萬亨兩營由西北登關雷長庚帶親兵後營及喻正祥餘勇由東南登城左世亨帶親兵前營由南門登城部署

既定天亦漸曙喻正祥入城砍開南門傅先宗率隊衝入一聲號響鎗礮齊發該逆夢中驚醒倉皇失措城內之逆既不
能出關內之逆意圖入城援救被京馬營阻擊關逆遂跳牆
出竄關外之賊由西南上城亦經我軍擊退向西奔竄被京
馬營追殺數百名傅先宗督飭將士將城逆圍勦江成萬擒
逆首馬五十六喻正祥擒逆首馬彰善自寅至午城逆已無
孑遺內共斃逆首二十餘名逆黨三千餘名生擒三百餘名
獲騾馬二千八百餘匹救出難民四千有奇弁勇傷亡亦復
不少鞏郡遂卽時克復而華亭竄走陝回復分竄慶陽固原

楊岳斌仍擬親督往勦適接省城司道稟稱省營糧食異常
缺乏有萬難支持之勢因咨雷正綰與張在山劉效忠馬步
各營防勦涇慶飭彭楚漢李助發扼紮隆德以杜西奔飭王
得勝傅先宗堵勦北路而令陳德隆駐守鞏昌遂於九月初
九日由通渭起程歸省未幾奉

上諭云楊岳斌回省布置計已大定著卽督飭鶴齡督兵西
進會同黃祖淦籌辦肅州攻勦事宜毋再任意違抗成祿於
鶴齡抵肅後卽趕緊起程鼓行而西馳赴奇台一帶會同李
雲麟相機勦辦不准藉詞延宕欽此等因時黃祖淦駐紮肅

州所部原有八營黎獻所部復歸兼統兵力原非不厚已無
需成祿援助鶴齡所部川兵餘存無幾現已不能成軍因奏
明遣撤回川而自任派軍渡河西剿而由華亭敗竄平涇之
逆經總兵劉效忠及已革提督周顯承剿之於花所鎮峒峴
鎮擒僞帥馬全芝斃逆眾數百該逆遂繞由涇州北原東竄
張在山截之於西峯鎮復竄甯州九月二十二日沈大興擊
之洪河川官軍失利譚玉龍至政平鎮軍中絕糧爲該逆所
乘全軍幾覆當經收集退紮店頭堡慶甯股逆復熾其分竄
固原之李得蒼一股經王得勝彭楚漢李助發等進規該逆

退竄靜甯乞撫西路逆回馬瑞興楊文治等股往來平番古浪之間經涼州鎮總兵楊占鼐仁字營王仁和迭次痛剿復聞提督梅開泰渡河西向遂退屯鎮虜堡不敢肆擾是時兵機原非不順逆回亦頗懷畏懼惟糧食缺乏已極每市斗小麥一石價銀一百六七十兩軍民之困無以復加楊岳斌內撫飢軍外籌逆匪觸處棘手焦灼萬分而慶陽一郡從前尙爲完區現遭逆回巨股麇萃洪河川零股分擾甯州正甯合水環縣遂至無處無賊雷正綰張在山兩軍不能制其奔突蘭垣鞭長莫及勢不能不望援於陝值劉蓉將次交卸接撫

陝西者爲喬松年新至陝疆情形未悉劉蓉雖奉

命幫辦陝西軍務呼應已異從前况捻氛漸近潼華不得不
抽調各軍回顧陝境幸

朝廷深鑒其苦所奉

上諭有云陝省東西兩路同時喫緊劉蓉勢難兼顧且該省
兵力甚單亦屬不敷分布穆圖善現在中衛自應先其所急
回顧陝省著該將軍暫緩前赴蘭州仍與劉蓉悉心會商先
將陝甘毗境竄匪迅圖殄滅如陝省兵力空虛該將軍有無
就近可以添撥援應之處並著相機調度欽此等因劉蓉因

奏請

敕下穆圖善率所部得力馬步迅由鹽茶趨平固進紮涇州
督飭雷正綰等軍截剿東竄逆匪以杜回捻旬結並督張在
山等軍竭力保護慶陽現據周顯承稟報逆回分遣馬賊由
涇州中原竄至崇信雙廟鎮意圖窺伺隴州查隴州僅有三
營駐紮麟遊現飛調駐紮鞏昌之陳德隆於德字八營內分
撥四營赴隴等語而洪河川一帶回逆經雷軍擊剿於北周
顯承夾攻於南不能復歸老巢遂行結黨西竄十月二十日
該逆二千餘人竄至平涼城下平涼遊擊劉玉昌勢不能支

該逆遂於二十一日黎明時由北門越入周顯承聞之卽率所部馳往一面稟請雷正綰會同張在山全軍赴援二十二日行至十里鋪適雷正綰之軍亦至遂於次日天明時由東南北三面攻入該逆卽由西門竄走我軍合力尾追斃賊四百餘名當將平涼府城克復旣而土匪董福祥高萬鎰擾及保安合水交界之東華池林鎮廟經陝軍段登雲馳往剿辦斃匪三四百名餘黨向元城子一帶竄走復有回逆馬隊竄邠州之白吉原經都司陳貫珠迎擊斬黃衣逆目一名該逆復敗而西竄劉蓉慮涇州長武等處回氛弗靖實爲陝省門

戶之患因檄飭同知鄔太愚總兵楊得勝提督邱時成副將
洪殿元駐紮白吉原亭口鎮等處堵剿回逆飭提督劉厚基
劉玉興副將何玲必直隸州黃加焜分紮武關竹林關漫川
關並飭潼商道厚集鄉團嚴防金堤關以防捻匪嗣聞曾國
藩奏派劉銘傳潘鼎新張樹珊馳剿東路鮑超劉秉璋楊鼎
勳劉松山專辦西路時楊鼎勳一軍已到陝州劉松山一軍
亦抵內鄉復附片陳請

敕下曾國藩改撥劉秉璋楊鼎勳劉松山三軍來陝助剿而
令劉松山由商州進劉秉璋楊鼎勳由潼關進旣而回逆竄

擾甯州之太昌鎮與洪河川木瓜鎮逆勢聯絡復調西蒙克西克馬隊及黃鼎步隊移駐邠長而宜君三水警報復至正苦無兵可撥忽據潼商道蔣徵陶稟報前竄山東曹州股捻已於十一月二十七日竄至陝州邊馬擾及閩鄉距潼關僅六十里當飭中軍彭體道率撫標三營馳赴潼關而檄何玲必黃加焜移紮雒南劉厚基移紮藍田旋據蔣徵陶報稱該逆至閩底鎮知潼關有備折由蒿峪小路依秦嶺行走一股由太峪口向華陰一股由潼峪山路竄入據拏獲奸細供稱僞曾王已在山東擊斃大閩王李坤兒統萬餘人執白邊紅

旂小閻王李隨兒統萬餘人執黑邊白旂僞魯王五榜統二萬餘人執藍旂小頭目邱姓統千餘人執白旂均約共撲西安省城等語時賊騎已擾至三河口一帶彭體道擊之於華陰敷水鋪小有斬獲旋被賊騎包裹身受矛傷又聞張逆有由魯山竄漢中之說正苦無兵截剿未幾捻逆麇集藍田之洩湖一帶意圖久踞各軍連日擊剿幸獲小捷十一月二十五日我軍已進逼賊壘該逆突出馬步數千圍繞衝突鏖戰逾時始退該逆卽於是夜棄巢而遁先由藍田趨商雒山徑旋復折由厚子鎮竄渭南我軍分途追剿劉厚基蕭德揚黃

鼎等追及該逆後隊於普化鎮頗有擒斬譚玉龍扼擊於渭南之麻李村該逆亦敗至十二月初三日鄔太愚洪殿元馬步至新豐與逆黨遇自辰至未斃賊數百名生擒六七十名既而該逆馬步麇至盤踞近村開挖長濠以圍我軍時分小股渡河擾及高陵一帶劉蓉與陝撫喬松年會商嚴飭諸軍奮力進擣新豐初四日劉厚基楊得勝劉玉興等折回零口黃鼎西蒙克西克等折回楊村蕭德揚折回南原途次遇賊接仗皆勝初五日該逆分三路撲營均經我軍擊退初八日諸軍移紮南原上下以聯聲氣初九日黎明該逆復以馬步

數千來撲逆首張五親督逆黨衝突張玉文中矛落馬黃鼎
急揮黃有忠徐占彪猛撲賊勢稍卻各軍漸亦羣集賊敗而
去是日斃賊亦數百名初十以後我軍步步爲營更番進逼
日夜攻襲至十五日抵濠外是夜該逆密伏悍賊於濠內我
軍偵知其情候至十六日黎明始各率師猛進鄔太愚知援
師已集囊土填濠開堡大呼以火器長矛向前衝突而出劉
厚基黃鼎蕭德揚劉玉興譚玉龍西蒙克西克邱時成等各
率所部四面衝殺該逆憑濠死抗各軍復分道邀截內外夾
擊陣斬逆首張總道該逆始奪路狂奔當將逆巢悉數攻燬

追殺十餘里共斃賊八九百名該逆連夜西竄圖趨蓋屋一帶劉蓉預飭彭體道伏距城十五里之光大廟約俟張總愚紅旂隊到開礮狙擊飭諸將猛追勿許稍舒喘息十七日邊馬及省城附近之韓生冢一帶另分悍賊二三萬伏於瀆橋之十里坡上左右村堡十八日追師行抵瀆橋該逆回旂轉鬪我軍併力猛進畧有斬獲追過瀆橋楊得勝率所部雄毅軍首先搶上十里坡蕭德揚劉厚基黃鼎劉玉興等督隊繼進忽然風雪晦冥咫尺不辨坡上逆眾回拒兩旁伏逆突出我軍已深入難退該逆萬騎畢集蕭德揚等督軍力戰該逆

知係統將環矛叢刺身受二十餘傷力竭陣亡我軍轉戰數時鎗礮皆爲雪潤不能點放逆黨眾逾十倍層層圍裹楊得勝蕭集山蕭長青蕭德綱等均歿於陣傷亡弁勇三千餘人譚玉龍率師由南原繞至與劉厚基所部力扼滄橋鄔太愚劉玉興邱時成西蒙克西克等奮力殺出重圍退駐臨潼黃鼎衝至省城賊勢全數西趨適逆回大股六七萬圍逼慶陽府城將及一月周顯承於甯州進勦亦遇伏陣亡雷正綰張在山兩軍僅能保護甯州雷正綰駐紮邱家寨並有被逆回擁去之說喬松年復請

敕下穆圖善先赴慶陽以顧大局而陝省剿捻各軍自十八日挫敗後湘果一軍統領陣亡各營將領弁勇傷亡過多亦有被賊擄去者該逆踞省城外文報不通糧路斷絕婦孺狂奔哭聲載路喬松年曾約劉蓉會銜奏報及劉蓉送稿會印接到覆函云已於先日單銜具奏不必重複其所奉

上諭云喬松年奏官軍潰敗省城危急請調援軍並請飭穆圖善赴援慶陽劉典庫克吉泰等先剿陝捻各摺片覽奏曷勝焦急此時非有大枝勁旅星夜援奔陝事將不堪設想會國藩李鴻章所調各軍並未到陝鮑超一軍屢經諭令赴秦

遷延逗留致令陝省糜爛至於此極現在陝軍俱已潰散別無可調之兵著曾國藩李鴻章嚴檄鮑超劉松山等軍兼程赴陝趕緊救援倘再藉詞不進卽著嚴參照軍法從事並著庫克吉泰德興阿督率所部先辦剿捻事務再行相機赴甘左宗棠前已有旨令其先行赴陝毋庸來京著卽兼程馳往秦中與喬松年整理戎政並著左宗棠嚴催劉典速募湘勇成軍立限馳援陝省郭寶昌一軍著英翰飭令星馳赴陝聽候喬松年調遣慶陽甯州回勢猖獗郡城被圍一月緊急萬分著穆圖善統率所部卽日起程赴援並將回匪力行遏剿

毋任回竄陝疆劉蓉在陝有年一味寬縱將士毫無畏憚屢奉諭旨出省勦賊並不親臨前敵督戰以致諸軍進止不齊有此大挫殊堪痛恨本日已明降諭旨將劉蓉革職卽著喬松年飭令回籍援軍未到以前喬松年當就現有兵力認真防守省垣以固根本欽此等因劉蓉見喬松年不肯會銜不得已單銜另奏其所奉

上諭已於喬松年之奏

批發劉蓉尙未之知照常會辦軍務籌思焦灼幸劉松山一軍已抵潼關人心稍定而劉蓉喬松年疏中均有仰懇

天恩敕催劉松山迅速入關援剿並催左宗棠統兵赴陝之語緣楊岳斌前因母老身病奏求

開缺歸養左 遂奉總督陝甘之

命交卸閩浙督篆後卽由福建起行十二月十六日行抵九江府奉

寄諭著卽馳赴甘省毋庸來京二十三日行抵湖北黃州復奉

寄諭現在陝西賊匪已竄南山希圖直達漢濱左宗棠帶兵由湖北入秦著卽確切偵探覘賊所向迎頭扼堵杜賊竄鄂

之路如賊尙在秦卽著該督迅赴陝西督飭諸軍先剿南山一帶俟此股辦有眉目再赴甘肅督剿回逆劉典一軍會否啟行並著催令赴營以資得力欽此二十六日至武昌復奉寄諭云劉典前次所奏因病不能卽日啟程並募勇尙需時日請賞假五箇月等語甘肅待援孔亟若再遷延數月則軍情賊勢變幻靡常局勢何堪設想劉典著賞假二箇月趕緊調理一面募勇刻期啟行欽此等因時左 駐軍漢口籌辦入關事宜整練隊伍俟劉典募勇來會同治六年正月初十日奏陳籌辦情形適值楊岳斌亦有回捻勢將句結之奏

奉

上諭云左宗棠奏敬陳籌辦情形請將劉典開缺另簡楊岳
斌奏回捻勢將句結請飭鮑超入陝劉蓉赴涇西甯回匪日
逞奸謀大臣受其挾制各摺覽奏均悉左宗棠所稱進兵陝
西必先清關外之賊進兵甘肅必先清陝西之賊駐兵蘭州
必先清各路之賊實爲動中竅要本日已授該督爲欽差大
臣督辦陝甘軍務並令譚廷襄將封存關防一顆送交該大
臣祇領矣摺內所稱採買馬匹練習馬隊先造獨輪車應用
俟所調各營取齊由襄樊出荆紫關赴陝抵陝後製造雙輪

礮車一面開設屯田總局汰遣各營兼雇買車輛俟採口馬到陝增練馬隊並習車營均著次第辦理陝西已有劉松山一軍在彼並收集湘果各營鮑超一軍亦已令其入陝該大臣若率所部先駐西安不患無兵調度若必俟劉典到營一同入關深恐有稽時日著卽將現有兵力取道入關妥爲籌辦左宗棠未到以前喬松年務須懍遵疊次諭旨認真防剿勿稍大意劉典已開缺賞三品卿銜幫辦軍務著左宗棠催令卽日募勇到陝勿任逗留張岳齡已授甘肅按察使並著飛咨劉坤一飭令該司督率所部三營赴任藉資坐鎮楊岳

斌請飭鮑超速行入陝已屢經傳諭該提督星速進關援剿楊岳斌所請劉蓉赴涇之處著不准行並著喬松年酌度軍情派軍赴涇駐紮勿得視爲緩圖西甯回匪日逞奸謀玉通將漢團全行撤去受其挾制將來必難自保楊岳斌現今令孟柏林等仍行練習舊卒招募新軍著密飭妥爲豫備高連陞一軍已諭令瑞麟蔣益澧飭令迅速赴陝欽此楊岳斌復以病勢增劇陳奏奉

上諭楊岳斌所陳患病情形覽奏實深廬係著賞假一箇月安心調理惟秦省匪勢鴟張左宗棠先須入關剿辦俟秦省

底定然後移師入甘左宗棠未到以前楊岳斌責無旁貸仍著懷遵前次諭旨力疾從公倘有疏虞仍爲楊岳斌是問曹克忠前因患病赴陝現在計可就痊著喬松年檄飭曹克忠迅卽馳回甘肅統帶舊部掃蕩逆氛如有託病情事卽著喬松年據實叅奏以儆驕悍欽此等因喬松年親往看視見曹克忠果胸口悶塞難進飲食兩足拘攣艱於步履有不能痊可之勢奏奉

諭旨准其開缺回籍劉松山於入關後逆料至省必有戰事先令弁勇於途中預行度歲十二月三十日率老湘十二營

及壽春鎮李祥和厚兩營編修張錫鏞敬字三營共成十七營馳抵西安省城時逆捻大股麇集秦渡鎮花園鋪梁家橋一帶分股時過渭河擾及興平醴泉涇陽乾州各州縣譚玉龍劉厚基秦國輔劉效忠等軍均紮渭北劉松山看明地勢卽進紮城西之雨花寨營壘尙未全定同治六年正月初六日張逆卽以全股來犯我軍出隊七成迎擊編修張錫鏞自率百餘人深入賊陣後路逆黨環逼刺之登時陣亡劉松山督飭各營連環攻擊鏖戰數時立將大股悍賊擊敗追至八九里斃賊千餘人帶傷逃去者更多生擒百餘名正法軍

前獲騾馬軍械無算該逆敗挫之後連日於秦渡鎮一帶悉力抗拒製造擋牌屢欲撲我營壘我軍復添道員黃鼎彝字營總兵孫立士鎮西營隨劉松山進擊十七日移營進紮晁家莊逼賊而壘正布置間忽北路探報逆回由宜君縣境深入馬賊千餘騎數百騎不等已由耀州蒲城富平三原等處東趨渭南境內喬松年因飭駐紮咸陽之劉厚基駐紮興平之劉效忠向渭南扼擊又派何玲必邱時成由臨潼徑赴渭南旣而長武大荔均被回擾同時告警適聞庫克吉泰德興阿前隊已抵朝邑因咨請就近迎剿該逆見官軍速至向北

回竄雷正綰一軍進紮邱家寨被該逆糾合慶甯大股於上年十二月內直撲秦昌鎮將雷正綰營壘圍裏並分股四出以圖牽制雷正綰被圍二十餘日騾馬宰食幾盡該逆愈聚愈多我軍蓄憤已極至正月十九日親督各營會同張在山等奮威力戰登時擊破重圍將秦昌新莊踞逆悉數擊退殺斃不可勝計該逆併歸慶陽分股竄至鄜州蔓延數百餘里兵力不敷防剿雷正綰屢請益師喬松年復咨請庫克吉泰德興阿兩軍由邠長大路直赴涇州以爲援應劉松山因捻逆久踞秦渡等處毫無去意商定併力進攻二月初一日四

鼓會同李祥和黃鼎等營各出六成隊伍挑選奮勇攜帶火器鋤鋤等項分投前進行抵灋河東岸見對河守卡賊數百人憑河死抗我軍涉河猛擊立將該逆勦潰毀卡而入直撲賊巢該逆勢不能支有退入老巢者有從巢外奔潰者我軍拔椿越濠入壘來往搜捕斃賊無算當將呂兆集南豐店賊巢攻破直趨秦渡鎮花園鋪踞逆見北路之賊已潰不敢抵禦相繼向西南狂奔我軍追殺十餘里踏平賊巢數十處斃悍賊千餘獲騾馬千餘頭軍械不可勝計解散脅從數千人省城之嚴遂解而劉厚基等軍於涇陽獲勝後緊躡賊踪至

三原復由涇化追至三原旋據探報甘回數萬旬結土匪潰
勇由邠州竄至鄜州段登雲兵力單薄該逆遂擾及中部宜
君邊境喬松年因鄜州喫緊奏請

救催左 迅速入關並飭庫克吉泰德興阿等赴鄜州助

剿庫克吉泰旋赴省垣商調副將王其發吳得勝步隊兩營
歸其調遣改而剿捻而左 則以募勇未集尙在漢口也

其三原回逆見劉厚基軍至復竄耀州之柳林分股擾至同
官劉厚基復追至柳林逆戰而走同官之回合併向北狂竄
同時劉效忠剿乾州回逆亦經逐出陝境忽鳳翔府縣稟報

有大股回逆自靈臺竄近郡城其遊騎至於岐山扶風而北
山膚施安塞甘泉等縣又以回逆滋擾疊稟喬松年茫無以
應而捻逆雖經屢挫猶踞郿縣之齊家寨一帶地方北或渡
渭南或入山均未可定劉松山慮其潛遁因進紮槐芽鎮緊
逼而營未幾西安將軍庫克吉泰都統德興阿副都統安住
全福及曾國藩續派來陝之處州鎮總兵馬德順各率馬步
來會張逆見官軍逼近將悍黨調集金渠銀渠兩鎮意圖負
隅劉松山商定方畧於十五日四鼓各派隊六成以出劉松
山李祥和馬德順由左以順字壽字兩軍馬隊包鈔派黃鼎

彝字營由右以安住全福馬隊包鈔直趨銀渠賊壘該逆接仗卽卻棄巢而遁我軍入巢剋洗餘逆敗併金渠復糾各巢悍逆列隊鎮外我軍乘勝而來銳不可遏斃長髮甚多一擁而入其鎮該逆狂奔追殺七八里所斃更多餘逆竄東西梁谷是役擒斬二千有奇救出難民數千所獲騾馬軍械無算庫克吉泰喬松年會奏陣亡之叅將劉福勝劉發蘭彭榮致遊擊張德豐陳萬勝李振五都司許瑤林賀爾山等均蒙賜卹如例但擒逆與鳳翔回逆僅隔一河訊據擒逆供稱賊中已有過河句合之議其事固在人人意中也然欲制其句

合不外於以兵截勦奈北路勦擒之師止譚玉龍秦國輔兩軍北路勦回之師止劉效忠邱時成兩軍其他若雷正綰張在山專辦慶陽久爲回逆牽制日夜望援穆圖善藉楊岳斌奏留久住中衛迄未起行皆非可調可恃之軍喬松年因奏請

敕催郭寶昌一軍速進並請

飭鮑超一軍早清鄂境疾馳赴陝擒逆句合回匪後欲令回逼南岸同抗官軍劉松山慮其固結遂於十七十八等日會合各營連破賊巢十餘處該逆於十九日由渭河淺處梟過

渭北留馬賊斷後劉松山等擊敗賊騎亦渡渭緊躡而前該逆欲由扶風岐山悉眾東奔適譚玉龍秦國輔何玲必諸軍由扶風西進與該逆大股遇卽行奮擊該逆逞其慣技以馬隊分路包鈔我軍早以馬隊準備該逆知其不濟復率悍黨欲圍我軍譚玉龍等齊力衝擊擒斬多名該逆退踞益店鎮仍與回逆相近勾結以抗官軍劉松山等擊之於渠羅鎮譚玉龍等扼之於扶風雖屢有斬獲究以逆眾太多未能聚殲該逆仍欲渡渭回竄爲劉松山等所阻遂於三月初二日由菊村鎮杏林鎮向醴泉一路東奔鳳翔之回逆亦分股隨之

而東值郭寶昌一軍由三原向咸陽中途遇該逆前隊擒斬百餘名於是郭寶昌迎擊於前劉松山等追勦於後惟據擒賊供稱回捻合謀欲以捻逆竄擾同朝回逆撲犯省城等語是時甘省回民盡變醜類愈繁皆思下竄陝疆以就食而附捻鳳翔逆首卽張家川之李得蒼一稱得昌前曾懼勦就撫者而雷正綰飛緘至陝又有另股下竄之說喬松年至此始知籌軍非易惟盼左速至卽陝甘軍民亦知非左必不能辦是以國子監祭酒車順軌據同鄉之信陳奏於前藩司林壽圖知措置之非瀝陳於後皆以

敕催左 速進爲言然左 雖駐鄂省固非不念陝事

孔棘甘境糜爛者特新募未集口馬未至雖勉強遄征亦難辦賊也而甘肅之回旋撫旋叛幾與陝回同洮州廳自上年曾克忠撫定留副將周潮旺帶領四營駐防其地至九月間回員都司丁永安令所部回眾於城內高阜築堡盡徙回民居之人心已不能無惑十月初旬有由營逃出回勇至狄河句結逆回數百竄至洮州千家寨一帶時周潮旺在岷州剿匪聞信馳還十三日率隊往剿未能得手收隊回城旋派勇至丁永安處搬取前所寄之軍械子藥丁永安竟不與周潮

旺見其反形已著隨調在岷之提選中左兩營回洮該回眾
卽於四更時吶喊開礮自堡內出撲官軍迎擊斃回百餘回
退入堡忽城外喇嘛川等處回匪猝至官軍首尾不能相顧
卽令收隊而堡內之回復出隊不能收陣亡勇丁百餘人丁
永安乘勢入城戕舊城都司雷興隆脅制洮岷副將馮光明
教授劉升嶽逼令降回二人不屈遇害同時漢民被害者百
餘家於是洮州新舊兩城及太平寨千家寨汪家嘴喇嘛川
等處回匪連接屯紮狄河逆回亦竄往盤踞署洮州同知熊
其光先已避居卓泥地得以苟免至是楊岳斌查得其詳奏

請將統領副將周潮旺及營官副將魏紹珍參將田文勝都司張廷秀一併革職留營立功自贖丁永安先行革職俟獲日就地正法熊其光發往黑龍江馮光明劉升嶽雷興隆等均請

賜卹緣楊岳斌雖經開缺以左不能速至尙留蘭省辦理軍務得以隨時奏事故也左 因屢奉

寄諭催其赴陝不能再緩遂擇於二月二十四日由漢口拔營起行其奏報疏云竊臣所調各營於本月上中兩旬陸續到鄂逐加點驗舊部尙多當卽分撥各營編爲前中後三路

十五營而自統親兵營十哨及先鋒後勁新前新後四營馬隊五起以利分布二十日令提督銜總兵劉端冕總兵周紹濂率前路中路十營啟行二十四日臣率提督銜總兵楊和貴後路五營及馬隊各營旂繼進擬由雲夢德安隨州以達襄陽其劉典所募之四營亦已到鄂飭令暫駐漢口俟劉典率親軍左右兩翼及後營到鄂隨同前進其中書科中書吳士邁之宗岳兩營新授甘肅臬司張岳齡之平江三營廣東提督高連陞之果勇八營則尙無來鄂消息也現據探報捻逆大股復自鄂皖交界二郎河等處回竄廣濟鄂軍獲捷賊

復繞竄蘄州蘄水鄂軍迎勦失利勢甚披猖臣軍前進沿途
或有戰事惟當慎以圖之前奉

諭旨務須保固同朝等處兼顧山西勿爲回氛肆擾臣維防
河之要必先由潼關兜勦而西而臣軍不能速進鮑超所部
馬步全軍原擬由荆紫關入秦臣奉

諭後比卽恭錄咨行並緘商於入關後取道留仙坪大峪口
以達潼關頃得覆緘以荆紫關一路山徑崎嶇難以整隊遄
行改由宛洛以入潼關本月十五日已由樊城啟行臣軍到
襄樊時鮑超全軍必已由潼關入秦如同朝有警自可渡渭

援勦臣軍行過龍駒寨時亦當相機兼顧竊計解凍以後河防宜易爲力也等語此疏既上

朝廷宵旰之憂稍釋卽軍民雲霓之望亦稍慰時捻逆大股麇聚乾州附近之臨平鎮其前股已至醴泉郭寶昌一軍卽向醴泉進擊劉松山庫克吉泰率同黃鼎等亦卽拔隊前進商定於乾州取齊譚玉龍劉效忠秦國輔等軍則由扶風追勦而來郭寶昌甫至醴泉探知傅家莊徐家堡一帶有回逆數千分踞卽疾馳往勦立將該莊堡擊破忽後股悍逆蜂擁來援亦經擊敗後斃賊五百餘名生擒百餘名救出難民

數千遂率隊赴乾州復擊退回逆千餘方與劉松山庫克吉
泰諸軍會合當卽分路齊進附近村堡諸逆不虞我軍猝至
紛紛潰退我軍馬步齊進陣斬甚多餘逆退回臨平譚玉龍
等自扶風而來該逆於夜間往襲其營當經奮擊而退於是
譚玉龍等由西路郭寶昌由東路劉松山等由南路三面合
逼臨平三月十四日直趨董村進戰該逆驚慌無措我軍乘
之遂奪董村該逆復糾大股來撲亦經我軍截擊郭寶昌率
隊搶過山溝斜鈔而前該逆復敗歸臨平老巢十五日我軍
商定分三路進擣劉松山等由左郭寶昌孫立士由右李祥

和黃鼎由中路以進各營馬隊分左右包鈔至距巢二里許該逆卽以騎賊數千向前排列其步隊悉伏寨中我軍亦以馬隊誘之該逆果糾大股而出我軍三面齊進鏖戰數時該逆傷亡已多棄巢敗走我軍追殺十餘里立將臨平辛店南齊堡上渠堡數十處賊巢攻破斃賊千餘名救出難民數千獲騾馬三百餘匹譚玉龍另攻菊村一帶賊巢斃賊亦近千名所獲亦多追至武功興平該逆大股疾趨咸陽將由三原以窺同朝我軍俟逆踪稍定以籌進剿其時穆圖善久駐中衛屢奉

上諭責令馳援慶陽亦擬擇期前往先期緘知楊岳斌請分撥數營換紮甯安堡以資彈壓並遴派委員辦理安插乞撫陝回馬生彥楊文治等事宜楊岳斌正苦無兵可撥又據署慶陽府知府支昭辰稟稱慶郡踞逆悉數東趨城圍已解四鄉糧食得以入城糧價平減涇州亦無賊踪等語因奏陳甘省兵單已極更無營可以撥派而慶涇回逆均已東竄仍留穆圖善暫緩東行以資熟手等情穆圖善因留中衛以俟諭旨陝省方辦竄回捻逆亦無可抽之軍而土匪董福祥等與慶陽竄走回逆交相蹂躪畧無顧忌甘省之甯州正甯合

水陝省之鄜州中部宜君三水生民塗炭無可控訴有力者
攜家遠避無力之民束手待斃而已況甘省僅南路稍甯西
路惟涼州府城有鎮標兵勇堪資防守鎮番縣城經逆回數
次圍逼署知縣余宗麒署遊擊陶世貴督率兵勇鄉團竭力
守禦幸未失陷餘皆時陷時復北路雖經安撫而包藏禍心
軍械馬匹抗不呈繳東路地當孔道逆踪來往無甯日僅涇
州幸保城垣餘皆鞠爲茂草慶郡受禍最後至是罹災亦最
酷蓋其地距甘省遠而距陝較近此時捻逆數萬逼近西安
官軍力有未遑以至於此自臨平破巢後該逆東竄由三原

至富平踞王寮鎮惠店一帶二十四五以後劉松山黃鼎全
福郭寶昌等分路追攻將王寮鎮惠店等處賊壘平毀該逆
退踞流曲鎮一帶我軍復進攻之該逆仍歸原巢二十七日
我軍直前奮擊該逆宵遁連日所斃約二千餘名該逆由蒲
城東竄同朝並分派回逆擾及邵陽在籍編修王鳳翔督團
迎擊陣亡劉松山等軍跟踪追至同朝兼顧河防據擒賊供
稱該逆畏懼官軍急欲渡河擾晉省完善之地等語旣而該
逆大股果向同州以來晝夜狂奔留悍黨在後以圖牽制劉
松山等於四月初一初二等日一戰於晉成堡再戰於姜彥

村該逆每以騎賊前拒劉松山郭寶昌齊進亦以馬隊包鈔該逆悉行潰敗陣斬及投河死者不計其數遂連夜向同州東北逃竄劉松山及黃鼎跟追連將許莊小濠賊堡擊破正乘勝前進間張逆自率大股迎戰橫亘二十餘里並以滾龍車擋牌各隊包裹而前劉松山李祥和黃鼎等仍分三路進戰斃賊已多該逆恃眾四面包圍劉松山嚴束隊伍專用洋鎗四面轟擊逆眾紛紛倒地其勢遂亂張逆復糾前股馬賊來援經總兵黃萬友等分路勦擊陣斃逆騎不少衝突三次均被我軍擊卻自午至酉賊眾散亂棄軍械而奔我軍追殺

十餘里擒斬二千餘名並生擒頭目鄧立志等多名軍前正法救出難民數千獲軍械六七千件乘勝將大濠營小東坡一律攻破該逆竄伏謝家坡劉松山自入陝以來大小三十餘戰以寡敵眾每戰皆捷未嘗自鳴其勞庫克吉泰等不忍歿其勲績至是始彙案陳請

獎勵其先後陣亡之叅將李順才遊擊胡理明蕭忠恆左德明都司楊焜益胡連升守備熊吉福千總周福泰李明祥把總熊志昌劉建祥羅錫良外委曾楚榜等均蒙

賜卹如例左
自漢口拔營行抵灑口聞捻逆回竄麻城

黃岡一帶值鄂軍新挫鄂省兵力太單卽飛咨鮑超迅速赴鄂得以壹意西征三月初四日聞捻逆已至黃陂城下卽飭劉典五營速進灑口大軍遂於初六日進駐雙廟探報捻逆已竄孝感雲夢督軍往擊及至孝感則已西竄應城鄂軍已跟踪追至鄂撫曾國荃咨催淮軍之在行者分道會剿並催鮑超疾趨安陸遙合長圍左軍於十六日抵德安府城將由隨州取道襄陽聞劉典已至灑口俟鄂省長圍合後卽行拔隊速進曾國荃馳至德安會商大局而捻逆全股麇聚天門鍾祥以圖偷越漢西曾國荃令水軍扼其西陸軍扼其東左

亦飭劉典往扼新溝時擒逆日思偷渡皆爲提督左光培所卻該逆惟長圍合後無路可逃遂折竄京山左軍於二十四日由德安拔營二十七日抵隨州聞擒逆已由洋梓竄隨州之茅茨畝進至環潭知州潘亮功請援許按兵俟之二十九日都司丁太洋探報該逆已至州北三十里之高城前隊至萬家店乃令各營蓐食追剿四月初一日辰刻抵塔兒灣遇賊數百皆駭而回竄忽後股馬步數千護賊眷由山溝馳走礙於民房不能施放鎗礮該逆出溝復依林而逸僅斃百餘名初三日拔營取道棗陽初八日抵樊城接劉松山等

稟報陝揔東趨同朝遂改議由潼關大路以冀迎頭截擊其時陝西郭寶昌與劉松山分途後初戰於朝邑再戰於蒲城三戰於富平皆獲大捷惟富平血戰終日賊始敗走是日斃賊亦較多賊勢大沮劉松山追及於富平之文川團陣斬二百餘級再追及於永豐鎮蒲溪堡斃三四百名賊竄興平意圖渡渭劉松山緊躡其後郭寶昌迎頭截擊該逆竄踞渭濱之普集鎮郭寶昌渡渭而北將憑河悍賊悉數殲除轉戰而前與劉松山等軍兩面夾攻全福黃鼎孫立士等併力同進勢如破竹將普集鎮攻克並奪村堡二十餘處該逆梟過渭

河意圖直撲省城劉松山郭寶昌分道疾追二十三日敗之於李家橋該逆仍連夜向省城南竄二十四日城上已見賊旂庫克吉泰等料理城守德興阿率親兵馬隊迎頭截擊復派中軍叅將彭體道帶馬步出城扼截劉松山郭寶昌已疾馳而至戰於城南之山門口木塔寨齊王村等處呼聲震地鏖戰數時頗有傷亡我軍畧不返顧往復十餘次斃賊數千名日已向晚賊不能支向省東竄去次日黎明卽拔隊往追訊據難民供稱該逆意圖盡力圍攻省城以逞其願官軍未容喘息竭力追剿精銳大半傷亡始鼠竄以去裹脅之眾潰

散不下萬人其馬斃於陣者數千官軍所得亦數千屍橫十餘里該逆自入陝以來未嘗受此大創人心快慰我軍追至灞橋該逆膽已先寒甫與交鋒逆卽大潰仍涉淺渡渭而北左 駐樊城旣奏明改道潼關旋接劉典緘報在宜城之官莊地方遇賊未戰而遁十九日將回軍往擊該逆又竄棗陽之平林市二十日四鼓署安襄鄖荆道唐協和率所部截賊於黃龍壩左 亦親率全軍赴峪山該逆由洋梓竄過平林夜爲鮑超所部之宋國永所襲二十二日卯刻大軍馳至孟家集該逆已趨黃龍壩爲唐協和所敗辰刻大軍進至

張家集遇賊零騎擊之遁追至棋盤岡斬馬步百餘名髮淺者概予免死獲騾馬百數十頭拔出難民千餘二十三日探該逆已竄新野仍回樊城二十八日劉典亦率所部至急欲分道西進苦車馱雇覓無多乃以現至者先送楊和貴一軍赴南陽而以所獲鄂捻騾驢送劉典先由老河口赴荆紫關而親兵及中路宗岳等營尙須停待因簡料重賚軍裝先由水路向新野時淮軍劉銘傳擊賊雲夢生擒逆目陳大貴而陝捻張總愚大股經劉松山等追剿於渭北復渡渭南竄蓋鄂五月十三日左由樊城拔營啟行聞高連陞八營已

抵長沙因緘商至襄陽後溯漢水而上至蜀河口登陸以防
該逆敗竄南山之路時劉松山等勦張逆於鄂縣之大王鎮
該逆仍不戰而潰復由舊路回竄興平劉松山等躡踪追之
沿途所斃不少惟甘回分路竄陝現猶絡繹雷正綰固守邱
家寨張在山固守荔家堡皆未能派隊遠出鳳翔之逆竄近
咸陽劉片基劉效忠等雖屢次獲勝亦以兵單不能制其竄
擾故盼左軍之至尤殷而左軍自樊城啟行後途中連日大
雨積潦載途軍行不無濡滯六月十四日度函谷申酉之交
甫出谷口忽黑雲西起雷雹交作山溜暴發平地水深數尺

山衝逼東水勢陡急車驟奔勇漂出大河者甚多軍械輜重
 所失不少經理一日然後行十八日抵潼關駐營西關外劉
 典亦已於十六日抵藍田高連陞聞已於初四抵樊城乘舟
 溯漢而上值夏水盛漲舟行頗遲計入關亦將不久張逆屢
 為劉松山所敗亟圖竄豫聞左劉兩軍由東而來乃避竄渭
 北擾及同朝復為劉松山等所敗東阻大河又為晉防水陸
 諸軍所扼復返竄至蒲城劉松山等熟知賊情其眾約三萬
 有奇能戰者居其半惟健馬尚多一賊或兼數馬更替乘騎
 故飄忽尚如常態而其銳氣則消沮甚矣回逆與捻時離時

合而土匪交錯其間陝省幾無完地賊踪之密以北山爲尤甚楊岳斌聞左 將至求歸益切其前次留穆圖善之奏至是奉到

上諭云前因楊岳斌奏病體難支老親皆在病中盼望情詞哀切是以准令回籍飭穆圖善馳赴省垣接署督篆茲據楊岳斌奏稱慶陽踞逆東趨城圍已解涇州亦無賊踪惟甘省西南北三路勦撫均須重兵省城存兵無多勢難分顧馬生彥等股甫經就撫甯安堡彈壓之兵實無可撥其辦理安撫各務若遽易生手前去必至猜隙叢生仍飭穆圖善暫緩東

行等語所奏自係實情此時穆圖善計抵蘭垣責無旁貸著將楊岳斌所籌體察情形妥爲布置不可稍涉疏虞河狄等處地方應如何防剿之處並須設法兼顧以固省垣欽此自是穆圖善居守蘭垣督理督篆回捻各逆悉由左 駐陝籌辦事權歸一矣

平定關隴紀畧卷三終

平定關隴紀略卷四

同治六年丁卯夏六月

欽差大臣太子太保督辦陝甘軍務陝甘總督部堂一等恪
靖伯加一騎都尉左

既入潼關陝省軍民之心爲之大

慰維時捻逆張總愚全股由同朝回竄蒲城回逆蔓延陝甘
而北山尤爲喫緊歸綏亦因之震動綏遠城將軍裕瑞歸化
城副都統桂成奏調蒙兵奉

上諭裕瑞桂成奏添調蒙兵分防請調山西兵勇協防一摺
陝省北邊回逆竄擾歸綏毗連邊隘在在應防裕瑞等現添

調伊克昭盟兵五百前赴榆林屬之神木縣邊界駐紮與前
往防邊之蒙兵聯絡截堵移烏蘭營布蒙兵於黃河南岸駐
守察哈爾之兵調往歸薩適中處所以籌兼顧布置尙妥著
管帶蒙兵之日子札那格爾第嚴密偵探妥籌策應毋稍疏
虞至所稱調山西勇丁千名之處該省河防喫重捻氛尙逼
能否尙不可知惟托清薩三屬河干地廣兵單深虞竄入左
宗棠庫克吉泰喬松年趙長齡等均當兼顧統籌使賊不得
沿邊竄逸方爲妥善凝條梁爲山陝門戶現有另股滋擾著
左宗棠喬松年迅飭帶兵員弁就地殲除毋令竄及晉疆欽

此此時北山之危於他處者由逆回知北山僻遠官軍正籌腹地必不能及故萃於一方也既而該逆大股擾及延安郡城總兵胡世英剿之頗有斬獲經穆圖善奏

報而捻逆盤踞蒲城縣東北之高閣馮家村萃莪村一帶已近匝月劉松山等商定會攻七月初一日郭寶昌由東路進至富安村值該逆半出掠食未歸郭寶昌遽前掩之該逆卽時敗潰在村未出之逆亦經孫立士擊敗四竄副將王立洪遊擊王鳳鳴都司宋善元等率馬隊分馳截殺該逆向蒲城狂竄適劉松山黃鼎大隊從南橫截而來合追至蒲城始行

收隊初二日復三路進剿行十里許遇賊敗之進至興市鎮賊向富平竄逸初三日步隊分三路進以馬隊張兩翼包鈔中路馳至索家村遇賊大股敗之追至昌甯村左右兩路亦獲勝來會地勢陂陀賊騎不能馳騁我軍齊進蹙之火械並投賊陣大亂劉松山衝入賊陣斬長髮二百餘名騎賊奪路而竄郭寶昌復從右路至合追三十餘里至富平之何家村始行收隊回營黃鼎料逆眾已疲是夜選壯士二百餘人親率以往至九郎廟殺守卡之賊數十於臥所自率數十人伏於卡外令壯士潛襲張家堡堡門洞開直入亂砍賊驚叫狂

竄黃鼎馳至截殺之乘勢殺入張家廟賊由廟後跳牆走墜而死者甚多旋聞前村礮聲三響知爲賊中之號率隊回營迨賊騎喧呼而來黃鼎已還營中矣連日斃賊二千餘名生擒五百餘名內有賊目陳允發施見文屈中喜趙啟新徐似虎張老么等數十名並逆首楊傳新楊五等妻子獲馬匹近千賊由富平西竄初六日至三原城北之土官村劉效忠擊之亦有斬獲賊仍西竄初七日該逆至涇河沿值雨發水漲屯踞河邊忽聞官軍自後至折而東趨迨官軍踵至三原而賊之去已盡十三日該逆回竄三原劉效忠進擊之至焦家

堡官軍小挫參將張心揚路扶劉維善誤中賊伏遇害並損馬隊五六十名是日該逆疾馳過高陵東竄劉松山等追之未及左以爲官軍之不能制賊由於每出皆落賊後必繞擊其前然後可乃商令改道富平出蒲城以扼其前而飭楊和貴周紹濂兩軍馳赴華州劉典與劉端冕兩軍由藍田進駐臨潼以相聯絡劉效忠所率之馬步五營則令扼之於涇水之西適新授甘肅提督高連陞於十九日抵藍田亦令休息數日進駐咸陽而跨渭搭造浮橋以利遄速至逆回之最著者則甘肅靜甯州蕭河城逆首李得倉一大股由華亭

繞入鳳翔隴州七月十一日至隴州之宰相莊十四日至麟
遊之招賢鎮白馬坊分股竄汧陽之麻夫站經鄉圍擊退歸
巢西北路一股則由甯州宮河竄擾三水縣境七月初三日
譚玉龍擊之敗竄淳化縣境已保遊擊改捐同知秦國輔扼
之退駐紅土屹峪譚玉龍追賊適至與之夾擊賊遂遁回宜
君之馬欄鎮老巢北路則回土兩匪合併回匪以合水之太
白鎮鄜州之王家角槐樹莊爲老巢土匪則有新老兩營老
營匪首董福祥新營匪首扈正禧出沒於保安安塞橋扶峪
新集老集董圍安邊定邊各處無一定巢穴幸提督劉厚基

馬步七營分紮鄜州中部洛川及鄜州之張村驛任家台甘泉之道左鋪等處隨時堵剿東北路一股回匪由慶陽而來匪首一爲馬長順一爲禹彥祿擁眾萬餘以董志原黃龍山爲巢穴六月間由洛川擾及澄城韓城兩縣官軍剿之竄郃陽縣百良堡兩女鎮一帶總兵李南華不能禦七月初五日擾至朝邑左 飭楊和貴周紹濂周金品等往剿會大雨連日渭河水漲浮橋被水衝斷致愆師期比至朝邑則早已鼠竄而去楊和貴追至郃陽縣露井鎮則已悉歸黃龍山老巢旋因捻逆東竄檄楊和貴回駐華州此六年六七月間陝

境所有各匪之股數蹤跡也左
於七月二十七日縷悉

陳奏

朝廷始知其詳籌辦方有把握而記名提督胡世英統領英禮十營奉穆圖善檄駐紮延安於軍事全不經理保安塞各縣告急迄無派撥所稱延安郡城擊退回逆細查實無其事當此之時羣匪如毛糧餉艱乏誠不容有此冗軍亦經據實陳奏惟捻逆圖竄晉省河防緊急奉

上諭著左宗棠趙長齡督飭陳湜認真辦理並催陳膺福等迅速募勇赴防其防河各員就近歸陳湜調度著左宗棠趙

長齡妥籌具奏欽此等因其時猶在中途尙未深悉形勢也
迨師次潼關山西臬司陳湜來營據稱黃河渡口甚多以營
兵團勇分防實不足恃至冬令冰凝全資陸軍憑岸堵截而
保德河曲迤北邊外地屬歸綏西通甯夏現已製礮船四十
安置垣曲一帶若三門以上再加礮船則河防一律鞏固等
語因酌定分爲三段一自歸綏至河曲保德州止爲西北岸
一自河曲保德州至永濟縣境爲西岸一自永濟至垣曲爲
南岸西岸道路綿長津渡至多陳湜水陸僅數千人不敷分
布而用南人使礮船與陸軍相依尤爲省力自禹門以上宜

加製礮船由陳膺福募南人二千駕駛陳湜復於防營五千人內酌畱數營防守西岸再增募勁旅三千人節節設防至保德河曲止保德河曲河岸責成大同鎮總兵馬升將所派協防弁丁歸陳湜節制陳湜應於汾州一帶擇地駐紮居中調度至南岸垣曲以下由河南仿造礮船自濟源延紮至直隸界晉豫均得其益其西北邊外薩拉齊廳一帶應咨大同鎮飭歸綏道察看情形嚴密防守設卡盤查惟距省寫遠應由綏遠城將軍督辦該鎮道等統歸將軍節制以一事權歸商既定與晉撫趙長齡會同陳奏奉

上諭均著照該大臣等所議辦理自是河防爲有專責可以
壹意剿辦而是年春夏之交西甯屬貴德廳回人變叛將署
同知承順及其家屬全數戕害楊岳斌飭鄧全忠督勇率團
進剿玉通謂進剿有礙撫局其奏因道路梗阻至是始達
宸聰所奉

上諭有云玉通一意主撫已誤於前此時尚不省悟另片奏
鄧全忠等來甯進剿有礙撫局實屬偏見鄧全忠等既經收
復米拉三溝能否督率所部先抵西甯入城鎮撫再將貴德
廳城相機攻取著穆圖善妥籌辦理所有徇難之署貴德廳

同知承順及其家屬人等著左宗棠詳查分別奏請旌卹以慰忠魂欽此等因究之兵力實有未暇故西甯回逆得以稍稽天誅

朝廷權其輕重且姑置之未嘗以玉通爲可任也其陝北鄜延一帶回土勾結久爲民害董福祥扈正禧兩股出沒於合水之東華池及安塞之橋扶峪等處其盤踞橋扶峪新莊口方家河下寺灣陳家紙坊王家坪張河灣石門子等處者爲逆首僞大元帥張幅滿副元帥李雄安擁眾萬餘仿照官軍編立哨隊連結回逆招納叛勇實爲鄜延大患張幅滿曾與

董福祥扈正禧歐狗兒等攻陷安塞甘泉二縣本係巨逆久之遂自爲一股復句回土各匪謀於七月二十五日會攻延安府城劉厚基於府村道左鋪兩捷後軍威頗振偵知張幅滿將家屬輜重寄匿距橋扶三十里之馬家莊撥悍賊數千守之七月十二日劉厚基將往剿辦先撥一千六百餘人防守鄜州中部及張村扼賊內竄之路而自率部眾進剿橋扶正拔隊間忽報橋扶之逆已至甘泉縣之勞山署知縣魯學浩率團勇深入誤中賊伏陣亡弁勇數十名劉厚基因飭中衛兩營星夜馳援並催副中營前進十三日抵甘泉十四日

接仗擒斬百餘名餘逆越山而遁十六日進攻橋扶行至石
門子遇出掠之賊數百人揮軍掩之斃百餘名是夜我軍乘
勝疾行六十里襲破王家坪下寺灣陳家紙坊各賊巢十七
日回土各匪來援劉厚基設伏山溝然後進擊賊敗而奔竄
伏兵齊起陣斬數百名梁得勝帶傷力戰斬賊目石姓生擒
逆黨二百餘名十八日復冒雨進攻距峪十餘里張幅滿親
督抗拒我軍分路並進劉厚基親督小隊居中以數騎誘之
伺其深入三路掩殺賊眾大敗乘勢踏毀橋扶峪老巢斃賊
百餘名餘賊悉竄馬家莊我軍一面築壘一面復進連破新

莊口方家河直抵馬家莊賊之浚濠樹柵甚固隔河列九節大礮數尊向官軍轟擊傷弁勇數十名我軍佯爲憩息密傳號令一鼓齊上喊聲震天遊擊田玉廣首先陷陣遊擊李作福鄴登科率馬隊包鈔劉聲集王雲孚劉福填戴貴昌朱楚文王賢俊朱國弼等率隊設伏河干副將梁得貴黃超羣都司張正喜千總甘彰輝等繞出山後劉厚基親督府經歷梁以恭縣丞馬樑臣主簿袁文炳等往來搏戰先以開花礮轟隔河之賊該逆猶思死抗叅將賀羣其千總張文彥李興藻把總黃良弼外委王佐趙太生等均受傷陣亡鏖戰兩時賊

屍滿地我軍一擁殺入張幅滿攜家眷二十餘口投河死賊
黨欲撲河泗竄水深溜急淹斃約數千人其由寨後逃者爲
梁得勝黃超羣截殺生擒僞副帥李雄安僞統領梁可材楊
占彪僞營官趙萬勝鄭朝忠等三十餘名賊黨千餘名搜獲
篆刻順受天歸四字僞印一顆大帥旂二桿軍械牲畜無算
賊之漏網者無幾將賊巢一律焚燬生擒賊中有作官軍裝
束者訊係胡世英禮營訪拏未獲之叛勇計一百八十五名
並眾賊共七百餘名悉行正法其脅從並婦女老弱給以牛
羊遣歸本籍因有二十五日襲延安郡之供遂回軍甘泉備

之經左 另案陳奏均蒙

獎卹其在陝擒逆屢經官軍剿敗急圖回竄河南因久雨水漲盤旋渭北七月二十一日劉松山李祥和郭寶昌等師抵渭南之官底鎮探知該逆尙踞新莊馬家堡一帶二十三夜四鼓劉松山由中李祥和由左郭寶昌由右路進馬隊張兩翼包鈔天甫明卽抵新莊賊倉猝無備我軍四面蹙之斃堡內之賊三百餘名各莊賊向東狂竄我軍分路截擊忽馬賊千餘橫至郭寶昌擊卻之乘勝追三十餘里至於永樂鎮共擒斬五百有奇是夜二鼓該逆折而西竄後隊猶踞渭南之

倉頭天明官軍追及之陣斬六七百名訊據投誠之賊楊春
三李光某供稱賊中最悍頭目陳二老坎已中礮伏誅二十
六日賊竄臨潼之石川河官軍追殺數十名是夜賊掠三原
縣城而過劉效忠追之賊由塔底過涇河我軍斃其尾隊二
十八日竄至咸陽分撲縣城經勝果營羅洪德擊退追劉松
山李祥和郭寶昌馳至該逆已竄至興平之郭空祠桑家鎮
旋又竄乾醴交界之溝里及楊家尹家等莊八月初一日將
擄船渡渭而南甫過數十騎適黃鼎已先夜由咸陽渡渭駐
終南鎮訶賊偷渡急往截之賊見官軍仍回北岸初四日劉

松山等分路會擊遇於呂家莊斃三百餘名該逆復折回東
竄適劉典率所部至該逆復退回原巢是夜二更後冒雨疾
馳由涇陽一帶渡涇而東自是日至二十日大雨傾注眾流
同漲二十一二十二稍止二十三日大雨如前黃河長至五
六丈渭水長至三四丈各軍薪糧益絀加以雨久泥深未能
出隊適據延榆綏道嵩壽馳稟轉據懷遠縣知縣劉昌蕃稟
報初三日午後賊陷靖邊縣屬之凝條梁眾約一萬有奇又
據米脂縣張守基稟報初八日辰刻突有騎賊直逼縣城而
綏德州亦同時戒嚴北山之賊幾於剿不勝剿因將延榆綏

道嵩壽及延榆綏鎮陶茂森奏請

諭旨先摘翎頂責令振作圖功以重邊防而飭劉厚基由延川進剿喬松年亦另摺馳奏奉

上諭交部議處該處敦奇祥阿等營有無潰退情事及穆圖善加派之托雲佈馬隊曾否與賊接仗著左宗棠穆圖善等查明具奏欽此等因至九月十七日據凝條梁巡檢李夢蘭申報八月初二日有回匪竄擾四十里之泥梁子統帶黑龍江馬隊之敦奇祥阿遊擊蕭明發分段守禦初三日回匪馬步約二千馳至蕭明發窠不敵眾受傷求援敦奇祥阿不應

適副都統薩斌圖率馬步前來策應蕭明發裏創衝擊賊敗而退初四日巳刻復至蕭明發禦之南街駐安邊之叅領托雲布聞警來援與薩斌圖合隊夾擊追殺十餘里頗有斬獲初六日駐定邊之副都統貴定帶兵至鎮人心始定米脂縣於初九日被回逆攻撲知縣張守基督團守禦陶茂森所派之遊擊楊樹棠亦帶兵自南至該逆向西北狂竄三十四等日擾及榆林縣之鎮川魚河等堡十五日進撲府城十六日巳革遊擊李允芳至自米脂知縣巖書麟遊擊牛玉林出城會剿賊竄懷遠縣境知縣劉昌蕃扼之於前李允芳追逐

於後賊竄石雲坪二十七日帶勇童生劉芳軌孔昭勛及鄉團魯述周方守正敗之二十一日復敗之於臥牛城殺斃賊數百獲軍械牲畜甚富搜獲江湖哥老會盟單皆兩湖江西川黔勇丁從甘肅潰散者緣是時道路梗阻傳聞異辭當時凝條梁雖經被賊闖入旋即擊退至是查明覆奏仍飭劉厚基駐防宜君白水以遏捻逆北竄之路而甘肅甯州合水踞回分股擾鄜州宜君八月初二日劉厚基剿之於鄜州之羌村該逆交鋒卽敗追斬五六百名初四日竄至中部渡惠家河因雨阻未能馳剿至二十四日雨霽卽率營官劉榮華剿

之於四聖村擒斬二百有奇二十五日再敗之於牛湖嘴殲斃數百該逆由雙柳竄回老巢據擒回劉元蹇文志供稱此次由甯州而來共有兩股此股逆首馮正綱卽馮阿渾尙有一股爲余阿渾所帶已由楊家店焦家坪竄宜君劉厚基急馳以往聞宜君縣城已於二十五日辰刻被逆回闌入知縣張杰遇害該逆知官軍將至遁回甯州老巢及抵縣城詢之廩生屈朝海王家駿皆裹創而來據稱署叅將秀順身受二十餘傷現臥城樓尙不能起典史胡光煦馬欄巡檢徐廷俊皆身受重傷詢失陷之由則以久而之故城坍二百餘丈知

縣因無糧不敢請兵募勇百名防守勇首郭大順通回引由
缺口闌入城後搜掠財物倉皇遁走等語經左 據實陳
奏張杰蒙

賜卹如例文武各員亦僅予革職以城爲雨坍失守非關疎
忽也是時左 尙駐臨潼值前奏調之吉林馬隊二千五
百名並採購察哈爾戰馬三千匹於八月初九以及九月初
四初九十一等日陸續至陝查點勇丁僅千餘名礮手不過
四百有奇餘皆老弱疲乏充數所採戰馬僅千餘匹亦多瘦
病詢之管帶之正統領桂廉副統領常林僉云馬匹沿途倒

斃及病廢寄養數逾一半勇丁沿途逃走數百名當派充統領時並未令隨同選募臨時招湊迫促登程數日後始將勇丁花名冊發給等語及閱其所攜器械皆不適用於雖經據實奏明而大失所望糜費無益已無如何矣捻逆自八月初六日渡渭後竄及臨潼渭南北岸值大雨連旬零騎四出覓食官軍因雨阻未克進兵至九月初旬始霽左 謀大舉以殲之於十一日親赴涇西各營面與劉典劉松山李祥和郭寶昌高連陞黃鼎商議方畧以提督蕭德經總兵羅洪德于奇泮副將王其發叅將劉竹田遊擊劉德良各營與黃鼎

一軍分扼涇河西岸以提督劉效忠一軍扼耀州山口築壘甫成劉典與劉松山李祥和郭寶昌高連陞各軍卽渡河進剿十四十五十六等日大雨如前官軍冒雨覓渡三日始克全濟左 於十五日冒雨回臨潼大營十六日劉典高連陞抵高陵劉松山李祥和郭寶昌至三原該逆見官軍進逼潛竄涵鹽灘二十二二十三等日劉典高連陞復由雨金鎮進紮相橋康橋一帶賊見官軍緊逼復鼠竄而去劉松山李祥和郭寶昌同時進駐富平自二十一日至二十六日風雨交作官軍修浚牆濠布置關鎖該逆探知之遂鋌而走險由

白水竄入北山劉典與高連陞甫抵同官賊騎已薄中部左
慮該逆北竄豫飭劉厚基鄜防各軍南下備之嗣於十
月初三日戰於中部初四日戰於洛川皆獲小捷逆蹤自洛
川延紮至鄜州城西初五日該逆復由鄜州吉子塢一帶折
向洛川東北狂竄劉厚基掩擊於安公村進至永鄉鎮見該
逆正撲民寨疾前擊之斃賊數百生擒賊目宋三元運天福
姚宗望等二十三名訊據宋三元供認係山東濟甯人本宋
景詩之黨現充張五旂內頭目姚宗望係邱天將部下頭目
其洋礮則由回逆接濟劉厚基方調中部三營至洛川會隊

進擊初六夜謀報該逆已分兩股一由街子河一由舊縣將合竄鄜州劉厚基卽夜馳向鄜州逆已先至城外之監軍臺副將劉厚填擊之小有斬獲該逆之來愈眾遂致挫退該逆隨圍其營並分撲州城東南門知州田景瀛署都司張鵬程吏目孟振鈞督團固守相持厯一晝夜力不能支正危急間劉厚基左營適至其圍始解該逆分三股竄去一由任家臺走府村一由道左鋪走甘泉一由牛武鎮走屈家灣劉厚基正派隊追剿忽西路回土各逆乘機撲犯鄜城乃畱劉厚填之副中營周萬祥劉文華之左營助鄜防剿而自督各營進

援甘泉初八日抵道左鋪遇該逆小股敗之追至甄家灣破賊館數處正追剿間忽隔河賊千餘來援副將李作福衝擊被圍身受重傷劉厚基馳救回營該逆向甘泉竄去是夜劉厚基抵甘泉與知縣魯學浩會擊該逆由蟬溝入山方收隊小憩忽探報任家臺牛武鎮各逆皆向該縣東鄉竄走其地北通延安南達宜川十四日劉厚基馳抵宜川賊已竄宜川境之雲巖鎮劉厚基因暫駐甘草坪時總兵李南華奉檄扼韓城之神道嶺劉松山李祥和郭寶昌等方自洛川拔營而西路另股之捻句結回逆於十三日突至耀州之官莊劉教

忠潛師襲之該逆退竄入山山中無可擄掠復出竄黃埔及
劉效忠馳往則又竄同官之高村劉效忠追殲數百名十四
日合股數千紛竄同官縣城駐防副將范克復會同知縣王
浩率隊迎剿范克復之部將周萬祥及劉端冕之部將譚同
聲亦各率隊前往已斃賊數十名忽騎賊數千梟水衝至步
賊復從左右兩山包鈔而下周萬祥令守備謝元信遊擊曹
啟瑞禦之賊勢凶猛曹啟瑞被圍周萬祥前往援應相繼陣
亡譚同聲突前手刃紅旂捻目忽鎗子貫腦登時暈絕相持
至晚始克收隊王浩飛稟求援劉典一面函知高連陞劉端

冕而自率弁勇折回金鎖關十五日申刻高連陞派所部正
四營抵金鎖適劉效忠疊次獲勝後亦自南而來劉典料賊
敗必由焦家坪卽派親兵前往設伏十六日高連陞續派副
四營至是日黎明該逆仍率黨攻城范克復竭力守禦高連
陞所部之總兵丁賢發高有志副將陳得勝朱桂馥鄧玉魁
叅將李國良等分三面齊進該逆敗而回撲已十餘次勢尙
凶狠丁賢發怒馬斫陣斃黃旂髮賊一名正割取其首級左
手爲洋鎗所傷我軍奮力齊前逆勢少挫紛紛向北竄走官
軍乘勝掩殺斃賊數百名覘其所向果由焦家坪以去伏兵

揚旗發號而出劉典所部黃有功李大有復由中部續至高連陞劉端冕自洛川赴援一晝夜馳二百六十里亦同時而至鏖戰至二更始息兩戰所斃近二千名兇鋒實已大挫其血戰陣亡之副將周萬祥柳瑞庭遊擊曹啟瑞劉貴和盧得生都司蔣福榮周明勝周友勝龍昌騏守備董占魁劉仕炳吳榮任何光照吳金標並傷重歸殞之副將譚同聲等均經奏蒙

優卹而陝西提督雷正綰亦咨稱回逆於八月下旬攻撲甯州西南關官軍迎擊互有傷亡收隊駐紮早勝卽棗社鎮次

日先派李廣珠率隊伏城東而自督各營搦戰佯敗以誘之至清華堡時已初更該逆聞城中礮聲飛奔回顧我軍追抵城邊李廣珠之伏兵亦出內外夾擊該逆大敗遂解甯州之圍張在山一軍於八月初三二十九月初十二十七十九等日派所部遊擊馮秀章副將項上達趙占魁劉明泰鍾本起喻佑勝等於羅漢洞毛家堡周家坪紫金坡等處擊剿回逆屢有斬馘生擒李英兒蘇二蘇五等六名十月初三日毀蒲河川逆壘斃賊數百初六日回逆突入正甯縣城知縣黃紹新隨同雷正綰所派兵勇於初九日收復譚玉龍奉檄赴

三水防剿遇賊於職田鎮敗之旋由間道入城分三路追剿
佯退以誘之俟該逆撲近遽起奮擊當斃賊數百名生擒十
一名訊據供稱阿渾馮均福欲入陝助捻等語另股回逆竄
汧隴十月十一日突陷寶雞縣城楊和貴周金品會同往剿
該逆旋於十六日遁去當將寶雞縣收復劉松山李祥和郭
寶昌等軍自十月十七日於中部之合窰子探聞捻逆已竄
宜川亟思緊追剿擊柰嶺峻坑深卽步隊亦難成列一經出
險卽須急行讓道以待後隊踵行劉松山率前隊十二營先
拔畱三營在後郭寶昌亦銜尾繼行惟李祥和和厚兩營最

後劉松山將抵洛川縣城接提督黃萬友飛報後路礮聲不絕恐有戰事等語當將留後三營折回郭寶昌則先已馳回行至山頂據報稱回逆數百騎突竄至大賢村適李祥和暨提督劉芳桂隊伍小憩村旁瞥見賊騎馳至李祥和卽率親兵衝擊倉猝之際官軍與賊不能辨我軍皆人自爲戰少頃賊騎愈增李祥和之馬中礮而倒遂下馬持矛連刺數賊右臂受鎗子傷猶裹創血戰劉芳桂率親兵斫圍直入賊亦舍騎搏戰李祥和身被十餘創復被賊矛中喉遂歿於陣劉芳桂面被刀砍身受矛傷更多值郭寶昌黃萬友同至分路並

擊賊敗向龍安鎮奔竄時已日暮未能窮追遂將和厚兩營輜重及陣亡將士屍骸收至洛河東岸是役陣亡弁勇頗多劉芳桂調治無效越數日亦死各軍齊抵洛川遂以黃萬友權領和厚兩營奏報後李祥和劉芳桂及陣亡員弁均蒙賜卹李祥和並蒙

予諡附祀羅澤南湖南專祠嗣據中部縣知縣黃召棠稟報此股回逆已向鄆州張村驛竄去大股捻逆復於十六十七等日分擾宜君之雲巖鎮九郎廟延長之交口岔口等處因令劉松山郭寶昌由延川延長宜川一帶沿河鈔截劉厚基

分途追擊高連陞由綏德延安一路邀截旋據安塞縣知縣
王魯庭稟報十二日捻騎由膚施之劉家莊至該縣南門之
磔子溝步賊緣山薄城縣城跨山一面本無高牆賊眾搭梯
攻城不能抵禦縣城被陷等語劉厚基旋調得該逆於二十
二二十三等日北竄延長二十四夜急率隊馳往行二百三
十里二十六日至延川之曹家灣連日進擊頗有擒斬訊據
擒賊供稱該逆前股已於二十二日陷延川縣城前隊仍向
清澗竄去等語劉厚基卽擬先剿延川踞逆然後進清澗綏
德以免後顧之虞旋據吳堡縣知縣呂懋勛馳報捻逆由清

澗直趨綏德州二十七夜四鼓勇丁內變句捻逆入城遂致失守等語緣和厚兩營中途失利劉松山等回軍救援稍稽時日致該逆得肆披猖時甘肅土匪董福祥仍踞花馬池潰卒遊勇哥老會匪股數紛繁互相勾結而陝回之遁入慶陽甯州正甯鎮原清水者絡繹奔赴鳳邠汧隴之間警報紛來寶雞甫經收復至二十八日復有大股回逆自汧陽徑撲鳳翔府城總兵孫立士督所部馬步三營血戰死之弁勇傷亡甚多楊和貴周金品奉檄率馬步往援二十九日行抵岐山之橫水鎮騎賊從空堡衝出我軍排礮車擊之賊敗而走我

軍仍結隊徐行二鼓始抵郡城東門乘夜急築營壘三十日
天明賊眾蠡擁而來我軍嚴整行列鎗礮環施斃賊四十餘
名賊遂奔潰追至三汊河而還鳳郡之圍遂解忽澄城縣飛
稟鄜州之回竄入縣境黃龍山將犯韓城郃陽時陝省已無
軍可派左 因擬親率中路五營西行就近節制諸軍忽
報狄河回逆又由張家川下竄乃令黃鼎率所部八營由郃
州赴鳳翔是時各軍之在陝境者劉松山所部一萬有奇郭
寶昌所部三千人劉厚基所部三千有奇此爲剿捻之軍高
連陞所部五千人原令剿捻而爲宜君回逆所牽劉典所部

五千人分駐同官耀州三水防剿回土各匪左
自統各軍共一萬有奇楊和貴周金品兩軍畱駐鳳翔周紹濂所部二千餘人駐宜君吳士邁之宗岳軍千餘人僅能防渭其升營奇營新前新左兩旗清渭水師兩營並親兵千餘人均分布華州華陰潼關渭南臨潼一帶吉林馬隊新派副都統喜昌挑選千餘名猶資訓練此外陝省舊日各軍欠餉太久士氣難期振作欲裁併則欠餉難籌欲調遣則飢譁可慮辦理實形棘手乃陝回崔三果嗾狄河悍回米賈張非兩股合併入陝勢更披猖內而岐山扶風外而鳳翔隴州同時告急楊

和貴周金品兩軍正擬於十一月初一日東剿岐山之賊忽聞狄河悍回米賈一股已至城西十餘里之柳林鋪卽勒兵前往迎剿適黃鼎由靈臺赴汧是日至汧陽城東二十里之黃里鋪初二日五鼓進至近城之龍王廟值該逆攻民堡垂破黃鼎飭五營築壘自率三營往擊進至金家嘴該逆以步賊四五千列楊家原上而以騎賊四五千分布汧川俄頃步騎齊逼黃鼎督隊轟擊該逆愈撲愈近徐占彪率正營自後馳來大呼陷陣縣丞雷炯叅將陳金彪率副營自右上原鈔下奮力進擊賊遂返奔自相擁擠落澗者悉被雷炯陳金彪

圍殺前後共斃六七百名生擒回目王拴拴馬者馬等八十
三名徐占彪與副將邱國良追殺直抵黃里鋪逆首張非披
紅袍嗾黨回撲徐占彪督隊鏖戰邱國良鈔出村後擲火焚
屋該逆驚惶失措徐占彪乘勢掩入回眾大亂官軍用矛戳
張非中背墜馬陣斬至千餘名比追出街口騎賊見我軍兵
單勒馬返撲我軍稍卻徐占彪手刃退後卒一名督隊堵禦
黃鼎急從楊家原鈔下擊賊之腰賊勢不支奔上高原死拒
分千餘騎復由原上鈔下截我後路黃鼎飛調劉竹田之鎮
西右營劉德良之德字營橫截騎賊並調都司龍常總兵趙

雲鳳分擊原上之賊賊中飛石如雨縣丞楊作舟被石中腦
陣亡賊卽逞兇下撲官長勝朱蘭亭下馬持矛率隊迎擊龍
常揮眾猛進斃賊數十名賊敗退上原黃鼎令夏桂林以炸
礮擊之凡五發所斃約五百名五里坡之賊遂潰敗走彭祖
原是日斃賊約三千名生擒八十餘名獲騾馬三千有奇糧
食山積訊據馬者馬供稱河州人與米賈張非同鄉米賈爲
阿渾又名甘牛阿張非歸其調遣因捻匪勾結各選悍黨一
萬內有番回叉子鎗手一千名欲往西安合捻共攻省城等
語張非受創後與米賈崔三合併大股至岐山攻城甚急楊

和貴畱守軍裝之幕友周其俊等竭力固守屢退撲城之賊初二日副將吳禧德自大營至岐山督防初三日賊騎突入城西民堡楊和貴之幕友徐樹柁及親兵熊國亮縋城下擊賊旋遁去二人均帶鎗傷初四日賊騎大至城西里許吳禧德周其俊令守備姚銓發開花礮擊之賊駭而奔向西南折竄鳳翔柳林鋪之逆見官軍隊伍甚單後無策應初五夜悉合岐扶賊騎環伏鳳翔之四頭果園關村大相寺等處初六日辰刻遊騎圍攻鳳郡城東麋桿村堡意圖誘我軍出擊肆其包鈔楊和貴揣知其情就計深入遂率九成隊作梅花陣

而出周金品以馬隊分列兩旁將抵郡東桃源堡賊佯退誘我官軍前進伏賊齊出一由四頭果園犯其前一由關村大相寺襲其後分股由塘坊三岡子鈔其左右馬步約計數千我軍從容結陣且戰且行鎗礮環施斃賊不少該逆仍恃眾環撲楊和貴周金品率壯士四百精騎八十從陣中出向賊勢最厚之四頭果園塘坊等處奮威衝殺並嚴飭結陣隨行賊下馬攢矛叢刺自己至申鏖戰四時賊屍枕藉猶死抗如故我軍愈戰愈奮參將劉春藻副將沈俊德遊擊盧友勝均裹創血戰共斃賊二千餘名斃賊馬二三百匹正酣戰間黃

鼎已抵鳳郡未及傳餐遽出隊分路策應楊和貴周金品復從城中橫截而出兩面夾擊斃賊尤多賊遂大敗狂奔我軍收隊回城漏已二下矣自此戰後該逆固匿不出初七日三鼓悉向東北川口入山繞道而逸黃鼎追至靈臺不及而返其譚玉龍一軍於十月三十日剿邠州紅崖窰安家堡等處逆回又於十一月初一日進剿永樂鎮踞逆斃賊共數百名陣亡叅將張得林千總張玉林二員賊騎繞竄三水初四日劉典飭總兵陳集賢副將李世顏叅將蕭雅泗祝鑑高賀潤蘭禦之城西十里之南宮太乙兩村斃賊數十名賊卽敗遁

初六日回逆五千餘人復犯邠境譚玉龍由永樂鎮迎擊誓師再進賊遂敗北我軍追至五六里適三水擊敗之回竄近永樂鎮譚玉龍回軍擊之復獲全勝是日斃賊三四百名生擒七名初七日該逆復合另股四路來犯譚玉龍派馬隊扼白吉鎮令副將胡日盛率千人伏溝中而自當馮家川大股一礮斃紅衣賊四名賊皆奪氣鼓而進之復斃賊三四百名馬步伏兵亦各有斬馘惟龔家川賊勢較重譚玉龍移兵攔擊適蕭德經羅洪泰兩軍於三水之甘家寨獲勝後聞報赴援賊遂飛竄其宜君一帶經幫辦軍務劉典派營分紮而自

駐金鎖關自十一月初一日起屢擊回土各匪均有擒斬至
初九日剿賊於高廟陣斬百餘名生擒七名慮其乘虛以襲
宜君飭總兵李大有甘大有副將唐俊元等往剿初十日抵
宜君該逆馬隊數千人果至城北教場我軍卽乘其未定擊
之賊敗遁高村劉典復飭黃有功繼往而令丁太洋率馬隊
偵探途間遇賊數百騎列隊排擊斃賊十餘人忽大股麇集
遂被圍裹乃下馬步戰手刃悍賊數名哨長郭榮陞亦手斬
悍賊身受矛傷二十一處猶能血戰忽賊騎自後衝來力不
能支李大有得報馳援賊始解去郭榮陞回營遂死高連陞

一軍馳抵洛川之孝義村遇回逆數千正攻堡子頭村寨卽率隊馳往救之斃賊二百餘名落澗死者尤眾各逆復集宜君高連陞率各營由偏橋北繞出高家村擊之賊見官軍卽遁追而擊之越山兩重猶狂奔不止僅斃其落後賊騎是時各路大捷軍威益振左

始罷親臨督戰之行劉厚基因

延川失守卽於十月二十八日率各營由曹家灣前往至延川縣城外斃賊數名賊卽退走城內之賊亦皆由北門狂竄劉厚基入城斃賊數十名生擒十五名訊據供稱該逆本無攻城之意因見城身坍塌遂卽攻破等語查訓導趙國珍典

史陳桂芬被戕甚慘均經奏請

賜卹嗣據延榆綏總兵陶茂森稟稱綏德未陷之前陣擒逆回馬如金白鳳山供稱該逆自慶陽繞道延安山中而來等語劉厚基稟中亦云陷綏德者實是回逆嗣捻逆聞城中尙有積糧現亦陸續竄至惟州城失陷時僅署都司韓錫恩在北城殉難總兵陶茂森署知州沈際清均退守米脂查明具奏後奉

旨陶茂森沈際清均革職拏問韓錫恩

賜卹如例其時宜君一帶回股最爲紛雜劉典籌痛創之因

高連陞至偏橋卽飭劉端冕親赴其營會商兜剿高連陞先於十八日率總兵賀三元副將陳得勝何世載鄧玉魁參將賀茂林等馳抵密坪該逆釋民寨之圍併力拒戰高連陞督隊斃當先騎賊十餘名乘勢掩殺賊遂敗走其搜掘窖糧者經左右兩路弁勇截擊共斃二三百名日已向暮軍士尙未午餐乃以所獲之糧四百餘石及衣服衾褥各件交團紳散給難民收隊回營而劉端冕適至商定裹糧分道兜剿建莊等處回巢劉典知其會商已定飭所部黃有功李大有自古泉回駐米子要隘以防回逆窺伺二十日黎明劉端冕回營

卽有回逆數千突至駐營十里之鳳凰山劉端冕料其有伏
飭總兵甘大有副將唐俊元由右叅將喻先知劉仕邴由左
偃旂疾前自率中營由山岡進擊行甫五里伏賊齊起劉端
冕督隊奮擊殪賊數名左右兩路鈔至會擊斃數十名該逆
退至鳳凰山我軍追之山徑險窄墜死數十騎殺斃者百餘
該逆悉向楊家店奔竄次日進剿該逆分踞鳳陽坡黨家店
楊家店一帶蔓延十餘里因與李大有等商定銜枚疾趨直
抵鳳陽坡劉端冕手刃守卡賊二名軍士一擁齊進該逆狂
叫紛逃官軍正分路截殺左右兩路亦至將該逆痛剿乘勢

追至楊家店賊不敢拒分兩路狂竄士馬飢乏乃收隊駐楊家店是日斃賊六七百名生擒王平安等八十二名訊據供稱此回係禹阿渾所管僞元帥馬壯元帶四千餘人蘇萬元帶八千餘人十四日由董志原起程而來不料大敗至此馬壯元受傷甚重蘇萬元擬赴建莊等語劉典商令趁其未定乘月進剿劉端冕飭各營由大路自與喻先知由小路比至建莊見該逆皆繫馬身旁仰天鼾睡聞官軍至急起狂奔殺斃及墜崖死者不可數計該逆已不能成隊是役共斃賊二千有奇所斃馬騾亦以千計生擒韓有德等一百三十餘名

訊據供稱馬壯元昇至轉角地方氣絕蘇萬元之眾得歸者亦無幾高連陞因與賊另股相持未赴會剿之約二十一日裏糧赴密坪進搗譚家灣回巢該逆分路抗拒高連陞因飭總兵高有志副將李瑞林朱桂馥遊擊吳國富等擊左路之賊副將陳得勝鄧玉魁擊河岸來犯之賊自督叅將賀茂林縣丞羅壽昌截擊河下之賊三路皆勝該逆敗竄追至譚家灣返撲數次官軍乘銳轟擊傷斃更多該逆棄巢向車泉越嶺而遁官軍遂駐密坪次日畱高有志李瑞林朱桂馥扼密坪自率各營馳抵車泉騎賊見官軍卽遁詢之難民始知大

股已於先夜竄雙柳樹此騎乃斷後悍賊我軍疾馳三十里抵雙柳該逆未及午餐被官軍奮擊折損不少遂分路竄走陳得勝跟蹤追殺賊屍枕藉忽報密坪有另股賊至乃畱吳國富駐雙柳而促陳得勝收隊回援忽見雙柳之左突出回逆數千高連陞與吳國富各占一嶺陳得勝分起設伏賊不敢近吳國富乃繞出賊後擊斬數賊賊遂驚潰伏兵齊起賊益狂奔而北僅追斃數十名生擒一名供稱此股五千餘人係郭阿渾馬三保高三碼所管由甘肅合水縣西華池而來不與譚家灣同股等語追回密坪則撲營之逆已經擊退亦

頗有擒斬該逆自雙柳敗竄中途句合土匪南擾至曹家河
劉端冕於二十五日探蹤往截賊見官軍卽驚官軍分途追
剿進至三官廟賊無去路遂聚而殲之所斃六百餘名生擒
三十餘名蕭德經一軍自邠州東秦堡獲勝後聞甯州宮河
逆回有於二十三夜向梅子坪合股西竄之議遂率所部疾
赴宮河派所部分路截擊該逆前隊甫行經總兵江得意副
將蕭以純遊擊姚松齡等三路縱火未竄之賊出巢抗拒經
我軍奮斬數百獲牲畜甚富解散難民二千餘人將宮河逆
巢踏毀並附近一律肅清自是回逆稍戢而河冰凝結擒逆

急圖偷渡官軍防不勝防十一月初六初七等日劉松山郭寶昌直抵清澗商定於初九日大舉規復綏德州劉厚基及右後兩營亦赴之中途遇賊均獲小勝是夜齊薄綏德州城劉松山攻其南劉厚基攻其東郭寶昌派二營助攻東路自督步隊攻其東北以馬隊伏城東各莊劉松山進逼南關賊分數路迎拒郭寶昌劉厚基督隊進攻賊亦死鬪各軍奮力轟擊斃悍賊各數十名劉松山先破南關賊卡該逆驚潰不及入城旋經官軍截殺城賊大亂亟向西北兩門奔竄劉松山一面派隊追剿一面奪路入南門郭寶昌劉厚基亦同時

攻入東門穿城搜殺卽出城合軍追剿沿途斃賊甚夥追至二十餘里之石家灣始收隊回城是日斃賊約三千餘名獲騾馬牲畜不可勝計救出難民三千餘人劉松山所部陣亡守備王春濤把總張藻林劉厚基所部陣亡都司張瑞卿守備張成保把總董興成彭玉林戴祥發勇丁共十二名十一日據探回逆向西北竄走劉松山等商定先其所急務將捻逆掃除十二日據報捻騎數百踞州西南數十里之苗家坪並擒獲髮捻二名據供張逆因回逆句結前來綏德待冰渡河等語十三日各軍出隊至苗家坪據賊中逃出難民供稱

擒逆因綏德已爲官軍克復回逆向西北竄走遂向西南折竄適報米脂西北有大股回逆盤踞劉厚基卽率二營往剿畱四營守綏德劉松山等以苗家坪地勢適中該逆若繞而向東可以就近馳截因暫駐以探之十六日據報擒逆已向瓦窰堡竄走維時劉厚基所畱四營調赴前敵劉松山急回綏德布置城防十八日拔行擬由清澗延川延長宜川循兩岸截剿二十二日至宜川距城二十里聞西南二十里之劉管村羊獻坪一帶有大批回逆遂疾馳以往酉刻抵劉管村築壘以護輜重二十二日五鼓各率隊七成以出劉松山襲

劉管村鏖戰數時始破其堡郭寶昌進攻羊獻坪副將王立
洪王鳳鳴等躍馬陷陣賊圍之數重王立洪被鎗子穿胸歿
於陣郭寶昌揮軍猛擊遂破其巢二處回逆皆向南奔竄兩
軍合追四十里至張家灘駐宿是日斃賊千餘名陣亡將士
王立洪戴星懷二員勇丁共五十三名是夜五鼓據報宜川
之南溝哨有捻逆盤踞其地已近河干因酌畱二營待後路
輜重卽拔隊疾馳以往二十三日酉刻抵南溝哨旋據探馬
馳報龍王迤七狼窩東西兩岸均有火光卽督隊向龍王迤
行十餘里擒獲騎賊供稱捻逆於二十三夜五鼓衝過冰橋

等語及至龍王辿賊眾馬步約三千人扼守冰橋官軍直前奮力衝擊斃賊數百名賊大敗上原奔竄官軍悉渡冰橋追剿至十餘里之史家莊沿途復斃賊數百裹糧已盡軍士飢疲遂分駐龍王辿七狼窩以待輜重自是捻逆已入晉境雖擾及完善之區而與回逆隔絕剿辦無虞牽制亦該逆必亡之徵也劉松山郭寶昌既緊躡渡河二十五日探悉該逆已破吉州鄉甯兩城二十六日五鼓分路進剿沿途斬騎賊數十及抵吉州城西五里城中出賊四五千迎拒當經郭寶昌督軍截擊斃賊數十名生擒五十餘名該逆向東敗走不及

入城劉松山亦已擊敗城北之賊遂將州城克復商畱千餘人駐守輜重二十七日五鼓督隊前往鄉甯行三十餘里探悉該逆甫經出城竄走復疾馳三十餘里及其尾隊奮擊敗之追至十餘里而日已暮是夜探悉該逆前股已近河津後股猶在西魚口一帶圍阻我軍出山之路二十八日五鼓拔隊辰刻出山西魚口賊騎悉散追殺三百餘名生擒八十餘名其大股方圍河津見敗賊狼狽而至亦相率遁去官軍駐宿楊秀村二十九日途中擒斬亦多據擒賊供稱張總愚現攻稷山縣城將破劉松山郭寶昌疾馳而前至城西二里許

見該逆正仰攻未輟卽揮馬隊擊之賊皆駭走追至二十餘里張逆回頭猛撲千總張宗之李大有身被鎗傷猶裹創力戰及副將宋朝如馳至降卒指認張總愚鎗礮環向擊之張逆大敗而逃官軍追殺至絳州城西十里龍泉鎮駐宿是日斃賊四百餘名救出難民千餘人該逆遂竄洪洞分股竄擾太平其被劉松山郭寶昌截斷未及渡河逆黨尙遊弋於澄城韓城宜川邠陽境內不下萬人而晉省毗連直隸故援晉爲尤急乃令喜昌統林吉馬隊一千二百騎益以安住全福所挑五百餘騎並步隊二百名由孟津渡河以趨山西澤潞

左 徐籌親往督剿以回土各逆及未渡擒逆尙須布置防剿故未能卽發也旋據邵陽縣報稱擒逆餘騎由邵陽陳益村甘河子等處竄至澄城之岔河村由八十畝川入山奔赴澄城之石堡曹店等處旣而韓城縣報稱宜川一帶擒回各逆分由神道嶺沙河腦窺伺牛心峽白馬灘等處左

因調周紹濂二千人由岐鳳馳抵臨潼由臨潼派總兵簡桂林馬復震率親兵四百餘人同副將戴定邦一營取道黃河西岸前赴宜川以防河而進剿適接山西按察使陳湜初五日稟報渡河之擒其老賊不過數千人劉松山等於初四日

擊之於洪洞克獲大捷該逆回竄平陽又爲晉軍所敗等語
是知捻逆之未及渡者尙多陝省之防河亦卽所以援晉也
劉典於十一月二十六日聞宜君之石底子有回土各匪由
吳家邊竄至青草坪飛飭劉端冕扼擊二十七日黎明劉端
冕率所部抵青草坪該逆已先遁去追至茅茨嶺賊眾回撲
經官軍陣斬百八十餘名生擒五十三名而洛川中部之逆
於二十七夜直薄中部縣緣梯入城二十八日高連陞聞報
馳往及抵縣城該逆正在焚掠見官軍至卽紛紛竄走官軍
追殺十餘里不及而還查城中尙無大損惟胡世英營中餉

銀一萬餘兩火藥數千觔號衣數百件適解經縣城寓宿悉被搶奪無存值大雪封塗未能窮追蓋自捻逆西竄入關以來回逆益肆披猖穆圖善始終主撫前八月間准河狄逆回至省投誠幸署臬司蔣凝學早覺其詐飭所部安字營嚴爲之備該逆僅大掠關廂而去甯靈雖曰安撫而逆黨不時四出西甯鄧全忠之軍以無糧而潰玉通力主撫議悉聽回之所爲肅州黃祖淦陣亡所統諸軍悉歸楊占鼇節制成祿屢奉

嚴旨出關剿賊仍逗畱肅州亦未聞其所剿何逆所擊何處

甘肅之事幾不可復問近惟據雷正綰咨稱十月二十四十一月初一等日先後進至甯州棗社地方將距棗社十里之曹家堡下雷家小戶曹家石家城子等處騎賊一戰擊退餘賊收踞溝東初三日踰溝進剿朱學文等繞出賊後兩面夾擊賊向平子鎮一帶竄遁官軍遂向慶陽前進由清華堡秦家堡安定堡節節剿洗抵甯州之武漢原北十七十八等日環攻大莊賊卡十九日破之將回土各匪分別誅宥附近十餘寨聞風震懾陣亡都司左金玉劉應彪外委楊桂林三員二十三日親督總兵沈大興參將郭壽春遊擊趙金標都司

李廣珠已革提督劉正高及張在山所部副將鍾本起遊擊顏宣等進紮大安堡訶知回逆方往上川運糧乘夜襲擊將賊截爲兩段一股西竄一股奔回襄樂堡二十二日直逼襄樂回巢一鼓克之將悍回駢誅救出難民七百餘名二十三日援賊大至馬步約三四千雷正綰督隊迎擊擒斬甚多該逆敗退方村二十五日五鼓令沈大興劉正高率隊伏左右溝中親督各營由川中進剿佯退誘之該逆疾追而來伏兵齊起擒斬數百名該逆大敗而奔官軍緊躡其後沿途所斃更多方村土匪乞降縛獻回逆訊明後分別斬釋而自方村

至盤客原地方三十里賊巢林立乃約駐防盤客之總兵孟玉德出隊夾擊二十六日督隊以往孟玉德等亦至該逆羅拜乞撫收降二萬餘人雷正綰進駐盤客距慶陽僅八十里而固原回酋孫義章殺傷回酋赫明堂徒眾十餘人遂至互相讎殺有黑城子回民李正雲馬得忠等排解息事知州蔣方直請兵彈壓亦經雷正綰派員前往蓋自鬪則衰亦犬羊之敗徵也左 既決計東行

朝廷亦望其速往所奉

上諭有云宜川一帶捻逆雖多而晉省無知兵大員督辦事

無稟承恐未能迅速蒞事且前調宋慶程文炳等軍由獲鹿赴晉張曜余承恩兩軍由臨洛關進發並將陳國瑞發往該大臣軍營差遣客兵愈多必得左親往督辦方可調度合宜著仍遵前旨兼程東征其宜川等處捻匪另派委員防剿俾得移緩就急廓清晉境再行返旆而西以紓廛念等因左具報啟行疏云竊臣派兵赴韓城宜川一帶截剿未渡黃河之賊前已恭摺馳報昨據喜昌馬德昭等探報捻逆於初九初十等日由垣曲縣東竄河南濟源縣境臣以該逆既竄豫省河北一帶若鋌走東路則畿內防務必殷晉省兵

力太單斷難足恃劉松山郭寶昌於初十日五鼓由絳縣向東南覓徑繞截臣慮垣曲以東山徑崎嶇不如山南易行劉松山等軍必致又落賊後卽喜昌等馬隊亦成尾追就此時局勢而論臣仍由晉境東趨覘賊所向出賊之北由直隸南路出兵冀與官軍收夾擊之效如山行不遇大雪可迅踰太行以達畿甸卽於十八日拔隊入晉臣親兵三哨及戴定邦一營之赴宜川者飭其由韓城一帶渡河馳赴山西聞喜與臣合隊前進陝省回土各逆及髮捻尾股不時出沒防剿正需兵力臣所調西路各營如周金品周紹濂馬步二千數百

人仍不能不畱之秦中臣但率親兵一千三百人及提督楊和貴二千五百人副將戴定邦五百人副將楊鳳元都司丁太洋新集馬步六百餘人計四千九百餘人馬隊則不及百騎僅供哨探之用此外皆步隊也喜昌一千七百餘騎未能卽與臣合隊祇可令其會合劉松山郭寶昌兩軍緊追痛剿臣所帶皆步隊自陝西臨潼至直隸千數百里遠道長征天寒晷短每日安營支帳僅可行六七十里而止到防恐需時日惟有趲程前進以速補遲而已現已將陝甘軍務咨交劉典暫行代辦蓋以臣軍將領皆劉典所深知餉事源委亦劉

典所素悉也遇有軍務劉典仍會商庫克吉泰喬松年聯銜奏報一面鈔摺咨會臣處俾得與聞等情拜摺後卽於十八日率師東行時劉典尙駐金鎖關旣任代辦之責自當移近省城以便會商調度因籌布諸軍以憑剿擊檄高連陞折回耀州駐宜君之楊家店一帶劉端冕進駐鄜州周紹濂所部分駐中部洛川劉厚基相機北征兼顧中路總兵羅洪德移駐汧陽甘肅臬司張岳齡暫緩赴任移駐隴州蕭德經移駐麟遊而駐長武之黃鼎一軍駐邠州之譚玉龍一軍駐三水之陳集賢一軍則令仍駐原所劉典於同治七年正月二十

九日由耀州出山督剿遂駐三原庫克吉泰仍駐咸陽咨請
貴州提督周達武率全部駐寶雞均經妥籌會商各將領先
後抵防相機剿辦蓋自左 東行後喬松年以病乞休及
奉

上諭慰畱仍以病難速痊陳奏亦以左

難期遽返陝境

捻回土逆潰勇遊匪種類雜沓籌辦維艱也而自六年十二
月下旬迄七年正月上旬劉厚基剿餘捻於北山高連陞劉
端冕擊回土各匪於鄜州洛川中部未嘗失利迨劉典行抵
三原據劉厚基轉據米脂縣知縣張守基稟報回逆自金積

堡竄出徑突甯條梁將衝勇三營衝陷進圍懷遠屬之波羅
鎮正月十二日總兵文星明率隊六成赴援及抵波羅而鎮
已陷文星明疾進奮擊破賊卡五處斃賊過千名酉刻逼近
該鎮逆黨齊出我軍士卒已飢軍火將盡戰至三更力更難
支遂致失利文星明不知下落等情正籌兵赴剿聞又據黃
鼎稟報董志原回逆聞官軍進剿將家屬移往環縣以圖北
竄榆林東竄洛川等情時各將領皆已抵防責有所屬因飛
飭相機堵截是月捻逆由山西竄開州進竄保定易州左
渡河後星夜追剿至保定進駐定州至二月初四日據岐

山縣知縣郭昌時稟報回逆分股由鳳翔入該縣之槐莊勞
川里崛山等處因檄張岳齡於赴隴之便督勇剿之初六日
張岳齡之營務處訓導余家珍於槐莊小捷賊卽遁走初七
日張岳齡抵鳳翔探知回逆馬步五六千人由麟遊竄周家
河亢家河等處卽飭所部銜枚疾進初八日黎明抵亢家河
該逆敗竄鐵門尖我軍追殺十餘里斃賊百餘名生擒二十
七名當進兵之初勞川里敗逆竄至吉兆坡圍鈔我軍之後
經總兵于奇泮左日升迎而剿之頗有擒斬遂亦敗竄至二
月十二日劉典遂奉巡撫陝西之

命劉典以母老望
上諭云陝省軍務
庫克吉泰督率諸
巡撫責重難於勝
金順由定邊前進
範等因劉典不敢
日行事件飭藩司
營辦理等情並蒙
俞允時駐涇州密

尙有大股踞逆復有另股千餘騎竄靈臺之新集百里鎮麟
遊之花花廟等處黃鼎於十二日率彝字五營由靈臺截擊
十三日黎明出隊馬隊馳至水磨溝該逆猝不及防我軍乘
勢破卡而入該逆憑高抵禦拋石如雨叅將胡應芳下馬持
矛衝殺各勇丁亦下馬猱升斃賊數名胡應芳頭受石傷倒
地暈絕正危急閒步隊趕到該逆越嶺狂奔我軍斃賊百餘
追至雨亭寺遇另股馬步千餘人我軍擊斃百餘名該逆亦
越嶺而逃副將徐占彪率正營向花花廟進剿副將陳金彪
率副營向高洪寺黃鼎率親兵及後左兩營接應其花花廟

之逆僅三四百人經官軍並鄉民斬殺殆盡高洪寺之逆馬步約二千餘人憑險迎抗當經轟斃數十名該逆竟分股鈔我軍之後陳金彪亦分隊應之鏖戰良久殊難取勝黃鼎急調正右兩營由山岡捲旂疾趨截賊後路以後營馳往援應該逆知之謹譁而潰副後兩營躡追正右兩營從腰攔截該逆紛紛逃走騾馬器械大半拋棄我軍斬其紅衣賊目二名殲逆黨二三百名收隊而回及抵胡家崖寨民截敗賊去路勢幾不支黃鼎令韋占雄往助賊始敗走比及回防日已暮矣高連陞由煙火進駐宜君楊家店堵董志原東竄之賊二

月十七日抵防所探悉二十里之何家莊有大股逆匪竄踞十八日自率親兵先行探擊飭總兵丁賢發副將黃毓馥叅將賀茂林等繼進行二十餘里遇賊二千餘人策馬猛撲而來經我軍堵擊賊勢稍卻忽大股湧至眾約萬餘幸賀茂林洋鎗隊至循環轟擊傷斃以數百計該逆恃眾猛撲如故並分股鈔我後路高連陞令丁賢發黃毓馥分路拒之賊猶未卻適直隸州洪惟善府經歷楊懋春率叅將楊玉魁接應高連陞復橫刀壓陣申令大呼各勇遂奮威衝殺斃賊六七百名生擒十七名該逆始大敗而走乘勢追至轉角寺該逆乘

地勢寬衍整隊回撲下馬交鋒猛撲十餘次高連陞令諸軍
穩禦自率親兵繞道橫擊苦戰三時我軍銳氣百倍連斃黃
旂賊目五名逆黨千計生擒賊酋馬阿渾僞領員禹方魁賊
大敗狂奔我軍追至合水交界之石底子始行收隊沿途雪
泥皆赤誠血戰也是役先後斃賊二千餘名生擒首要十九
名獲騾馬三百七十六匹斃騾馬數百我軍傷亡勇丁十七
名訊據馬阿渾等供稱該匪均踞董志原乘官軍抽赴邠乾
會商武舉鄒阿渾挑選萬餘人裹五日乾糧於十五日起程
取道楊家店計圖襲取耀州爲立身之地其竄鄜甘大股爲

回目王瘋子等語當於軍前正法經庫克吉泰劉典會奏並
蒙

優獎同時署中部縣知縣萬夔署洛川縣知縣周貴庠探報
二月十四日四更後回逆大股竄至鄜州分攻西南東城等
門架梯蜂擁而上文武各官登城守禦駐北城外之衛隊營
副將黃超羣聞警往援由北門殺入會同文武各官聚集一
處鎗礮環施至十五日辰刻該逆愈眾官弁兵勇均受重傷
力不能支州城遂陷十七日劉端冕派隊向鄜州進剿行至
洛川探悉回逆大股盤踞鄜州城中分股擾及洛川之舊縣

卽率所部五營並周紹濂派防洛川之一營整隊前進是夜
露宿街子河望見二十里鋪火光燭天知爲逆踞乃於四更
出隊分左右兩路以進抵該處天色已明該逆恃其長技列
陣前拒以馬隊分兩路包鈔我軍結成方陣俟其將近以鎗
礮密轟該逆人馬紛紛倒斃督隊之賊揮刀穩壓尙無退心
歷兩時之久始不能支向城而奔劉端冕禁拾賊物竭力進
剿我軍爭先刺殺賊屍枕藉追至近城之鐵箱城中賊出隊
迎戰約萬餘騎我軍預得地勢審其厚集處所轟以開花大
礮繼以洋線各鎗賊屍積道賊馬皆驚我軍乘之賊大敗返

奔自相擁擠傷斃極多我軍乘勢由南門殺入適劉厚基在英汪鎮聞信亦由牛武鎮搜剿而來十八日將至鄜州有馬賊數千攔截副將田玉廣千總黃萬清迎擊賊已將挫李作福復督馬隊衝來賊大敗不可支當斃千餘人所棄騾馬盈路乘勢由東門小北門殺入該逆出城向西竄走立將鄜城克復兩軍分三路追剿斬紅巾賊目一名殿後之賊誅之殆盡日暮收隊回城是役共斃賊三千餘名生擒五百餘名救出難民數千是日另有大股竄洛川之馬家河周紹濂得報卽於十九日由中部往剿及抵交口探報該逆向吉子嶮飛

奔大有乘虛襲犯中部之勢遂亦率隊折回露宿鞍子頭訶該逆尙踞吉子嶮二十日黎明分三路而進行抵焦家原遇賊探百餘騎見官軍立即返奔我軍追之至吉子嶮該逆大股約萬餘人列陣待戰我軍三路並進賊恃其眾分路包鈔百長李光賓率眾扼其右叅將劉甫田扼其左該逆技不得逞已斃紅衣賊目兩名逆眾譁然潰亂紛紛敗走我軍乘勢跟追前阻深澗刺者墜者屍盈溝壑餘賊向西敗竄是役斃賊千餘名生擒百餘名救出難民千餘名據擒賊供稱董志原糧乏已極分兩股乘虛內犯此股二萬餘人係王瘋子馬

復盛所統十四日入鄜州欲踞之爲巢不料官軍猝至等語
此戰亦云惡矣會奏後均蒙

獎敘黃超羣兵力單薄身受重傷暫行革職責令立功城守
都司張鵬飛吏目孟振鈞受傷被圍隨同克復均革職畱營
效力署知州鄭壽麟平時漫無防守州役高均爲賊內應亦
漫無覺察實有應得之罪現與學正張湘訓導任藻庭尙不
知下落俟查明後另辦時已革提督譚玉龍奉檄仍駐邠州
探悉西路之賊竄麟遊經黃鼎剿敗後仍復回竄十四日自
率所部前往適該逆擾及土橋桑村原一帶十五日黎明飭

刁文昂

總兵胡

正帶馬

人正搜

營乘勝

福二名

俱北十

八日黎

陷陣該

始膽怯

恐其攔入邠州飭各營進紮崔木鎮既而該逆果竄邠州之泰伯廟譚玉龍督軍冒雪進擊該逆瞥見卽走追殺百餘人餘賊狂奔不及而返亦經聯銜奏報譚玉龍蒙

恩開復提督原銜

賞還翎枝出力員弁准存記彙案保獎二月十九日羅洪德探悉崔三大股竄至草碧溝騎賊至近汧陽城之寇家河剿之而遁二十日該逆馬步撲汧陽縣城羅洪德督隊擊之略有斬獲二十二二十三等日該逆圍攻各處堡寨復經羅洪德擊退團勇乘之賊敗而去隴州亦於二十一日被圍亦經

羅洪德所派之湘果左營擊退而大股盤踞汧陽寶雞之間蔓延百餘里乃檄張岳齡蕭德經于奇泮左日升會剿另飭劉效忠由岐山取閒道往助該逆由縣頭鎮擾及寶雞之李家河團紳王瑞麟集眾接仗小捷二十二日大股圍撲寶雞之紫草原堡寨團勇禦之被挫適周達武所部之提督李輝武率兩營至未及傳餐卽飭出隊往援堡圍雖解而分擾如故二十三日該逆正攻温家寨李輝武飭副將鄧貴華截其後路自督兩營進擊斬悍賊二十餘名生擒六名二十五日該逆圍汧屬之武家堡羅洪德擊斃數十名其圍始解二十

六日該逆圍逼汧城以圖牽制而分股攻侯家堡冉家溝羅洪德以兩營力支其閒幸免決裂是日張岳齡奉檄至陳村查悉大股分踞賈村原縣頭鎮爲老巢緘約李輝武同時並進二十八日李輝武分兩營助攻賈村原自率四營進撲縣頭鎮分三路進擊至劉家廟遇賊數千騎擊而敗之追至馬河口騎賊愈增我軍奮勉衝殺該逆敗回縣頭鎮我軍乘勝搗之僞元帥率眾迎敵我軍分兩路殺入復獲大勝陣斬八百餘名生擒十八名追至雙柏楊而還同日張岳齡及蕭德經于奇泮左日升等進攻賈村原分兩路而往適該逆分攻

陳家堡馬家堡垂破于奇泮左日升卽往援之斬賊目三名賊竄山坡仍整隊待戰而陳家溝內之賊齊出張岳齡飭余家珍及總兵李佑厚從旁橫截賊遂不支向黃梅山竄走左日升追斬數百名生擒二十餘名張岳齡進援馬家堡該逆搖旂示武總兵黃儲寶策馬衝入斬執旂賊目一名副將蕭賞謙督隊繼之賊勢已卻忽騎賊自曲徑橋馳援我軍力戰久之賊漸紛紛落馬該逆催後隊繼進適蕭德經督同知縣余澤春已攻破賈村原賊巢陣斬僞統領一名斃黨逆四百餘人附近賊巢俱毀追剿前來與張岳齡夾擊賊始大敗追

至曲徑橋陣斬百餘名將賊巢一律踏破敗賊併歸一處列陣回撲適李輝武所派之副將宇文秀總兵鍾開蘭率兩營馳至賊仍大敗追至吳家溝路窄而中斷騎賊拚命回鬪我軍猛力遏之復斬賊目二名據擒賊供認爲馬楊二僞帥餘賊刺落山溝無一脫免我軍卽就馬家堡縣頭鎮駐紮寶雞境內肅清而汧陽則仍如故也二十九日于奇泮左日升由馬脊山往張岳齡蕭德經由黑虎嶺往及抵該處軍中尙未傳餐而沿河兩岸民堡危急于奇泮左日升逼河列陣蕭德經繞城東出羅洪德繼之張岳齡西出進至原北騎賊分路

來衝而劉效忠擊敗之賊復與之合我軍乃嚴陣而前副將李獻厚用劈山礮轟倒十餘騎我軍乘之賊遂敗去乃收隊晚食當分攻賈村原縣頭鎮時鳳郡西隅之清泉堡喬家堡尙家橋均爲賊擾無兵可撥賴劉效忠從閒道出賊後該逆正與鄉團接仗劉效忠從後兜剿而前該逆心慌陣亂紛紛敗走經劉效忠追殺甚多其得竄汧陽者膽已先落無能再戰宜其甫交卽敗也三十日劉效忠與諸軍會合西征而該逆已竄靈臺鳳寶汧隴俱靖先是各將領奉檄抵防一時尙未遽集而甘肅合水踞回句結土匪擾至延長騎賊約七千

餘二月初七日知縣宋良率廩生張問明武生馮占魁督團禦之略有斬獲賊敗竄宜川虜施縣境適劉厚基將赴宜川聞鄜州失守回援該逆遂分四路直撲宜川縣城知縣余觀瑞督團堵禦該逆搭雲梯六十餘架團勇齊力擊之賊勢稍卻該逆拋擲火蛋入城典史廳房火起團勇抽動救火該逆乘機上城登者甫百餘人余觀瑞督團猛擊斃賊四十餘人該逆仍越城而出團勇陣亡四名軍功陳慶榮鍾南英候選教諭趙鳳鳴同時陣亡三月初一日劉厚基劉端冕由鄜州抵宜川該逆尙近城擄掠兩軍捕斬甚多劉端冕跟追至鄜

該逆遁歸老巢經聯銜併奏均蒙

獎敘宜川陣亡之團紳三員並蒙照例

賜卹三月初三日董志原回會鄒阿渾馬阿渾王阿渾偽元帥馬伍什馬正和馬二元封一頭張泗明並常胡兩會率回逆土匪潰勇五萬餘人竄踞宜君之馬欄鎮分萬餘人擾三水二萬餘人擾淳化三原復分股竄至窰渠高連陞一面緘報一面派隊剿窰渠之賊而親督所部赴馬欄鎮行近五溝口遇萬餘騎東竄高連陞帶隊迎剿而令丁賢發黃毓馥從左右齊進鏖戰兩時斃賊數百賊遂敗走進至五溝口復斃

數百值窰渠之師亦獲全勝敗賊回竄馬欄官軍遂駐五溝口初六日抵馬欄鎮先鋒隊殺守卡賊十餘名鎮賊登陴固守高連陞督隊薄城攻擊丁賢發楊玉魁及武生張鎮清等率隊由南門缺口冒矢石殺上該逆抵死抗拒高連陞復督隊從北門攀援而登大隊兩路繼進賊不能禦從西門竄走跟追三十里至劉家店該逆齊眾回撲經賀茂林轟斃數名墜崖者甚眾生擒四十一名忽臘達坪援賊大至鈔出我軍之後幸我軍皆百戰之士遇危益奮斃賊又數百名賊知無救分股四竄我軍苦戰終日至此始收隊傳餐軍士亦苦極

矣訊據擒賊馬伍什供稱此次董志原之賊已大半出巢有決不空回之意守馬欄鎮者爲常胡二阿渾已被官軍擊死馮阿渾亦被擊敗由柳林竄淳化三原者係馬正和封一頭等語高連陞卽令將馬伍什正法軍前率所部回楊家店其分竄三水之賊一股擾至職田鎮一股由三河鎮擾至看花宮馬步約五六千人均約至棗池合隊以犯三水駐防三水之州判喻兆圭總兵陳集賢會商於三月初五日出隊行抵棗池該逆列隊迎敵喻兆圭率隊進剿斃騎賊二十餘名該逆分兩路包鈔喻兆圭陳集賢由左叅將賀潤蘭守備殷忠

庭由右該逆下馬交鋒志在必勝我軍亦奮勇衝擊斃賊三百餘名該逆敗奔職田鎮我軍跟蹤掩殺比至該處則防營已被另股圍攻勢正危急敗賊附之凶燄益熾我軍復剿之而勝斃賊二百餘名該逆猶恃眾力抗我軍乃分路鈔之復斃百餘名生擒九名賊勢不支向陽坡頭狂竄比收隊回防日已暮矣回酋馬正和等率二萬餘騎於初四日竄擾三原劉典飭總兵李大有叅將蕭雅泗祝鑑嵩赴耀州迎剿初六日抵耀州該逆已竄淳化之方里鎮營務處道員魏光燾催促李大有等進駐朱家村劉典復派副將夏奉朝叅將聶福

田等赴洪水鎮偵探擒獲奸細一名訊據供稱該逆踞方里築壘自固有久踞之意因調中書科中書吳士邁率宗岳軍由紅水鎮掃蕩而北與李大有等合隊初七日商定乘夜襲攻是夜分三路赴方里該逆酣睡無備我軍衝入村內殺賊數十名賊皆竄方里李大有等追至天已黎明該逆以大股拒戰我軍鎗礮密施斃賊無數吳國富率馬隊由左衝殺李大有大呼陷陣千總袁必壽張盛元揮戈斬回酋封一頭刺傷王瘋子逆黨大亂我軍乘之連斃賊目胡正海崔家玉賊大敗返奔是役斃賊四百餘名獲騾馬六百餘匹耕牛三千

餘頭糧食數千石皆散給難民吳國富追至梅家腰嶮復斬獲無數乃收隊駐朱家村是夜探知蘇萬元馬正和張泗明諸逆復踞方里鎮初八日官軍分兩路進剿該逆接仗卽走我軍追殺約及半里該逆四面伏起將我軍圍裹李大有布列方陣以鎗礮四面環施該逆堅忍相持轟擊兩時之久祝鑑嵩吳國富已敗賊之左路率隊來援魏光燾率親兵繼至吳士邁自紅水鎮來會亦同時而至三面夾擊該逆大敗狂奔前阻深溝官軍後促賊屍盈溝敗賊悉上山岡憑高以禦李大有蕭雅泗祝鑑嵩率副將徐萬福遊擊劉忠發由中路

副將張佑庭叅將李國良由右路吳士邁飭遊擊劉厚福副將謝盛枏由左路皆身先士卒挺矛躍馬賊復大敗而走我軍憤甚追殺十餘里賊屍遍野生擒至二百餘人救出難民數千是日共斃賊二千有奇獲牲畜四千餘頭該逆向北竄去劉典豫飭喻兆圭隄防截剿初九日敗賊竄至石門關經駐防守備舒步雲扼擊小勝該逆折竄土橋喻兆圭陳集賢率隊行至數里外見四山火光知係敗賊所在率隊齊進總兵余明發守備王蓋臣副將翟春壽等繼之奮威猛擊喊聲震天該逆昏夜不能齊隊我軍刃無虛揮賊大敗越嶺北竄

我軍因暫駐土橋天甫明該逆後隊繼至見賊屍盈野知前隊被創拚命衝突我軍仍三路截之賊殊死鬪陳集賢身受四傷幾不能支諸將領環集猛擊約一時之久該逆向東北竄走是役晝夜共斃賊一千七八百名生擒七十五名十二日高連陞率隊馳至劉家店該逆已由正甯遁回老巢旬日之間官軍卒不滿萬敗各逆數萬之眾非盡瘁出力不能至此聯銜奏報蒙

獎敘有差是月捻逆由近畿折而南竄左 由正定移駐順德奏請

獎勵克復綏德城將弁奉

旨俞允西北諸軍同仇所以益切也黃鼎探悉董志回逆竄擾涇河川初七日出隊往擊行抵瓦雲驛遇賊探百餘騎擊之奪馬十餘匹擒賊一名訊據供稱僞元帥禹得彥將往靈臺辦糧等語黃鼎率所部由雁門口馳下涇河川未及成列該逆馬步已至總兵趙雲鳳及韋占雄徐占彪急前禦之斃賊二十餘名賊敗而復至千總周廷楨把總朱文炳由原邊鈔出賊後兩面夾擊賊始敗潰我軍乘之斃賊二百餘名該逆向涇河川竄走我軍涉淺追之有賊目率眾回撲馬陷泥

中都司康得勝砍其左臂落馬馬勇謝肇培擒之並斬紅衣賊目數名黃鼎收隊回防提訊賊目供認爲禹均彥有被擄逃回之李朝恩指認爲禹得彥彼遂以禹得彥自認云係渭南人同治元年因漢回爭鬪起釁該匪管禹家十一村回子後至甘肅與孫義章管各部回子孫義章陣斬後遂併其眾又添馬正和管長陀灣圍子馮均幅馬正和張泗明踞蕭金鎮崔三余彥祿踞西峯鎮如許活命情願緘約眾回求撫等語未幾查明實係禹均彥亦回中悍目遂令軍前梟示奏報後黃鼎所部亦蒙

獎敘維時甯條梁尙未克復延榆綏鎮總兵奉

旨著劉聲集補授並令與劉厚基金順胡世英等辦理北山防剿事宜劉厚基於三月二十九日進紮延安分扼甘泉之勞山麻子街等處劉端冕駐紮鄜州亦分扼甘泉之道左鋪四月初旬甘肅大股回逆竄踞甘泉之夏家哨分股二三千攻撲縣城經麻子街道左鋪各防營擊退而洛川之馬家河復有大股回逆自張村驛竄至經周紹濂擊敗復有另股數千竄擾中部之隆坊白村上官村李家村等處十四日總兵周志懷剿之於鞍子頭獲勝以兵單未敢窮進周紹濂聞報

卽於十五日親督隊伍向隆坊追剿飭總兵張大雄助周志懷往剿上官村二處皆捷遂並白村曹家村一律掃蕩共斃賊千餘名而甘肅之涇州復被回逆圍攻知州林發深就近求援於審店四月初六日黃鼎冒雨往援該逆敗竄官軍追下河川該逆不暇測淺競先鳧水溺斃甚多卽驟馬亦有淹沒涇州城圍立解四月十七日周紹濂探知回逆復竄隆坊再往剿之該逆敗遁官軍因日暮駐宿古樓村是夜據報有賊數百騎由土橋向白水而去十八日周紹濂率隊往追飭各營折回中部分防要隘自率董玉春進至渭陽鎮而賊已

他竄遂飭董玉春窮追二十四日至大香村適周金品正與賊相持於民堡董玉春合勢齊擊立將該寨攻破殲賊五百餘人餘賊向洛河梟水而遁旋又折回中部周紹濂飭防軍分途截擊無一漏網時高連陞駐軍馬欄鎮探悉回逆二股一由土橋竄宜君之雷原鎮一竄三甲河距宜君均十餘里二十日飭各營分路進擊各有擒斬至二十五二十六等日合隊勦之於建莊竄逆六百餘人斬殺殆盡復聞轉角一帶有另股回逆率隊往剿斃數百人該逆由石底子竄古泉副將周廷興探蹤往剿該逆列隊抗拒我軍猛進斃賊數十人

陣亡守備劉祥仙該逆向北竄去而北山一帶土匪蔓延四月十五日大股由延川竄至延長之渠口三更後進逼城根經團勇鎗礮擊退十六日黎明該逆四面環攻由西城搭梯緣撲經該縣丁憂知縣宋良率團堵禦手刃悍賊數名忽被洋鎗中傷脇肋猶裹創力戰奪獲雲梯數架該逆改由東南猛撲經該縣典史鄧兆璫監生宋庸榛從九鄧邦平等擊退該逆愈聚愈多勢極兇猛鄧兆璫宋庸榛鄧邦平均力戰陣亡賊遂乘勢登城宋良裹創督戰腹背受敵力竭捐軀訓導張賡泰復督團勇堵禦經三時之久斃賊不少宋良之子布

經歷銜宋庸松監生宋庸植鄧兆璫之子未入流鄧邦靖會
同候選教諭馮師詠等激勵團勇分起巷戰賊遂奪西門竄
走團勇居民被害尙不滿三十人印信倉廩衙署科房獄囚
以及民房均未傷損奏報後知縣宋良典史鄧兆璫監生宋
庸榛從九鄧邦平與陣亡之遊擊鄒懷德守備劉祥仙蕭千
勝等一體如例

賜卹宋良鄧兆璫父子濟美亦可云有光矣劉端冕移駐鄜
州後於四月二十三日探悉逆騎數百竄至洛川之吉子嶮
經喻先知率防勇出擊逆勢稍挫官軍正待猛進忽大股漫

山遍野而來環攻營壘守壘之勇以鎗礮竭力堵擊而已出之隊亦被包裹喻先知奮威衝出回營固守待援劉端冕聞報赴剿飭劉仕祁由左自督各營及親兵由右兩路齊進力戰久之該逆分股包鈔貢生羅正湘率馬隊策應喻先知亦出營夾擊苦戰兩時斃賊數百賊勢漸衰我軍乘之截賊爲二前股向洛川之舊縣竄去後股折向西奔營圍遂解劉端冕駐宿吉子嶮是夜探報竄往舊縣之賊蔓延廂西鎮交道鎮一帶正擬督軍往剿忽報道左鋪防營於二十二日被圍經唐俊元擊退斃賊甚多而鄜甘之閒隨地皆賊鄜防喫緊

遂率隊回鄜兩日共斃賊六七百名生擒六十餘名我軍亦陣亡守備蕭千勝並勇丁十名而舊縣竄逆旋擾及澄城郃陽魏光燾會同周金品張佑庭等埽蕩以往該逆聞風回竄洛川二十九日周紹濂探知洛河南北賊蹤布滿因派都司周曙良赴洛河之北調赴白水之董玉春折回調赴偏橋之劉甫田赴中部閏四月初一日該逆由交口渡河而西周志懷飭遊擊鄒懷德周惠生扼擊值水落河淺處處可涉該逆前後麇集我軍兵力太單周紹濂聞報率劉甫田赴剿甫抵河干忽大雨傾注乃收隊駐宿鞍子頭初六日周紹濂率隊

伏於西溝上段飭劉甫田伏西溝下段張大雄陣於原上以誘之該逆恃眾鼓譟而前張大雄以鎗礮緊轟斃賊目二名賊遂驚亂周紹濂揮伏令起三路夾攻斃賊七八百名該逆大隊折竄我軍分途掩殺又數百名至洛河邊該逆仍齊隊列陣周紹濂整隊以防援賊劉甫田率隊壓擊賊屍盈畔該逆搶渡洛河值雨後水漲賊屍填積計所斃二三千人所棄牛馬驢騾以萬計我軍陣亡遊擊鄒懷德並勇丁三十五名官軍以寡敵眾竟獲奇捷此閏四月初旬也是月擒逆已由修武獲嘉折而東竄偷渡運河由高唐竄至滄州左

由

彰德拔營渡運經德州景州青縣進駐直隸之吳橋連鎮回
逆大股由靈臺竄至鳳翔眾約數萬劉典以魏光燾高連陞
劉厚基劉端冕周紹濂等軍防剿西北可以杜賊內犯惟鳳
翔逆勢浩大不能合力攻剿遂擬於閏四月初八日率兩
營前往督戰而劉端冕前於吉子嶮地方將賊截作兩段前
股萬餘竄踞韓村劉端冕於四月二十九日自率兩營銜枚
急趨閏四月初一日抵韓村出其不意一鼓攻入該逆倉皇
失措不戰而竄我軍追至草地將守糧之賊斬殺無遺旋至
仙宮河該逆拋騾馬輜重誘我士率劉端冕申令嚴禁督隊

緊追該逆萬騎齊衝我軍嚴陣以待該逆恃其巢穴堅固退藏甚便愈衝愈猛我軍繞據堡東高阜用開花大礮轟入堡內斃賊無算並傷偽帥白添玉餘賊踰牆狂奔賊陣因之大亂我軍乘之奮勇衝殺屍骸枕藉計斃賊數千人救出難民亦數千獲騾馬牛驢無數餘賊東西竄走日暮收隊此又北山之一大創也西路之賊分由汧隴內犯閏四月初二日蕭德經擊之於麟遊之麻夫站斃賊數百名羅洪德擊之於隴州之白石川斃賊二百餘名生擒六名賊竄寶雞之號縣鎮李輝武迎擊之戰歷五時斃賊三百餘名我軍亦陣亡二十

名初七日張岳齡擊之於汧陽之屈家灣鏖戰終日又斃賊三百餘名初五初八等日劉效忠與該逆戰於岐山之號王村劉家口等處斃賊一百三十餘名生擒五十餘名此皆初八日以前各將領分途截擊情形也劉典自三原起行初九日至醴泉探報渭河南北賊蹤已滿初十日移駐咸陽以圖兼顧省垣派吳士邁率宗岳軍駐興平其時慶陽屬境悉爲賊有甯州合水相繼失守駐甯防軍不能制署甯州知州凌光漢逃匿偷生者合水縣知縣楊炳華力戰被戕崔三等逆分股由寶雞之號縣鎮下遊渡河南竄李輝武慮其擾及漢

南遂偃旂息鼓馳行二十餘里至馬營鎮遇賊戰而勝之賊
卽潰走追二十餘里至斜坡該逆黨類愈眾李輝武令各營
分路猛擊自辰至午鏖戰數時賊勢稍弱我軍追捕搜殺至
戌刻始收隊回營初九日該逆因先日受挫由雙堡子渡渭
會同駐原上之賊合隊抗拒及李輝武出隊至斜坡該逆仍
紛紛四竄未得痛剿是夜探悉該逆盤踞底店初十日丑刻
復銜枚以往黎明至其處見該逆馬步五六千人正圍民堡
我軍整隊攻擊賊解圍而走我軍乘之擒斬甚多該逆敗過
汧河向魏家崖以去訊據擒賊供稱此股係僞元帥馬姓統

領四五千人所部賊目劉王張趙四千人初五日號縣鎮之戰馬偽帥中鎗子傷由乳旁穿從背出劉賊目歿於陣初八日之戰趙賊目亦被陣斬等語十三日探悉該逆由九龍山八廟口入山擾及塘口嘴頭號川恩哥嘴等處續股渡渭絡繹十四日探悉該逆圍攻底店民堡連日派隊往剿賊見官軍卽遁追之不及李輝武乃於十七日夜二更後挑選奮勇襲攻杜家莊油坊村踞逆用火蛋火箭密施斃賊無算生擒十餘名十八日復挑奮勇於五更後潛伏麥地中另派二十餘人扮作鄉民刈麥賊果蜂擁而至伏兵從麥中衝出殺斃

多名生擒二十餘名該逆經李輝武痛剿後折向東竄擾及岐山扶風郿縣渭南地境道員魏光燾於十五日向郿縣進剿道員黃鼎中書吳士邁先後至扶風岐山十九日魏光燾會商進擊而該逆步隊已遁甘境騎賊亦於十九夜繼遁蕭德經乘夜截擊斬馘僅數十名值雨作不能再進二十日黎明忽有回逆千餘騎衝至中部縣城下周紹濂營中什長李華明率勇生擒一名據供認爲趙元六大股二萬餘人日行百餘里距城不遠等語周紹濂料理城防飭各營分城堵禦並令知縣萬夔外委田玉春率民兵上城助守正料理閒該

逆果分三路而至於城外原上列陣作勢攻城乃飭都司黃勝龍率親兵出東門倚河設伏自率副將陳高華趙興雲都司孫柏山守備甘長福出西門攻中路叅將鄧廷望千總周崑都司劉輔軍何友元攻左路派總兵張大雄率都司黃順德王文明攻右路三路齊進左路之賊涉水前來撲陣鄧廷望迎戰良久斃執旂賊目一名賊黨甚多賊敗退北岸中右兩路之賊復拚命前來張大雄扼險堵擊先之以劈山礮繼之以洋鎗賊敗竄原下正擬壓陣追殺適耀州局解糧來營該逆分股繞截倉卒間肆應不暇勢將窘迫經親兵張得勝

李揚芬奮勇斬騎賊數名斃賊目二名賊敗向北原奔竄我軍乘之追殺數里前臨深澗騎賊不能馳騁我軍迫之墜斃極多值大雨忽至未及越澗而還是日斃賊千餘名生擒二十餘名據供僞帥曹福堂已經擊斃尙有李天祥楊磁娃康纏兒張士元趙芸等圖陷中部進攻白水蒲城耀州等語是夜該逆向白水一帶馳竄而西原尙畱悍賊致周紹濂不能追剿飛稟請派隊往截劉典因飭副將楊德明叅將吳國富率馬步以往檄魏光燾由岐山回援忽報宜君之馬欄鎮復有大股圍攻副將李瑞林營壘李瑞林督勇憑牆堵禦鎗礮

密轟賊勢稍懈李瑞林見賊陣已動立挑勇敢二百餘人出營衝殺斃賊數十人賊卽敗走勇士趁勢追殺賊見其人少回撲數次皆爲我軍所敗始紛紛退竄追至黑牛窩而還共斃賊百有餘名是夜探報前股已竄石門關後股尙在田家鎮馬欄鎮之圍立解劉厚基一軍分紮延安宜川甘泉地境戰無虛日前四月十五日剿賊於甘泉之南泥灣斃賊甚多獲騾馬軍械無算生擒僞帥言得勝並頭目杜全幅據言得勝供認係捻匪張總愚頭目上年十月內入山經土匪杜全幅推爲大帥所管有七百餘人等語先是二十二日賊由勞

山迤北竄至延安二十里鋪劉厚基飭總兵田玉廣往剿該逆恃眾圍裹自辰至未戰歷四時劉厚基續派黃超羣赴援內外夾擊賊遂大敗斬馘頗多劉厚填自勞山截擊至三十里埠該逆正解鞍造飯我軍一鼓而前斬悍賊數名值山路狹隘該逆擁擠齊力反鬪劉厚填急扼街口石橋密施鎗礮賊不能支立時敗潰正收隊間忽另股三四千猝至勢甚猖獗劉厚填派隊繞從山上壓下賊遂大潰我軍乘之斃賊二百名偽統領翟姓受傷墜馬鄒祖德斬取其首適劉端冕部將甘大有亦追賊而至合勢進擊沿途斬馘更多生擒二

十餘人據供係甘肅潰勇共有十營匪首係翟朱陳伍四姓與回逆土匪相依等語劉厚基見賊勢趨重延安防軍疏落移麻子街勞山各營以往二十八日有百餘逆騎至延安城外副將劉文華迎戰克捷正將齊隊進剿該逆之來愈眾劉厚基察其有伏乃令整隊而前該逆時進時退我軍追至李家灣劉厚基傳令止追結陣抽隊回伏楊家灣李家坵一帶方令收隊行甫數里伏賊果出比至楊家灣乃令回旂返鬪伏兵齊起斬悍賊數十名賊突圍狂奔追斬百餘乃徐徐收隊二十九日出隊再剿不見賊蹤適被擄之探卒逃回據稱

二十八日之戰阿渾哈玉林中鎗洞腹而死僞總帥楊文治
連夜折回董志原延安府城賴以無恙至閏四月十八日劉
厚基探悉大股回逆由高家哨竄至勞山卽派叅將梁得勝
副將劉文華遊擊甘彰輝馳赴延安三十里堵剿營壘未成
該逆前隊已至甘彰輝率隊迎擊斃賊數十名生擒十四名
訊知逆首楊文治因前次哈玉林被殺特選兩萬悍黨來此
報復等語乃飭速修營壘竭力堵剿而該逆愈來愈眾將兩
營層層圍住我軍鎗礮轟擊徹夜未休斃賊雖已不少奈賊
黨極眾其攻愈猛劉文華上牆督戰中鎗而殞勇丁相繼傷

亡甘彰輝見劉文華陣亡恐該營有失過營督戰甫出營門亦中鎗而殞梁得勝竭力督戰亦被鎗子穿腳裏創嚴督至十九日辰巳之交我勇傷亡過半劉厚基得報卽率隊馳援行近三十里鋪該逆四面蜂擁而來劉厚基扼險抵禦身受數傷猶裹創血戰該逆知不可犯解圍東竄意圖乘虛襲城劉厚基急馳回郡布置防守人心始定賊知有備亦未近城攻撲是役陣亡將弁勇卒至三百餘名良由兵力太單軍無後繼之故均經奏請

優卹回土各匪旣久聚北山而落後之捻人之潰散之勇附

之官軍布防腹地尙虞不足故該處營伍更疎自劉聲集接鎮榆林劉厚基疊次痛剿各匪狼奔豕突不敢屯踞前四月閒竄至魚河紅洞淵一帶經鎮道各營擊之東竄劉聲集親督都司劉茹惠等馳追五十餘里及之於牛角灣該匪復向東敗竄劉聲集以地廣兵單不敢遠離是夜回城探悉邊牆之外高家堡大保壩各蒙地馬步匪黨分股鈔掠清湖綏德一帶另有回土合股由米脂北竄擾及葭州榆林據探該匪一在響水堡一在神木柏林堡因派遊擊王守基縣丞王遇春等管帶勇練往剿響水堡該匪聞之逸去而榆東各匪竄

近神木二十九日署叅將慶連派署守備林必榮出關哨探至十餘里外大股回逆數千自溝中擁出將林必榮砍傷墜馬直撲神木南關慶連登城堵禦中洋鎗而殞該逆闌入關城無可擄掠縱火焚殺向府谷竄去旋又分爲兩股一由界牌竄草地一撲萬家墩署鎮羌堡都司王培蔭率團堵截該逆竄至溝口王培蔭鎗斃數名該逆一擁而上勇力不支王培蔭不知下落其老匪董福祥經劉厚基剿敗後於陣前跪地乞撫亦未見續有稟呈擄掠如故維時復有數大股由甘肅竄入北山每股多者兩萬少亦萬餘意圖搶掠夏麥其竄

至馬欄鎮白水宜君耀州等處者卽此匪也慶連於本年正月開神木失守案內部議革職畱任此次守城殉難奏蒙開復原官照叅將例

賜卹劉典因鳳隴肅清遂於五月初一日回駐三原以便調度其馬欄鎮敗賊於閏四月二十六日竄至三水之石門關經防營叅將何昌梓扼要力堵賊不得逞相持至三時之久賊損多名遂敗而返奔卽於是夜繞由七里川竄至耀州境內高連陞適至耀州二十八日迎剿該逆前股竄涇化之通澗溝擄掠後股尙在塔兒寺二十九日高連陞馳至塔兒寺

該逆正分途擄掠見官軍至紛紛逃走遺糧食牲畜殆盡官軍捕斬亦多追至通溝鎮該逆大股約萬餘布陣抗拒高連陞令黃毓馥由左楊玉魁由右自督知府楊銘濬副將賀茂林直搗中堅鏖戰逾時賊屍委積大敗而走官軍追殺十餘里始還計斃賊約千餘名生擒十四名訊據供稱先數日探得耀州無兵意欲乘虛竄陷等語是日賀潤蘭亦抵淳化軍威益振該逆膽寒星夜向三水竄遁陳集賢喻兆圭殷宗廷等早已探知料賊必由土橋竄走卽出隊赴該處該逆亦早探知乃乘夜由蜜蜂橋班村一帶越溝飛遁喻兆圭等率隊

斜出橫擊號鼓齊鳴鎗礮向人聲多處轟擊追過五道溝時已黎明賊由職田鎮向正甯狂竄我軍至五月初一日未刻始行收隊此次殺賊不多而墜崖踐踏死者不下數百其竄白水一股於閏四月二十五二十六等日擾及澄城郃陽一帶經駐韓城之都司張雲松派隊赴郃陽扼防楊德明吳國富復於二十六日奉劉典檄飭抵白水出隊進剿陣斬數十名該逆向東北狂奔二十九日竄至中部之西經周紹濂預於各要隘嚴防該逆繞越偷竄據扼守土橋之都司黃順德遊擊黃應維飛報該逆大股向該處衝突周紹濂卽飭張大

雄前往夾擊遂將該逆截斷一股向土橋東竄周紹濂督同董玉春劉甫田及叅將毛正明赴剿分隊左右包鈔該逆退踞東岸周紹濂令收紮該處枕戈待旦四更後據探報該逆乘夜繞由蓮花溝酒溝等處向偏橋許家原竄走初二日黎明追至該處該逆正奔竄未已周紹濂令毛正明由後策應自督劉甫田由左飭陞用同知張權英會同張大雄董玉春由右同時並進該逆莫有鬪志我軍乘之斃賊無算該逆復分兩段周紹濂令毛正明力堵後隊自督各隊冒雨追殺該逆委棄牲畜輜重狂奔而去其後隊亦經毛正明擊敗繞由

宜君之五里鎮西竄兩日共斃賊二千餘人解散千餘人時西路擊敗之賊尙踞靈臺崇信涇州一帶閏四月二十八日馬步千餘竄至永壽西南之儀井鎮副都統常興阿率馬步前往迎剿商令譚玉龍舊部知縣王時邁率新捷兩營接應行抵大橋見該逆東竄卽飭叅領額爾和布率騎過橋誘敵該逆卽時折竄追十餘里不及而還二十九日探報該逆另股二千餘人由西竄至常興阿率馬步進擊並約新捷兩營至夾道河會剿行抵大橋該逆列隊迎戰常興阿飭營總賽清阿由白村進副將李得志帶隊居中策應賽清阿首先衝

殺常興阿繼之賊遂披靡合力追至儀井鎮斃賊三百餘名
生擒十餘名賊敗向西北狂竄而汧陽復有大股回逆自靈
臺新集竄至初一日張岳齡率所部出隊戰於汧陽之西原
苦戰竟日斃賊百餘我軍亦傷亡二十餘人營官李佑厚哨
長曾傳勝黃協吉均中鎗傷甚重該逆仍踞陝甘毗境初四
日李輝武率隊助剿午刻抵汧陽探報該逆大股圍攻馮坊
河寨堡勢甚危急李輝武張岳齡會商往援馳抵馮坊河該
逆馬步萬餘分攻民堡見官軍至解圍迎戰相持約兩時之
久尙不稍卻李輝武督令各營官冒險衝殺賊乃大敗我軍

乘勝猛進追殺四十餘里至南陽堡該逆始棄糧鼠竄我軍回營已三更矣維時譚玉龍因眾寡不敵亭口之戰力竭捐軀比經會奏請

卹其所部新捷一軍開除陣亡淘汰傷病編爲四營歸陝甘補用道黃鼎兼統仍駐防邠州一帶旋據革職畱任宜川縣知縣余觀瑞稟稱閏四月二十日逆匪闖入該縣地境圍攻秋林甘草各民堡勢已垂危余觀瑞挑選壯丁千餘人約劉厚基所部遊擊李恆勝於二十五日進剿黎明抵秋林鎮乘其不備一鼓克之該逆敗走我軍進追至甘草賊已列陣抵

御勢尙猖獗余觀瑞李恆勝暨從九席炳南等挑奮勇四十餘人自率當先各勇繼進傷賊極多該逆立即敗退追殺三十餘名生擒二名寨圍遂解敗賊竄歸雲巖鎮訊據生擒王泳勝李長發供稱該逆向隨張總愚爲匪歸袁大魁管帶馬步共七百餘人上年十一月內竄過冰橋時因官軍追緊落後折竄陝甘交界地境招集艾姓李姓潰勇三百餘人又收土匪三千餘人嗣後裹脅難民約共萬餘人因甘肅境內無糧竄踞宜川雲巖鎮將該鎮舊城加修堅固挑濬濠溝紮木城一圍並在上坡修葺寨堡一座每日分途搶掠糧食儲積

城內頭目袁大魁意圖久踞藉以窺伺山西搶渡合隊等語
既而延川縣知縣姜承惠代理延長縣知縣吳功全榆林府
知府蔡兆槐飛稟沓至皆以逆匪竄擾境內國勇進剿失利
急請派兵赴援而董幅祥一股仍踞懷遠地方雖聲稱投誠
仍擄掠如故且有另股竄至榆林之黨家岔李家溝等處劉
聲集派兵往剿兵力以分而愈單金順有東征之信以無糧
不能拔營等情劉典等會商設法抽撥四營檄道員魏光燾
管帶由三原起程赴鄜州面商劉端冕緘約駐延安之劉厚
基酌量抽隊前進會剿並奏請

勅下山西撫臣鄭敦謹飭已革臬司陳湜率現駐吉州一帶
防河之兵就地渡河約期會剿並飭候選知府成定康新募
千五百人趕緊訓練成軍帶赴綏德州駐紮聯絡劉聲集相
機防剿卽以成定康署綏德州知州責令安民剿賊會商左
聯銜具奏是時捻逆往來於山東之東昌直隸之南皮
靜海天津等處左 仍駐連鎮陳奏後均蒙

俞允五月初八日盤踞涇河川回逆以大股步隊圍撲長武
縣城以馬隊分列西路作進攻窰店之勢閻定邦率隊七成
出城東迎擊正接仗間西路騎賊來援知縣張景福會同糧

局委員府經歷程維雍率團於西南城角開礮擊中悍賊數名賊騎數匹馬賊遂走城東步賊亦經閻定邦擊斃百餘名同時敗退初九日逆回馬正和率數千騎攻該縣之淺水堡閻定邦率隊赴援忽有大股騎賊撲城閻定邦折回迎擊該逆下馬持矛猛進衝陣我軍鎗礮環施賊不能近正擬乘勝壓剿馬正和忽由馬坊溝直撲北城敗賊亦與之合遊擊李祥豐中賊洋鎗猶裹創血戰各勇奮力衝殺賊始敗走斃賊共百餘名我軍亦陣亡五名而該逆蔓延邠長閒十一日由正甯竄至三水屬之紅崖河文家川一帶知州喻兆圭等擊

之斃賊數十名賊仍趨左路合股猛衝總兵余明發率隊由溝內鈔出火箭洋鎗並施賊始敗走忽僞元帥馬生彥由四村來援我軍亦合併迎剿鏖戰多時賊大敗狂奔我軍追殺數十里賊向甘境竄走而吳士邁于奇泮左日升等駐麟遊之麻夫站初十日拏獲賊探訊知甘肅隆德縣回目馬豔魁馬豔寶馬豔虎兄弟糾合三萬餘人由華亭宗信入靈臺擄掠麥糧牲畜分踞北里鎮宋家寨鄧家寨不時分股出掠等語吳士邁畱湘果營駐防麻夫站自率宗岳營勝字後營先進商約升奇兩營馬隊繼後行至靈臺李家村登高察看形

勢商定分兩路進令各營分隊設伏約會於北里鎮鄉民爭先引路吳士邁令其集團以助而以余濤勝領之分布四山多張旂幟行近宋家山步賊千餘出抗我軍擊之敗退入寨追至東門石如雨下不可近因令楊秀明扼西門山坳施放開花大礮一時寨中火起賊開西門竄走斬數十名餘悉翻崖而逸叅將劉厚福追之落崖者不下千餘遂進攻鄧家寨該逆膽落卽時奔潰賊甫下山遇我軍分伏各隊鈔殺而來該逆七八百人殲之殆盡附近十餘小寨皆望風而逃我軍入山搜捕復斬賊三百餘人吳士邁重申軍令禁取賊物再

進至北里鎮見漏網之賊向西北遁竄跟蹤緊追至爛泥灣
忽遇逆首馬豔魁頭裹黃巾身披紅袍率萬餘騎前來迎撲
我軍堅陣待之該逆復分四面包鈔經謝盛柑管春林李耀
卿曾景龍陳子琛等督隊衝擊斃賊雖多而圍終莫解吳士
邁督隊自山而下一面催升奇馬隊速來一面率隊猛進內
外夾擊逆首卸去紅衣率騎賊拚命衝突戕我軍先鋒勢幾
不支適守備鍾盛慶督洋鎗手湯成考鎗中逆首倒地周志
仁唐慶甫李有才急進刺之山上余清勝亦率鄉團馳至賊
遂大敗向西北狂奔我軍跟追至北里鎮復斃賊三百餘人

時已黃昏傳令休息令百姓收拾賊物數十里內麥糧牲畜盈山遍野悉聽百姓運取我軍回至李家村時已四更露坐待旦是役埽穴殲渠斃賊三千餘人奪回麥糧逾萬石牛馬驢羊萬餘頭洵數月中奇捷專摺奏報蒙

獎敘有差馬正和於初十日復糾涇河川踞賊竄擾長武蓄意攻取縣城爲老巢閻定邦會同知縣張景福咨商已革提督劉正高訓導卓宗元幫同守城十一日閻定邦更換旂幟分路出隊劉正高伏於左右複道中該逆見旂幟異前疑有添軍驚惶失措守備趙連科首先陷陣劉正高從左右衝出

千總李元保把總王高成前後鈔殺該逆敗走我軍乘勢追殺斃賊五十餘名是夜初更後忽有大股由原北繞至城根搭架雲梯從東南北三面猛攻經知縣張景福督團抵禦聞定邦飭趙連科曾保元猛擊歷兩時之久奪獲雲梯二架賊始敗竄十二日午刻復至闔定邦率都司張錦春等迎擊斃執旂賊二名賊始敗去據逃出難民供稱陣前所斃之賊一係僞帥馬二等語馬正和復調集夥黨四面棋布內外聲息不通其勢仍危黃鼎於十四日由邠州赴援行抵水簾洞踞賊扼險攔截黃鼎飭右副後三營繞從黑河川猱升上原飭

正左兩營由中路進剿自率親兵繼進甫至半山忽破堡中
出騎賊數百人憑險施放鎗礮正相持閒而黑河川上原之
隊遙至該逆遂紛紛逃竄我軍乘勢擁上前後截殺斃賊頗
多追至距長武十里之染店該處割麥之賊二三千人均四
散逃奔黃鼎督隊緊追適雷正綰率馬步三營由政平掃蕩
而來兩面夾擊該逆不敢抗拒附城數十里之賊皆望風而
遁黃鼎督馬隊追剿至涇河川斃賊千餘名救出難民亦千
餘人長武解嚴而三水之賊經喻兆圭等擊敗後退踞正甯
四村等處搶割三水之麥十三日直隸州知州劉倬雲至三

水適甘肅提督高連陞亦至商定喻兆圭賀潤蘭殷忠廷進駐太峪鎮高連陞進駐張洪鎮劉倬雲李大友陳集賢進駐職田鎮連日分途探剿各有斬獲至十九日會商高連陞直搗正甯賊巢而該逆已於十八夜回竄董志原三水數十里熟麥得以保全劉端冕奉檄剿宜川雲巖鎮捻土各逆於初十日拔隊緘約劉厚基出隊會剿道員魏光燾由後路繼進先是雲巖鎮逆於初一日分股竄踞宜川之交里鎮搶割民麥經知縣余觀瑞率團勇擊剿斃百餘人該逆遁回老巢初三日余觀瑞隨同李恆勝前進探擊中途遇賊略有擒斬十

五日劉端冕率所部抵宜川劉厚基亦撥營來會是日進駐距雲巖鎮十五里之劉家莊十九日劉端冕由正南進擊派劉厚基部將劉厚填唐俊元及本部甘大有由東南緣山而進余觀瑞率團由溝口進我軍行近賊卡該逆憑險抗拒轟擊逾時賊不稍卻劉端冕令劉厚填紮駐山頭連放開花大礮轟衝賊巢斃賊不少劉端冕遂督軍猛進立破賊卡兩座余觀瑞等亦將木城兩座攻拔我軍進逼城根該逆首袁大魁率死黨拚命抗拒礮石如雨傷我勇丁百餘人苦戰四時日已漸暮不得已收隊回營二十一日劉端冕逼城築壘扼

賊出路而該逆山坡堅堡與鎮城相犄角我軍兵力不敷分
布因緘催魏光燾兼程前進而晉撫鄭敦謹以河防喫緊兵
力不敷勢難渡河會剿等情奏覆更不能不就陝省現有之
兵盡力剿辦劉端冕於二十三日銜枚齊進派甘大有余觀
瑞環攻東北兩寨唐俊元進攻南門劉厚填陳國珍排列河
邊劉端冕自率隊伍從西北進攻立重賞激勵士卒唐俊元
會同總兵王雲孚哨長喻榮貴首先爬城將及垛口該逆拋
擲插木滾石傷勇丁一百餘人已斃者四名喻榮貴登時陣
亡苦攻終日終難遽下仍以日暮收隊二十七日魏光燾率

四營抵宜川縣二十八日進紮距雲巖三里地方會同各營官看明形勢一城兩寨均極堅固城內糧食甚足而北達延川東近黃河西通延安東南可竄韓邵宜先斷其去路二十九日劉端冕自率兩營紮該鎮北山之巔魏光燾自督副將張佑庭紮該鎮正南副將蕭雅泗紮該鎮西南距賊城不及半里均扼去路其餘各營準備截擊是夜大雨如注有自賊中逃出者據供稱城中經開花大礮擊斃不少人心驚惶有欲乘我營未定假託投誠投間衝出者有欲嬰城固守句回援助者主意未定等語魏光燾劉端冕等以賊情恇怯心志

不齊利在速攻三十日劉端冕率甘大有劉厚填陳國珍等由東北進魏光燾飭蕭雅泗由正西進楊德明由西南進張佑庭由正南進祝鑑嵩由東南進自率親兵並吳國富馬步排列河岸接應各路齊力猛撲鎗礮密施賊目中鎗死者甚多賊黨喧噪我軍乘勢撲至城下拔椿填濠爬城而入賊勢不支越城墜死者相屬乞撫者尤眾立將雲巖鎮城克復遂飛飭勇丁團練圍攻兩寨皆開門乞撫訊之則被脅飢民也乃交余觀瑞給資遣散是役擒斬五千餘人遣散男婦四千餘人獲僞檢點張大有僞司馬周友明僞軍功袁崑岡僞指

揮施萬才李綱山李成玉僞將軍曹振邦等訊明正法搜獲
僞印三顆旂幟鎗礮軍械無算糧食數千石耕牛百餘頭騾
馬千餘匹耕牛糧食散給難民訊據擒賊供稱袁大魁投井
溺斃亦有稱乘人擁擠潛逃者而井中則撈取無屍終無確
據但大股旣滅應無他慮奏報後均蒙

獎敘其陣亡之都司喻榮貴王得華把總蘇嘉寶劉良祿徐
良玉董仁和等均蒙

優卹雲巖鎮旣克北山一帶已無賊踞之巢其胡世英所部
十營到處騷擾全無紀律亦經奏奉

諭旨先行撤去統領交劉典查明嚴行叅辦毋稍寬縱各營
勇丁並著該署撫實力整頓分別裁畱嚴申軍律毋任仍蹈
故習欽此自是勇丁愈知畏懼北山之民困稍甦矣

平定關隴紀畧卷四終

平定關隴紀畧卷五

同治七年戊辰夏六月

欽命署理陝西等處地方巡撫劉典駐劄三原縣城代籌陝甘軍務

欽差大臣督辦陝甘軍務左 仍駐吳橋連鎮官軍進剿

捻逆在鹽山滄州德平清平等處屢獲大捷逆目次第乞降二十八日之戰該逆全數擒斬雖未得張總愚實在下落而捻逆實已蕩平奉

上諭左宗棠縱賊出陝追剿尙屬迅速抵直隸後督軍截擊

扼守運河亦頗嚴密著將該大臣疊次降革處分一併先行
開復欽此嗣因李鴻章奏請循例

陞見所奉

上諭有云現在陝甘等省軍務緊要亟須左宗棠統帶原部
劉松山郭寶昌喜昌等軍回剿著左宗棠卽飭令劉松山等
軍一面拔營由山西渡河入陝將鄜延綏榆等處回氛節節
掃蕩左宗棠當先來京陞見等因蓋捻逆旣平則陝甘軍務
益不容緩矣而陝甘自攻克雲巖鎮後捻逆之在陝者已無
大股土匪亦有乞撫之意獨回逆恃其眾多勢尙猖獗是時

復有大股竄至三水之底廟甘家村一帶搶割民麥經高連
陞陳集賢劉倬雲喻兆圭等分途擊勦該逆復回老巢道員
黃鼎率隊至邠州之永樂鎮適遇騎賊陣斬十餘名生擒白
隆兒一名餘賊向宮河川竄走是夜探報逆騎千餘在白堡
一帶割麥黃鼎仍由馬連河進勦令徐占彪胡應芳率馬隊
兜擊自率步隊繼進該逆棄其騾驢飛奔而遁追斬三十餘
名生擒二十餘名追過白堡二十餘里忽破堡中出騎賊五
六百名兩路鈔來敗賊亦折回迎戰鏖戰逾時賊勢稍卻適
黃鼎率步隊趕到賊遂敗竄我軍追殺數十名賊向宮河狂

奔以去是日隴州亦有回逆馬步千餘竄至火燒寨等處擄掠羅洪德於酉刻聞報往剿四更至火燒寨詢知該逆已竄至苟家寨銜枚再進至該處天已黎明該逆猝不及防倉皇奔竄追至芳莊該逆因有另股合隊列陣迎敵我軍分兩路夾擊始將該逆剿退回竄甘境六月初十日回逆數千竄至麟遊之廟灣吳士邁緘約蕭德經及升騎馬隊進剿該逆聞風竄崔木鎮我軍仍分三路往追蕭德經先及之賊不敢抗棄所掠糧畜向西北狂奔吳士邁飭升奇宗岳等營由小路截之頗有擒斬獲牛羊騾馬五百餘頭以耕牛交麟遊縣給

難民高連陞勦賊於轉角賊敗向東而竄高連陞探勦至宜君之古泉適駐宜君之總兵高有志先日於高村等處擊賊斬馘頗多我軍亦陣亡三十餘名該逆大股衝至五里鎮高連陞於十一日追至該處該逆已竄雷原鎮正督隊前進聞適周紹濂亦督軍而至遂商定一軍繞前一軍截後周紹濂趕赴雷原該逆正修築卡門妄圖久踞周紹濂飭張大雄由左張權英由右自督劉甫田董玉春直擣中堅該逆列陣抵禦我軍中路奮勇直前賊已不支而左右兩路復鈔而至該逆退入鎮堡我軍乘勢撲入該逆敗走自相擁擠經我軍擒

斬以千計餘賊向原路狂奔高連陞詢知之亦分三路迎擊我軍甫踰嶺而下恰遇敗賊從南竄來殲斃百餘名該逆奪路狂奔高連陞飭丁賢發追剿自率馬隊越嶺繞出賊前該逆不料由前截擊正踞民堡造飯我軍驟至猝不及防盡棄騾馬而逃我軍前後夾擊自申至亥追殺三十餘里殲賊五六百名生擒十八名十二日高連陞復派隊搜剿斃尾賊數十名兩軍不期而會連獲大捷天之假手斃回豈偶然哉而回逆猶造孽未厭馬正和因未得志於長武也復率十三營分擾邠州三水黃鼎詢知之卽於十六日四鼓率隊赴邠屬

之世店助勦十七日該逆環攻其營我軍派隊迎擊逆輕其寡伏馬隊於村畔而以步隊誘我適黃鼎率隊趕到賊尙未知黃鼎揮軍猛攻賊遂大敗正馳勦閒伏賊齊起黃鼎隊伍稍退先擇地勢結陣以待該逆果四面包鈔我軍俟其逼近分路衝殺黃鼎督叅將劉心灼率馬隊策應各軍奮力齊擊戰至十餘合賊紛紛敗竄馬正和揚旂督戰敗而復回經我軍壓退約兩里仍齊隊回撲黃鼎親督猛進斬悍賊數百名馬正和怒馬回衝自稱其名大呼而至徐占彪令洋鎗隊叢擊傷其左肋伏鞍而遁徐占彪督親兵追刺之連中數矛猶

能勒馬格鬪逆黨護之而逃餘逆披靡已甚我軍掩殺至紅巖河時已二鼓始行收隊計前後斃賊千餘名斃馬數百匹我軍亦陣亡總兵侯鼎綬外委扈品恒吳占魁三員傷勇丁六十餘名此竄邠之賊也其竄三水一股約萬餘人十六夜底廟一帶火光燭天十七日駐職田鎮之知州劉倬雲會同陳集賢李大有前往察看甫抵鞏家花園據百姓報稱該逆大股潛伏盈村一帶劉倬雲方回營派隊而賊已紛乘距營僅五里另股數千直撲三水西關維時駐三水之喻兆圭賀潤蘭均赴職田聞報卽商劉倬雲抽隊赴援遂從賊中馳回

三水縣適余明發王蓋臣已與賊接仗賊勢稍卻喻兆圭賀潤蘭馳入陣中飭王蓋臣由左余明發由右自率親兵居中三路並進連發開花大礮並以鎗礮刀矛相輔而前賊不能支敗退大峪余明發等挑奮勇怒馬馳追斬回首數名喻兆圭等繼進賊見我軍銳甚而北岸之黨又經職田各營扼勦不得會合遂紛紛向梁渠溝竄走我軍追殺至溝邊而還是日斃賊近千名是晚報稱回逆大股盤踞湫坡頭椒村一帶誓圖破職田劉倬雲等於十八日由太峪赴椒村截擊陳集賢由北岸頭下溝俟賊敗卽向店子河追擊劉倬雲李大有

等直向湫坡椒村進攻甫抵湫坡該逆數千騎撲近我軍屹立不動約一時許忽見喻兆圭賀潤蘭由梁渠溝鈔來遂成夾擊之勢而陳集賢進攻店子河亦已得手鎗礮聲震山谷該逆心膽俱悸向盈村竄走喻兆圭復截斬尾賊百餘名劉倬雲派隊跟追山路陡峻該逆爭先脫逃墜跌死者不可勝計李大有等馳下兜擊刺斃極多陳集賢由店子河來會將尾賊斬馘無遺計此役共斃賊二千餘名救出難民數千亦惡戰也而該逆尙欲由三水竄陝二十一日據報正甯之四村等處騎賊紛紛下溝又據北岸堡民訴該堡被回騎攻擊

求援李大有率隊馳往堡圍立解追之下原不料原下先有
伏逆將歸路截斷劉倬雲得報會同陳集賢往援甫抵伍家
堡騎賊紛撲而來擊之遂退追至恆安洲見回眾麇集如蟻
我軍排列方陣環以鎗礮賊不能撼陳集賢率親兵猛擊步
賊敗退騎賊猶層層包裹陳集賢用開花礮連轟擊倒白旂
賊數名賊始解圍奔竄忽大雨如注紅巖河賊復四面包鈔
我軍穩固陣腳鎗礮環施賊不得逞陳集賢挑洋礮疊轟喻
兆圭復率隊來援該逆大敗狂奔是日斃賊數百名回首赫
阿渾馬偽帥一股亦萬餘騎十四日竄至中部之王村蘇家

嶮一帶周紹濂出隊鏖戰終日未獲全勝十五日添營猛攻鎗不虛發前隊之賊已損其半奈官軍以千敵萬數實懸絕自辰至午不能取勝該逆以大股圍我軍而分股繞撲中部縣城暨偏橋營壘周紹濂訶知衝圍而出急欲派隊兼顧苦於不敷分撥幸撲城之賊經守城隊伍擊斃數百人我勇亦傷亡百餘人該逆知不得逞向白水衝竄十六日至距白水二十餘里地方適魏光燾由宜川凱還抵白水縣出隊迎擊賊眾敗挫十七日魏光燾率隊追勦該逆竄富平之美原鎮高連陞敗之於窰河十八日至渭河意圖搶渡而南叅將游

永茂率水師卻之並挑奮勇夜襲賊館畧有斬馘十九日竄至王張渡孝義鎮副將黃本富亦以水師卻之夜襲賊館如前亦有擒斬二十日至孝同鎮黃本富再敗之二十一日魏光燾進駐臨潼之關山鎮高連陞進駐蒲城南鄉遂敗賊於孝義店該逆沿洛河下竄二十二日魏光燾所部馬隊由孝義埽蕩而北該逆梟水渡洛高連陞截之晉王渡值河水盛漲溺斃幾及其半僞馬元帥中鎗落水得渡者不過四五千入未渡者尙有千餘兩軍殲之殆盡二十四日楊文治率黨數千人竄踞三水之文家川紅巖河正甯之三家原一帶二

十五日賊哨擾及職田劉倬雲派營分剿文家川紅巖河各股而自率親兵策應李大有陳集賢由義陽往紅巖中途遇騎賊數百解鞍炊爨我軍乘其無備圍之生擒二十餘名斬首百餘級餘逆敗下紅巖河而派赴文家川之兩營由恆安洲斷其去路李大有陳集賢復掃蕩而來該逆計窮齊向三家原遁去李大有陳集賢跟縱追逐戰於原上逆勢不支踞堡以抗我軍進逼堡下千總胡芝益首先爬牆胸膛中礮子陣亡我軍仍猛攻不懈堡外之賊經喻兆圭賀潤蘭禦之不能近堡後路援賊則劉倬雲堵截之我軍以開花大礮向堡

內轟擊該逆遂棄堡逃走我軍追斬回目馬跛子並紅旂賊
數名斃賊黨更多餘賊悉向正甯北原敗走是日共斃賊一
千餘名三水已無賊蹤魏光燾專勦洛東之賊於二十六日
渡洛乘夜至澄城之交道嶺據報該逆踞郃陽境內廣造雲
梯圍撲郃城駐韓城之都司張雲松已派守備任效孟至郃
二十六夜該逆撲城經任效孟出擊擒斬多名奪雲梯三十
六架二十七日天明該逆聞魏軍驟至撤圍竄坊鎮二十八
日我軍分三路追至坊鎮斬殿後悍賊數十名餘賊紛紛四
竄大股回逆散處北岳莊新莊一帶我軍乘其不備直進擣

之蕭雅泗踏破北岳莊繞出賊前截賊去路總兵吳禧德率
馬隊合圍擒斬殆盡而各莊之賊回援勢甚兇猛蕭雅泗祝
鑑嵩張佑庭李國良齊集迎擊吳禧德周勝元吳國富等率
馬隊接應該逆下馬猛撲我軍竭力堵剿該逆大敗我軍追
殺至合義地方賊屍枕藉日暮收隊駐新村是晚探悉該逆
大股向西北甘井竄走二十九日追至甘井該逆已竄馮原
鎮追之不及其由百良鎮分竄一股竄近韓城經張雲松進
剿二十八日遇賊於大棗溝自卯至午該逆撲溝數次經我
軍鎗斃十餘名該逆繞由文王溝竄擾呂莊川一帶張雲松

馳往剿之該逆敗回甘井合竄馮原鎮七月初一日魏光燾率隊赴馮原中途聞逆欲踞該處爲老巢分股出掠遂令銜枚疾進先擣其巢蕭雅泗行抵橋頭街手刃悍賊數名該逆始知兵至倉皇紛竄蕭雅泗乘勢殺入馮原賊巢該逆糾黨迎拒正酣戰間各營分路馳至合力痛剿該逆星散而奔追至蝴蝶山下擒斬約以千計卽收隊駐紮該鎮而該逆輜重盡棄料必復來傳令各營嚴備初二日黎明賊果大至喊聲震天我軍豎壁以禦至巳刻始乘其懈分路出擊有黃衣賊揮眾猛撲而來我軍排列方陣鎗礮密轟該逆下馬衝突各

營官督勇奮刺鏖戰三時勢猶未決魏光燾馬隊往鈔自率親兵衝鋒各營愈奮斬黃衣賊目二名該逆大敗狂奔追至十餘里斃賊甚多我軍亦傷亡數十名該逆圖由黃龍山竄洛川以歸老巢劉端冕適奉檄至初三日該逆至白水之齊家河搶渡而過是日酉刻魏光燾追至河干值暴漲未能卽渡至初六日官軍始克畢濟該逆已由蒲城分三路西竄先是劉典慮官軍力單檄飭副將楊恆春遊擊劉德良兩營赴蒲城助剿初四日至蒲屬之京紙坊遇先鋒賊七八百騎擊之該逆敗退漫川溝東岸聚黨破姚家寨踞之楊恆春乘夜

攻克賊屍盈街初五日後股紛至楊恆春兵力太單未能進擊該逆知魏光燾阻於洛東楊劉兩營亦出三原守備空虛因以大股牽制楊恆春劉德良派回目金翥挑悍黨數百騎星夜向三原狂竄圖襲城壘幸成定康新募赴綏德之軍集而未發初六日出城卽與賊遇遂列陣迎剿劉典得報派都司余保元率親兵接應該逆以爲有備折竄富平之曹村雷村一帶魏光燾渡洛後於初八日兼程進至曹村見該逆正向紅土坡竄走卽飭吳禧德周勝元張佑庭蕭雅泗李國良祝鑑嵩等左右鈔擊自率吳國富馬隊策應將該逆截作三

起一起入山向同官一起緣山向涇陽一向耀州魏光燾飭所部分追北竄二股斬馘七八百名劉典因緘商高連陞由楊家店趨柳村初九日高連陞自率楊銘濬一營由同官赴黃堡行抵李家溝已與賊遇揮軍擊之斃其尾隊飭楊銘濬跟追探悉魏光燾追賊已至耀州遂自赴耀州面商機要料賊必竄楊家店預飭該處防營設伏待之是日高連陞所部副將賀茂林遊擊陳恆貴率洋礮隊由馬欄鎮拔行至廟灣遇賊先鋒數百騎經洋礮轟斃紅衣賊三十餘名而後股繼至賀茂林等分三路衝擊賴列陣得地未被包鈔該逆反爲

我軍所敗紛紛奔竄我軍追二十餘里該
我軍不爲少卻齊隊奮刺該逆棄糧畜芻
猛力向前追至油榨灣該逆下馬持矛誓
隊擊敗反奔由文王山向東北而去我軍
再進遇黃堡敗賊奔來我軍以鎗礮擊之
王山竄走適高連陞自耀州逐賊而至於
楊家店雇土人引由小路繞出賊前及抵
至窰渠集隊高連陞分兩路下擊該逆十
數里值大雨傾注遂駐宿土窰是夜探乘

榆坪合股十一日高連陞派隊設伏楊家店自率親兵直前
擣之賊卽敗竄將至楊家店伏兵突起該逆自知無路可逃
棄馬步戰拚命格鬪總兵彭祥勝左腿連受鎗傷猶縱橫盪
決賊已傷斃數百高連陞復壓勦而來黃毓馥從山坡兩路
殺上該逆四山亂竄其奔竄鳳凰山者經鄧玉魁斬馘無遺
連日所斃之賊不下二三千人騾馬糧食拋棄殆盡其繞竄
涇陽一股於初九日夜竄至川流甲經余保元祝鑑廷及國
子監典籍戴巽宣挑勇繞前攔截賊遂折竄涇化成定康派
隊緊追而劉倬雲派駐土橋之李大有賀潤蘭等探悉賊情

二十日馳抵涪化詢知該逆尙踞高嶺該縣知縣夏與賢派城勇導引官軍馳抵該處李大有派勇兩旁鈔殺自率隊衝入賊館該逆盡棄糧畜而奔李大有賀潤蘭余明發章凡英等跟縱追剿斃賊無算該逆仍齊隊回撲適成定康所派之隊亦至四面截殺倖免者不過數百餘名竄往方里楊恆春劉德良擊之復竄石門關何昌梓復擊之僅存數十人喻兆圭殲之而盡計此次回逆出巢萬餘回巢已不滿兩千其竄竄宜君一股六月二十一日經高連陞所部之副將向正秦擊之於轉角二十二二十三等日該逆添合另股復至圍逼

該處營壘向正秦督兵嚴守鎗子傷其右手副將楊隆昌聞警馳回援擊該逆退踞石底子追我軍會隊往剿該逆已分股四竄一由榆樹灣竄古泉一竄近宜君縣一竄半節街圍擾官軍糧局楊銘濬駐防該處卽率隊擊之於霸王村賊已敗去少頃復至對面山巔揚旂示武楊銘濬會同賀茂林鄧玉魁擊斃數十名追至十數里收隊賀茂林率洋鎗隊由古泉掃蕩至宜君該逆已聞風遠遁另股復由店頭竄至周紹濂截擊敗之該逆復糾大股踞偏橋周紹濂復剿之梨花溝再敗之同日有另股圍撲中部縣城亦經張大雄擊退此皆

董志原踞逆四出擄掠者也官軍追擊數百里十斃七八我軍亦陣亡總兵陳彥清等二十三員均經奏請

賜卹維時駐防延安之提督劉厚基於六月十九日據民人李吉祥報稱有逆匪數百人盤踞棗樹灣焚掠等情卽派田玉廣陳國珍及知縣梁以恭等率隊赴剿二十八日抵拒棗樹灣八里卽有抗拒之逆經我軍擊之敗退追至棗樹灣該逆踞寨抗拒拋石如雨我軍冒險蟻附而上立將該寨攻毀計擒斬三百餘名獲僞印一顆餘匪無一漏網訊據生擒逆首孔天喜供稱係山東人充當袁大魁僞指揮前官軍圍攻

雲巖鎮緊急乘夜冒雨逃走糾黨夥王元盛等七十餘人行至棗樹灣遇土匪李長新招集流亡共得八九百人據寨掠食印係袁大魁給發等語比經解營正法旋據清澗縣知縣趙聿灝請援卽派劉厚填田玉廣率營往應行抵延川屬之雲眼地方遇賊千餘人攻寨田玉廣出賊不意陣斬二百餘人生擒數十人餘賊敗竄清澗七月初一日劉厚填田玉廣等督隊前進行至十里鋪該逆馬步約二三千人前來接戰我軍轉戰而前斃賊二三百名未刻抵城下一面築壘一面迎敵圍城之賊退紮七里鋪城圍立解初二日卯刻劉厚填

派隊至七里鋪該逆數千前來迎拒我軍分三路進攻鏖戰數時該逆敗竄我軍追殺十餘里陣斬數百名墜崖者更眾生擒三百六名救出難民數百名逆首梁昭文奪路奔竄把總劉言凱跟追二十餘里被該逆傷其左腿田玉廣連開洋鎗將梁昭文擊斃梟其首級餘逆散竄清澗之圍遂解而署延榆綏鎮總兵劉聲集於六月十一日據黨家岔等處紳民稟報自率前營並遊擊王步雲張隆昇王守基牛玉林會同叅將王泰來劉崇慶遊擊曹正興等抵魚河十三日進逼賊巢是夜四更出隊分三路進攻黨家岔賊不及防我軍勇往

直前斬賊目數名斃賊甚夥該逆敗向寺兒溝孟家畔一帶
狂竄我軍乘勢追剿沿途斬馘頗多追至武家坡該逆大股
合隊分三路回撲劉聲集派王步雲王泰來分左右鈔襲賊
後而自率親兵猛力衝擊該逆腹背受敵向綏德米脂境內
敗遁計斬悍賊百餘名生擒亦百餘名救出難民男婦千餘
口十五日王泰來張隆昇各回防所劉聲集挑選奮勇二百
名馳赴米脂十六日出剿東路賊匪扼防竄葭州要路十八
日探報綏米交界之四十里鋪有土匪潰勇回逆萬餘人劉
聲集卽率各營用已革外委王尙清率練勇百餘名爲嚮導

黎明抵四十里鋪預令王步雲等四面埋伏自率親兵分三路進剿該逆亦分三路迎撲鏖戰約一時許四面伏兵齊起逆勢不支四路奔竄追至二十里鋪始行收隊自卯至酉擒斬不可勝計救出難民二千餘口仍率隊回防二十四日該逆大股竄踞西川等處適王泰來護餉之隊六百餘名經過該處劉聲集會同往剿二十六日行抵曹家溝探報該逆竄踞麻坪劉聲集分三路齊進砍其大旂復用連環鎗礮轟擊該逆奪路狂奔當將賊棚數十座踏毀追至青龍寨附近賊皆望風逃竄是月劉端冕駐鄜州探報左道街有回逆竄擾

令總兵甘大有副將文明章進剿比至該處賊已聞風西竄及我軍猛進該逆復列陣迎敵甘大有等分兩路夾擊斬十餘名賊仍回竄甘境二十七日復有大股至張村驛羊圈等處劉端冕於是夜四更出隊黎明抵羊圈該逆列陣迎敵我軍先以洋礮隊擊之賊不稍卻乃令步隊左右包鈔而以馬隊出賊後該逆慌亂而退我軍乘勢猛擊遂棄糧畜狂奔我軍跟蹤追剿沿途斬殺血流成渠追至張村驛該逆四散遠颺始行收隊回防時金順遵奉

諭旨剿辦北山各逆六月下旬已抵定邊七月初七日督同

總兵胡世英副都統常福馬步各營兼程南進途次接禮左營遊擊劉崇慶稟報前竄綏米之賊已會合陝軍擊退遂於十三日抵榆林將所部十三營擇於近城扼要駐紮旋據探報響水堡南路之張明梁地方有股匪三千餘名擄掠而波羅堡迤南亦有賊蹤二十四日五鼓督帶副都統常福遊擊董金春劉崇慶都司俞厚安程朝立英禮選鋒等營馬步往剿二十五日未刻抵張明梁賊眾恃險抗拒及經我軍進擊該逆翻山潰走金順令劉崇慶羅德勝赴波羅鎮駐紮自率各營赴榆林而董志原回逆忽分股竄至龔家原梅家河一

帶擄掠唐俊元喻先知等於七月十一夜四更進勦行抵梅家河見號火綿延里許人馬喧囂文明章等分兩路並進該逆出巢迎戰相持逾時天色漸曙悍賊已斃數十名遂棄糧畜向西奔竄文明章等追至龔家原該處之賊亦已西竄其另股之竄涇州者七月初旬至涇屬之孫家堡一帶擄掠經雷正綰馳往截勦擒斬頗多該逆敗竄政平值大雨未及窮追乃調總兵陳義率隊赴長武定於十七日親督各營赴政平忽報涇河北岸有回逆萬餘騎渡涇而南距長武僅二十餘里遂令陳義由馬坊溝掩旂疾進飭義字新選等營由淺

水堡循溝前往分兩路擇要埋伏飭李廣珠馬隊向前誘敵自率洋礮各隊居中接應李廣珠誘賊至距城五里之石牌地方雷正綰督馬隊回擊兩路伏兵左右包鈔賊乃大敗我軍乘勢猛擊斃悍賊三百餘名生擒二十五名追殺二十餘里該逆涉涇遠竄據生擒賊目馬雙之供稱該逆聞官軍赴政平圖乘虛襲取長武等語比經軍前將馬雙之正法其竄中部洛川另股經劉端冕高連陞擊敗後緣山遠遁旋探西溝等處復有回逆擄掠卽飭所部馳往比至該處見居民畏其兇虐避匿洞中該逆燒煙薰逼已歷三時洞中之民危甚

幸官軍至擒斬多名餘逆竄去將所熟柴草撲滅洞民始獲無恙是時成定康將赴綏德任劉典令其便道洛川助剿竄逆誠以其地北近北山西通董志爲各逆之所出沒也董志旣爲回逆老巢而北山一帶林谷深阻匪類輻輳尤防不勝防劉厚填旣於初一初二等日進解清澗之圍該逆猶踞縣南之十里鋪馬步尙數千人初四日劉厚填督隊往剿擒斬數百餘匪竄老君殿一帶劉厚填旋據清澗防營稟報賊目僞元帥鄭姓踞紮距城六十里之惠家園爲巢穴分股四出等語卽派王雲孚率衛營陳國珍率中營於十四日戌刻出

隊十五日黎明至邵家坪敗馬賊數百騎進逼惠家園賊巢分三路進攻該逆憑堡固守矢石如雨仰攻既久士卒饑乏幸知縣趙聿灝親帶民勇護送乾糧至戰所弁勇飽餐再進趙聿灝亦率文童王允暉方功燦分帶團勇助勦數時之久擊斃悍賊已多逆勢漸挫我軍乘勢上牆陳國珍趙聿灝先登弁勇數十人繼之王雲孚方功燦斬開堡門我軍一齊搶入首逆鄭姓持刀巷戰經陳國珍洋鎗擊斃搜殺二千餘人生擒一百二十三名救出難民千餘卽將輜重牲畜盡給難民而遣之訊擒賊舒有正供稱此股土匪本高姓所管高姓

被回逆殺斃卽由鄭姓管領眾約三千餘人等語訊明後一律正法全股撲滅罄盡由是各匪震恐乞撫之意遂堅有扈彰者係甘肅環縣人被回擾害無家可歸糾聚男婦夥黨約數萬人竄踞保安安定縣境四出擄掠攻劫堡寨三月內曾遞稟投誠劉厚基未測誠僞一面出示曉諭令其先繳軍械數月之久該匪黨未能自決至是復遣黨至營求撫劉厚基派員往察果出誠心扈彰偕其黨七人隨委員詣營叩謁惟其眾數萬急切難於安插劉厚基據情轉稟庫克吉泰劉典等商定一面派委署延安府知府趙維賡前任環縣知縣翁

健會同劉厚基再加察看一面據實陳奏此股既降則土匪之最眾者僅董福祥一股矣至十九日劉厚基復據宜川縣知縣余觀瑞稟報該縣燕曲堡有匪黨八九百人盤踞擄掠卽飭劉厚填率營赴剿二十日余觀瑞亦率團往會二十一日抵燕曲該匪已聞風逃竄兵勇跟蹤緊追二十三日抵延川之安家河該匪正休息造飯我軍乘其不備分途猛擊陣斃四五百名生擒三十九名訊據供稱此股係袁大魁收集夥黨勾結土匪潰勇等語劉厚填率勇緊追並帶獲匪徐天喜劉大升等指認追及於延川屬之西溝口該逆扼險以拒

劉厚填黃超羣梁得勝等鎗礮所斃不少該匪敗走我軍復追二十餘里陣斬二三百名袁大魁正狂奔未已徐天喜劉大升急奔向前袁大魁揮刀亂砍徐天喜用洋鎗擊之洞胸而死其餘黨擒斬無遺全股悉數殲除雖袁大魁真僞未可知要亦匪類之一大股也成定康至洛川探悉隆坊店頭等處復有大股回逆遂駐洛川勦辦二十六日探報賊騎由蘭臺橋竄來遂商同毛正明出隊迎擊生擒三名餘逆向嶺前折竄是夜大股麇聚龔家原成定康毛正明等於八月初一日往勦兩路進擊行抵蘭臺橋該逆大股適至成定康令各

隊穩慎進取該逆恃眾力抗殷忠廷衝入賊陣各隊繼之副將木光明總兵喻先恕左右鈔擊該逆敗竄與安社村另股合併勢仍披猖毛正明正與賊鬪見賊眾愈添因與總兵李良穆分路迎擊哨長張鴻發李必勝阮春林周大順胡維美等齊聲大呼奮力衝擊鎗礮斃賊頗多賊勢漸弱適成定康隊伍追勦而來唐俊元亦聞信率隊馳至賊遂大敗向西路紛紛竄走我軍分路追殺斃賊數百名我軍亦有傷亡日暮收隊初二日成定康毛正明率隊探勦黑水蔣村等處騎賊探悉大股尙踞雲南河蒲蘭村等處商定兩路夾擊逼賊於

蒲蘭大坑中鎗礮密轟賊無藏避之處轟斃不可勝數餘賊棄騾馬糧食越坑奔竄我軍分途追殺十餘里唐俊元復中途截之斃數十名其竄至街子河騎賊亦經劉端冕殲之無遺而正甯境內踞逆仍不時竄擾邠長三水等處二十九日黃鼎探知白吉原永樂鎮等處均有回逆擄掠督隊赴勦行抵馬家河復據探報該逆擾至施家河黃鼎令總兵官長勝遊擊朱蘭亭沿紅巖河而下以斷後路飛催徐占彪李玉春何玉超等從臥龍堡攔截自督韋占雄胡應芳周廷楨直上白吉原適遇該逆數百搶獲民粟經我軍斬殺過半攻堡之

賊乃撤圍來援當經陣斬數十名生擒十餘名該逆棄馬而逃時官長勝徐占彪等已將施家河之賊擊退追勦而來遂會合收隊比回營已三更矣旋據永樂鎮民求援黃鼎卽於八月初一日往勦該逆正攻西牛家堡不料我軍猝至揮隊掩殺堡圍立解據擒賊供稱該逆大股悉踞底廟一帶等情黃鼎卽派隊由余家堡出其前再派隊出麻原擊其左自率隊直攻底廟該逆不敢迎拒倉皇奔竄擒斬二百餘名餘逆被余家堡官軍所截前路一股誅戮殆盡麻原一股亦經陣斬百餘名殘逆向西狂竄追至距正甯縣城五里擒獲僞元

帥馬四司並小頭目數名劉倬雲駐職田賊該逆竄擾無時
七月二十七日令陳集賢率隊藏恆安洲民堡中果有回逆
千餘騎由四村馳下文家川前隊甫至恆安洲經陳集賢截
擊敗退劉倬雲得報卽派李大有往助自率親兵繼之另派
賀潤蘭由前義陽斜鈔以作夾擊之勢行抵伍家堡接喻兆
圭緘報回逆由北巖頭繞至看花宮逼近營壘等語劉倬雲
卽派賀潤蘭折趨趙家堡往應維時文家川之賊見隊伍繼
至不敢戀戰踰溝而逃看花宮之賊經喻兆圭陣斬數十名
敗賊竄鞏家花園我軍正擬收隊而正甯四村之民求援甚

切劉倬雲派陳集賢李大有分兩路並進回逆集於原上我軍直前疾擊立斃賊數百人始收隊回營八月初一日該逆由看花宮竄至平房均村一帶李大有陳集賢率隊迎擊該逆卽時竄走喻兆圭賀潤蘭率隊截之生擒十餘名該逆分途四竄又經余明發王蓋臣追及陣斬數十名餘賊向正甯逃竄於是正甯之民求援者踵至初二日劉倬雲率營由北巖赴正甯南原詢悉該處踞逆已於初一日經黃鼎擊走惟北原賊尙未退乃飭營由千家村橫出正甯縣北五里方下馬憩息突有逆騎由南原而來瞥見官軍卽策馬飛馳我軍

追之不及乃收隊駐宿該處初三日齊赴永樂原審察賊情
突遇回騎數百經我軍擊敗向三河原逃竄迭據擒賊供稱
董志原踞逆缺糧已極屢敗之後急欲投誠被潰勇戈匪阻
遏不能自主現議併力竄陝掠食等語時值秋成官軍力護
收穫不能遠離防所北山地瘠民稀各匪之搶獲更甚駐波
羅鎮之叅將羅德勝探悉五龍山有匪竊踞時出搶獲八月
初五日乘其不備經襲其巢舉火焚之賊之被擒斬者甚眾
餘逆散向西遁嗣探綏德境內忽有大股逼近州城劉聲集
兵力單薄不敷調遣金順因督常福及副都統永慶依精阿

副將萬金榮遊擊李宏林李考祥李金春李大勝劉崇慶劉宏發熊履山胡有勝等馬步各隊並英禮各營於十三日赴綏德胡世英亦力疾前往詢知回土各逆共有三四萬人劉聲集曾經進剿頗有斬獲近城尙無賊蹤現屯踞七十里外之三皇崩三眼泉雙廟灣等處十六日進紮沙灘十七日至三皇崩而該處賊巢已空入巢察看竈火尙溫卽催令跟蹤追剿甫行十餘里遙見前面馬步約五六百人其行甚緩料有奸謀乃令且追且探至距三眼泉不遠溝嶺愈多地勢奇險路下有大川一道可以埋伏金順益疑之遂留萬金榮李

考祥李大勝劉宏發及英左英右禮前禮中四營扼紫川口
並於山邊虛立旗幟然後督軍前進熊履山跟追騎賊甫過
三眼泉溝西卽見股逆約有二萬層層排列所追之賊回身
抗拒火器對轟勝負未判忽有悍賊數千身穿黃藍號衣從
兩翼鈔來常福卽飭永慶依精阿分頭迎擊自率戈什親兵
策應斃賊數十名無奈賊黨太多我軍勢漸不支金順胡世
英趕到胡世英親督洋鎗上前密轟賊勢稍卻而山下之賊
忽從兩旁圍裹而來李宏林董金春乃分路仰攻逆眾憑高
以拒正相持間後路喊聲又起川內湧出逆黨七八千人斷

我後路經萬金榮奮力堵禦該逆退而復進金順激勵將弁加倍奮擊呼聲震天立斃悍賊多名適李宏林等搶上山頭將賊壓下賊遂驚亂我軍乘勢力衝該逆向後奔潰自相踐踏我軍一面進剿一面焚巢更飛調胡有勝馬隊接應萬金榮等見面前火起知己得手遂併力向前斃賊數百名該逆見巢已被焚向西敗潰我軍乘勢追殺該逆冒煙突火狂奔追過雙廟灣該逆入巢不及紛紛西竄我軍躡跡緊追忽周家嶮出另股三千餘人蜂擁而來我軍未及接戰該逆被敗賊衝動自相驚亂向後倒奔我軍乘之將周家嶮雙廟灣等

處賊巢十餘座全行踏燬巢逆搜殺無遺直追至安定北界
天色已晚始行收隊萬金榮等回至雙湖峪駐紮時已四更
是役斃賊二千有奇我軍亦陣亡三十餘人聞成定康將至
金順仍率各營回駐榆林維時胡世英所部叅將王泰來縱
容勇丁騷擾漫無約束此次復不遵調經金順正法軍前適
前劉典叅奏胡世英所奉

上諭亦至胡世英遂將統領交卸俟被叅各節查辦完竣再
行回籍劉厚塹等自西溝口收隊回延川據報杜家腰嶮有
賊竄擾二十六日進剿該逆敗竄王家河二十八日劉厚塹

追及之陣斬二百餘名生擒三十七名訊據王有勝李老八等供稱此股賊目袁本尊亦係捻匪餘黨句結土匪潰勇圖踞甘境金頂山因無糧出掠至此等語當經軍前正法並將餘匪搜殺淨盡自是捻匪之在陝者次第殲除已多八月十一日劉端冕探悉董志原逆竄至鄜州之羊圈侯家莊棗落原等處卽派所部分左右兩路前進自督劉仕祁居中策應飭都司楊永松先率馬隊衝陣該逆敗竄我軍追至清澗廟該逆列陣抵禦劉端冕督勇用鎗礮環攻火蛋火箭連接施放斃賊不少內有紅衣賊目一名餘賊向西狂竄我軍追過

張家溝該逆步隊已盡騎賊向張村驛飛奔據生擒楊三娃何虎娃等供稱回首馬新元由董志移踞廣城需糧更緊等語十九日探悉回騎由張村驛竄踞鄜屬之王樂村卽於是日申刻率隊抵鉗兒村稍資休息四更後派所部隊伍繞赴王樂村西北扼賊竄往柳池之路派馬隊繞伏正西約示不許放走一人劉端冕自督隊伍由東南進擊五更抵該處卽將四圍分布該逆正在酣睡我軍四面殺入該逆狂走不能出圍悉就誅夷無一漏網而涇州告急甚迫黃鼎率隊赴援會商雷正綰於初八日夜四更分道馳擊該逆已先偵知卽

於是夜遁去僅馬賊數百在涇河川游弋我軍上下鈔擊斬
數十名餘賊敗走因雨大未能進追十八日長武縣復以該
逆竄擾相公鎮乞援黃鼎卽於是夜往鞏初更後行至二廠
裏接雷正綰緘報回逆馬步數萬蔓延長武涇州地境縱橫
七八十里攻堡割粟並圍攻審店營壘等情黃鼎漏夜遄征
十九日辰刻抵長武適回逆數千正與雷軍相持於五里鋪
黃鼎由右路進擊商請雷正綰由左逼剿該逆之星散擄糧
者收集一路退踞十五里鋪一齊回撲經我軍鎗礮迭轟斃
先鋒賊數百人該逆折向左路衝突雷正綰所部擊退各路

悍逆整隊壓勦追過三十里鋪見涇河川上下廟頭三字坡
窰店黑河川一帶飛塵蔽天騎賊之後步賊林立一望無際
黃鼎列陣以待該逆以我軍深入料必難於取勝分馬隊數
千抗拒雷軍以馬隊萬餘將黃鼎隊伍包裹以步隊數千衝
突呼聲震天黃鼎嚴飭各營屹立不動洋礮隊坐地以待該
逆愈逼愈近相距數十步以馬隊猛撲我軍鎗礮齊發急如
掣電立斃悍賊數百名乘勢分左右猛進營哨官下馬持矛
身先士卒衝入賊陣後隊列方陣緊隨之而以馬隊接應黃
鼎亦親督猛衝斃賊千餘我軍亦傷亡不少該逆見左路兵

單齊力向左黃鼎見其勢重申令所部方戰有回顧者斬以
徇韋占雄持旂衝陣斃賊數名李玉春黃虎臣等橫貫賊陣
十盪十決該逆猶拚命堅拒我軍勢幾不支黃鼎手刃退怯
數名親督衝入賊陣立斃僞元帥馬長勝並紅衣賊目十餘
名各勇齊力奮擊將賊陣衝爲兩段賊遂大敗分竄胡應芳
韋占雄督隊追殺無不手刃數賊計已斃之賊千餘名復飭
黃虎臣馬隊繞出賊前斷其去路雷正綰亦由黑河川壓勦
而來三面夾擊賊愈不支抱頭鼠竄我軍追斬尤多該逆自
相踐踏屍骸遍野情急渡涇以竄淹沒亦多黃鼎捕殺至未

刻始行收隊是役斃賊三千餘名生擒馬五等一百餘名我軍陣亡勇丁二十五名受傷一百六十餘名以寡敵眾卒獲大捷洵血戰也訊據擒賊供稱馬正和前次受傷已成廢疾不能督隊擇陳瞎子爲大元帥回黨馬生彥楊文治白彥虎等由正甯竄三水該酋自率大隊圖破窰店營壘踞涇州長武爲老巢等語訊明後概行正法其由正甯竄三水之賊注意攻破職田營壘十八日辰刻騎賊至北嶺頭經我軍斬馘多名向四村奔竄賀潤蘭尾追上原該逆回撲復斃多名餘賊敗竄娘娘廟劉倬雲遙見底廟一帶煙火大起知有伏賊

突至卽督周玉堂由右往截賊去路該逆拚命衝撲周玉堂下馬持矛極力捍勦斬先鋒賊十餘名餘賊四竄忽有千餘騎由郭家村來援劉倬雲飛調李大有賀潤蘭由中路進擊斃賊已多乃該逆兇悍異常進抗如故余明發奮威衝殺苦戰逾時賊乃敗遁追至底廟收隊余明發手刃數賊亦自中賊矛數傷跨馬回營至二十日因傷重不能督隊勉令親兵扶掖上馬已騎坐不穩下馬氣喘口呼負負而死蓋其忠勇性成志氣激昂素如此也收隊復訊據擒賊供稱回逆缺糧已極誓破職田營壘以便內竄擄掠馬生彥等湊集三萬金

購潰勇戈匪八千人包破營壘等語二十日回騎復竄至北
嶺我軍方出隊往擊俄而先鋒賊已至營前均經我軍擊退
斬殺多名該逆大股麤集正甯之四村原其眾約二三萬圍
攻民堡李大有陳集賢率隊過溝分兩路並進相隔十餘里
陳集賢與賊鏖戰甚久斃賊不少奈該逆愈聚愈多李大有
與另股相持各不能顧兩處均被圍裹李大有火药用盡僅
持刀矛而該逆鎗子如雨溝南復有另股劉倬雲被其牽制
迨經擊退往援見李大有尙困圍中我軍奮力齊突斃賊多
名賊勢稍退少選復行回撲李大有憤甚持矛銳進連中賊

鎗登時陣亡陳集賢身受十餘傷猶督陣不已劉倬雲見天色已暮遂令收隊是役斃賊千餘我軍陣亡二百餘名苦戰終日兵單受挫良可憫惜二十一日白彥虎率悍黨萬餘進逼職田劉倬雲選奮勇十餘名出壘誘戰俟其逼近以鎗礮密轟賊敗而退是夜分路來襲比經我軍擊退而該逆仍伏窰洞及粟田中我軍挑勇敢百餘先之以火箭火蛋賊黨大亂我軍乘之斬殺多名賊乃宵遁二十二日亦有賊近營經我軍擊敗二十三日劉倬雲追剿崔家河一帶悍逆適黃鼎由長武回邠途次接劉倬雲緘二十二日已至世店二十三

日探悉大股踞焦村卽率隊以往行至義橋子見逆騎擄掠秋糧揮隊急擊該逆敗回焦村黃鼎飭步隊伏左右破堡中令馬隊往來馳騁該逆結陣來衝馬隊誘令深入伏兵齊起斃其先鋒百餘賊遂返奔追至數里忽有二三千騎由湫坡頭前來黃鼎分三路進擊相持逾時胡應芳督馬隊衝入賊陣各隊繼之賊遂大敗楊文治率黨殿後經劉心灼黃虎臣環擊棄馬越溝而逃追近看花宮另有賊騎數千會合敗賊回抗劉倬雲適至兩面夾擊乃大敗而遁會追至文家川前阻深溝逼入溝中兩路截殺賊屍盈溝餘賊向正甯狂竄日

暮始各收隊其竄擾土橋另股經知府洪惟善於二十二
十三等日往剿頗有擒斬其賊亦敗竄正甯二十四日黃鼎
劉倬雲向四村會剿該逆已悉歸董志原此次長武三水苦
戰併案奏報均蒙從優

獎卹李大有余明發二員蒙

恩予諡其歷年從戎戰蹟奉

旨交史館立傳並與前三月內邠州陣亡之提督譚玉龍於
三水建祠合祀可謂非常曠典矣軍士暴骨實

朝廷所深憫特無知犬羊鴟張日肆爲斧鉞所必加亦不得

已之勢也乃董志原回逆復分大股竄至涇河十六日雷正
綰率隊往剿陣斬百餘名該逆向政平竄去正追剿間忽有
騎賊竄至彭公堡雷正綰回軍疾擊斬殺殆盡並斃僞副帥
劉蒼一名生擒二十餘名訊據供稱此次分三股出竄一向
三水一向涇州一向長武意圖盤踞涇長等語十七日雷正
綰設伏原畔午後賊騎數萬紛至涇河新莊政平一帶盤踞
並未出戰十八日仍前布列申刻該逆忽趨上游乃緘請黃
鼎夤夜會剿至二更時果見密店一帶火光燭天十九日該
逆果出大股來撲雷正綰正督陳義雷聲遠等與賊相持適

黃鼎率隊亦至遂分兩路進擊斃賊甚多追至洪家鋪該逆齊黨回撲鏖戰逾時乃偏向黃軍猛衝黃鼎屹立不動雷正綰刺斜鈔出賊後賊遂大亂我軍會合衝殺追至范家河斃賊數千名生擒百餘名副將浦本祥深入賊陣被圍力竭陣亡奏蒙

賜卹北山各匪於七月十六十七等日逼近綏德州城東南門外列陣環攻署知州胡有志督團堵禦開放大礮賊始退去仍蔓延四鄉擄掠十九日胡有志督團向尉溝鄧家樓一帶擊斃賊敗向毛家山竄走二十一二十四等日仍竄近州

城二十五日聚屯紫柏村胡有志激勵團勇於四更後襲攻
並於兩山設伏該匪敗走伏兵齊起斃賊甚多追至馬家坪
毛家山餘匪向王家溝竄匿八月初三日復至城下攻撲歷
兩晝夜經胡有志擊退初六日又至適劉聲集率隊探踪而
來與團勇夾擊城圍遂解初十日劉聲集率署都司王克勝
等將五羊泉蘇家梁踞逆擊退該匪復由七里鋪襲攻州城
十一日經劉聲集擊敗向西川竄走十二日復有另股至城
外之落雁溝劉聲集往勦擒斬尤多據生擒賊供稱此股土
匪係高姓賊目管帶共六十餘營安化固原人居多老巢在

西川小溝一帶等語維時成定康已由洛川起行不日將至
劉厚基亦奉

旨接署延榆綏鎮總兵劉聲集胡有志均將計日交卸適金
順率馬步各營至綏德連日與劉聲集合擊擒斬不可勝計
餘匪遂分途遠竄其駐防中部之周紹濂一軍於二十八日
探悉回逆竄至蘇家峴分股竄及鞍子頭卽率所部往剿三
十日抵蘇家峴該逆正圍攻陶家寨堡而以騎賊列陣堡前
我軍三路齊進該逆敗退卡內與攻寨之賊四面扼卡抗拒
我軍鎗礮密速逆不能堪大敗向店頭飛竄董玉春唐俊元

奉派至棗道河亦於三十日將賊勦敗賊向北路狂竄雷正
綰駐軍密店於九月初一日探悉靈臺之火星廟百里鎮等
處被回逆踞擾卽率隊向前鈔擊賊敗竄西屯初四日進至
西屯該逆列隊抗拒自辰至未斃賊二百餘名該逆敗退近
村雷正綰飭陳義伏兵要隘派副將郭萬春鍾本起都司余
新發等接應自率各營向前誘敵且戰且退該逆緊躡而來
號聲一發三面齊起該逆退走不及被斬二百餘名賊遂急
奔涇河川調集馮鈞幅大股由瓦雲驛竄至初六日分兩路
來襲復經雷正綰擊敗初七日雷正綰正與賊接仗適黃鼎

由黑河川埽蕩而來賊見官軍厚集紛紛敗走是晚探該逆竄踞上良地方初十日各以馬隊馳勦分派步隊夾擊行抵上良該逆正分攻民堡經我軍馬隊截作兩橛該逆猶敢回撲俄而步隊踵至甫一交鋒賊卽敗走共斃五六百名生擒七十餘名追至娘娘廟該逆由崇信川向老巢逸去其竄至甘泉一股眾約萬餘黃超羣擊之於麻子街傷斃甚多賊向宜君奔竄據難民供稱僞元帥余月彪已中洋鎗伏誅等語是時宜川縣境復有賊騎竄擾經知縣余觀瑞督率民團及撫標前營擊之於十一十二十三等日各有擒斬並生擒賊

目馬虎兒正法追至北原探知該逆大隊萃於絳桃村並於
四路設伏以待余觀瑞未敢深入飛稟請援左
逆後自連鎮入
勦平捻

觀蒙

賜紫禁城騎馬加太子太保銜奉

上諭督率所部回陝是月十八日已抵河南孟縣因接渡不
能迅速飭先渡之卓勝一軍先行入關庫克吉泰劉典等因
咨請檄令由潼關取道韓城徑赴宜川一面飭劉端冕吳士
邁先往援勦其土匪扈彰一股察其投誠尙係實心卽委刑

部主事周瑞松同知魯學浩等攜帶扈彰赴延安府會商知
府趙維賡擇地安插周瑞松派委訓導翁其森守備李世恩
等查明人數籍貫除陳海鵬一股心懷疑忌歸併董幅祥外
其所管小頭目徐尙泰梁可彩管奉征等十餘人無不甘心
歸順九月初四日扈彰自率六千餘人移駐安定之蟠龍寨
徐尙泰等率一萬五千餘人移駐安寨之上川均先呈齋清
冊繳送器械周瑞松委員清查其籍隸安塞清澗大荔朝邑
等縣有家可歸者給資令其回籍共遣散五千餘人又資遣
甯夏千餘人此外一萬五千餘人皆籍隸環縣鎮原一帶回

氛未靖不能回籍令分起帶領赴延周瑞松擬於膚施之北川及甘泉延長宜川鄜州洛川中部等處酌量安插按日籌撥糧食並籌備耕牛籽種令其開墾荒地俟軍務告竣各令回籍而扈彰之股眾以安成定康至綏德接受州篆其時滋擾州境各匪已經劉聲集金順勦敗遠竄至九月初七日聞米脂縣城防緊急卽會同劉聲集率隊以往比抵米脂該逆已竄周家寨曹家溝等處初八日分路進勦行抵秀側梁該逆復紛紛竄走行至張家寨逆眾千餘人力抗劉聲集成定康合力猛攻該逆敗竄曹家溝忽報蕭家寨有賊千餘鈔襲

後路劉聲集飭張隆昇牛玉林王守基等迎擊自率隊伍追
勦敗匪成定康由左路鈔擊比至曹家溝伏賊將劉聲集團
裏劉聲集手刃數賊賊騎始退我軍步隊趕至兩路夾擊該
逆紛紛敗走約追行四五里忽步賊數千人由溝中突出劉
聲集首先衝陣成定康繼之賊大敗向雙湖峪奔竄時張隆
昇等亦將蕭家寨賊勦敗追殺數十里劉聲集乃回駐米脂
成定康亦回綏德行抵大川里忽報賊眾數萬乘虛圖襲綏
城已至近城西南成定康於午刻回抵州城率隊偃旂息鼓
由韓蘄王故里爬山繞出賊後殷忠廷由右戴光明由左喻

先恕由中而親督隊伍接應先將騎賊截殺該逆大敗我軍乘勢追殺忽報蒲家圪塔有賊數千由左路而來成定康正往援戴光明一時接應不暇適同知陳瑞芝已革同知沈際清由城率隊前來助剿連用開花大礮轟擊戴光明亦乘勢衝殺十餘里是日斃賊數百名生擒百餘名訊據擒賊供稱賊目高僞大帥於八月二十五日敗後由老君殿逃竄三皇峯冒寒受驚呼號數日已伏冥誅所部四五萬人已歸李登管轄並賊目李雙良張萬飛田老四辛滿城盧僞大帥等糾合董幅祥悍黨妄圖乘虛攻破綏德以便東竄擄掠今日係

李雙良一股雖已大敗明日必來等語初十日黎明該逆果分路來撲我軍連放開花大礮該逆不敢逼近我軍於午後出擊該逆敗竄十一日該逆復圍攻村莊成定康於二更後挑奮勇以往各以火蛋洋鎗突前施放該逆連夜向三皇崩老巢奔竄九月二十一日有回騎數百竄至洛川之葫蘆河守將劉竹田於二十二夜直擣其巢頗有斬馘二十九日逆黨數千竄至甘泉之勞山分股擾及麻子街副將劉仕祁率隊至老人倉擊之該逆由原路竄走少頃大股復由麻子街至劉仕祁留隊三成守營派後哨列隊河溝以防後路自率

隊七成出擊正酣戰間忽有另股萬餘騎由對岸衝至駱駝
原將後哨圍裏劉仕祁一面請援一面回救而山後各逆又
將劉仕祁圍裏縱橫血戰力竭陣亡所部叅將曾恆勝遊擊
魯桂德把總謝文泰同歿於陣弁勇陣亡七十餘名是日劉
端冕探悉大股竄至鄜州城北之劉家岔卽率中後兩營往
剿中途得劉仕祁急報卽令喻先知往援行至道左鋪見該
逆正攻營壘麾隊衝殺該逆解圍而遁遂急往劉仕祁戰所
則已無及劉端冕於劉家岔獲勝後追剿至麻子街擊其後
隊畧有擒斬據賊供稱此股係余馬兩偽帥率眾五萬分作

三股一攻鄜州一竄延安一竄宜川等語劉端冕暫留後營駐道左鋪自率中營回鄜城十月初二日回逆大股分竄開撫鎮廂西鎮馬蹄莊舊縣等處分防舊縣之總兵凌默發堅守堡城逆騎遂竄至牛武鎮將趨鄜州劉端冕聞報飛調道左鋪之左後兩營準備迎敵一面督中前兩營及馬隊赴鄜截勦行十餘里卽遇騎賊數千擊之而卻追近牛武鎮該逆大股列陣平原我軍申巖進勦賊不能勝向英汪鎮狂竄劉端冕率隊回鄜該逆由英汪鎮竄至洛川之交口河周紹濂率中後兩營馳赴鞍子頭會合左營扼之交口敗之賊分兩

股遁去一竄洛川東北之樂安金牌草地一帶圍攻民堡適吳士邁先日至洛川十月初四日分四路進剿其樂安一寨已先日被該逆攻踞副將劉竹田往攻之該逆由北門竄去旋復回拒劉竹田擊之而卻向北竄走謝盛柑余清勝等至金牌該逆解圍北竄李耀卿抵草地該逆正攻民寨各處敗賊併歸之皆爲李耀卿所敗旣而各路獲勝之軍及洛川知縣王浩鄜州州判周貴庠俱至四面夾擊該逆大敗由舊縣竄去追至田家村適報東鄉有回騎攻寨遂令收隊回援而東鄉槐柏鎮塔子坪五十村童張彭溪北頃南頃之民同至

求援吳士邁留邱時成馬隊及劉竹田鎮西營防北路自率所部於初四日赴東鄉傳令二更造飯三更出隊維時總兵朱德樹知縣張遂生亦率營至遂分三路進剿各獲大捷共斃賊二千有奇生擒四十三名獲騾馬千餘匹當將糧食耕牛給還難民其由吉子嶮退竄之賊周紹濂分派所部於初七日由石家峴阿當寨古樓村等處進擊斃賊三百餘名會雪勢太勁山路凝滑未便窮追同時董志原回首馮阿渾郭阿渾張萬寶馬正和馬長順馬文舉等於十月初一日竄至隴州楊家河一帶連亙四五十里初三日直逼城下知府喻

步蓮率義勝三營截擊該逆且戰且走分爲兩股一股萬餘人西走曹家灣折竄州南白家河朝天坡等處一股七八千人東走折竄州南蘇家灣八渡等處悍騎駛至距汧陽二十里之寇家河而隴城之南尙紛至未已張岳齡慮賊由新集併犯大灣嶺派叅將胡弼武馳赴隴頭自督各營扼剿於寇家河初五日八渡之賊擾至寶雞之縣頭鎮初六日魏光燾率馬步七營赴汧陽會同張岳齡於初七日出隊行至草碧灘遇賊騎擊之反奔忽大雨如注遂收隊暫駐是日李輝武亦率營至新街值大雪封塗初八日探報回逆東趨仍率隊

本頁原缺

本頁原缺

我軍奮勇排刺該逆敗近河岸猶敢回抗升奇兩營協力奮擊始大敗而走追至王村川逆酋立馬橫刀嗾黨死鬪魏光燾飭總兵熊道濱叅將王正和由小路鈔出賊後叅將何昌梓由大路直擊賊前兩面夾攻遊擊魏紀鋈斬賊酋一名該逆驚駭敗潰追殺三十里日暮始行收隊是役斃賊二千有奇生擒三百七十五名所棄之糧塞道任窮民收取訊據擒賊供稱該逆聞大軍十萬西來亟圖廣擄糧食爲固守計等語自有此挫該逆之糧益乏在事出力及陣亡員弁均經奏請

獎卹詎該逆隴州敗後復竄鄜州袁家寨開撫鎮廂西鎮等處劉端冕率所部及鎮西營馳赴舊縣初十日大雪迷漫頃刻盈尺我軍乘夜進攻十一日天明抵袁家寨該逆倉猝無備立斬百餘騎餘賊因雪封山徑往往顛蹶官軍感之得脫者皆東趨適遇右營鎮西營鎗礮齊轟折損更多遠竄開撫鎮是夜收隊駐袁家寨四鼓出隊十二日黎明至開撫鎮鏖戰三時斬四五百級生擒羅平兒等四十七名賊向屈家灣英汪鎮敗走劉端冕慮其由勞山道左鋪麻子街舊路歸巢飭各營速回防所十四日果至道左鋪麻子街十五十六等

日防軍截而剋之擒斬共計千餘據擒賊供稱回首楊文治馬生彥等擬破韓城作巢穴聞大軍自同州來遂決計西竄歸巢十二日開撫鎮之戰楊文治左脅中礮子傷未知死活等語該逆此次大股出竄仍未得償其所欲而北山一帶土匪自扈彰一股投誠後董福祥李登等股眾尙十餘萬游勇潰卒附之者亦數千四出竄擾劉厚基由延安赴榆林鎮總兵任行抵清澗聞該匪圍攻該縣民寨勢甚猖獗九月二十五日正圍攻師家寨甚急卽派隊分道馳援斃匪二三百名追過一山大股紛至復派隊分三路齊進自督馬隊繼之縱

橫鈔殺賊屍遍野追殺十餘里共斃賊千餘生擒三百餘名
訊據匪目李玉青金貴保供稱此股匪首爲董幅祥所統之
李雙良李登均甘肅固原州人等語是夜探報另股在九里
山掠食敗匪圖與之合劉厚基卽飭各營向九里山進剿二
十七日黎明抵奧林寺分派步隊一由山路繞賊後一直前
迎擊而以馬隊繼之該匪向前抗拒我軍堅持不動約一時
許劉厚基度繞賊後之隊已至親督馬步奮擊正鏖戰間陣
後鎗礮大震匪眾倉皇紛竄官軍四面縱擊斬千餘名生擒
百餘名追殺二十餘里始行收隊二十八二十九等日董幅

祥李登二匪句結回首馬天喜突犯綏德州城成定康密率所部伏於薛家寨十月初一日大股驟至成定康出其不意揮所部三面截擊賊屍枕藉生擒馬天喜等百餘名殺斃以數千計奇捷實出於意外也是月十三日

欽差大臣督辦陝甘軍務左 至陝西省城劉典亦先自三原晉省甘肅提督高連陞署漢中鎮總兵李輝武道員黃鼎魏光燾各自防所來謁妥商機要乃以高連陞一軍進駐廟莊楊家店一帶周紹濂一軍分營進紮雙柳樹魏光燾一軍由張村驛進王家角以漸達慶陽劉端冕一軍仍駐鄜州

甘泉以扼東西關鍵調吳士邁全軍赴鳳翔與黃鼎邠州之軍張岳齡喻步蓮汧隴之軍李輝武寶雞之軍相聯絡復調步隊兩營馬隊八營赴鳳翔又調郭運昌所部卓勝馬步八營由同州韓城赴宜川可以進延長郭運昌暴得寒疾現今提督蔡光武代領其眾劉松山一軍現在洛陽整理尙須時日令其由茅津渡河而北入山西乘冰橋赴陝自統親兵一營後路五營吉林馬隊三起結營西安城西俟河東餉到再相緩急調遣一面具疏陳報時金順一軍尙駐榆林於初一日據探報魚河堡西有馬賊竄至卽於初二日五更率馬步

各營往剿初三日渡無定河賊已遠遁初四日回榆林旋據
綏德州稟報該州有回土各匪十數萬竄犯州境已設伏斬
馘數千等語正擬親赴綏德忽據駐波羅鎮之叅將羅德勝
飛報懷遠縣西南之威武堡油坊頭水地灣等處有大股踞
匪圖窺榆林又探報邊外之爛泥河已有賊蹤等情十二日
確探油坊頭之匪已於天路峴清風寺五龍山等處節節屯
踞而劉厚基已帶步隊援綏德金順於十三日黎明率馬步
往油坊頭行抵響水堡探知該處西山有馬步賊五六千卽
令步隊進剿而以馬隊包鈔及步隊交鋒馬隊忽自後衝擊

該匪大敗而遁追殺至韭菜溝斃匪三百餘名乃收隊駐波羅十四日進剿五龍山該匪糾大股負嶠眾約二萬金順令遊擊胡有勝先以馬隊誘敵而以步隊各營站對面山巔密施鎗礮該匪果下山來撲當斃匪首多名其陣遂亂金順見機有可乘揮各軍乘勢衝入喊聲震地步隊亦下山鈔擊賊後該匪潰敗自相踐踏金順復親督各營分三路沿山追殺常福帶馬隊由大路溝內而進追剿四十餘里直至清風寺將五龍山天路峯一帶賊巢十數處全行踏毀計斃賊一千七八百名生擒數十名救出難民甚多訊據擒賊供稱董李

二逆句結西回欲分道東竄等語遂收隊駐五龍山該匪連夜西竄十五日回駐波羅鎮十六日擬由波羅之北渡河出邊值河冰初結中流未合乃回榆林時綏德之賊遠竄劉厚基亦已到榆十八日遂率隊出邊一面飛咨綏遠城將軍定安及晉撫鄭敦謹飭沿河各軍加意防範是日酉刻追至大李之兒漢地方詢據難民供稱該匪馬步約七八千十七夜駐紮該處聞官軍出關遂向東北竄走乃令各軍飽餐連夜跟踪追剿十九日黎明至禿尾河遙見東岸金雞灘有馬賊千餘人遂將步隊排列令常福率馬隊從上游渡河該匪直

前迎拒金順督步隊忍寒裸涉擁登東岸該匪不敢拒戰向
東北狂竄我軍尾追數十里擒斬三百餘名據供稱此股回
逆係平涼一帶土回僞帥胡姓所管圖竄神木府谷等處昨
因官軍進剿分爲兩股一股已向西北新廟灘等語我軍因
暫駐延免兒免灘再探西北果有賊踪卽於二更令常福分
率馬步以往金順親督馬步追東北之賊已刻至大喇嘛廟
灘據探報沙磧伏賊甚多乃帶馬隊前進步隊繼之該逆下
馬持矛齊黨猛刺我軍亦下馬迎擊均有傷亡萬金榮李考
祥步隊趕到一擁而上馬賊向北狂奔步賊悉被誅戮進至

大小伯當地方天色已晚是日斃賊二三百名常福等追至新廟灘該逆毫無準備亦經我軍殺斃數百名餘賊悉向西竄二更後收隊會紮大喇嘛廟灘二十一日據留守營壘之遊擊李大勝專弁報稱探得魚河堡大小鹽灣有賊數萬盤踞並有馬賊千餘向葭州竄去等情乃收隊回援並奏請敕下張曜一軍兼程赴榆再

敕撥凱撤之吉林黑龍江馬隊一二千名來榆會剿一面派勇確探據報大小鹽灣係李雙良黨眾其竄入小川溝馬步約四五千已由通秦砦東向葭州卽令湖南綏甯營遊擊李

考祥分帶四營於二十六日五更前往二十七日金順親督各營繼進二十八日至魚河堡途次探知鹽灣踞逆已連夜西竄忽報邊外回逆仍將乘虛回竄神木府谷卽緘知成定康助勦葭州金順仍回榆林李考祥行抵朱官砦探知大股盤踞陳家隴卽率營進擊及抵該處賊已宵遁追及於關山峴該逆鳴號整隊李考祥督營前進地勢狹隘賊眾未及成列我軍更番迭進賊勢不支卽時敗退我軍乘勢掩殺十餘里直至黃家梁收隊計斃賊五六百名次日跟蹤追勦三十日五更由蔡家老莊拔隊行三十里至金雞河探悉大股屯

踞張家坪遂分三路嚴陣而進一擁齊上刀矛交錯賊仍潰退追殺二十餘里直至小川溝口計斃賊八九百名我軍亦傷亡三十餘名葭境已無賊蹤其延安東北一帶時有土匪竄擾十月十二日劉厚填及周瑞松詢知賊圍劉家寨是日由府城拔隊行八十里抵何家寨卽於五鼓潛師疾進至劉家溝口遇賊奪其大旂再行里許有賊二三百名列隊川口立斬數十級生擒匪黨呂興福等七名劉家寨之圍遂解乘勝而進行過一山遇騎賊五六百名迎戰黃超羣陳振贊等躍馬陷陣立斬賊目一名而奪其馬訊擒賊知爲僞營官李

霸四川潰卒也羣賊喪膽鼠竄我軍長驅疾進復遇賊六七千礮隊分起擊之斃騎賊五名餘賊皆潰復整隊壓之山險路窄該匪自相擁擠多墜死溝中計共斃三百餘名生擒數十名餘賊遁回定邊縣新城老巢成定康自襲攻竄匪大獲奇捷後雙湖峪三皇峯老巢之賊移踞周家哈李家河兩處時分股竄擾清澗米脂縣境十月二十六二十七等日成定康率各營進駐綏德吳堡交界之義合鎮賊望風而竄成定康以城防緊要仍回綏德州城二十九日據署吳堡縣知縣呂懋勛稟報該縣之霍家溝應牛寨被賊攻陷時成定康有

疾飭陳瑞芝率各營由義合進剿十一月初一日夜抵應牛寨從寨後斬關而入賊倉皇出走各營挺矛攢刺斃賊極多初二日黎明乘勝進圍霍家溝亦一鼓而下凡此皆北山捻土各匪也至甘泉鄜州地居北路之中爲董志原回逆東西奔竄衝要十月三十日有回逆六七千由高家哨靈溝突至甘泉縣城駐甘泉之副將喻先知憑城守禦鎗礮轟擊賊卽引去十一月初一日黎明復至喻先知出城擊之賊仍敗卻少頃大股虜至喻先知收隊回城一面馳告劉端冕該逆羣集城下呼噪攻撲副將喻經魁黎思齊周茂林率弁勇嚴守

堞口鎗礮不輟斃賊實已不少悍賊仍冒死攀梯或頂版以
升及堞口輒被砍下賊氣大阻初二日黎明劉端冕率馬步
夾河馳至分左右恣殺而進賊驚駭狂奔喻先知亦開北門
出截之三路併力窮追至高家哨乃令收隊是役斃賊七八
百名生擒王虎兒等二十一名餘賊分竄洛川白水澄城地
界適魏光燾由鄜州行至蒲城尋蹤掩擊提督蔡光武亦奉
檄率卓勝軍馬步由韓城出宜川兩路夾擊該逆大憝從澄
城雷原鎮遁去另股回逆同時犯邠州麟遊遂及汧隴十一
月初四日騎賊數百竄至七里灣黃鼎飭所部新捷營迎勦

千總張吉珍陣亡賊勢驕甚適防城隊伍踵至該逆卽向南竄及黃鼎追至雷家堡則已由亭口竄去其竄擾汧陽一股經張岳齡率所部擊之黃蒿灣斬紅衣賊目並賊黨多名賊遂遠竄是時劉松山老湘全軍已渡茅津抵平陽左 令其駐紮河西以固晉防奏請

敕宋慶由太原北趨催張曜由河保入榆林金順因邊外回逆勢將東竄卽於初二日率所部由榆林取道高家堡往剿初七日抵神木探悉竄擾蒙地宮堡一帶之賊聞官軍至神木已向北逸去當飭湊就乾糧出邊進剿旋據米脂令張守

基葭州牧何福奎飛稟有賊過無定河滋擾葭米地境並探報榆林之小川口亦有游騎遂於初八日回軍援剿星夜疾馳旋據探報該逆已出葭米境外正擬窮追痛剿忽據駐波羅鎮之羅德勝稟報回土各匪東竄邊馬直至城下又探報邊外回逆竄至府谷邊外之麻地溝金順念河冰已合府谷尤關緊要乃飭禮左營劉崇慶往助波羅卽於二十七日親督各營直趨府谷成定康自官軍連破應牛寨霍家溝後其疾已愈亦率隊搜剿擒斬匪目張萬雲匪目張登詣陳瑞芝軍前乞降亦已准其自新分別留遣遂於十一月初八日進

攻陳家鵑遙見匪眾千餘攻劉家寨甚急卽分三路往援成
定康及喻先恕由中路先進被賊圍裏塵戰久之適右路隊
伍至截其去路寨民亦持械出擊賊馳而左復遇左路隊伍
官軍三路齊擊賊屍滿坑僅存一賊目同十餘騎衝出餘賊
擒斬無遺訊據生擒賊供逸出之賊卽辛滿城曾約張萬飛
由義合鎮內竄等語旣而探之張萬飛聞辛逆已敗改由義
合鎮南出竄旋陷雷家寨其地距州城已七十里十一日辰
刻成定康率師追之行抵薛家峒賊已渡無定河踞峪口
海座灣一帶正攻王家民寨因飭陳瑞芝率隊先赴河邊搭

架浮橋是夜五鼓率師潛起十二日渡河進擊賊騎乘半渡來犯殷忠廷整隊迎擊戴光明繼之皆下馬格鬪成定康乃鈔出賊後號鼓齊鳴賊駭而奔官軍乘勢掩殺追過王家山賊復回拒洋鎗隊陷陣急轟斃賊數十賊敗向張家臺狂走喻先恕殷忠廷追至殿子溝收隊計斃賊數百名生擒百餘名餘賊折竄清澗二十六日往清澗進剿賊目李雙梁李登辛滿城遞呈乞撫成定康未測誠僞一面具稟請示二十七日師次石嘴驛訶知駱駝鋪柏樹坵樓子塌王家溝一帶均有大股盤踞及官軍至駱駝鋪賊已分踞郝家山排陣迎戰

成定康令鄧萬盛李占榮等先伏柳莊山旁以防鈔截乃三路鼓行而前賊從郝家山一齊衝出柏樹坵等處之賊亦蜂擁而來遂飭殷忠廷戴光明各率所部當左右兩路自率喻先恕及馬隊當中路忽騎賊從柳莊山口躍出爲鄧萬盛等伏兵所敗官軍知賊氣已餒遽前薄之哨長周克齋首先陷陣各營繼之賊不能支紛紛敗潰追殺三十餘里斃賊千餘名救出難民數百賊向老君殿奔竄迨收隊抵清澗縣城時已二鼓矣知縣趙聿灝復請勦西南之賊適劉厚基所部後營營官知縣梁以恭亦至縣城會同進勦二十八日追賊至

老張瓜則踞賊已遠颺僅截殺後隊百餘名乃收隊回城戊刻探報縣東周家圪塆李家寨高家嶮有賊數千攻民寨甚急成定康令潛師擊之二十九日馳抵麻子坳偵賊方撲李家寨遂分三路進擊行甫二里馬步賊數千來抗中路乘銳奮擊正酣戰間右路已從槐黃峪截出賊遂敗潰成定康飭馬隊衝殺步隊兜勦賊屍枕藉賊敗向高家嶮奔竄官軍三路窮追斃賊數百名生擒百餘名總由各匪叢集北山故官軍勦不勝勦幸劉松山全軍馳抵山西永甯州急購行糧爲渡河擊賊計十二月初三日前隊渡河抵綏德州留所部三

千人扼於軍渡助防東岸初六日抵綏德州城商定乘其不備直搗各賊老巢初八日劉松山率所部由岔把溝自北而南成定康由大理川自南而北會師夾擊是夜劉松山訶知北路無賊賊巢在小理川之南大理川之北縱橫二十餘里劉松山飭提督易德麟蘇松鎮總兵章合才並馬隊前營右營先攻大理川西續家灣一帶賊巢劉松山俟其拔行十餘里自率中軍及馬隊中營後營由右進飭提督蕭章開率右營由左進直搗小理川一帶賊巢甫行二十餘里該逆紛紛出巢抗拒官軍奮威衝殺賊不能支奪路狂竄官軍乘勝壓

擊立將小理川店子寺一帶賊巢一律埽蕩賊向山南大理川周家嶮西竄其馬隊不能越山中後兩營追殲殆盡追近周家嶮老巢敗賊不敢回巢巢賊出隊抗拒劉松山分步隊爲兩枝一由右路一爲後勁馬隊從右路之右斜鈔而出賊乃呼躍搦戰官軍靜以待之少頃鼓聲忽起三路齊奮如雷如霆賊遂大敗棄巢而竄附近之賊亦不戰而潰我軍乘月追至數里擒斬無數是日成定康由三皇峯進剿行抵樓兒砭見賊壘數座橫踞道旁官軍更番迭進示之以暇該逆以爲可侮漫不戒備及至未刻戴光明張德榮殷忠廷易培文

成景星邱萬盛古楚南李志剛李占榮金發勝李長樂陳瑞芝等各率銳卒仰攻火器環轟該逆膽落官軍奮躍而登連破十餘壘殺賊無算復擣三眼泉劉家坪一帶卡壘大破之追殺八九里適劉松山已破老巢而來兩軍會合縱擊窮追六七里始令收隊是夜五鼓易德麟章合才適由大理川續家灣埽蕩而來踏賊壘二十餘處擒斬亦多是役共破賊壘百數十處斃賊五六千名生擒三千餘名解散脅從二萬有奇獲騾馬三千餘匹初十日派隊搜山均有擒斬是夜三鼓飭易德麟章合才率馬步向西南進剿自率各軍及蕭章開

所部會合成定康一軍分兩路而進行六十里天已大明卽與大股賊遇商定成定康由右自率各軍出左路馬隊由左路之左相機鈔擊賊駭而奔留悍賊殿後官軍乘勢感之悍賊亦奔追殺二十餘里及之南岔路狹溝深傾跌死者相繼擒斬千餘名越山竄者尙數千又追十餘里斃賊極多是夜各就地駐紮二更成定康向西繞北而進劉松山率各營向西進行三十餘里見小里溝火光約長數十里劉松山因山高溝狹不便列隊飭蕭章開先進親督中軍繼之馬隊居後魚貫而行獲賊探訊知賊之前隊已行後隊待發蕭章開分

兩路沿溝而進時曉日已昇瞥觀前途賊眾擁擠聞官軍至遽行反撲官軍奮威衝殺斃殿後悍賊甚多賊悉潰走我軍乘勢急追其由左路竄者約一二千劉松山擒斬殆盡其由右竄者成定康擒斬過半其越山逃逸者尙七八千向西狂竄十三日劉松山率馬步急進行五十里及之且追且擊賊奔不止再追二十餘里適成定康已至截其去路兩軍夾擊其向西北者經成定康截殺殆盡其向西南者劉松山截殺千餘名拔出難民數千迨收隊時已初更矣及詢易德麟章合才戰狀據稱十八日至宋家坪探知玉梯山有賊盤踞是

夜分路襲之平賊巢二十餘處賊向西南紛竄我軍合力猛進賊狂奔不止道左一村踞賊約七八百分軍圍之賊目鄭才有出降乃一面受降一面進剿再追二十餘里斃賊二千有奇生擒近千拔出難民數千時方正午頓隊傳餐再進行十餘里將近瓦窰堡巨巢敗賊正造飯聚隊不虞官軍復至倉皇出竄我軍分起截殺賊屍遍野又追二十里至樂家坪時已二鼓矣十三日再追僅截尾賊數百我軍裹糧已罄遂收隊回安定縣辦糧通計是役殺賊萬餘生擒五千有奇內頭目約四五十名拔出難民數萬劉松山全軍僅陣亡十五

名成定康全軍陣亡五名內有把總杜宗泰一名成定康遂率隊回綏德劉松山以逆首董幅祥黨夥尙眾由榆林至靖邊賊巢林立若引軍而西節節搜剿則賊必急於回顧河防之嚴自解因行糧不繼十四日屯軍安定宰所獲騾馬雜糞充飢是夜三鼓向西北追剿行五十里適派充嚮導之降卒報稱敗賊首逆李雙梁高萬全亦竄西北僅隔胡家山一山卽派易德麟蕭章開先行及劉松山率各營繼進則易德麟等已與賊接仗劉松山至賊卽駭走追至小李莊擒斬千餘名拔出難民數千乃收隊回胡家山尋訪土人知小李莊北

四十里爲隆腰鎮鎮之西北爲黑牛川邱家坪三處賊巢鼎
峙皆董幅祥之黨是夜四鼓率各軍疾進十五日辰刻抵隆
腰鎮則賊已夜遁併歸黑牛川邱家坪兩巢矣查邱家坪距
隆腰鎮比黑牛川更遠十餘里劉松山親率易德麟先往飭
章合才蕭章開遲半時許以往黑牛川庶得同時進擊劉松
山行三十餘里邱家坪賊列陣出抗兩山之賊如林因飭易
德麟分其隊爲左右攀躋而上擊兩山之賊自率中軍分前
後直撲賊卡賊乍覩劉松山軍威惶恐震駭陣勢先亂我軍
乘之立將賊巢攻破追至八里許連掃賊巢十餘處適章合

才蕭章開亦破黑牛川馬營灣一帶賊巢十餘處而來兩股
敗賊已併歸一路我軍迅追數里賊屍駢列計斃賊千五六
百名賊竄鎮靖堡官軍二鼓收隊訊據陣擒賊目孔福興呂
萬源朱有祥李益昭周其慶李元福何良如等供稱鎮靖堡
極爲堅固董幅祥恃爲巢穴其眷屬則竊踞靖邊縣城等語
劉松山卽於十八日率全軍馬步馳抵鎮靖堡逆首董幅祥
之父董世有及其弟董幅祿跪地乞降當飭將鎮靖堡及靖
邊縣城所有難民造冊呈核旋據董世有訴稱各股徒眾疊
蒙截剿其畏誅者或向榆林米脂一帶或向延長竄逸董幅

祥隨身三四千人未知竄向何處已崙人前去喚回
限數日其扈彰餘黨未就撫者亦詣鎮靖堡造冊
山因暫駐軍鎮靖堡而董志原回逆掠食至於隴
關陝西試用道喻步蓮於十一月十五夜三鼓率
元龔曉亭總兵蕭羣魁由曹家灣進剿天明抵咸寧
在黃家溝卽捲旂往襲之殺賊三四百名生擒回
洪包連及土匪周七等十餘名十九夜周紹濂部
剿回逆於中部縣屬之五家原斃百餘騎該逆分
家溝一竄宜君之偏橋而大股仍踞店頭二十日

偕劉甫田李賓光率隊截之周紹濂亦飭董玉春扼紫隆坊親率所部及毛正明於初更時向蘇家峴進剿行十餘里見村前火光知賊未動潛往撲之賊驚而號遽滅其火我軍鎗礮轟擊賊眾亂竄自相蹂藉向店頭而遁董玉春由四溝橫截斬馘甚多正收隊間聞偏橋鎗礮聲知張大雄等正在接仗周紹濂行至布莊據探報該逆以騎賊抗拒官軍步賊護糧畜向王家莊竄走已經張大雄等前後夾擊斃賊甚多賊悉棄糧畜潰走周紹濂令毛正明扼黎原自赴張寨截擊霜月之下賊騎紛馳而來我軍前截後追屍骸枕藉墜坑死者

尤多計共斃賊千餘名生擒十餘名訊知逆目舒阿渾亦經
轟斃分竄之賊僅餘百餘騎歸併店頭十九日另股回逆數
千突入正甯縣城知縣黃紹薪率團巷戰正苦不支賊亦以
無所掠而去知府劉倬雲聞警往援二十一日黎明至正甯
之四村原賊騎數百突至副將劉忠發祝鑑嵩督隊奮擊立
斃數十名賊向南主原紛竄劉倬雲令兩營列隊千家村自
率各營前進行抵正甯城南則黃鼎之軍已先至乃飭四營
回三水自率親兵及總兵徐萬福一營助剿北原之賊部署
方定忽報回逆大股竄至職田急率所部回援三鼓後至防

所令三營伏關家川自率周玉堂徐萬福李躍騎四營向羊坡頭進剿天明抵羊坡頭列陣分左右進遇賊探敗之各村之賊齊出立斃數百名賊向大灣狂遁劉倬雲知前路逼窄催軍猛進賊多墜死及追出谷口截賊爲二大股向關家川不虞劉忠發祝鑑嵩王蓋臣從溝中突起震懟失措又斃數百名計斃賊已千餘名生擒二十餘名黃鼎馳援正甯二十三日追賊文家川知羊坡頭之賊已經劉倬雲擊敗遂收隊回邠探知邠州三水之北賊蹤密布二十七夜三鼓出隊天明至永樂原見賊騎陷師家河堡方運糧食飭叅將林定遠

截之而自率三營往擣底廟比至該處則師家河賊已經林定遠擊敗而來副將李玉春急往扼之林定遠亦急追而至賊無路可逃立時殲盡韋占雄徑攻底廟原賊方憑堡穩抗而麻原之賊又至知縣雷炯率所部截之韋占雄躍上堡牆堡中賊由後門出走併入大股維時總兵徐占彪副將陳春萬趙興隆皮昌魁率所部各營已破東牛家堡及永樂堡之賊各賊均集底廟騎賊約四千餘步賊千餘欺官軍單薄四路齊撲黃鼎屹立不動調林定遠何玉超從右路瀆場鈔出賊後親督兩營結方陣整隊而進賊旋卻旋前斃於鎗礮者

不少遂向後狂奔適林定遠何玉超鈔至兩面夾擊斃賊無
數餘賊向宮河原竄遁乃收隊回底廟是役斃賊千餘名生
擒十餘名我軍亦陣亡副將明占魁傷勇丁數十名劉倬雲
由職田馳至適遇敗賊竄向郭家村復擊斃賊數十名訊據
生擒賊供此股回逆係白彥虎馬長順鄒阿渾等其禹得彥
崔偉卽崔三陳林馬正和等則方赴隴州求撫其黨分赴水
洛城擄掠未與俱來等語其另股渡涇而南者擾及長武靈
臺地境雷正綰及閻定邦擊之斃二百餘名生擒逆目馬順
兒虎秀哩正法餘逆回董志老巢值涇州告急雷正綰卽於

二十八日抵涇州三十里鋪探知該逆已先期遠遁涇州解嚴此時董志原逆馮均幅楊文治馬生彥三犯已遁入金積堡其黨眾均歸白彥虎馬長順統轄禹得彥崔偉陳林馬正和等挽清水降回李得昌乞撫陝回虜集慶陽境內北通金積堡東竄陝疆甘回如金積堡一股陽爲投順心懷叵測西甯一府任回之所爲玉通毫不過問肅州由楊占鼐勦辦成祿藉詞延宕亦未出關惟河狄密邇省垣時出竄擾穆圖善派營往勦亦以攻克新路坡收復太子寺具奏甘省尙無緊急陝省北山一帶爲各匪之所歸回逆亦竄窺邊外金順於

十二月初七日馳抵府谷之鎮羌堡探悉回逆大股分踞河
干之胡家灣法寺古城十里長灘等處綿亙一百餘里初八
日馳抵皇甫營適劉厚基亦率營由榆林馳至神木先派遊
擊李萬勝率所部赴皇甫營助剿卽於初九日黎明督率馬
步直取古城行四十里見前面塵氛四起少頃突出騎賊數
百圖襲我後常福直前禦之斬悍賊數十名賊遂向東狂竄
常福亦緊躡之大軍隨後疾進逆眾層層排列而右路山後
氣覺有異金順知有詐謀卽派知州黃長吉遊擊李大勝李
宏林等擊其中路派已革知縣王輯瑞遊擊劉宏發都司何

惟愷俞厚安等由左路沿溝而進派遊擊李萬盛都司陳國鐸等由右路傍山而進時常福追賊已回金順與之往來策應該逆恃眾直前抗拒我軍屹立不動待其將近鎗礮環施斃賊無數而該逆抗拒如故李宏林李大勝首先陷陣黃長吉繼之立斬紅衣賊目並悍賊多名右路隊伍橫衝而入鏖戰逾時突有馬賊千餘由山後包鈔而來常福分投迎敵各軍亦奮威力戰各馬隊四面衝殺騎賊遂紛紛落馬該逆大亂向後奔潰我軍進至沙山前阻大溝該逆無路旁竄多擁顛溝中救出蒙漢難民二千餘人生擒賊目馬進稱等百餘

名據供此股皆平涼等處土回糾集萬餘意圖搶過山西等語遂收隊駐古城是日張曜遣探弁至詢知該軍已至河曲卽緘請渡河會剿初十日劉厚基亦親帶虎威親兵及西林馬隊至當據探報該逆悉踞十里長灘卽於十一日往剿及抵該處則該逆已棄巢西遁當派常福田玉廣率馬步前行金順劉厚基督諸軍繼進沿途殺賊五六百名是晚紮烏柴喇嘛廟五鼓拔行追三十餘里卽遇馬步悍逆三四千人返身列隊常福田玉廣暨各營分兩路鈔擊賊復奔潰追殺至哈慶當王廟始收隊停紮是日計斃賊八九百名十三日探

知該逆晝夜西奔其行甚疾追亦無及乃揮軍折回張曜於十三日親率七營由五勞布拉前來會剿駐紮拉林地方遇騎賊數百擊斬數十名該逆倉皇西竄次日由幹直漢般溝前進行三十餘里遇馬步逆眾接仗獲勝該逆由西南分竄十五日同集古城因聞榆林有警商定張曜暫駐古城金順劉厚基拔隊而歸十九日抵榆林查留防之遊擊李考祥等亦於十六十七等日率隊往勦葭州之特牛溝馬家跳等處殺斃竄賊三百餘名該逆由馬龍堡回巢經金順專摺具報均蒙

獎敘有差時劉松山駐軍鎮靖堡據南路探報賊首李雙梁李登張萬飛姬滿春等糾集餘黨屯踞洛珠川一帶距堡一百三十餘里二十三日劉松山章合才率右軍蕭章開率左軍及右後兩營馬隊取道烏牛川進勦正拔隊行間西路探報有回逆一股屯踞定邊縣屬之高小灣劉松山自率中軍飭易德麟率前軍卽夜三鼓潛師西進二十四日行一百里駐張家溝領馬隊提督余虎恩擒獲回逆四名皆假扮官軍裝束訊據供稱此股約三四千皆騎馬之隊從下馬關韋州蒙城子而來現踞高小灣頭目爲馬萬得馬棘子等語因卽

傳令三更出隊行二十餘里遙見高小灣火光隱隱分路急進該逆驚駭狂竄我軍蹙之斬殺無數其散匿民房者圍剿無遺易德麟躡踪追之連破賊館七八處時已天明該逆向西逃走我軍追殺十餘里又斃二百餘名前後共斃六百餘名生擒二百餘名二十六日探報該逆已回老巢二十八日收隊還鎮靖堡適章合才蕭章開亦振旅言旋詢知二十四日五鼓抵洛珠川騎賊方列隊步賊已紛紛潰走我軍整隊壓之卽向西南狂逸窮追三十餘里沿途斃賊千餘名生擒三百餘名拔出難民數千是日留駐山西軍渡之提督何作

霖稟報亦至據稱二十二日聞吳堡北境有賊二千餘攻破
三和原白家塌一帶民寨卽同提督周國勝楊清源由軍渡
過河援之抵石堆山見賊攻民寨甚急及官軍至卽解圍狂
竄官軍乘勢緊追三十里至汪家渠沿途斃賊百餘名生擒
四十三名仍收隊還軍渡此劉松山一軍抵鎮靖堡以後戰
狀也其劉端冕一軍於十二月初八日擊賊於陳家紙坊下
寺灣等處搜殺畧盡其村外巖洞中多匿賊亦飭弁勇孫升
被礮石傷亡數名副將張復盛亦中石落川中劉端冕嚴督
銳進賊不能禦果入其巖而克之計搜殺二百餘名生擒張

保兒等三十餘名初九日馳回甘泉初十日赴高家哨探剿
遇該逆馬步湧至副將王開福都司盧華直衝賊陣中鎗陣
亡賊遂乘勢猛擊官軍屹立不動俟其逼近鎗礮密轟該逆
遂潰乘勢壓之賊仍由將臺一路飛馳而去十三日飭文明
章出洛川以攻上曹村之賊劉竹田出秦關以趨三汊河自
率各營分駐甘泉勞山麻子街並緘請魏光燾會剿十九日
敗賊於麻子街二十日又敗之於西山坡二十二日大股賊
至蘇家河廟嘴一帶二十三日黎明劉端冕方部署諸軍騎
賊已馳騁而來步賊亦將繼至都司張鵬程躍馬陷陣中鎗

陣亡賊益猖獗自辰至午相持未決維時文明章已埽蕩上
曹村聞勞山有警卽星馳從賊後掩擊而來前後夾擊賊始
大敗向王家坪西竄其三汊河另股亦經劉竹田於十五十
九等日擊敗之迨駐師白水適另股騎賊由澄城而來與敗
賊合竄乞弗村魏光燾委從九張兆熊解餉適經該處突與
賊遇張兆熊寄餉堡中率護勇與賊鬪劉竹田聞信馳往與
張兆熊夾擊賊遂敗潰追至馬家河劉臣儀繞從上游壓下
將溝中之賊斬馘無遺生擒賊目馬化祥解省訊辦其時復
有土匪陳海春與潰勇陳一本沈惟清糾合逃勇飢民勾結

回逆滋擾宜洛間管帶猛營遊擊張雲松副將張星元奉檄就近搜捕初九日襲之於老窰坡遊擊蔡春榮督勇直入該逆逃走無路拚死回鬪傷我軍十餘名我軍奮勇衝殺該匪傷亡過半適劉竹田踵至陳海春及餘黨百餘人悉數就擒正收隊回宜川忽聞回騎千餘出屯土基村撫標前營副將唐寅清已率隊往剿張雲松與張星元往剿斬馘甚多餘賊北竄維時提督郭運昌病愈率卓勝軍前隊至宜川聞敗賊已至甘棗鎮復會同各軍往剿十七日敗之於甘棗鎮十九日再敗之於雲巖二十二日追至百尺鎮該逆悉銳聚回撲

千總王化臣衝鋒陣亡提督蔡光武總兵李華文揮軍排擊張雲松等亦至該逆大敗由延川安定竄去其董志原分股由太白山河竄至鞍子頭魏光燾在中部聞報卽率隊趨槐柏鎮截剿比至則賊已過槐柏擾及橋章十五日追及於石堡川敗之賊竄腰嶮十六日左日升伍正得攻之於腰嶮遊擊史秀成陷陣而殞把總鄭有德赴救亦中矛陣亡賊騎四合副將王正和總兵吳禧德周勝元率馬隊橫衝立斬悍賊數名左日升于奇泮繼之賊遂大潰追殺二十餘里斃賊百餘名賊由街子河西竄另股回逆由平子竄至麻園總兵張

福齊自職田馳勦十三日大股竄馬欄鎮我軍先截底廟之賊大敗之賊仍由平子回老巢我軍乃進勦馬欄之賊探之已入石門關星夜馳往斬後隊數十而前隊已至照金鎮高連陞聞報整隊東馳連日率馬隊窮追至趙村天尙未曉官軍一擁而入斬殺過千餘賊竄武安村官軍隨之村中賊盡出副將謝春台把總張世發怒馬衝入賊眾環刺謝春台陣亡張世發負傷力戰遊擊桂錫楨急率百餘騎鈔出賊後高連陞督中軍奮擊賊大敗繞村而走札錫楨自村後鈔至賊無走路滾溝而下我軍乘之殺斃墜斃相繼餘賊翻溝上咸

和原竄走榆樹河二十二日魏光燾截之丁家原擒斬殆盡其自董志原南竄涇州之賊十二日攻破董家堡踞之雷正綰自棗社馳往圍而攻之該逆礮石雨下傷亡副將金國榮等十餘名乃從缺口急攻以入將堡內之賊悉數殲除其渡涇由崇信而南者分爲三股一由靈臺入邠長十六日破瓦子堡吳士邁自鳳翔馳至十八日冒雪進攻賊尙未覺總兵朱樹德叅將劉厚福分數路鈔襲該逆倉皇潰敗追殺三四百名仍由寨子山北竄一由崇信靈臺之間竄隴州東境踞麻家臺二十一日黎明張岳齡馳抵賊巢叅將陳太益大呼

直入賊驚覺出抗立斃十餘名遂棄麻家臺而遁追至鎖匙
坑凡斃百餘名餘賊悉向齊家原奔竄一竄隴州北境攻雷
家民堡未下喻步蓮援之解圍而去二十二日復攻韋家堡
經喻步蓮分兩路夾擊之該逆死傷枕藉追殺十餘里賊由
崇信狂奔回巢此董志原出掠之逆經各路截剿敗竄者也
當是時土匪已節次乞撫殘捻亦屢經誅戮獨回逆恃其人
眾尙稽天誅然劉松山等軍旅會集自可節節進剿掃蕩而
前逆眾雖多亦無能爲矣

平定關隴紀畧卷五終

平定關隴紀畧卷六

同治八年己巳春正月

欽差大臣督辦陝甘軍務左

駐節陝西省城據延安府

守將劉厚填刑部主事周瑞松稟報土匪李雙梁高萬全經
劉松山勦敗後率眾南竄正月初二日其黨尙榜陳明桂擾
及西河溝劉厚填馳至廟店山截之總兵羅長春副將陳振
贊由山後突入官軍分道上山賊無走路官軍四面環擊陣
斬尙榜陳明桂餘賊擒斬殆盡其宜洛一帶回逆經郭運昌
張雲松擊敗後尙出沒宜韓地境初七日竄至白馬灘提督

郭寶昌抵韓城星夜馳勦距城數里卽見白馬灘火光官軍馳至掩擊賊遂驚竄據生擒回逆供稱賊後股尙在石堡川郭寶昌卽飭提督王鳳鳴等率馬隊前驅自率步隊由關家山繞擊初八日黎明抵石堡賊已列隊川上王鳳鳴等進前衝撲正相持聞郭寶昌已至由山口壓擊而下賊眾大敗官軍分路掩殺二百餘名餘賊翻山竄至延長其時延長復有回逆飽掠將歸劉端冕知其必經勞山伏兵左右待之一面緘約魏光燾會勦初九日午刻賊果至劉端冕俟其過半突出擊之前賊已敗後賊遂棄糧狂奔廟嘴官軍獲糧二千餘

袋騾馬五百餘匹魏光燾率師會勦行至中途忽聞另股百餘騎自金盆灣竄至太平村移師勦之擒斬殆盡初八日仍擬赴甘泉助勦途次得報知賊已擊敗料其必由將臺槐樹莊一帶回竄十三日截之於將臺大敗之盡棄其所掠向石厰子狂奔十四日將拔隊窮追忽報胡僞帥率黨數千踵至魏光燾分軍埋伏自率親兵待戰十五日辰刻後賊果至其步隊見官軍卽遁馬隊直前迎敵官軍奮擊之賊且戰且退追至十餘里伏兵齊發賊驚潰狂竄委棄糧械盈途官軍分路追擊擒斬千餘獲駱駝騾馬千餘匹餘賊由太白鎮回竄

訛生擒各賊供始知胡元帥卽虎元帥之訛而賊中所稱虎元帥蓋十八酋之兇悍素著者也是日斃賊千餘生擒逆目張阿寶馬元元及悍黨百餘名吳禧德陣斬執旗賊目左手被傷急開小洋鎗斃之割其首級其留駐吉子峴之軍於十五日訶知前竄澄城邵陽韓城各境回騎經郭寶昌擊敗後餘賊復竄洛川之楊樹村劫官運馱騾二十餘頭向交口竄去知縣余甫勳守備楊金龍等追勦知騎賊夜聚普羅村卽夜出隊掩擊三鼓直抵賊巢先設伏於左右兩路楊金龍及千總范潮海守備戴俊德遊擊唐萬勝外委張金明首先殺

入賊從酣睡中驚起倉皇四竄叅將陳東海副將李奪魁伏兵齊發鎗轟矛刺賊屍遍野牲畜糧食拋棄殆盡賊目白同舉棄馬逃去官軍奪獲其馬此股回逆悉數殲除劉端冕自岳家屯截勦後於十三日戌刻聞後股回逆竄近延安卽飭喻經魁率所部趨勞山爲疑兵以分賊勢自率中前左右四營趨高家哨天明至其處巳刻遙見馬衣山後塵氛大起飭文明章黃承佐迅渡洛河伏雷村左右伺賊半渡擊之飭甘大有率所部伏牛武川之左自率中營伏牛武川之右約聞中營號聲則起未幾賊由牛武川蜂擁而來中營號聲起右

營應之賊乃大驚棄馬紛竄官軍兩路夾擊斃賊無算其冒死搶渡者值冰銷水漲官軍復蹙之溺斃亦多先渡之賊又經雷村伏兵截擊無一脫免喻經魁甫抵小勞山而賊之馬步數千已聚大勞山廢寨遂整隊往擊賊見其兵寡遽前迎抗喻經魁堅立不動賊勢稍懈官軍猛撲之斃數十名賊翻山而竄知前隊已覆不敢再由舊路繞向蔡家山別覓捷徑劉端冕訶知之十五日黎明潛師馳赴王家坪以待逾時賊果翻山而下劉端冕飭前左兩營截其後自率中右兩營突擊之賊駭而奔乘勢壓之斬馘甚多其先搶渡之賊官軍馬

步齊躡之十六日至洪家川則賊已散竄歸巢是役斃賊千餘名生擒回目馬光福楊超龍等三百餘名良由熟悉路徑故能以寡敵眾設奇制勝也其由董志西南出竄者爲回目王明章率馬步各千餘名由秦州竄擾吳家河張家莊欲由鳳縣以入棧道李輝武訶知之十六日飭總兵胡國珍副將楊恩澤分三路追剿沿途頗有斬馘賊由辛家山竄向黃牛鋪十七日李輝武親率副將邵永齡已革總兵王名潛提督王照南副將蕭德林往剿十八日抵東河橋聞賊已竄梅見溝急飭四營分鈔自率訓導羅寅知縣周鑑文從九吳銘訓

督隊由中路直入賊驚駭失措急思逃
已將去路阻截立斃悍賊數十名該滿
馬衝入賊陣手刃數賊各營乘勝掩殺
者十餘名其先奔上原之賊見溝中當
而逸回巢者已無幾訊生擒賊殷元兒
臘出巢由秦州一路擄掠至鳳翔縣不
已於梅見溝陣斃其先鋒藍正魁海全
全數撲滅會銜奏報後所有陣亡之副
國榮遊擊史秀成都司盧華張鵬程千

德等均蒙

賜卹如例王名滔開復原官其餘出力員弁進秩有差而董志原回逆飢蹙日甚遂糾集十八營傾巢東犯以陳林馮鈞幅居前崔偉余彥祿馬正和藍明太繼之其餘逆首隨後策應共合悍黨三四萬於二月初六日分道而出屯踞正甯南北兩原及永樂堡白吉原宮河原一帶將併力以擾秦川陝安道黃鼎聞報卽飛飭徐占彪率五營伏牛家堡以扼其衝調集彝字全軍由邠繼發一面緘約劉倬雲雷正綰由職田政平兩路會剿是日午刻該逆前隊至牛家堡徐占彪伏發

陣斬先鋒虎麻子等多名生擒四人餘眾竄走官軍追至原邊賊大股萬餘自白吉原擁出徐占彪以兵力過單扼溝而守是夕黃鼎率前部渡涇與世店五營會合遙見白吉原宮河一帶火光燭天綿亙數十里傳令各營飽餐嚴陣以待初八日平明大風東來回騎由洪巖上世店乘風馳騁黃鼎飭各營堅壁不動待至午刻賊已大齊官軍以馬隊衝出賊卽反奔官軍追下洪巖河賊向白吉原奔竄沿途棄騾馬以誘我師黃鼎令各營勿顧悉力跟追甫上白吉原陳林馮鈞幅卽率千餘騎擁至官軍奮力撲之賊且戰且走追至白吉鎮

忽前途塵土蔽天回逆大隊馬正和余彥祿等分十數路蜂擁而至每路約一二千人橫互十餘里張村底廟之間伏賊並出陳林馮鈞幅亦回馬猛撲而來黃鼎念軍已深入急令韋占雄趙興隆林定遠力敵陳林馮鈞幅兩逆徐占彪李玉春劉心灼何玉超以當余彥祿馬正和大隊自率縣丞青勝藍主簿謝初旭督中軍繼進以防伏賊包鈔布置甫定賊已四合官軍團結方陣周圍鎗礮環擊前賊死傷枕藉紛紛敗走馬隊乘勢衝殺步隊繼進追至原邊賊情急合隊回撲崔偉余彥祿等各率馬隊猛衝勢甚兇悍黃鼎見馬隊少卻急

督步隊疾進副將胡應芳趙嗣昌督矛手直衝入陣將賊截
爲兩段馬隊從步隊後急進鎗轟矛刺斃賊百餘賊勢大敗
官軍分道跟追逼其一股至高里坊前阻深溝賊無走路逆
首余彥祿率眾死拒副將劉治均躍馬挺矛直前刺落馬下
官軍羣矛攢刺割取首級並奪獲其馬其姪余驢兒馳救復
被朱蘭亭衝出擒之餘逆四散奔逃官軍圍而殲之無一脫
免其時崔偉馬正和等望見勒馬馳回援救官軍乘勝衝擊
賊不能支大敗奔潰同時韋占雄等亦將陳林馮鈞幅擊敗
合隊跟追賊分路狂奔陳林等走政平大股悉向宮河原竄

去初九日大雪滿川追至宮河衣械盡溼賊已先竄棗社官軍沿途搜殺該逆連夜遁回老巢是役斃賊二千餘名陣斬逆目虎麻子楊式明等數十名惟逆首余彥祿一名雖據賊供尙未知其的實生擒逆目余驢兒等六十二名先是雷正綰得黃鼎緘約初八日卽由長武率隊出政平未刻卽見陳林馮鈞幅率千餘騎奔回望見官軍駭而北竄雷正綰揮軍截擊賊奪路向宮河狂奔初九日正拔隊赴宮河忽據探報回酋禹得彥率數千騎南渡涇河竄至靈臺之獨店柳家鋪一帶急收隊折回初十日探悉該逆尙在獨店雷正綰乘雪

夜掩擊十一日黎明馳抵獨店賊尙未覺陳義閣定邦等分
數路大呼馳入該逆倉猝狂奔官軍奮力衝殺斃賊三四百
名賊向十字鎮狂竄十三日張岳齡邀擊之於新集鎮斬馘
頗多賊由崇信一路北竄回巢此次官軍以少擊眾卒獲大
捷時左 已移駐乾州所獲回目余驢兒等三十餘名均
經解營訊辦會銜陳奏後在事出力員弁均蒙

優獎適准刑部咨開步軍統領衙門奏送拏獲置買軍械回
黨丁良貴等一案奏奉

諭旨飭下署陝甘總督穆圖善詳細查明迅卽據實覆奏欽

此等因當經飛行該署督查明覆奏旋於十二月初五日復
飛催各在案迄今半載仍未據查明咨覆爲此咨查等因適
前次陣獲余彥祿戰馬訛據余彥祿之姪余驢兒供稱係馬
化澁用銀七百二十兩於歸化城買來餽送余彥祿又據供
稱董志原巢內糧食將絕馬化澁於二月初旬用駱駝一千
五百餘隻馱運糧食接濟等語他若各回逆洋鎗洋藥戰馬
屢據擒賊供稱均由馬化澁自歸化城一帶販來比經據實
奏覆並懇

天恩飭下綏遠城將軍歸化城副都統督飭五廳嚴密盤詰

遇有甘肅採買戰馬鎗礮等項非持有穆圖善委員印文一概禁止等情維時肅州亦報收復穆圖善奏請

獎勵並請

旨由四川招募兵勇以實營伍及成祿自設糧臺金順回駐花定奉

旨飭成祿出關剿賊楊占鰲暫駐肅州會同該鎮道等將善後事宜悉心籌辦其回目稟內所稱沙州口外各回民奉烏魯木齊妥老阿渾送書來肅寄來帥印二顆其中有無別項情節卽著成祿就近查明斟酌辦理等因其時肅州等處均

由穆圖善奏報而東路勦辦回土各逆則未嘗與聞也董志原逆自二月初八日敗遁回巢遂議挈眷先徙金積堡及聞大軍西指各路馬步尅期大舉恟息益甚復於十八日集議併十八營爲四大營以其半護家口輜重先行留崔偉馬正和等率悍黨萬餘伏董志原斷後時出游騎數百由秦昌政平兩鎮出擾涇河兩岸牽綴官軍維時黃鼎自邠州率師會同雷正綰李耀南及記名提督馬德順等率馬步各軍屯駐靈臺百里鎮西屯鎮一帶均遵檄備十日乾糧以俟大舉二十一日據探報該逆老弱輜重均已離巢分向驛馬關三汜

河北竄雷正綰黃鼎率師自長武渡涇馬德順李耀南亦率馬步各營由靈臺踵至會師於秦昌其時精悍賊眾悉伏董志原崔偉等率騎千餘扼紮三不通憑溝抗拒黃鼎等知西路空虛商定雷正綰撥陳義步隊六營馬德順撥楊世俊馬隊四營由秦昌入荔家堡取蕭金鎮西路以達鎮原迎頭截剿餘軍分爲四路以李耀南所統恪靖馬隊爲前鋒馬德順繼之雷正綰黃鼎馬隊爲左右翼各軍步隊隨後排列而進均由三不通直擣賊巢二十三日五鼓各軍分道進攻行至邱家寨遇該逆游騎數百瞥見官軍卽遁各軍風馳電掣直

抵三不通該逆以馬隊千餘排列卡外官軍亦以馬隊衝突
爲深溝所阻卒不得前正相持閒適步隊各軍分左右踰溝
衝上平原繞出賊卡之後該逆驚駭失措馬隊乘勝衝入賊
不能支紛紛敗竄原上伏賊甫出又爲敗賊牽動相率狂竄
官軍追殺千餘名復分軍循馬連河而上遂將焦村石社蕭
金鎮董志鎮一帶賊巢同時踏毀沿途百餘里屍骸枕藉餘
賊悉向西峯鎮北走各軍遂駐董志原二十四日五鼓拔隊
跟追辰後抵西峯鎮訊據擒賊供稱前起老弱輜重因人馬
眾多未能疾走相距約一日程其殿後悍賊漏夜奔竄一由

驛馬關以出環縣一由蒲河川以向三汊河約在黑城子下馬關會齊同向預望城半角城金積堡一帶等語維時分派之陳義楊世俊兩軍自荔家堡上原出南路掃蕩而前已將鎮原縣城收復各軍復商定雷正綰李耀南步隊出蒲河川會合陳義楊世俊於鎮原進勦三汊河一股其竄驛馬關環縣之賊則馬德順黃鼎緊追之馳抵驛馬關斬落後賊千餘名追殺二十里至黨家腰嶮路窄溝深該逆自相擁擠急不得前崔偉馬正和見勢危急親督數百人阻隘死拒復爲官軍所敗回目先逃餘逆紛紛繼遁自相蹈藉墮落極多追殺

五十餘里約斃賊數千二十五日收復慶陽府城二十六日
追至蔡家廟餘賊徑過環縣由紅德城北竄二十七日收隊
回董志原雷正縮陳義兩軍於二十五日至鎮原會師追至
孟壩寺截尾賊數百復追及前隊於三汭河該逆護其家屬
輜重先行而以悍騎扼險抗拒官軍奮擊四散奔竄騾馬輜
重悉數拋棄追至白馬鋪斬馘千計二十六日收隊回蕭金
鎮統計是役殺斃餓斃及墜巖落澗實有二三萬之多奪獲
騾馬亦以萬計拔出難民萬餘確探敗逆由環縣固原竄至
下馬關復分竄蕭河城預望城半角城等處涇慶各屬一律

蕭清於是分軍扼紫廣興屯政左

擬率親兵移駐邠州

忽得劉典急報二十夜三更候有叛卒數百圍逼高連陞楊家店營帳將高連陞戍害營官賀茂林黃毓馥聞變往援同時遇害叛卒旣戕統帥卽乘勢遍脅各營其素在會中者卽起而應之未入會者不知所爲倉猝之間計無所出二十一日駐金鎖關之副後營營官楊銘濬聞變率所部馳援取道同官邀該處守將桂錫楨與俱行十餘里遇楊家店逃出弁勇詢悉情形並云該叛卒將趨同官金鎖關劫取糧局逼令同叛等語桂錫楨率所部馬隊急回同官布置城守楊銘濬

亦折回同官隨身僅十餘騎其步隊悉遺在後少頃叛卒大至繞西北兩面大聲而呼城上迄無應者楊銘濬立城上瞥見所部副後營旗幟亦植立不動異之遽下城呼令入城甫入隊中殺聲齊起楊銘濬甫回身上馬矛已及其左足桂錫植在城上見之卽下城率隊衝入副後營有後哨哨官龍恩思及未入哥會各弁勇已擁楊銘濬出以鎗矛反拒追者桂錫植至合力禦之當斃叛卒數十名其攀緣上城者皆經城上刺墮是日巳刻至二十二日卯刻叛卒徹夜猛攻經桂錫植憑城擊殺數百名奪獲木梯百餘架天明叛卒始退桂錫

檳開城追剿斃八十餘名生擒十一名正酣戰間叛卒復從
東西兩溝突出桂錫檳面受矛傷右手爲石所損猶縱橫血
戰叛卒仍敗走是日辰刻周紹濂聞變率所部中前右三營
行隊迅赴古泉適叛卒蜂擁而至周紹濂督劉甫田張權英
周玉林分路堵剿斃叛卒數十叛卒敗退官軍進據古泉空
壘叛卒仍敢圍攻均經登時擊退狂奔官軍乘勢一追殺斃
三百餘名有繳還軍器伏地自投者五百餘名官軍亦陣亡
十四名二十三日桂錫檳復派馬隊兩哨進攻金鎖關米子
審擒斬多名劉典當聞變之初卽派丁賢發率所部往扼耀

州及至該處則已經桂錫楨周紹濂擊敗甘心爲逆之徒擒斬略盡其被脅繳械來投者丁賢發復收四百餘人其分駐馬欄鎮之果軍前後兩營經營官李瑞林王光發帶赴職田鎮並經劉倬雲協同鎮壓尙無搖動高連陞之屍亦經李瑞林昇歸職田二十四日張福齊截擊餘黨於馬欄鎮復收輯脅從百五十餘名二十五日劉倬雲探聞山河鎮尙有餘逆疾馳而往適回逆白彥虎鄒阿渾率敗黨數百來窺官軍扮叛卒前往誘之繼以大隊當斃四十餘名生擒許阿渾等十四人訊之果爲叛卒所約而來者也再訊起事之由據生擒

叛卒及各弁勇供稱二月初旬高連陞因各營收留游勇多有哥匪飭各營嚴密懲辦勒令首悔有前營親兵丁玉龍畏罪倡亂嚇各營之會入會者勾結回逆約於二月二十八日入犯因而舉事適高連陞捕丁玉龍甚急丁玉龍潛入左營與左營差弁鄔宏勝哨長朱得達蔣宏高石文科等迫不及待卽於二十夜三更時藉索餉爲名致有此變自起事至勦撫完竣凡五日逆黨除陣斬外若陳恆貴黃啟昌鄧得勝熊益貴熊兆祥匡世民黃秀成王永春張連芳等均經訊明分別梟斬旣而鄔宏勝詐稱吳得勝由洛川縣盤獲訊係手戕

高連陞要逆丁賢發在耀州陸續捕獲首逆朱得遠黃上輔
逆黨熊松宜焦得興田興發唐占鼈羅有元楊長福楊先緒
等七名其首逆丁玉龍熊定邦羅興萬李長林及逆黨吳得
勝卽吳步雲等百餘人竄至長武之審店經雷正綰及提督
周蘭亭率隊截擊悉數擒獲前後解赴大營訊明分別梟斬
案定後據實陳奏甘肅提督穆特本巴圖魯高連陞懇
恩照提督陣亡例議給卹典

加恩賜諡並

宣付史館立傳以彰戰蹟該提督轉戰廣西浙江福建廣東

陝西各省准建專祠同時遇害之提督銜湖南補用總兵黃毓馥總兵銜補用副將賀茂林花翎同知銜浙江補用知縣謝生春四川補用副將高莫舉守備吳學裕千總余永福把總朱雲從從九潘甫一張西堂監生方甫臣均懇

恩飭部照原階原資議卹並請

旨准其附祀高連陞專祠其未變之前後兩營改歸李輝武統帶丁賢發桂錫楨所收之一千五百名分爲三營以兩營歸丁賢發一營歸魏光燾統帶其周紹濂張福齊所收之六百餘名卽令分補缺額其事遂定當籌辦果軍潰變之時劉

松山所統分駐綏德州城十營亦被游匪句煽猝踞州城緣
劉松山全軍自上年由永甯州渡河而西設採買局於軍渡
留中軍三五兩旗及蕭章開所部右軍後旗勇夫轉運軍渡
之糧於綏德及駐軍漸遠又留易德麟所部之左軍左旗駐
綏德轉運綏德之糧於周家嶮迨師抵鎮靖堡復裹糧西勦
靖邊定邊土匪回匪又飭易德麟率所部前左右三旗駐瓦
窰堡轉周家嶮一帶之糧於鎮靖堡以餉前敵各軍兼哺降
眾劉松山因收撫土匪董福祥降眾十餘萬率四營駐鎮靖
堡督辦安插自軍渡至鎮靖計一千零八十里勇夫散布各

處絡繹載道僅章合才往還監督巡護不常厥居以故游匪竄匿其間潛相引誘無從察禁二月十三日游勇句結綏德州城內外各營起事襲踞州城章合才於是日午後自義合鎮糧局回州中途聞變及內外各營弁勇或被誘入夥或被脅入城或乘間逃走其挑糧未歸之弁勇押運未歸之營哨各官未攜軍械無以制賊倉皇失據劉松山得報卽併蕭章開所部由洛珠川折由瓦窰堡南趨飭易德麟率所部會師清澗沿途偵知營務處黃萬友率所部中軍第六旗於聞變時已交總哨帶赴瓦窰堡而何作霖已將三五兩旗調過東

岸已知叛卒之必難逞二十二日抵瓦窰堡卽派提督曹義勝赴綏德察看二十三日抵清澗章合才率馬隊三營來會二十四日曹義勝自綏德回報城中各營不知統帥動靜人心惶惶及曹義勝至密告總帥已抵清澗皆喜出望外二十三日四更乘各游匪酣臥刺斃百餘名弁勇之被脅者遂乘勢反正縛哥老會首謝永青唐太春方經山胡泰江童嘉隆等五犯解清澗行營成定康所部之在城內者亦與之俱往二十五日抵清澗劉松山提訊謝永青唐太春等據供前在湖北軍營當勇結拜哥老會匪陸續來至綏德勾通城內外

勇丁甫數百人不料被新夥暗算等語當經正法軍前各營
哨官什長指出叛卒一百二十七名供認不諱概予斬決各
哨官內惟遊擊羅忠桂湯惠能王福升都司黃忠貴情節較
重一併軍前正法自變起迄事平僅閱旬日並未戕官通寇
實因游匪煽惑更無他故而劉松山恩信素孚聞其所在悔
心遂萌於斯益可見矣維時成定康已擢署延榆綏道交卸
州篆未行陳瑞芝已接署州篆當變起時成定康帶隊出城
駐延川之虎兒隴陳瑞芝駐城外二十餘里之邱家河事平
後據寶具奏奉

旨劉松山交部議處成定康陳瑞芝均著革職留任失察之
營官哨長著左宗棠等查明分別參處嗣於奏報克復董志
原一摺復奉

上諭左宗棠等奏克復董志原回巢慶涇各屬一例肅清現
籌布置情形一摺已明降諭旨宣示並將出力之雷正綰等
照所請獎勵矣董志原地居秦隴要膺久爲回逆老巢此次
痛剿克復慶涇各屬一律肅清該逆由環縣固原兩路北竄
下馬關等處左宗棠等因裹糧將罄仍令各軍回駐原防擬
擇要興屯徐圖進取固屬老成持重第當此得勝之餘軍威

大振回情渙散甘肅各匪經此懲創自必大爲震懾若能乘勝進剿必當事半功倍倘遲遲進取恐回逆狡謀抗拒轉形費力著左宗棠將糧餉等事與劉典妥商卽行西征隴回並馳至涇州接受總督關防擇要駐紮居中調度以期秦隴兩省得以兼顧至延安一帶地方是否安謐扈彰有無反側董福祥是否歸降興辦兵屯應如何經畫左宗棠籌定後卽可交劉典經理免致失此機會左宗棠另摺奏查明劉松山及高連陞兩軍變亂情形均已明降諭旨將劉松山等分別議處革留及副將楊玉魁等正法遇害之總兵黃毓馥等議卹

矣其未獲之蔣宏高石文科仍著左宗棠等隨時嚴拏毋任漏網現在高連陞所部陣斬及擒獲正法人數甚多未變各營改派李輝武等統帶尙屬妥協著卽飭該統領等妥爲鈐束不可稍涉大意欽此劉松山恩信素孚此次之變實因相距太遠軍心無所稟承未能卽時勦辦致爲游匪所搖迨聞劉松山已至清澗人心大定等情復經金順據實陳奏則劉松山之公而忘私久爲人所共信雖古之良將洵不多讓矣金順聞湘果兩軍相繼變叛益以邊防自任據探報邊外之海流圖河馬家梁等處及波羅堡西南一帶均有竄匪約六

七千人又據代理神木縣之同知英俊等稟報北面達拉旗地方竄來回逆數千金順卽派副都統常福總兵萬金榮挑帶各營有馬弁勇先赴海流圖河截剿劉厚基亦派總兵田玉廣統帶馬隊會同前往旋據稟報分路兜剿已斃三千餘人餘匪向西面遠遁旋以回逆趨重北路等情具奏奉上諭金順奏回逆趨重北路現籌進剿一摺回逆盤踞磴口烏拉特等處蔓及纏金日漸東趨董志原回逆數千人擾及定邊西大水坑一帶旋復他竄騎賊由橫城附近出邊者絡繹不絕後套情形甚爲喫緊該處地土饒沃爲甘軍糧源所

出關繫匪輕金順現已派副都統常福先赴達拉旗探剿卽擬親率各營進規烏拉磴口所籌甚是著卽迅速前進向賊匪重趨之處迎頭痛剿截其東竄疏通甘軍糧路兼爲靈郡聲援邊外地方遼闊若賊匪分踞肆擾必須分兵兜擊金順所部十餘營尙嫌單薄張曜赴陝剿賊甚爲奮勉現駐古城相距較近並著金順知照該提督移營西進藉爲後路策應其古城一帶亦須有兵填紮著金順知照宋慶卽率各營擇要扼堵仍聯絡劉厚基等軍以壯聲威欽此適報西路花定一帶復有回逆竄擾並據營總富勒琿等稟報四月初七日

有大股回逆攜帶雲梯乘昏夜潛至花馬池城根欲於東西南三面樹梯登城富勒琿會同副將春福叅將王萬年都司楊德裕州同周浩等各帶兵勇民團分投應敵鎗箭礮石如雨該逆退而復進富勒琿等復親燃大礮徹晚轟擊約斃賊數百名賊始敗退西北五六里其邊外沙梁後仍有伏賊三四千初八日午刻分股窺伺北城下馬隱身邊牆搖旗誘戰富勒琿堅忍不出用鎗礮憑城施放轟斃百餘名至四鼓時退向十三堡一帶竄去僅離城二三十里意圖乘隙復來十一日金順派常福挑帶馬隊由邊外馳往援剿嗣後據探報

札薩旗武達汗一帶另有馬隊卽飛咨張曜宋慶一體嚴備
金順親督禮前禮中選鋒衛隊四營出邊於二十三日馳抵
宮堡探悉此股回逆係由烏拉搶渡而來聞官軍出邊卽飛
奔遁去金順復收隊回榆常福馳至定邊適有回騎竄撲城
垣及見官軍卽時退走常福等追殺數十名生擒四名午後
該逆復糾眾而來常福與副都統貴陞總兵汪德才等分路
迎勦行六七里卽與賊遇接仗之餘馬隊從旁鎗斃執旗賊
目落馬賊眾駭亂官軍乘之殺斃二百餘名餘賊向西遠遁
常福等遂連夜馳抵花馬池探知邊外之大墩梁王家圍一

帶有賊二三千焚掠富勒琿商同常福等分路進攻大墩梁
該逆以一股押馱運西竄一股列隊迎抗我軍四面縱擊賊
亦往復抗拒及洋鎗隊至排列轟擊賊紛紛而倒官軍乘之
殲數百名賊勢大潰追殺四十餘里遂棄糧畜遠遁花定一
帶已無賊蹤金順卽派常福及禮前禮中兩營先行飭萬金
榮帶英右英前英後三營及效勇馬隊李考祥率英左禮左
禮後三營金順自率英中選鋒衛隊三營取道札薩郡王達
拉齊旗由包頭迤西渡河而進咨請左 撥兵填紮花定
是時土匪董福祥李雙梁張萬會扈良儒梁植劉文誥劉永

春等經黃萬友會同陳瑞芝等安插於五窰堡老君殿周家嶮等處耕懇荒地已就安帖延綏各州縣之游勇潰卒經郭寶昌劉聲集劉竹田派隊搜捕擒斬甚眾其叛軍變姓易名溷跡營中者亦經劉松山周紹濂先後搜緝正法自是北山一帶漸臻甯謐魏光燾劉端冕兩軍正奉檄飭由黑水寨王家角進太白鎮合水縣以漸向慶陽途聞捕獲蓄髮悍賊張有福等五名訊據供稱爲首老匪卽上年踞雲巖鎮之巨逆袁大魁自上年六月破巢後率死黨數十人乘雨夜竄七月內竄至燕曲堡招集敗黨及飢民潰卒數百人復經官軍擊

散袁大魁仍得漏網冬閒逃至保安之老巖窰其地絕險有居民數百餘戶憑險結寨自固袁大魁僞爲官軍糴糧委員以給寨民遂入據之糾集游匪潰卒數百遍脅鄰寨土民千餘皆蓄髮從之分爲五隊每隊一僞將軍一僞指揮統之瞰官軍進止爲趨避蹤跡詭秘魏光燾訊得其實斬張有福而釋其餘黨令爲前導一面會商劉端冕張星元周瑞松剋期會勦四月初五日夜起黎明抵近老巖窰三十里之馬蹠溝守卡賊驚起抗拒副將王正和蕭玉元叅將魏紀整遊擊李奪魁奮威衝殺斬執旗賊目奪隘而入總兵周振南于奇泮

副將石茂林參將譚吉士左右截出將馬蹶溝之賊登時勦盡其踞頭道川之賊聞風驚卻官軍合勢感之窮追二十里斃賊約四百餘名生擒僞將軍徐榮韓清榮僞指揮張洪太余天貴等正法軍前時已薄暮大雨如注不得已收隊初六日黎明甘大有喻經魁率師抵陳家紙坊遇賊百餘殲之進逼鷓子川守卡賊分布抗守鎗子如雨參將章和榮顏禧承等斬關而入賊大譁潰官軍分投截擊生擒僞指揮張復盛何文彪等斬於軍前士氣倍奮當將鷓子川賊數百一併擒斬初七日駐延安之副將賀卓吾幫統之副將張星元率所

平定陽隆系

部至魏光燾

前後營馬隊

審之後環攻

千仞下臨洛

塹小橋橫閣

更無他路審

鎗眼是爲審

吾張星元率

擊力攻竟日

十叅將袁海壽手被鎗子所傷甚重仍不得已收隊諸將初時甚銳至此見著手甚難慙憤交迫連日反覆熟商非從巖頂鑿石立柱潛縋壯士引繩而下必不能抵洞門魏光燾急雇石工挑勇助之一面更番進撲厚積蒿草枯柴僞爲火攻之狀以疑之十五日巖上穴成穴右多安橫柱下令軍士有能從巖縋下攻撲洞門者受上賞自十五日起派隊輪攻鎗礮晝夜不輟時放噴筒火箭令賊不能休歇五鼓始收隊如是者已數日十七日昧爽之先方鳴金收隊壯士十餘名忽由巖頭抱繩縋至柵外賊正酣臥少頃縋而下者益多攀柵

而入連拋火蛋袁大魁急喉悍黨迎拒密內人聲鼎沸官軍短兵密進賊屍枕藉袁大魁中又傷倒地其弟袁二亦受刃傷而倒都司涂國榮守備楊振家陳如美千總范潮海董大榮蔣得勝戴鵬程外委張金明徐有禮軍功李宏泰周元吉劉開年陳萬得等一齊殺入割取袁大魁袁二首級大呼以徇各軍競奮立將上下卡並水樓一併攻拔計十五密之賊除斬馘外皆墜巖墮水以死無一脫免遂將巖洞一律剷除免爲寇踞乃次第拔營前進函逆首馳送大營而鄜延巨患以平周瑞松回延安調知府南三十里野豬窪等處時有游

勇出沒苦未悉其巢穴所在二十四日獲游勇周俊林訊知
匪目杜占元自上年冬旬結土匪連破英溝龍耳溝魯家灣
等寨卽踞魯家屯收留游勇哥老會匪分布韓家原紙坊村
孫家溝不時出數十里百餘里外劫掠所得贓物輒以少許
分給近寨民人故無人舉發二十六日黎明周瑞松率所部
抵魯家屯察看屯踞山巔小徑已斷兵不能入乃令賀卓吾
帶同武舉彭春亭及親兵二名持諭叩寨託言買糧杜占元
放板橋納之甫經過橋卽以親兵守護橋頭急放號礮周瑞
松揮軍奪隘而入彭春亭手縛杜占元霎時隊伍齊至搜殺

立盡同時副將張維美叅將彭芝蘭亦將紙坊村盤龍寨韓家原各處游匪一律搜除並獲匪目劉大福斬之乃將所獲糧食牲畜俵給貧民訊之杜占元張光如李鳳先張兆霖吳東元張世顯楊林元朱洪勝等均積年哥老會匪至是一概伏誅而狗頭山賊前經郭寶昌勦敗後賊目張大仁卽張三胖子復勾結游勇士匪於延長縣東南八十餘里之小梅村南莊羊肚原等處時出剽掠四月十四日擾及白家河知縣孫永成偵悉賊蹤商請郭寶昌所部提督宋朝如副將李長勝等分路前往圍捕甫抵王家河遇掠食之賊二百餘卽奮

擊之斃賊多名生擒李根兒等十餘名白家河之賊遂遁宋朝如收隊後該匪復攻撲白河十七夜宋朝如再往圍而擊之斃賊百餘名賊敗歸巢十八夜官軍襲破馮家嶺南莊羊肚原諸巢陣斬匪目呂邦科斃匪數百名生擒王守正李金賢等四十餘名分別斬釋惟張大仁由深澗遁去二十八日竄至鄜州之牛武鎮僅殘匪百餘名經官軍擒斬二十餘名餘皆散逸無蹤自是榆林綏德延安鄜州各府州縣境游勇潰卒土匪搜勦罄盡陝西全省肅清爰籌進兵甘肅以劉松山一軍北指定邊花馬池魏光燾周紹濂劉端冕諸軍西出

合水甯州正甯以向環慶雷正綰黃鼎諸軍由董志原涇州趨鎮原崇信華亭固原李耀南吳士邁諸軍由隴州寶雞趨秦州值甘肅臬司張岳齡稟請開缺回籍卽以其所部平江二營檄令李耀南兼統左 率親兵及正營良營擬由永壽邠州長武以赴涇州飭馬德順簡敬臨馬步各軍暫駐靈臺之上良百里鎮以策應南北兩路一面大開賑恤招集流亡勸令及時墾種秋糧兵燹餘生漸欣得所先是穆圖善派軍勦辦秦州竄回失利退至清水責民捐糧甚急幾成激變左 出示解散穆圖善誤聽將領之言形諸奏牘奉

上諭穆圖善奏回逆竄擾南路撤回駐狄各軍以保完善請
飭金順兼顧山陝西北邊界並餉需維艱及出差官弁被地
方官殺斃多名各摺片覽奏均悉陝回竄逼秦州等處勢極
披猖雖經善山保等奮力衝擊立解秦州之圍而糧運不繼
譁潰堪虞穆圖善現飭駐紮各軍移紮鞏昌並於甯遠伏羌
二縣要隘分營扼守合鞏南路股匪疏通運道尙係爲事勢
所迫不得不斟酌緩急處以權宜所請交部議處之處著加
恩寬免陣亡之副將余東旺著查明請卹左宗棠聞清水民
團之變出示曉諭許以請帑賑撫禁革差徭固係爲恤民起

見惟穆圖善處餉源窮乏之地力爲其難左宗棠總當遵疊次諭旨將各省解到餉銀均勻分撥不得以空言見好於民致甘肅軍務辦理愈形棘手前已有旨令左宗棠馳至涇州接受總督關防現在甘肅南路軍情緊急著卽懷遵前旨迅赴涇州接印任事覘賊所向認真勦辦毋稍延緩金順現已進規烏拉磴口未必卽能分兵花定甯夏一帶防務穆圖善當隨時與金順咨商相機布置穆圖善所派赴楚製辦軍裝之遊擊周欽輝等行至榆林被該處地方官殺戮殆盡穆圖善以該道所稟情節支離飭令切實根究一年有餘尙未稟

覆顯有事前枉殺事後粉飾情形著劉典提集人證嚴訊確情務令水落石出毋稍瞻徇欽此左 覆陳疏云臣維陝回竄擾秦州事在上年十二月其時陝回方遞稟求撫而分起肆擾如故臣覺其詐故罷撫議當於正月十三日附片陳明奉

諭旨董志原回逆首鼠兩端現又求撫左宗棠恐其包藏禍心未敢將就了事所見甚是卽其時也甘肅攻河州各軍於上年十二月敗後正月初十日起各軍節節潰退復被回逆截斷糧道逕退至鞏昌秦州其時清水縣因派捐軍糧激變

鄉民數千擁入縣城殺差役騾櫃數人洩其怨毒仍跪知縣
傅炳森馬前明其非叛旋即出城署鞏秦階道張瑞珍馳稟
擬從嚴懲辦臣以直省征軍糧食從無責令民間供辦之事
而甘肅各軍則竟習以爲常每營每日勒民間供給一千斤
或八百斤以清水縣一縣而論養總兵敖天印一營每日須
捐糧一千斤每年須三十六萬斤視額征丁糧奚止數倍甘
肅州縣地方素稱瘠苦百姓何以堪此聞敖天印性情慘刻
異常每徵比軍糧竟創造非刑以銀箝夾糧戶鼻孔牽之以
走必待展轉哀號勒繳足數而後釋去其勇丁之擾騷萬狀

又不待言清水之民不得已請逐其防勇又因縣中差役驟
櫃助營爲虐鄉民不堪其毒始忍死出此其情亦大可哀矣
臣批張瑞珍稟咎諸軍不能殺賊偏善擾民嚴斥張瑞珍從
嚴懲辦之非出示清水宣布

朝廷德意卽引

特發帑項賑撫延綏難民一事爲徵以明官吏科派將卒橫
暴固非

朝廷意也又慮愚民藉詞干犯限令解散靜聽察辦毋許自
作不靖致底滅亡並無許其請帑賑恤之說甘肅自河州諸

軍節節潰退之後蘭州與鞏秦一帶處處梗阻諸軍潰退者雖藉詞疏通餉道然距賊甚遠遇賊卽退能護餉到省與否臣未接據文報聞各省協餉轉運入甘中途壓擱者尙有三四十萬兩之多是此時穆圖善之餉因運道中梗而絀非關臣不分潤且各省解到臣軍餉項寥寥頻催不應臣軍積欠日深西征糧臺並無存款亦實無可分潤也用兵先顧餉道轉運必取多途所防一路有阻全軍俱困甘肅奏撤慶陽糧臺臣兩疏爭之者以此穆圖善不悟臣早慮餉道之必阻梗前疏擬急籌發兵秦州者以此臣拜摺後卽由永壽邠州長

武至涇州一面咨會穆圖善派員賫送督篆祇領任事等情
此疏既入

朝廷之疑遂釋又陝西藩司林壽圖於正月內乞養交卸奏
奉

諭旨著三品銜翰林院侍講學士袁保恆接辦駐陝後路糧
臺並准專摺奏事其咨催分撥事宜均由袁保恆斟酌辦理
尤可免分撥未勻之議得以壹意西征無虞紛雜是時黃鼎
奉檄駐軍涇州探悉鎮原縣屬之安家山有土匪惠常魁嘯
聚多人肆行焚掠其附近梁家原等處遺民被其脅制因派

都司封虎臣帶勇丁先往宣諭惠常魁開鎗迎敵致外委田澤波等陣亡七名及黃鼎繼至仍令差弁陳占魁往諭復被鎗子洞穿左脅黃鼎覽山寨形勢三面峭壁下臨深濠寨踞山巔無路可上該匪等由濠中鑿竇出入兵不可近乃令各營扛運劈山礮由寨對面連環轟攻陰選士卒於兩旁開挖地道三處七日之後地雷舉發轟坍山寨右角壯士自缺口躍入立斃悍匪百餘名惠常魁傷重投井而死地窖內搜出匪黨惠勛魁等數十名拔出婦女老弱百餘名景家原寨民景之敬景之惠等乃詣營涕泣求撫匪寨遂平是役用力頗

勞以地險故也適哈密幫辦大臣景廉密陳關外情形及回
酋索煥章詭詞乞撫等情

朝廷催成祿尅期出關並催左

速赴涇州接受督篆

聖明洞燭萬里蓋有在不言之中者矣維時甯夏邊外回逆
分股竄擾旗地一由陸路攻撲烏蘭木頭經叅領德昌等擊
敗竄向西南由上中灘渡河竄入杭錦旗地仍由石嘴子竄
回邊內一由水路擾至纏金河口亦經叅領成山等擊沈賊
船該逆舍舟登陸竄入鄂爾多斯旗境其自定邊以達甯夏
東北毗連蒙地一帶經金順督營出邊勦辦自五月二十五

日親率英中選鋒衛隊各營取道札薩克郡王達拉各旗西進六月十一十二等日陸續由包頭以西七十里之昭君墳渡河因天氣炎熱蒙地水草不便遂將各營分紮什巴爾台地方探悉甯郡西岸自石嘴山直至中衛陝回節節盤踞甯夏之回實句引之蔓延一片旋接張曜緘稱行次纏金偵知迤南數十里卽有回騎游弋遂派提督楊春祥帶隊兜剿比至該處而賊已先遁甫經收隊又報賊至總之賊踞石嘴不時窺探等情金順以劉松山等旣將由花定進剿甯靈卽應會合張曜等軍徑由烏拉磴口直取石嘴山嚴剿而南以援

甯郡而收夾擊之效因催調富勒琿統帶花定各營隨勦以厚兵力是月左 率親兵各哨及正營良營進駐涇州之瓦雲驛飭劉松山於抵定邊後先辦三月軍糧至花馬池後小作停頓察看馬化澂撫局虛實及陝回離合蹤跡再定進止魏光燾一軍進屯慶陽府城及合水之板橋劉端冕分屯合水張福齊進屯甯州以西丁賢發進駐正甯周蘭亭進駐蕭金鎮就近屯墾互相聯絡而飭雷正綰黃鼎兩軍漸近平涼固原以規秦州五月十四日李輝武訶河州逆回馬步六七千人自成縣竄陷兩當卽飭所部王名滔王照南兩軍先

進自率大隊繼之而另股回逆由隴州之火燒寨進至齊家莊窺伺汧寶遂派胡國珍楊恩澤馳赴兩當以助王名滔王照南自率四營留寶雞約鳳縣知縣郭建本帶團丁堵馬嶺五月十六日王名滔等抵楊家店遇騎賊擊卻之而胡國珍楊恩澤兩營亦至遂會商共擣賊壘胡國珍由左楊恩澤由石王名滔王照南由中三路並進該逆悉眾抗拒相持久之王照南躍馬陷陣連斃數賊賊勢稍卻忽有執旗賊目喉悍黨數百斜出力堵賊仍回旗衝撲胡國珍卽從賊後殺入矛刺該賊目墜馬斬其首以徇賊大驚潰官軍悉銳環攻自己

至酉戰逾數時賊屍枕藉餘逆向徽縣竄走官軍追殺二十餘里至韓家灣收隊次日偵賊遠遁乃收隊回防是日斃賊近千救出難民三百餘名訊據擒逆藍廷和等十六犯供稱此股三千有奇由河州出徽成竄兩當頭目一爲馬阿渾一爲馬海成卽陣斬執黃旗者也其時留陝道李耀南候選道湯聘珍中書吳士邁等奉檄出寶雞清水以向秦州適有另股回逆由馬龍坡竄至清水之唐藏張家莊二十二日王名滔等抵唐藏訶賊尙踞張家莊楊恩澤趨山右拊其背王名滔胡國珍率所部伏於山坳王照南從左繞上山坡旣與賊

遇卽引軍佯退賊以爲怯傾巢出撲王照南退至山坳伏兵突起夾擊賊知中計惶恐潰退官軍三面感之自相蹈藉死者纍纍官軍躡蹤追勦四十餘里賊向吳家河竄走是役斃賊六七百名拔出難民百餘名生擒劉興林等十二名訊據供稱此股係陳藍兩逆陳逆已中鎗死等語二十六日華亭縣零股回逆周永龍率其黨千餘竄秦州之隴城擾及百花川適李耀南湯聘珍方往秦州該逆遂折而北向擾及赤沙香泉等處李輝武飭所部趨香泉自率隊赴赤沙賊聞風竄隴州之石莊子喻步蓮聞賊至派總兵蕭羣魁叅將龔曉亭

出大栗樹進勦喻光彪出咸宜關以截撒家店去路冒雨前進比至石莊賊已狂奔而過喻光彪急橫出截之僅斃尾隊數十名五月二十六日吳士邁由故關抵清水將徑往秦州中途據士民呈訴秦安之隴城鎮有回逆大股竄踞馬步四出焚殺甚慘吳士邁卽率所部往勦二十八日至隴城紳民訴稱僞元帥周瑞卽周七十自上年帶賊至此攻破康坪堡踞爲巢穴所運財物悉運河州而撫回李得昌夥黨南八營復陽受撫而陰助逆急求拯救等情吳士邁詢悉康坪堡在隴城南十七里險踞山腰東有馬家寨西有龍山寨南有馬

家河皆南八營黨眾所居之堡當雇鄉導親率兩營由高山以進派四營及馬隊由平川進直擣康坪該逆憑險設卡四營以劈山礮仰攻弗克而四旁更無他路百長羅如松游石懷憤甚率死士肉薄而上爲叉子鎗所卻如是者再三死者已十二人羅如松益憤乃裹創猛撲前者顛後者繼破卡而入刺斃悍賊多名賊始卻退官軍整隊而入忽續到黃巾賊目執黃旗揮大股衝來官軍列方陣待之該逆猛突已四次吳士邁察其氣衰急揮各營如牆而進斃賊約數百賊目猶揮眾死拒壯士胡高紳乘間擊線鎗測準擊之墜馬餘賊大

潰望康坪堡狂奔吳士邁飭兩營踰山脊截之賊狂奔不止
墜巖死者過半堡內之賊齊出將合隊棄堡而逃官軍截之
復歸堡中官軍以開花礮轟之復派馬隊飛追逃賊踰十里
斃百餘名堡內之賊復從後出竄官軍截之無及分竄龍山
馬家兩寨生擒十三名據供河州回民三十六村僞總帥穆
阿渾派周七十爲元帥帶千餘人踞康家堡希圖收割二麥
聞官軍至新添步隊前來陣前所斃卽周七十等語比經正
法軍前平燬康坪回巢出示曉諭龍山馬家兩寨並諭知回
目李得昌破其奸狡李得昌自行鈐束無復滋擾官軍先後

馳抵秦州河狄回逆已無大股出竄惟董志原餘孽竄至甯夏一帶甯夏之回導之北竄河東七旗蹂躪已遍遂由鄂爾多斯七旗竄至烏拉特三旗擾及磴口漸至阿拉善本旗經阿拉善親王貢桑珠爾默特派協理台吉阿布哩長史疊立閣爾大賴佐領多爾率吉率蒙兵擊退旋復糾集黨眾將磴口王府鋪戶民居全行焚燬遂進至沙金托海焚掠一空深入腹地肆行擄掠台吉格哩爾土厄爾德呢護衛什巡拉烏春巴雲墩等被害者數千家將台站二十六處殺害守台官弁九名四月以後糾黨數萬甯夏逆回引導撲犯阿拉善定

遠營經協理台吉沙布哩擊退復有另股竄近城南長史疊立閣爾大賴進剿陣亡次日進圍定遠營城並將城外

萬壽報恩寺及其先祖冢墓西園府第全行焚燬盤踞城南六十里張曜聞報遂會同烏爾圖那遜帶兵往援由蘭扇至察漢綽爾遇賊奮威齊進擊斃回逆甚多其紅柳樹伏賊頓起亦經官軍擊敗烏爾圖那遜探蹤至塔爾見都貢地方將回逆衝散窮追至於廣宗寺定遠之圍始解該逆仍由舊路西遁經綏遠城將軍定安奏報大蒙

嘉獎左 既抵瓦雲驛熟察甘肅情形統籌進兵次第北

路既有劉松山一軍由花定進剿甯靈其黃河以北則有金順張曜兩軍足敷剿辦南路自李輝武吳士邁連獲大捷後提督梅開泰復擊之於伏羌縣之馬家院擒斬極多餘賊全遁歸巢蘭州運道漸通因飭穆圖善所派之記名提督涼州鎮總兵傅先宗所統之喻正祥敖天印彭忠國二十四營分駐徽縣榆樹壩高橋李子園娘娘壩阜角鋪以護南路完善之區通餉運之道俾吳士邁李輝武湯聘珍等軍得以隨時調剿庶南路可有肅清之望中路零戶陝回乞撫者多飭地方官酌量安插再飭道員魏光燾進駐慶陽劉端冕分駐合

水以防環縣出竄之賊張福齊進駐蕭金鎮分防屯子鎮西
峯鎮丁賢發進駐驛馬關以防甯靈旁竄之賊一面調雷正
綰進駐固原之古城川周蘭亭進駐瓦亭以扼南北之衝惟
平涼凋敝已極民人散徙知府李超羣依土匪爲國任其蠶
食有鹽茶廳民張貴人呼之爲剛八者因忿其兄剛五被殺
糾聚黨夥迫脅良民竊踞靜甯州莊浪縣丞轄境之威戎堡
水洛城等堡破靜莊兩屬民堡五十餘處其黨侯應德破會
甯通渭所屬之黃家窰等堡二十一處秦安所屬之民堡被
破者尙不知其數聚眾至二十八營仿官軍營制部勒其曹

規模齊整與鎮原回首孫百萬句結拷掠之慘甚於逆回爲平涼秦州一大患孫百萬兄弟已爲黃鼎計擒解營正法而張貴猶鴟張如故所踞之堡居甘肅東西南北之中又係蘭州大道甯靈河狄之回往來句結以致出沒難防剿除正不容緩因飭黃鼎率所部由化平川往擣莊浪之威戎堡賊巢調前衢州鎮總兵簡敬臨由靈臺崇信以擣靜甯之水洛城賊巢而令吳士邁李耀南湯聘珍進秦安清水會剿必俟此匪殲除中路始無梗阻此時適奉進駐秦州之旨其地偏南與諸路聲息難通調度多有未便因籌駐軍之

地並籌勦機宜詳悉奏明兼聲敘督篆交卸遲速一由穆圖善酌量如有疏虞必不以未接督篆諉謝於穆圖善奉

旨報可而入甘後之局勢大定又其時平慶涇道方臻大久未來甘地方底定之餘急應遴員委署因奏奉

諭旨以二品頂戴陝西題奏道西林巴圖魯魏光燾署平慶涇道篆其慶陽府初經收復員缺未便久懸亦奏奉

諭旨以調營之浙江遇缺卽補同知謝大舒代理其安化甯州合水等州縣皆係新復均由營遴員前往分別署代責令招復流亡大開賑恤東路殘黎始有生意黃鼎奉檄捕誅土

匪張貴正籌派營前往該匪早已探知調集匪黨踞底店鎮門扇岔曹務川各隘築壘十餘以抗官軍黃鼎會商簡敬臨周蘭亭等分道前進黃鼎令所部總兵徐占彪率馬步五營連夜急馳踰山壓底店賊壘而陣賊欺其兵單嚇黨眾三面環攻徐占彪等嚴陣以待一面飛報黃鼎黃鼎卽率所部急進甫上崆峒山巔見徐占彪正在底店與賊酣戰忽另股從門扇岔蜂擁而至將鈔徐占彪之後黃鼎急令韋占雄黃有忠趙興隆胡應芳馬步各營先擊門扇岔之賊自督親兵及林定遠朱蘭亭暨大營礮隊馳擊底店之賊徐占彪見後路

齊至立督馬步分隊衝殺斬匪目高鳳翥余天喜及悍賊百餘名生擒百二十二名匪眾敗入底店第二壘黃鼎飭副將黃寶林率礮隊急攻之礮子從空墜入壘中轟斃數賊賊大驚潰棄壘狂奔各營整隊截殺猛追二十里至岳家堡賊甫入堡適胡應芳韋占雄等馬步各營擊敗門扇岔之賊陣斬數百名已將門扇岔三壘曹務川三壘一律攻破掃蕩而來岳家堡之賊益惶憊不知所措復棄壘狂竄各營合隊窮追賊屍載塗值大雨忽至乃收隊暫駐岳家堡底店堡初九日冒雨追赴莊浪城誦賊敗遁威戎堡裏脅之眾逃散過半初

十日追至威戎堡賊已遁新集子壩當將威戎堡賊巢平毀
躡追至張家小河十一日進追至新集子壩見賊沿途所棄
軍械輜重無數牲畜滿山谷被脅難民伏地哭訴棄械求
撫分別遣釋訊據供稱張貴侯應德連日狂奔黨夥盡散現
隨竄新集子壩馬建堡者不過數百人等語十二日丑刻黃
鼎率隊圍新集子堡破之斃賊二百餘名徐占彪分擣馬建
堡匪巢斬匪目石學進劉海儒及餘黨二百餘名簡敬臨抵
水洛城匪目楊文運敗遁增生史漢以被脅之兩營就撫撫
定之後卽率所部至威戎堡合隊追賊匪首張貴侯應德已

於官軍逼近時偕百數十騎先遁十三十四至二十一等日
兩軍搜斬逸匪約二百餘名據降眾供稱張貴侯應德有逕
投蘭州乞撫之意該匪等又曾接范銘來信囑其事不順手
卽往投該軍旋據會甯縣士民密稟張貴侯應德現在會甯
收集潰匪意俟官軍撤隊後仍圖起事等語及官軍拔隊以
往又復遠竄無蹤時吳士邁李耀南湯聘珍等已抵通渭南
路各匪巢已就肅清遂飭黃鼎簡敬臨等軍由固原北進劉
松山駐軍定邊據報稱前竄後套之賊因官軍進剿折回一
股仍從花馬池迤西向西南竄去又據靈州難民供稱甯夏

竄回已過東岸現踞金積堡附近一帶劉松山卽於七月二十八日整隊西行至四十餘里訶回騎有從邊牆外南竄者卽飭蘇松鎮總兵章合才道員劉錦棠率馬步各營南出擊之自率隊西行至安定堡以待章合才劉錦棠南行十餘里卽與賊遇官軍三路奮擊立斃馬賊十餘名賊駭而奔官軍躡蹤猛追二十里至天池子斃賊約二百餘名生擒二十一名並奪獲逆回所擄牲畜訊據生擒賊供此股係甘回蘇光棍夥黨二十九日進至興武營八月初一日抵磁窰訶知陝回踞靈州附近一帶與甘回雜處初二日行三十里探騎飛

報甜水河見騎賊數名劉松山以地勢甚狹飭中軍各營護
輜重緩行自率前左右三軍馬步五營前進甫至甜水河賊
騎千餘忽從兩旁山塢衝出意似繞截官軍提督易德麟李
就山知府李樹棠率所部迎頭截擊劉松山復飭提督章合
才李占椿喻執益率步隊擊其左提督余虎恩陳宗蕃率馬
隊繼之提督蕭章開曾德喜李雲貴率步隊擊其右提督潘
運璋譚上連率馬隊繼之逆回見官軍大至卽駭而狂奔官
軍分路縱擊斃賊二百餘名生擒十九名追近靈州城北二
里許城南一帶陝回悉向南路狂奔惟靈州本地回民未動

劉松山令於城南築壘是夜靈州已撫回目周斌詣營面稟
陝回敗遁靈境後分踞甘回各莊甘回畏其兇悍不敢與校
等語劉松山卽飛札金積堡馬潮清令其傳知各寨堡官軍
祇勦陝回已撫之甘回安居無恐並令周斌選派十餘人隨
隊行走傳示所過各回堡俾咸知官軍此來無他也行二十
餘里所歷各回堡均安堵如故適探騎追獲一陝回供稱陝
回昨經官軍擊敗悉歸郭家橋老巢頭目係余彥祿馬正和
馬長順等距此約六七里等語訊畢整隊齊進逆回見大軍
逼近郭家橋各莊賊眾紛紛吹角出巢馬步橫排數十團人

馬約計七八千勢甚兇悍劉松山立飭易德麟率李就山李樹棠劉錦棠率提督陶定昇易致中及五品軍功董福祥分兩枝進中路章合才率李占椿喻執益進左路蕭章開率曾德喜李雲貴進右路自率提督何作霖譚拔萃周國勝及馬隊五營由中路繼進正列隊間騎賊已從兩面猛衝而來步賊數路繼進兇悍異常劉松山飭余虎恩陳宗蕃彭緒炘率馬隊從左路之左何作霖率步隊繼之潘運璋譚上連率馬隊從右路之右周國勝率步隊繼之各營鎗礮連環開放間以炸彈聲震山谷賊中人馬紛紛倒地悍賊猶挺矛死撲數

卻數前塵戰逾時劉松山見馬賊甚厚飛令何作霖周國勝督步隊附馬隊加力猛撲自督譚拔萃及步隊各路奮威衝殺賊始大亂各營乘勢追殺敗回不敢歸巢立將郭家橋賊巢二十一處一律平毀巢內外賊屍枕藉軍械拋棄滿地悉向南趨官軍追至下橋下橋跨秦渠之上水深橋小敗賊不能遽過仍返旗回拒劉松山督馬隊各營薄之立將賊眾衝爲十餘起人馬溺斃無數渠西溝港環繞敗賊更難速遁官軍又追殺數里將近吳忠堡始行收隊回駐下橋一帶村莊計是役斃賊千數百名生擒一百十三名奪獲戰馬騾驢千

餘匹軍械數千件餘逆向金積堡一帶逃去官軍陣亡員弁
勇丁十五名章合才右膝肋中鎗子傷骨斷李占椿左腿受
礮子傷穿透其餘員弁勇丁受傷五十二名此劉松山初進
靈州郭家橋之捷也方官軍進郭家橋沿途各寨堡開放鎗
礮且傍堡列隊叫殺官兵劉松山飭各營祇追陝回置之不
理是夜馬朝清具稟到營稱陝回撫有端倪已稟知陝甘總
督署總督飭辦等語劉松山飭將乞撫情形據實具稟初四
日附近各回寨紛紛出隊向官軍索戰劉松山恐馬朝清傳
諭未遍又恐甘回驚疑所致仍按兵不動並出示曉諭凡甘

回概免勦辦初五日各寨甘回復列隊近營施放鎗礮比官軍出隊仍卽卻退初六日復列隊近營圍撲官軍營壘人數甚多劉松山始令各軍出隊擊之斃賊多名該逆敗退馬朝清迄未將乞撫情形稟覆反嗾金積堡精壯之回及擊敗之陝回踞吳忠堡一帶嗾靈州附近各寨堡回民踞官軍之後又嗾踞甯安堡四百戶一帶之陝回馬正和崔偉等前來助逆復決秦渠之水以自固而困官軍自八月初旬至十三日凡三次具稟大營僞稱代陝回乞撫稟中於劉松山兵至何處一字未及惟言署制憲已委署河州鎮總兵胡昌會由省

城來靈州飭該回首馬朝清察看陝回如果窮蹙善爲開導諭令投誠其意若惟恐不允所請者其第二次稟牘又言陝回言行相背反覆無常其求撫者引領而待命其兇悍者猶涉險而跳梁近在甯靈地面以及中衛之甯安恩和石空等堡肆擾均受其害等語至第三次具稟又稱陝回一律求撫而於前次竄至後套沙金托海磴口阿拉善定遠城犯鄂爾多斯札薩等旗之回一併在內與否中衛甯安恩和石空等處仍前肆擾與否並未明白聲敘旋據雷正綰緘報固原回民喧傳吳忠堡已被官軍擊破馬化澁急調預望城同心城

黑城子各堡回民助逆而是時固原回民果紛紛挈眷北徙游騎時越固原而南意圖阻官軍南進而以全力抗劉松山又復詭言求撫以怠官軍其奸狡可云極矣幸劉松山義正辭嚴率師急進而金順旣抵纏金卽親率選鋒英中衛隊等營前進於八月十三日直抵中灘地方就近赴沙金托海與張曜面商進剿機宜二十日後隊到齊卽由中灘拔隊而西張曜亦親督所部繼進二十三日准署甯夏鎮總兵龔良臣甯夏道陶斯咏等專差由山後至營緘稱賊勢正熾甯夏降回復形變叛城池危在旦夕請迅速撥兵援救等情金順卽

兼程疾馳徑趨石嘴山該處踞匪聞風南遁官軍嚴陣而追
一面派隊搜勦餘逆二十六日至平羅先派常福帶領馬隊
連夜密赴甯夏郡城協守二十九日抵甯夏將各營分紮附
城一帶據探報陝回大股已退屯城南三十五里之王秦王
洪等堡距城八里尙有賊壘三處九月初一日五鼓卽率各
營出其不意分投進勦該逆方圖抗拒我軍一鼓作氣三面
梯登將三壘一時攻拔適張曜亦率所部至會同進勦斬馘
極多自是劉松山督勦河南金順張曜會勦河北馬化澂雖
黠亦無所施其奸狡矣

平定關隴紀畧卷六終

平定關隴紀略卷七

同治八年秋九月

欽差大臣太子太保督辦陝甘軍務陝甘總督一等恪靖伯
左 督師駐節涇州時穆圖善雖疊奉

上諭令將陝甘總督關防交左宗棠接受仍未委員齎送軍
次而綏遠城將軍定安則特疏報甘肅降回變亂靈州失守
且上書神機營王大臣言劉松山一軍在靈州城北不分良
莠肆行殺戮以致降回疑懼陷城掠糧其竄踞上八堡一帶
陝回仍舊往來騷擾昌貴等堡回民亦叛平羅十八堡回眾

竝至昌貴等處有欲先占甯夏郡城之謀神機營王大臣亦以入告九月初六日

上諭劉松山所部兵勇前在綏德曾有譁潰之事此次輕進激變賊眾兵單儻因無食可就復蹈故轍則北路大局何堪設想著左宗棠速籌餉糈源源撥解以安軍心竝將起釁情形查明具奏不得稍涉迴護至郭寶昌一軍屢諭左宗棠酌度情形派往花定一帶與劉松山合軍前進見在靈州失陷花定等處喫緊劉松山一軍恐未足深恃著左宗棠迅飭郭寶昌移軍榆林迤西以厚北路兵力馬化澂陽爲歸順陰縱

黨與滋擾居心叵測此次變亂情形究因如何起釁卽著穆圖善查明據實具奏未幾穆圖善上疏猶以俟左進軍秦州而後送交總督關防爲言九月初八日

上諭前因左宗棠奏涇州爲適中之地可以兼顧南北當經諭令暫時駐紮並令穆圖善送交關防著穆圖善仍遵前旨將關防迅速派員送交毋稍延緩陝回逃入甘境蔓延甚廣靖遠碾伯等縣亦有賊蹤左宗棠務當分派各軍力圖掃蕩毋任四出滋擾劉松山等軍由靈州進勦近日情形若何著隨時具奏以慰塵糸省垣關繫緊要應如何布置及南路防

剿各事宜均應妥籌辦理毋得顧此失彼先是左 八月

二十九日馳報北路官軍由花馬池進剿捷狀時據劉松山
八月初八日稟聲敘厥後雖迭聞固原鎮原各屬降回及劉
松山畱駐花馬池之提督黃萬友等探報劉松山連獲奇捷
陝甘逆回震懼情形然未得劉松山續報未敢即以

上聞也九月二十五日劉松山續報駐軍下橋後戰狀始至
左 乃上疏云八月初六日劉松山下橋營次訶靈州城
甘回頭目王洪馬愛被馬化澂喉令襲踞郭家橋陝回遺巢
妄冀斷我後路因令諸軍派隊潛起擊之將至賊咸伏巢開

鎗知其怯也飭步軍蛇行從礮子密處猛攻馬軍整隊伺巢
破衝殺甫近傅巢巢中賊謹噪益甚步軍一鼓齊登賊巢火
起馬隊兩旁圍鈔斃竄出之賊四百餘名生擒五十有二其
焚斃巢內者亦幾二百方躡殺出巢竄賊忽得下橋營馳報
吳忠堡角聲齊作賊將出隊劉松山令馬隊掣轉自率步隊
繼之甫抵下橋見營前二里許步賊如林馬賊排列兩頭氣
殊驕甚劉松山令各營小憩傳餐午刻中軍鼓聲起道員劉
錦棠偕提督尹興茂張拔萃喻執益等各率所部由左路進
提督蕭章開偕曾德喜李雲貴等由右路進劉松山親督提

督陶定昇易致中易德麟李就山李樹棠由中路進留提督何作霖譚拔萃周國勝軍功董福祥各率所部居後備策應馬隊營官提督余虎恩潘運璋陳宗蕃列左路之左提督彭緒忻譚上連列右路之右均如牆而進賊亦分數路迎戰而騎賊猛從兩旁衝出勢如潮湧劉松山令董福祥率兩營附左路馬隊衝殺周國勝率一旂附右路馬隊衝殺正酣戰間步賊之悍者冒死衝突騎賊半下馬挺矛對刺官軍愈戰愈奮賊不能支右路賊勢先卻劉松山飭何作霖率所部陷陣各路號鼓齊催賊遂大潰追殺四里許忽吳忠堡有馬步賊

千餘突出似圖截官軍之後劉松山令譚拔萃周國勝橫截
而出擊之斃賊甚眾賊仍從吳忠堡北敗去譚拔萃等躡追
至吳忠堡西二里許與正路各營復合隊追勦敗賊悉遁金
積堡是日兩戰共斃賊數百生擒四十有三而余虎恩被矛
傷頗重弁勇陣亡十五傷者七十三次日分軍脩秦渠堤堰
已刻賊出馬步索戰橫排十餘里劉松山調脩隄各營歸隊
擊之追過吳忠堡二里擒斬二百餘賊亦不如先日之戀戰
也初九夜金積堡逃出漢民言四百戶陝回馬正和等股已
至金積堡議來撲營初十日黎明吳忠堡西各寨堡角聲競

起金積堡馬步大股亦至劉松山飭各軍靜以待之日中始分五路出擊令先堵步賊俟騎賊鈔出陣前則以步隊附馬隊猛擊視賊馬步混雜則各路急撲之少頃賊直前逼陣前搦戰經官軍鎗礮擊退旋卻旋前刀矛相接騎賊從兩旁鈔來官軍馬步橫出截之賊不能支紛紛敗潰官軍五路縱擊乘勝壓追八里許收隊斃賊已六七百生擒六十餘譚上連被創哨官傷者七員弁勇傷九十八人陣亡員弁丁勇二十有三蓋亦血戰矣十一日各軍壓吳忠堡而陣賊伏不出十二日吳忠各堡賊出隊依堡而陳金積堡賊亦絡繹出列吳

忠堡以南劉松山見步賊多而騎賊少心異之登高瞭望乃知騎賊已盡由吳忠堡北繞至下橋西三里許匿樹林及破堡中似圖官軍出隊後襲取營壘者劉松山飭各營分兩路專擊吳忠堡南之步賊自率五旂步隊四營馬隊分擊樹林破堡之馬賊飭董福祥兩營列隊爲策應之兵鼓聲起各營奮威衝殺步賊先奔依吳忠堡者收入堡內由金積堡來者遁回金積堡劉松山指攻之騎賊旋亦潰退惟左路騎賊數團立馬未動各營縱馬挺矛衝入賊中步隊繼之縱橫盪抉斃賊甚多夫隊分途掩殺約七里許兩路始會合收隊賊均

向金積堡一面敗逸弁勇陣亡四人傷者十七自此數日賊伏不出劉松山以暇令各營築堅寨頓輜重至十五日工竣其夜訶陝回馬正和等股迭經勦敗後未入甘回堡寨散處吳忠堡西各村莊四鼓因令各營乘月緣北面稻田塍埂繞向西南襲之逼巢賊始驚覺急傍村莊列隊易德麟蕭章開劉錦棠及未成列各督所部奮擊各軍四面蹙之因其恟懼分途猛撲立破賊巢十餘處追至吳忠堡寨南牆下步賊越濠遁馬賊擁擠不前維時甘回各堡均吹角出寨圍擊官軍之勢劉松山令譚拔萃周國勝陶定昇易致中何作霖橫出

截之賊仍敗歸各堡乘勝縱擊共斃賊計四五百生擒百二十有四弁勇亡者五傷二十一賊匿不出者又二日十七夜獲賊諜言陝回馬生彥白彥虎郭阿洪等又各率所部由黑城子半箇城到金積堡劉松山登高望之見西南吳忠堡至金積堡火光數十里不絕知賊諜言信料賊陣必寬卽定計分布擊之十八日黎明營之西南正西賊旂林立吳忠各堡亦皆出隊辰刻賊分由吳忠堡南北兩路撲近營壘結隊六七里橫列十餘里少頃騎賊直逼營前劉松山督陶定昇易致中何作霖出左路飭易德麟李就山李樹棠出右路譚拔

萃爲策應之兵擊南面之賊飭劉錦棠同尹興茂張拔萃喻
執益出左路蕭章開曾德喜王秀棣李雲貴出右路董福祥
爲策應之兵擊北面之賊飭余虎恩陳宗蕃等率所部馬隊
擊南面騎賊以周國勝步隊附之潘運璋彭緒忻等率所部
馬隊擊北面騎賊以董福祥中營步隊附之賊見官軍大隊
成列而出騎賊卽退居步賊兩旁相依而陣比官軍進至里
許騎賊仍從兩面鈔來步賊向前突陣勢頗兇悍劉松山先
擊南面之賊鏖戰時許賊漸不支易德麟乘勢大呼陷陣各
營齊進銳不可當南面賊先潰北面之賊經蕭章開劉錦棠

各督隊悉銳衝殺亦卽潰奔馬賊見步賊已敗無心戀戰官軍乘勝追殺直至吳忠堡西面敗賊併聚一路地狹不得前官軍合隊薄之擒斬千餘而陶定昇王秀棣俱中鎗傷奔傷六十八人陣亡十有七十九日金積堡出賊數千刈稻劉松山按隊不動意俟其放膽來多則擊之是夜五鼓令馬步各營分伏南北路樹林中伺之天明賊果於吳忠堡北至余家湖一帶排列騎先步後連互十餘里老者弱者牽馬驟絡繹下田割稻迨微見官軍隊伍步賊卽止騎賊仍分數路而前劉松山飛飭伏軍待東北各營將賊擊動乃分路出截分

布甫定賊已深入伏中官軍號鼓齊發騎賊驚惶勒馬不進各營乘勢縱擊賊大潰易德麟劉錦棠見東北賊陣稍卻急起截之殿後馬賊飛駛而遁步賊五六百擠陷水田中圍殺殆盡大隊壓追五里許沿途斃賊八九百擒割稻老弱三百餘縱之令歸是役余虎恩復被鎗傷甚重弁勇傷二十七亡六人二十一日獲金積堡小回目馮沅發訊知馬化澂因調崔三未到又調靈州王洪周斌兩股竝嗾河東河西各寨精壯回民多帶擡鎗小鎗集金積堡更令陝回馬正和將甯安四百戶一帶護眷壯丁悉來決戰二十五日天明金積堡逆

回數路齊出步賊排列吳忠堡左右各村濠外騎賊附其兩旁吳忠堡各賊亦列隊濠內以待少頃劉松山令易德麟李就山李樹棠劉錦棠尹興茂張拔萃分兩路由吳忠堡之左進劉松山率席大成易致中何作霖蕭章開曾德喜分兩路由吳忠堡之右進雷譚拔萃周國勝及董福祥中左兩營備策應飭馬隊營官潘運璋等爲左翼喻執益率所部步隊附之陳宗蕃彭緒炘等爲右翼李雲貴率所部步隊附之甫定騎賊漸前衝突各路官軍鎗礮齊轟因其敗退步賊之旁復前奮擊斃賊無算賊目有紅衣青馬者中礮落馬復訊

之擒賊云卽馬正和也餘賊大亂人馬擁擠墮入濠坎甚眾各軍乘勝圍逼見賊卽斫復猛追八里許計共斃賊千餘生擒百五十餘吳忠堡之賊縮退堡中逸賊均竄金積堡是役曾德喜易致中均被重傷哨官傷者十三員弁丁陣亡三十七傷者至百七十有五二十六日金積堡回又出割稻劉松山以其少不與戰二十七日獲賊謀知陝回崔三李經舉等股悉至金積堡二十八日黎明西南一帶塵氛大起吳忠各堡亦出隊南至水邊北至余家湖排列十餘里遙見羣賊多帶鋤鏟竝用矛量地劉松山揣賊屢經痛勦或圖掘濠以阻

官軍親往覘之回營卽令易德麟督李就山李樹棠等進左路蕭章開督前旗左旗及李雲貴等進右路自率席大成何作霖譚拔萃周國勝進中路飭劉錦棠居後策應三路均以馬隊列步隊兩旁別以步隊附馬隊之後比進至三里許騎賊已從左右飛奔而來步賊亦冒死前撲官軍馬步整隊禦之鎗礮刀矛竝進賊屢前屢卻轟斃殺斃無算步賊甫頓而騎賊仍與我馬隊拚死相持劉錦棠催張拔萃飛赴左路喻執益飛赴右路助戰騎賊始敗各軍乘之賊潰奔吳忠堡左右兩路追過吳忠堡西賊回拒又敗併走金積堡追殺五里

許至板橋賊墮溝塹者不可數計金積堡復出賊千餘似圖接應敗賊者劉松山飭兩路均連環收隊賊近始猛擊之收隊至吳忠堡東半里許敗賊均聚愈來愈多中軍鼓聲起各路返旗猛撲賊復大潰仍追至板橋而還共斃賊千六七百生擒八十餘賊中負創者又倍於斬馘之數而易德麟陳宗蕃董福祥張俊亦均爲賊所傷哨官傷十八員弁丁傷二百餘陣亡員弁亦三十五矣臣維馬化澂所恃以抗官軍者有二金積堡地勢居秦漢二渠之間黃流分醜舊稱沃壤足以阻水自固而困官軍一也回教有新老之分馬化澂本新教

回民與陝甘老教回民宗旨不同互相水火及與漢民尋仇生釁則彼此通同一氣無復新老之分而甘回究不如陝回之強馬化澂尤思藉以自衛始因陝回竄附代爲乞撫市德於陝回繼因陝回反覆無常又思豫爲別白以免官軍之勦其詭謀甚多蓋陝回勝固可藉以爲重陝回敗亦有辭以自解究之陽順陰逆其用心路人所共知二也劉松山自花馬池進靈州於甘回之已撫者本已豫示區別馬化澂嗾甘回陝回抗拒時初不料官軍之鋒不可犯妄思一逞以自雄迨八月初三日郭家橋大捷後初四日又遞稟代陝回求撫爲

緩兵之謀而於劉松山兵至下橋距金積堡三十里地方卻一字不露蓋欲掣臣與穆圖善准撫之批以挾制劉松山耳臣於馬化澂前稟批示勦撫機宜北路應由劉松山劉錦棠察看南路應由雷正綰黃鼎察看者以此幸劉松山燭其奸一意進勦未及一月迭將甘回陝回痛與懲創實殺賊一萬數千之多臣檄雷正綰黃鼎周蘭亭簡敬臨馬德順馬步各軍亦於陝回犯及固原時迅予埽蕩連獲大捷奸謀更阻馬化澂旋又於九月初三日具稟求撫矣臣閱其九月初三日一稟情辭尙爲哀切而緘中又附八月初六日一稟則頗以

劉松山濫殺激變爲言猶思藉辭聳聽情形殊爲可惡臣又批飭之仍擬察其誠僞以定勦撫貳則討之服則舍之務在攻心以規久遠至金積堡地勢險要陝甘官民均能言之劉松山所以得手者在於靈州速進先據下橋後五里之永甯洞得以宣泄河渠之水故能制賊而不爲賊所困觀馬化澂稟求劉松山退駐靈州及請臣委員赴靈州受撫其情可見因請卹諸戰死事各員弁竝稱劉松山速赴戎機得以潛消積年隱患忠勇實一時諸將之冠爲乞

恩復其失察游匪時所奪官而是時穆圖善仍疏極言馬化

澹宜撫不宜勦劉松山進軍吳忠堡卽爲濫殺無辜且云從此激其走險東路未定之鹽固西路已撫之肅州皆成變局河狄西甯各路更將乘機蠢動必至不可收拾蓋穆圖善疏與左 九月二十五日捷疏同日並入

朝廷仍不能無疑於劉松山十月初二日

上諭左宗棠云前因定安奏劉松山肆行殺戮致回民復叛襲踞靈城各情已諭該大臣查明具奏見在靈州情形究竟何似劉松山有無濫殺激變情事仍著懍遵前旨迅速奏聞馬化澹求撫各節原未可盡信爲真若此時靈州已失該回

自有公然復叛之心該大臣自應督軍進剿破其奸謀若已震懾兵威真心求撫前此亦無襲踞靈州之事卽著斟酌情形妥爲辦理毋令日起猜疑至甘回困窮情狀尙與陝回不同該大臣亦當悉心體察以戢兵端雖不可一意言撫而臨事決機亦不可涉以成見所請開復劉松山革職畱任處分著俟查明靈州情形覆奏後再降諭旨陣亡之提督鍾建高總兵胡玉元牛得超副將陳士標鍾宣晉龍錫玲楊朝有叅將萬名高易本集張澤友易光前遊擊李名成楊篤才劉疏元黃得祥賓義和都司徐育南章如山金崇德鍾貴德守備

趙祥友王玉順常中華陳國恆涂碧勝千總吳名填蕭其中
劉桂棠把總單洪桂熊玉貴滕加全鄧代全楊芝蓮均著照
例優卹其固原北路各軍戰狀及甘回求撫陝回南竄情形
著卽詳晰查奏以抒塵帑又據穆圖善奏稱甯靈回眾仍宜
籌撫及飭胡昌會督同馬朝清開導回民各節與見在辦法
有無窒礙亦著該大臣隨時籌辦用靖邊陲而劉松山亟進
靈州時固原各軍亦進剿北路連戰皆捷與劉松山成犄角
之勢左 九月三十日得報比已馳疏

入告矣其疏云馬化澂因劉松山郭家橋捷後浹旬又疊獲

大捷嗾甯安四百戶同心預望各堡回眾再與劉松山決戰
恐固原各軍竝進陰遣馬萬春等嗾陝甘回眾力抗南路之
師時固原提督雷正綰軍駐古城川石家溝謀報固原回民
毋仲元等被陝回白彥虎等所脅挈眷北徙金積堡白彥虎
及甘回李正榮等各股復由預望城黑城子竄入固原州八
月二十四日白彥虎李正榮卽撲雷正綰營適提督周蘭亭
自瓦亭馳至會同雷正綰擊敗之賊復嗾預望城半箇城李
旺堡各處之賊紛至抗拒中路提督銜前衢州鎮總兵簡敬
臨二品頂戴按察使銜陝安道黃鼎亦皆至二十八日簡敬

臨周蘭亭黃鼎出隊抵二十里鋪偵賊由平川兩路擁至氣
驕甚卽分三路嚴陣迎擊鎗礮轟斃賊數十雷正綰率師出
黃毛嶺壓下簡敬臨周蘭亭黃鼎麾軍猛進殺賊數百賊已
不支城中賊復護老弱竄出各軍分途橫截衝賊爲數斷敗
賊悉奔黑城子追至固原北三十里頭營地方沿途斬馘甚
眾共斃賊千有奇生擒者稱是分別斬釋後雷正綰簡敬臨
周蘭亭等誦黑城子踞逆因白彥虎李正榮旣敗一日數驚
紛紛北徙九月初三日四鼓秣馬蓐食整隊齊進行距黑城
子四里許瞭步賊聚平川騎賊布東西兩岸皆滿令步隊從

中路排進馬隊張左右翼徐行賊方分股上川抵禦馬隊馳
出黑城子之後賊眾大亂步隊薄之賊不及歸巢冒死北竄
步軍立破黑城子回堡擒斬甚多馬隊躡至界牌沿途復斃
賊數百仍回軍固原適三百戶良回穆進善報白彥虎等被
創後料禹得彥楊文治由黑城子出胡家廖坡大股屯踞距
固原六十里三營地雷正縮簡敬臨周蘭亭約黃鼎出隊自
率所部於初八日進勦偵賊已至頭營伏各破堡中步隊遂
密結方陣徐行騎兵張兩翼前進遇賊卽擊均有擒斬連日
賊且堵且退似引官軍深入者初十日黎明周蘭亭簡敬臨

雷兩成隊護輜重於楊老莊各率八成隊進勦行未數里逆
大股驟至簡敬臨飭總兵姚連陞譚正明彭壽山率隊進左
路周蘭亭飭總兵趙玉亭劉明泰知州黃立鰲率隊進右路
親率所部及廣東高州鎮總兵徐文秀縣丞吳恩榮居中參
將桂錫楨領馬隊出左路之左參將李廣珠領馬隊出右路
之右分布甫定逆以大股猛撲中路另股從左右兩路鈔來
兇悍殊常各營屹立不動俟其漸近乃連以線鎗洋鎗夾劈
山礮轟擊賊中人馬應聲而倒勢漸不支周蘭亭簡敬臨麾
左右兩路馬隊飛馳陷陣步隊繼之賊眾潰走官軍躡至三

營敗寇入堡死拒左右破堡內伏賊齊起周蘭亭簡敬臨飭
姚連陞趙玉亭等兩路出隊擊之馬隊斜鈔賊前各營愈戰
愈奮銳不可當逆越堡而遁堡外賊亦奪路狂奔其地坂峻
溝深賊人馬自相蹂藉墮斃無數各軍分途扼截斃賊八百
有奇生擒百餘訊知此股卽馬萬春所統也皆斬之敗賊向
洪溝逸去周蘭亭簡敬臨令彭壽山黃立鼇率所部憑堡扼
駐防黑城子何家溝鈔襲之賊自率所部各營前進甫行數
里聞何家溝突出一股騎賊圍撲彭壽山等營亟麾軍回援
時逆正與彭壽山等相持適雷正縮亦率所部各營馳至賊

駭而奔各軍合追將抵黑城子瞥見紅衣賊首率騎賊飛奔而前勒敗賊力鬪各軍整隊迎之馬隊亦下馬挺矛接戰斃賊數十賊勢稍卻忽紅衣賊首領數百騎疾馳突陣甚悍各軍分隊截之矛傷賊首墜馬擒訊乃陝回僞元帥楊文治狡悍異常屢以撫誤官軍者也驗視所用鐵矛重十七觔立斬於軍又追數里始收隊回營是役共斃賊千餘生擒百餘臣令函楊文治首徧傳受害諸地以徇十一日雷正綰馬德順周蘭亭簡敬臨黃鼎各畱一營駐黑城子防海城鹽茶廳預望城來犯之賊率所部馬步各隊進攻李旺堡十二日五鼓

齊由八營地進發行近李旺堡誦賊方擊脊而逃馬步各賊
列堡外思抗官軍雷正綰等商令分兵三路齊進馬先步後
賊望風而潰陣斬數十乘勢衝殺破李旺堡毀其巢賊走半
箇城馬隊躡之步隊兩路夾擊賊遇溝坎頓旗死拒各軍追
之急逆騎輒擁擠不前自相蹈藉死者無數追三十餘里至
永家莊沿途斃賊近千訊擒賊知李旺堡賊首李應春綽號
野賊老巢尙在李旺堡前五里穆家潭各軍立派步隊圍之
堡小而固賊見官軍至憑堡穩抗官軍以炸彈劈山礮仰攻
之一鼓齊登破其巢巢內悍賊數百悉誅之擒僞副元帥楊

輝雲訊知賊首李應春赴預望城求援未返楊輝雲本陝回
僞元帥李經舉之副也斬以徇其漢民婦孺則縱之是役亦
斃賊千餘生擒百餘自楊文治伏誅後陝甘各回震懼益甚
而金積堡馬化澂已屢爲劉松山勦敗乃令各堡甘回迅速
求撫以掩其勾結之奸馬化澂新教各回堡以預望城卽禹
王城半箇城卽同心堡爲最大諸回目旣受馬化澂指求撫
陝回心更不安於是禹得彥白彥虎李經舉等之在預望城
者潛率各部眾由鹽茶廳西竄約踞甯安四百戶之崔三馬
生彥及馬正和部眾金積堡所畱之陳霖等悉數西趨圖由

長流水打拉城出會甯安定南合河州之回暫延喘息黃鼎
得各土回密報卽商馬德順收隊黑城子會師追之臣所遣
總理營務處四川候補道曾傳理適至黑城子十四日兩軍
由黑城子冒雪行六十里抵黃楊坪詢之士回知禹得彥等
三日前尙踞鹽茶廳一帶聞李旺堡破始移家屬輜重於西
安堡李經舉白彥虎仍在黃家圍黃鼎馬德順會商十六日
馬隊先行步隊繼之爲犁巢埽穴之舉追六十里至鹽茶廳
見炊燼尙然知賊去未遠馬德順督馬隊又猛追四十里至
西安堡一望平川延袤數十里四面賊帳布滿見官軍馬隊

馳至老弱婦女號哭紛竄悍賊數千吹角齊出力拒馬德順
令馬軍半下馬挺矛衝殺半縱馬開鎗縱橫盪抉賊大敗殺
斃五六百餘奔黃家圍及西山一帶馬德順及黃鼎呼敦馬
隊營官胡應芳黃虎臣整隊追殺又斃賊千餘賊目死亡者
多不復成列馬德順望見前面山岔紛歧急督各營分三路
搜剿分統提督張會元進南山一路副將崇志率吉林馬隊
胡應芳黃虎臣率呼敦馬隊進北山一路自率黃旗及親兵
小隊由中路黃家圍進復追殺十餘里至劉家井路隘不容
方駕兩旁皆深溝馬德順率親兵十餘策馬前察地勢兩旁

馬步伏賊數百突出刀矛攢刺山上賊眾拋石雨下馬德順身被七創與黃旗哨官副將張顯揚各手刃數賊力竭皆死之張會元及吉林馬隊哨官全德呼敦馬隊哨官劉治均竝受重傷經各營救出折回弁勇陣亡三十餘適黃鼎率師馳至督隊勒馬回擊飛催步隊分路前剿賊始退以路狹不敢復追還軍駐黃家圍十七日黃鼎既遣黃旗小隊及副白旗送馬德順張顯揚忠骸回固原自率所部馬步各營合張會元所部副四旗馬隊崇志所部吉林馬隊由西安堡出乾鹽池進打拉城行六十里至乾鹽池謀打拉城有大股踞逆互

數十里詢降回知卽甯安四百戶由長流水西竄陝回是夜
四鼓馬步各軍急起躡之距打拉城二十里望東北山梁迤
西塵大起知賊已竄走黃鼎令左營護輜重行稍緩令叅將
林定遠總兵黃有忠叅將朱蘭亭率所部馬隊胡應芳率左
營馬隊循右路山梁進張會元崇志率所部馬隊循左路平
川斜襲打拉城後黃虎臣率所部馬隊由中路徑搗打拉城
自率副將李玉春副將何玉超等步隊繼之迨抵打拉城見
兩山開豁地勢寬平卽命馬步聯絡徐行賊誤爲鹽茶廳西
安堡來會之回適然不驚各軍亦不動聲色近賊前鼓起聲

震山谷賊出不意狂號亂竄黃鼎麾軍橫直衝突賊截爲三
一奔打拉城一奔東北山一向北面亂山狂竄李玉春何玉
超各率親兵及洋礮隊分路截擊殺賊數百墜崖斃者不可
勝計於是呼敦右營馬隊逼近打拉城逆眾憑街口抗拒弁
丁下馬開鎗轟擊刀矛手猱升而上城破逆眷輜重塞滿街
衢黃虎臣帶隊從八畜堆中衝出街口逆回馬步數千抵死
返鬪黃虎臣督勇下馬步戰李玉春何玉超等所部步隊適
至結成方營橫貫賊陣張會元崇志所部馬隊亦自左路平
川鈔出賊後夾攻斃賊無算騎賊先奔步賊則圍殺略盡矣

馬隊各營仍向西追殺其右路各營進攻東北山梁之賊甫上第一重山梁賊馬步已嘯聚一處由上壓下力抗官軍胡應芳督馬隊繞上山梁之左林定遠督步隊繞上山梁之右中後兩營步隊又從中路整隊齊進斃其悍者數十賊遂紛潰各營併上山梁齊壓而下追殺十餘里斃賊約四五百回軍打拉城行十餘里忽山口有紅旗馬賊駛至林定遠黃有忠朱蘭亭督隊截殺都司賈洪順衝入賊中礮子穿胸陣亡胡應芳怒馬陷陣步隊繼之斃賊百餘敗賊飛奔上山而逸夜分各營乃咸駐打拉城自此甯夏甯州已無陝回預望城

半箇城韋州堡各甘回均款營求撫臣已令曾傅理察其誠
僞分別辦理似甘肅北路肅清可期見檄雷正綰由半箇城
進長流水新堡子周蘭亭簡敬臨繼之期與黃鼎馬步諸軍
收夾擊之效其先竄一股十七日黃鼎所部總兵徐占彪步
隊三營已由靜甯州赴會甯截勦臣所調提督楊世俊正四
旗馬隊二十二日馳抵靜甯州二十三日馳往會甯合隊賊
如由會甯出安定黃鼎一軍及張會元崇志馬隊當先顧蘭
州省會然後進勦向河州之賊諸軍西趨其固原黑城子李
旺堡一帶新復之區見檄總兵張福齊率所部五營提督周

紹濂率所部四營分駐以重北路之防而通諸軍之氣臣料理後路糧運卽進軍平涼布置一切將來或由中路或由南路前進或緩或急屆時惟當審度機宜慎以圖之十月初七日疏入有

詔嘉獎雷正綰黃鼎竝如請

頒上方珍玩簡敬臨周蘭亭以次敘功進官有差死事之記名提督浙江處州鎮總兵博啟巴圖魯馬德順照提督陣亡例給卹賜諡建祠河南洛陽原籍及甘肅西安堡其同時遇害之副將張顯揚都司張成進董萬清熊天起把總楊大鵬

沈鳴山徐壽喜李大榮外委姚光成均優卹附祀黃鼎所部陣亡擬保都司賈洪順亦照都司優卹如例又

諭此次陝回糾眾紛擾意圖阻截官軍白彥虎等雖負創西竄難保不勾煽河州各回復行東犯著左宗棠卽嚴檄雷正綰等各率所部相機夾擊將未獲之各回目擒斬淨盡以靖陝氛竝著抵平涼後斟酌緩急將蘭州省垣及河狄防勦各務悉心籌畫馬化澂是否顯露叛逆抑係求撫緩師靈州一城如果失陷究爲何股所襲均著該大臣遵奉前旨將該城有無被陷及劉松山濫殺激變各情迅速查明具奏其預望

城半箇城各處甘回既經款營求撫卽著飭令會傳理妥速辦理但不可爲其所給致貽後患欽此是時北路軍威大振陝回之擾甯夏者河以南各股勢窮西竄河以北各股亦分竄至賀南山後經阿拉善王呈報十月初二日奉

上諭理藩院奏阿拉善親王貢桑珠爾默特呈報回匪竄擾情形請撥兵救援一摺所稱陝省董志原逆回竄入甯郡句通甯夏回匪攻撲定遠營城及竄至福因寺等處提督張曜所部獲勝各情均係在金順未到甯夏以前惟現在陝甘各回分股騷擾該親王亦風聞靈州失守是甯夏之圍雖解而

賊勢尙屬披猖阿拉善所屬之定遠營東通包鎮綏遠等處南通中衛均無險阻可守轉瞬黃河水凍尤虞該逆東趨金順勦賊現正得手著卽懷遵疊次諭旨會同張曜等軍乘勢兜擊毋任該逆盤踞城寨勢成負隅靈州情形何似著左宗棠確查具奏一面調派勁旅馳赴甯靈一帶與金順等迅圖勦洗不得以無兵可撥致逆蹤擾害蒙地復肆蔓延欽此敬譯

諭中所云包鎮卽山西邊境之包頭也密邇蒙疆故山西之防亦緊旋奉

上諭著左宗棠卽飭郭寶昌酌帶親兵前赴山西聽候李宗
羲調遣並著李宗羲督飭該提督會同李慶翱將河防事宜
嚴密布置以資得力其餘各隊仍著左宗棠嚴飭金運昌力
扼花定一帶疏通糧路兼杜賊蹤旁竄欽此郭寶昌前會奉
檄移紮榆林迤西因病未愈故此亦未能遽行旣而金順
張曜由河北會師南進甘回納萬元等糾合陝回各股在漢
渠官橋迤南一帶迎拒經金順張曜會派楊春祥等從東繞
擊並督同各軍分路鈔擊賊眾大潰悉向納申閘等處敗逃
我軍追過龍王廟南並將東西各壘攻拔據賊供賊首馬天

喜納洪均已破斬其來援新賊亦經常福等擊敗金順張曜遂於漢渠東西分紮復破賊寨兩處官軍追近納中開寨門楊春祥又拔其南面兩壘殺賊殆盡當經具疏奏聞故

上諭有云覽金順所陳大股陝回嚮集甯屬東西兩岸唐廣兩渠並被挖斷各情與左宗棠奏報不符此時甯夏界內究竟有無陝回著該大臣詳細查明具奏緣西竄陝回各股復有回竄之回黃鼎於打拉城克獲大捷後訶知向西南賊竄之賊所賸不過二千餘人馬械糧食拋棄大半由百草園郭

城驛一帶竄走圖與前竄之禹得彥等合股黃鼎將派隊窮追旋探勦敗之馬正和陳林等股尙在新堡子收集衝散賊屬慮其糾集爲患遂乘勝勦之二十一日五鼓督隊東趨天明抵王家井溝見騎賊數百往來馳騁似窺探進軍者迨見官軍旗幟微露遽擊隊狂奔黃鼎令步隊居中馬隊張左右翼前進賊伏南北兩山中見官軍整隊猛進自度不支向東敗走各營躡追至新堡子山徑開豁地平如掌馬正和陳林等列隊抗拒官軍奮威衝殺立斃悍賊數十名賊卽奔潰張會元崇志及黃鼎所部馬隊兩營追殺十餘里斃賊百餘名

步隊搜斬兩山及新堡子街內外之賊均數百名計共斃賊六七百名拔出被裹漢民千餘名奪騾馬百餘頭訊據難民供稱十八日之敗顧阿洪九社營老野阿洪擺萬海馬生彥馬正和各股死傷大半惟陳林馬長順在後聞前股大敗遂便縮退倖免打拉城之敗藍九阿洪經官軍陣斬藍九阿洪者陝回素所崇信者也陳林馬正和等敗蹙之餘仍圖折回金積堡是時陝西提督雷正紹聞陳林馬正和等有回竄之信卽率所部由半箇城向長流水地方截之二十三日行至何家口遇騎賊數百擊敗之遙見長流水一帶炊煙大起知

賊屯踞此間二十四日整隊前進適賊正擊眷紛逃雷正綰率隊衝擊殺斃悍賊二三百名賊向四百戶地方竄去二十五日提督周蘭亭率所部馳至當卽會同進勦冒雪疾馳沿途揆斬甚眾至黃河邊橋上地方探報甘回李應春率賊千餘自西路橫竄而東勢出官軍之後雷正綰周蘭亭卽掣隊分途截勦行過北口正與賊遇兩軍夾擊斃賊約數百名又追至石家溝斬賊百餘名是夜駐石家溝口二十六日仍整隊進勦行五十里至馬家河陳林馬正和等逆知官軍跟追將至先將輜重眷屬送往金積堡自率馬步悍賊二三千殿

後以拒官軍雷正綰周蘭亭結方陣擊之賊不能支紛紛潰走官軍馬步緊追二十餘里瞭見賊之輜重家小在前逆賊復回戈返鬪官軍奮威衝殺斃賊數百名奪獲戰馬駝騾數百匹軍械無數陳林馬正和二股經此次痛勦後所贖能戰之賊不過二千餘人始遞稟曾傳理處求撫並由馬化澂轉稟劉松山處願先繳軍械一半而雷正綰周蘭亭二軍遂由四百戶進駐黃渠橋簡敬臨張福齊亦進駐韋州堡與劉松山會商辦理其西竄之崔禹等逆則有徐占彪步隊二營楊世俊馬隊四營奉檄由靜甯州出會甯安定之間相機截勦

九月十七日徐占彪由靜甯拔隊起行忽接會甯縣官紳稟報前次勦敗土匪張貴侯德應等逃至會甯又聚匪黨鈔掠會甯北川攻破岳家等堡六處勢復披猖請兵速勦十九日徐占彪馳抵會甯二十日黎明出賊不意率所部兩路擊之獲匪百餘名張貴率匪黨伏地乞撫徐占彪率所部押令回靜甯點驗分別遣散二十三日楊世俊馳抵會甯詢知陝回經官軍擊敗後由會甯之郭城驛紅堡子等處紛紛西竄楊世俊於二十四日五鼓由乾溝驛繞出牛馬墩遇賊騎千餘護眷竄走楊世俊督馬隊兩旗掩擊之立斃悍賊數名兩旗

左右鈔出賊益不支追至馬家堡沿途斬馘甚眾二十六日躡追至巉口斬殿後悍賊八十餘名生擒九名奪戰馬二十餘匹老幼婦女墮巖死者無數急催徐占彪步隊速赴巉口會合以便縱擊二十九日楊世俊率馬隊抵車道嶺探知賊將眷屬輜重移紮漫窪站灘一帶而悍賊則紮甘草店大營川十月初一日徐占彪率所部步隊至巉口卽於是夜五鼓合隊齊由車道嶺出甘草店賊列隊死拒官軍整隊衝殺賊仍敗走進至大營川收隊初三日黎明楊世俊徐占彪率馬步仍分三路進追至高巖先後逃竄之賊均已麇聚徐占彪

率步軍結成方陣楊世俊飭馬隊張左右翼擊之斃悍賊百餘賊敗走步軍滾隊緊逼馬隊左右斜鈔賊勢不支分由水家坡新營兩路敗走漫窪官軍蹙之陣斬三百餘名及抵站灘地勢狹隘羣賊擁擠不前憑卡死鬪官軍亦不能施展楊世俊令所部下馬開鎗刀矛手從卡旁搶上徐占彪由兩山覓徑鈔出立斃悍賊五六百名壓追至距狄道四十餘里之漫窪十八盤始收隊而回計連日截勦殺斃悍賊千數百名奪獲戰馬騾驢千餘頭拔出難民漢回數百名初四日黃鼎率所部馬步各營及張會元崇志等馬隊馳至則賊已由狄

道河州竄去黃鼎因遵前檄先顧蘭垣再圖進剿以楊世俊馬隊四營紮安定兩營紮紅土窰徐占彪步隊兩營輔之以通蘭垣之氣以步隊七營紮會甯張會元崇志馬隊暫紮靜甯之西黃鼎暫赴靜甯點驗張貴降眾分別辦理俟事定後先赴蘭垣附近擇要安營一面由營發銀二萬兩交藩司崇保令其採購軍糧自是赴省驛道疏通蘭防益固其北路劉松山一軍雖自八月以來經定安穆圖善前後參奏濫殺激變疊奉

諭旨著左宗棠查明具奏不得稍涉迴護左於覆陳疏

內歷言戰事已詳前疏茲不復贅至甘回變亂之由係受馬化澂愚弄劉松山初至靈州時屢諭已撫回日周斌令甘回安分自保並令自左肩至右脅斜繫草繩以便識別一面出示曉諭乃拔營前進之日甘回竟敢列隊放鎗齊聲喊殺劉松山恐人未盡曉又經苦諭再三甘回抗拒如故且至撲犯官軍營壘劉松山始出隊擊之又於八月十二日據靈州逃出勇丁洪得勝稟稱靈州城內甘回將城門關閉亂殺漢民前派去護餉之副將謝榮華陳永錫續派買糧之提督曹加正副將陳明遂張福星彭友亮張細祿王榮華及勇丁七名

不知下落等情均經縷晰入

告時九月十九日也距參奏時已經兩月劉松山處疑謗之中治軍如故未嘗少渝十月十九日左

續報戰狀疏云

八月二十八夜擒獲賊探訊據供稱吳忠堡北二里許顧家寨踞賊本陝回白彥虎黨夥因屢敗膽寒約今夜四鼓移向寨後而以陝回崔三所部賊黨填踞顧馬兩寨劉松山遣人往探一面傳令步軍整隊以待四鼓前探飛報寨內火光漸出寨外火光亦漸近劉松山以兩寨相距不過數十丈飭各營分兩路向兩寨左右進一向兩寨之中進各營旗相機策

應並分布左右兩枝稍取遠勢以拒各堡援賊及兩堡逸賊
戒諸軍非近賊不得開鎗呼殺比抵兩寨前見賊方出入互
雜尙不知官軍已到也官軍擂鼓發號何作霖朱德開從兩
路衝入各路鎗礮齊施寨內外之賊均震懣失措人號馬嘶
自相蹂藉劉錦棠蕭開章乘寨門未閉揮軍直入寨內外各
賊殲斃殆盡其顧家寨南小顧家寨內賊亦慌亂董福祥馳
報劉松山立督各營分兩路鈔擊易致中乘勢破其外卡堆
薪焚門譚拔萃董福祥越壕而入堡上磚石雨下壯士肉薄
而登適寨門焚穿各營齊入寨內之賊殲焉天明收隊畱知

州李樹棠分駐兩寨其小顧家寨則舉火焚之計是戰破回寨三座斃悍賊一千二百餘名生擒一百四十餘名內賊目毛遂生郭得貴李阿滿訊畢斬之獲騾八百餘匹官兵員弁勇丁陣亡者二十六名哨官受傷者六員勇丁受刀矛鎗子傷者五十一名受瓢石傷者七十二名是日酉刻馬化澂遣人款營齎臣所批就近稟商劉松山雷正綰察看陝回就撫誠僞一件並咨劉松山公文一角並稟請劉松山停兵待其勸導陝回聽候覈辦劉松山許之令其呈繳戰馬軍械九月初三日馬化澂稟稱已諭令陝回確具冊結懇定呈繳馬械

章程力請移軍吳忠堡界外劉松山飭將馬械悉數呈繳再
議初五日馬化澂呈遞陝回陳林禹得彥余彥祿馬正和崔
巍等稟結懇轉稟臣暫緩進剿劉松山仍令將馬械悉數呈
繳再議初七日馬化澂稟繳擡鎗十桿小鎗十五桿瘦馬二
十匹並糧米一萬七千筋稟中於甘回就撫與否一語不及
劉松山知其詐嚴批申飭勒限兩日悉繳馬械初九日有遊
擊胡如東巡檢李廷光來營同稱陝回又繳擡鎗五十桿馬
五十匹存馬化澂處卽解送大營其餘馬械必俟官軍退紮
橫城方可呈繳初十一兩日馬化澂並不稟覆而賊馬四

竄似覘官軍動靜者兩夜城中脩寨掘壕如恐不
胡如東李廷光復來營申前請劉松山未准詢胡如
圖善所委催糧者李廷光則曾被馬正和所脅者劉
爲馬化澂央託而來飭仍語馬化澂將求撫真偽
稟覆然固知求撫之非誠也十三日劉松山親帶
赴余家湖察看賊壕縱營夫四出割草試賊動靜
堡馬賊蜂擁而來吳忠堡亦相繼出隊似誤以營
意圖鈔截劉松山飭營夫回營官軍列隊急調老
應騎賊欺官軍隊伍頗單結隊數十團冒死衝突

家莊兩堡排列劉松山令各隊猛撲之斃騎賊多名賊退兩堡旁開鎗死拒正塵戰閒適老營隊伍馳至劉松山飭蕭章開湯彥和李雲貴劉錦棠尹興茂張拔萃喻執益等率所部從堡右鈔出並防西南求援之賊飭朱德開李就山李樹棠等向堡北進飭董福祥兩營分附左右馬隊之後繼進賊見大隊齊至立即驚潰蕭章開劉錦棠分兩路防援賊各率所部奮勇衝殺斃賊甚多有步賊二三百敗由原路回堡劉松山麾軍截擊盡殲之乘勢縱火焚燒堡門各營將士紛紛由堡之四面猱騰而上連克兩堡堡中賊無一漏網計是戰斃

陝甘各回八九百名生擒一百三十名內有賊目馬阿忻馬
光發一併正法軍前奪獲戰馬騾驢三百八十餘匹拾取鎗
礮刀矛無數官軍陣亡員弁勇丁十九名受傷九十名賊之
連夜脩寨掘壕也意圖引秦渠水以灌官軍營壘兼爲守堡
計十四日五鼓賊於吳忠堡南決開秦渠逼水東流辰初吳
忠堡東南一帶平陸成川賊仍併力加土脩壩劉松山飭何
作霖譚拔萃周國勝由左路直攻壩西賊壘飭席大成易致
申相機策應飭蕭章開湯彥和李雲貴劉錦棠尹興茂張拔
萃喻執益董福祥張俊分兩枝由右路進朱德開李就山李

樹棠相機策應飭潘運璋陳宗蕃彭緒焯
由右路之右進防吳忠堡以北援賊並餘
漫溝則勿深進也迨各營進逼賊壘半甲
官軍奮力進攻忽西北騎賊約一二千飛
溝蕭章開劉錦棠若無所見仍攻壘如故
擊壘賊不能支持棄壘鼠竄官軍乘勢將
大溜西趨蕭章開劉錦棠急督馬步各營
走被水衝斷殿後騎賊二三百名折而北
悉逼溺急溜中無得免者蕭章開劉錦棠

堡脚吸溜甚急乘勢撲之寨中恟想無措遂麾所部掘堡脚劈寨門立將溝東賊寨攻破是戰破壘決壩共殺悍賊六百有奇生擒七十四名立予斬決獲騾馬一百四十餘匹軍械無算官軍陣亡員弁勇丁十一名受傷者五十六名十六日午刻水勢漸消各堡之賊仍加掘長壕是夜劉松山傳令各營攜鉏鍤草束三鼓出隊向水漫溝取齊馬步五隊仍布疊陣銜枚而進距溝半里賊始驚覺憑壕開鎗絡繹奔赴是時月明如晝官軍五路齊撲賊不能支一面擲草掀土平壕疊進賊向西路劉家寨王家寨陳家寨縮退劉松山令馬軍列

三才圖會卷之十一
三
隊勿前飭步軍踰溝猛躡之賊因官軍追急未及入寨紛紛
撲壕官軍乘勢掩殺之戮斃溺斃者頃刻屍積壕塹將士卽
藉賊屍躍過劉錦棠蕭章開所部兩支已鈔出賊後賊無路
可逃有退入堡者有越牆而上者官軍迅卽奪門而入同時
將三寨攻破寨內外斬殺淨盡劉松山隨飭董福祥張俊畱
所部分守之急督所部進攻王家莊梁家莊兩堡又克之天
明收隊計是役連破堅寨五座斃賊實一千五百餘名除陳
家寨回目王添玉王家寨回目馬合義於兵到特逸出外其
餘三寨頭目馬大舉馬奮剛哈得招均經陣斬生擒逆回一

百一十餘名陣前正法奪獲騾驢戰馬七百餘匹牛羊數百頭各營員弁勇丁陣亡二十二名受傷者一百四十三名此因平壕而獲大勝也劉松山軍中口糧均自河西採購由葉昇堡過渡轉運至營自賊決秦渠水倒漾余家湖運道須繞由西北行走而王家高樓張家灘各回堡適當其衝十八夜劉松山飭各營裹糧聽令並多攜鉏鍤四鼓出隊向王家高樓比相距半里許賊已驚覺宵柝乍停礮聲頓起各營齊隊撲之堡中礮石如雨而人聲喧雜殊常劉錦棠乘勢猛攻一面填壕猱騰而上賊開北門逃竄馬步各營分途掩殺逸出

者無幾劉松山卽令李就山帶所部前旂入據該寨仍親督馬步各營向張家灘北進行八里天色已明見張家灘兩寨並峙寨西三里許爲朱家寨遂令分支進攻察看寨東寨西野潦縱橫不便布陣乃飭各營魚貫而行比近堡前礮石飛注如雨壯士躍壕以火器仰攻或積薪焚門或揮鉏掘堡前者帶傷後者繼進賊漸不支是時朱家寨回堡見劉錦棠蕭章開大隊猛進卽啟西門向于家寨而遁劉錦棠蕭章開乘勢掩殺徑抵于家寨寨中踞賊亦相率西竄劉錦棠蕭章開急揮馬隊左右鈔截步隊從中路緊追賊無可逃盡由湖水

溝堯水而過水深湍急三寨之賊得登彼岸者不過百數十人而已惟張家灘兩寨賊眾因官軍圍攻甚緊無路可逃拚死堅守至巳初乃破堡而入堡內之賊無一漏網劉松山以此五寨爲北路糧運所必經飭馬隊分守候所調花定後路四營至再以步隊更替填紮仍將步隊收回老營計是戰破六寨一壘殺斃淹斃約一千七百餘名生擒二百一十三名其張家灘回目馬得貴則於堡破時生擒訊明斬決餘賊一併正法軍前奪獲騾馬四百餘匹礮械千餘件官軍陣亡員弁勇丁十六名受傷者八十六名十七日有久陷金積堡之

山西湖北各省漢民來營具保馬化澁永無反覆狀劉松山
閱其稟詞於甘回呈繳馬械及陝回投誠事並無一語敘及
引詰其故據稱伊等向在金積堡貿易被陷茲馬化澁扣其
眷屬逼令來營具保委非所願詢以馬化澁是否甘心投誠
甘回是否俯首帖伏則僉云不能知也劉松山嚴飭之十九
日復破王家高樓張家灘一帶六寨一壘老賊膽寒益可想
見以理勢論之陝回旣去金積堡賊勢已孤又經官軍連次
痛勦其迫而求撫固在意中惟馬化澁狃於從前未受懲創
仍肆狡謀其求撫也僅以陝回爲詞自居勸導之名一若未

嘗同豫逆謀者所呈繳之馬械又係派各甘回擇其疲朽不堪者呈繳希圖狡賴如果代陝回求撫豈有代匿馬械陰縱其逃之理如果甘心悔罪豈有陰藏馬械畱爲後圖之理姑勿論指喉陝甘各回力抗官軍罪狀昭著現在賊勢衰微而官軍四集劉松山已調花馬池定邊畱駐之四營前往各隊記名副都統全福所帶吉林馬隊因全福癩患甚劇委記名副都統雙壽代領西行其金運昌所統卓勝軍馬步均已行抵花馬池是甘肅北路局勢尙期穩固差堪仰慰

聖懷所有疊次陣亡之副將李洪吉叅將李明發李恆楚遊

擊李三元都司易其友鍾錦堂陳志林守備陳炳煒袁洪輝
徐玉武李華富張桂馥丁楚賢千總劉友文把總潘宗德龍
桂益劉貴發均係衝鋒奪卡血戰捐軀應請

旨交部照所保官階從優議給

卹典以慰忠魂而昭激勸所有劉松山一軍自八月二十九
日至九月十九日續破寨壘連獲大捷情形謹會同幫辦陝
甘軍務署陝西巡撫臣劉典馳報疏入奉

上諭左宗棠奏劉松山一軍續獲勝仗暨各軍勦回獲勝覆
陳靈州現在情形郭寶昌無庸折回山西各摺片覽奏均悉

陝回經官軍擊敗後竄據顧家寨等處劉松山督軍進剿馬化澂屢以求撫爲辭而賊中脩寨掘壕並未少息該軍自八月二十九日至九月十九日疊破顧家寨馬家寨各處賊壘並斬賊目毛遂生等多名現在陝回已去金積堡賊勢甚孤惟馬化澂陰蓄詭謀每以乞撫爲緩師之計若不痛加剿擊爲患更深劉松山所調花定後路四營計已早到著卽飭該提督乘此聲威合隊追剿毋任該逆從中勾結日肆蔓延如有真心悔罪赴營求撫者亦著該提督相機辦理所有疊次陣亡之副將李洪吉等均著交部照所保官階從優議卹黃

鼎雷正綰等軍在新堡等處各獲勝仗殺賊甚多賊由狄道向河州竄去現在赴省驛道已通著該大臣卽飭黃鼎等分投扼紮遏賊奔竄之路其蘭垣防勦事宜並著妥籌兼顧回人李百寬等該大臣仍當檄令曾傅理分別妥爲安撫靈州降回變亂現已收復查非劉松山濫殺所致著毋庸議副將謝榮華等下落並著查明辦理刻下黃河冰結山西河防更爲緊要該大臣旣以李慶翱爲不足恃則郭寶昌赴晉之行尤不可緩著卽檄飭該提督酌帶親兵迅赴山西金運昌已督軍赴甯條梁並著飭令迅速前進與劉松山等軍會埽賊

氛毋稍濡滯欽此左

因附片疏言續據郭寶昌稟報已

由清澗進發計此時已近花馬池若再令其回赴山西往返
二千餘里殊滋勞費已飛檄令其自行酌奪覆候具奏郭寶
昌金運昌本異姓兄弟各有其長郭寶昌爽直奮勇而紀律
難言所部又多降捻金運昌人尙樸實講求紀律而英銳不
如山西冬防喫緊李慶翔斷非勝任之人心有所知不敢不
以上

聞等語故郭寶昌進止仍待其自決而馬化澂前造蜚語聳
動當路冀劉松山退紮得以肆其披猖自蒙

聖明燭照後狡謀愈無所施前九月二十二日馬化澂復遣漢民解米糧十萬劬來營具保馬化澂永無反覆狀仍不言呈繳馬械劉松山以撫局關鍵首在呈繳馬械今馬化澂仍襲從前故智冀以甘言微利了事非誠心求撫可知察看金積堡東北馬家兩寨楊家一寨金何李丁四寨雄峙參錯深壕環繞渠流滿注其中距蕭章開劉家營壘五里是夜劉松山傳令各營攜鉏鍤草束四鼓出隊向劉家寨取齊馬步各分五路布壘陣銜枚夜行一向馬家寨進一向楊家寨進各支列陣於後以拒各堡援賊比抵寨前賊始驚覺官軍號鼓

齊鳴登時將各寨合圍寨上礮石雨下各營擲草平壕揮鋤掘堡併力攻之火器環施雷轟電掣天明楊家寨積薪著火煙燄蔽空寨中呼號喧噪壯士乘機猛進一鼓克之馬家兩寨見楊家寨已破恟息益甚各營復乘勝攻之兩寨亦相繼而下劉松山比傳令各營進攻李丁金何四寨察看李丁兩寨地勢低窪溝渠交錯飭各營運蘆葦築壩蓄水灌之未幾金積堡馬步援賊蠶至劉松山自督各營穩築壩堤派劉錦棠蕭章開董福祥分中左右三路擊之李占椿李雲貴爲接應潘運璋陳宗蕃進左路之左彭緒忻譚上連進右路之右

各營奮威衝殺賊勢不支折而西奔官軍馬步急追至秦渠邊賊中人馬擁擠橋梁忽斷殿後之賊覓水而過截斃溺斃無算餘賊向金積堡遁去各營返旗攻李丁兩寨渠水已淹逼堡腳矣寨賊勢感開西門出奔金何兩寨賊眾亦倉皇棄巢鼠竄官軍分支鈔殺斃賊極多餘賊敗歸金積堡劉松山卽令官軍分營填駐所破各寨收隊而還是役計斃回逆一千五百餘名回目馬玉喜已於堡破時格殺生擒一百餘名內有回目馬德三當卽訊明正法奪獲騾馬五百餘匹器械無算官軍陣亡員弁勇丁二十七名受傷者一百七十一名

是日吉林馬隊及留駐花馬池定邊四營來下橋會師詢悉提督黃萬友副都統雙壽於十六日道出橫城時適探南路有騎賊駛至意似迎抗官軍黃萬友督步隊雙壽督馬隊張左右翼迎擊馬賊結數十團猛撲而來氣殊驕甚官軍奮力壓擊鎗礮刀矛齊進賊敗退追逐十五里始行收隊計斃賊二百餘名奪獲戰馬五十餘匹器械甚夥官軍陣亡勇丁十名受傷十二名劉松山以該逆於竊踞靈州後因官軍未加懲創自謂得計此次仍敢截阻後路之師應予痛勦二十四日先諭馬化澂令靈州踞城叛逆速出就撫免其勦辦二十

七日馬化澂始具稟來營仍請寬限劉松山知其詐嚴飭之
訶靈城賊留精壯守城並引陝回入城助守其眷屬輜重則
已於先日潛移金積堡矣二十九日五鼓劉松山傳令各營
裹糧夜起仍分五路布壘陣向靈州進架橋過清水溝行數
里時已巳刻瞭見城南卡壘甚堅賊旗林立左右野潦縱橫
淺者猶及馬腹劉錦棠蕭章開分左右路鳧水而進劉松山
督各路直擣中堅抵城南五里團圓寺卡各營鎗礮仰轟拔
去茨藜架木爲橋踰壕而上克其外卡餘賊向南門外里許
之石壘竄遁官軍緊躡之忽城東塵氛大起突出馬賊千餘

向西南馳突意圖鈔截劉松山飭余虎恩馬隊擊其左雙壽
馬隊擊其右董福祥步隊副之騎賊撲近陣前官軍馬步相
依縱橫盪抉斃悍賊數十名敗賊折向東南飛奔各營追殺
十五里維時劉錦棠蕭章開已鈔近附城之卡壘旁矣城賊
開南門出卡拚死拒敵劉松山飭黃萬友周國勝朱德開李
就山知州李樹棠奮力圍攻城南石壘自督陶定昇易致中
伺作霖譚拔萃從中路猛進鎗礮環攻雷轟電掣賊勢不支
爭入卡門拋棄器械自相蹂踐劉錦棠蕭章開乘勢奪卡而
入敗賊縮退城中各營躡蹤搶入見賊卽斫城賊開東北兩

門狂竄官軍分道躡之追殺五里天色已向晚矣收隊回城
其南門外石壘踞賊三百餘名經黃萬友攻破擒斬無遺是
役實斃賊一千四五百名生擒二百七十三名訊明賊目馬
元生馬致和郭有利正法軍前拔出漢民男婦七百餘名奪
獲騾馬千餘匹器械千數百件官軍陣亡員弁三十一名受
傷一百八十一名是夜訶靈城敗賊踞城東迤南十里之海
子墩買家莊十二里之馬清兒羅家橋四寨劉松山留營駐
防靈城親督各營四鼓出隊派劉錦棠蕭章開向海子墩進
自督各軍向買家莊進傷馬隊伏左右兩路並戒步隊如未

破寨則列隊勿動也。部署既定，軍士銜枚疾行，直薄寨下。賊始驚覺，中軍搥鼓發號，火器仰攻寨上，亦礮石雨注。軍士擲草拋土填壕，而過焚寨門，掘堡腳，四面擁登，立將海子墩買家莊攻克。該兩寨回逆，四五百名悉數殲之。其馬清兒羅家橋兩寨踞賊見火光如晝，喊聲震地，礮轟如雷。知官軍已破海子墩買家莊矣，遂開堡門從東南狂竄。余虎恩雙壽馬隊左右鈔殺壓追十八里收隊而還。是役斃賊六百餘名，生擒四十二名，訊畢於軍前正法。拔出漢民男婦二百餘名，奪獲騾馬三百餘匹，器械多件。官軍陣亡員弁勇丁十四名受傷。

五十八名劉松山進城後察看城內倉廩廟宇官廨民廬半成灰燼瓦礫塞道飭黃萬友李樹棠移兩營駐之將節次拔出漢民安插城中設法撫輯一面招徠漢民認產復業初一日自率馬步各軍收回下橋老營營東十里爲里仁渠大小兩寨迤西兩莊迤北里許爲趙家寨迤東二里爲楊家三寨楊家寨迤北三里許爲馬家兩寨賊踞其中劉松山是夜傳令各營四鼓出隊分支向里仁寨趙家寨進自督中軍相機而動令馬隊伏東南二三里防西南援賊劉錦棠蕭章開抵里仁寨半里守賊見官軍至大寨礮聲起小寨之賊倉皇出

巢蠃附大寨各營乘勝跟蹤奪門而入賊眾死鬪鎗礮對轟壯士從寨後肉薄而上寨內之賊狂號出奔官軍一鼓擁入寨門敗賊無路可逃有墮牆而殞者有投井而斃者守賊約四五百名蒐雉殆盡劉松山乘勝督眾進楊家三寨令朱德開李就山董福祥圍趙家寨拔之守寨之賊約三四百名僅逸出馬賊數十騎餘盡殲旃楊家三寨之賊見各寨火起開門向正東狂竄陶定昇易致中何作霖周國勝兩路鈔殺逼入山水溝淹斃無算餘逆折回東南敗走天色已明忽西南塵氛蔽空突有騎賊二千餘來勢兇猛劉松山派劉錦棠蕭

章開督隊進正東攻馬家兩寨自帶步隊攔頭迎擊飭馬隊左右鈔之悍賊死拒不退馬家寨之賊經官軍攻破紛紛出寨亂竄賊眾返顧慌亂亦向西南潰走各軍四路掩殺陣斬步賊三百餘名收隊而還是役共計斃賊實一千四百餘名生擒一百一十一名內有賊目趙萬辣馬幅意訊畢斬之奪獲牲畜器械不可數計官軍陣亡員弁勇丁十八名受傷九十四名方劉松山之入靈州也馬化澂來稟靈回正在出城忽有南來陝回乘閒進城焚掠請示遵辦並央派辦撫局之總兵胡昌會請於甯郡五屬擇地安插意在飭其句結之謀

不意劉松山於九月二十三日破馬家寨時已撥出馬化澂
九月十三日給偽叅領馬三重吳天德楊長春等糾眾抗拒
偽札一封偽銜列統理甯郡兩河等處地方軍機事務大總
戎鈐以偽印其狂悖之狀陰校之謀已經敗露也陝回馬正
和陳林等股及從前雜匪金積堡之鄒保和沙學德等初七
日經劉松山痛勦勒令悉數呈繳戰馬軍械而雷正綰周蘭
亭於初八日由四百戶馳抵鳴沙洲訶張恩堡東西四堡爲
馬化澂先鋒袁希孟所踞初九日兩軍整隊齊進先攻東面
依崖兩堡破之斃賊二三百名釋其老幼婦女獲戰馬六十

餘匹袁希孟卽率西面三堡泣懇收撫願將馬械悉數呈繳雷正綽等受之正點驗閒忽見賊騎數百急馳而西雷正綽等列隊堵勦賊不意大軍倏至駭愍失措官軍馬步急擊之斃賊約二百名奪戰馬三十餘匹訊擒賊供始知此股卽馬正和馬長順之黨初七日經劉松山擊敗者也雷正綽由張恩堡進滾泉壘水適簡敬臨張福齊兩軍自韋州前來合隊行過強家沙窩擇要分駐秦渠內外距金積堡皆不過十餘里左 因慮事權不一檄飭進止機宜均候劉松山商酌定奪所有劉松山一軍九月二十三日以後收復靈州城池

並疊獲大勝情形經左 於十月二十六日具疏馳奏並
請將打仗陣亡之記名總兵楊玉賢補用叅將趙盛國陶昭
福補用遊擊杜雲龍補用都司張貞吉拔補守備謝福有李
應有拔補千總許育萬劉占魁唐國政何義勝拔補把總鄧
寶得張先發周陞祥周以則等請

旨飭部各照官階議給

卹典記名提督易德麟進攻吳忠堡一帶逆回連破寨壘數
十處因左乳受擡鎗子傷殞命另片陳懇

天恩飭將記名提督格洪額巴圖魯易德麟照提督陣亡例

給予

卹典並懇

賜諡

恩准建祠湖南湘鄉縣原籍及甘肅靈州地方以妥忠魂又另片奏查明靈州失陷時前代理靈州知州尹泗暨其弟藍翎從九品尹溱並家丁眷屬十餘口現署靈州知州候補同知鍾蘭並其子鍾爾規皆同時服毒自盡前派去護餉之總兵曹加正副將陳明遂辦糧委員副將陳永錫謝明華張福星彭友亮參將張綢祿副將王榮華隨去勇丁七名均被賊

害叅將馬福守備李繡春吏目黃廷輝約同出城赴營求援途中遇賊李繡春力戰捐軀此次官軍克復州城卽派馬福黃廷輝作爲前導所有死事諸文武均請照陣亡例議給卹典叅將馬福吏目黃廷輝聞變出城求援旋導官軍克復可否免其置議出自

天恩至劉松山此次蓋勞經金順同時具奏特奉

上諭前因左宗棠奏提督劉松山勦辦靈州回匪連獲大捷請將該提督失察游匪一案革職留任處分懇恩開復等情當經諭知該大臣查明靈州失守情形再行降旨茲據金順

奏稱劉松山到靈州後勦撫兼施現已將州城克復勦辦甚
爲得手等語與左宗棠所奏大略相同劉松山向來打仗甚
稱得力此次勦辦靈州回匪尤能速赴戎機謀勇兼備劉松
山著准其開復革職留任處分其前案內失察之分統營哨
各官均皆隨同打仗著有微勞著一併免其查參此外出力
各員著准由左宗棠擇尤保獎毋許冒濫欽此至是馬化澂
詭謀全行敗露劉松山所遭疑謗渙然冰釋北路軍情益穩
可以漸次圖南矣適南路道員李耀南湯聘珍提督梅開泰
涼州鎮總兵傅先宗提督敖天印喻正祥彭忠國等扼勦河

狄竄回連獲大捷左 因會銜馳奏並片陳初七日劉松
山獲勝大概情形並聲明拜摺後卽日進駐平涼又以南路
總統需人疏請前護福建巡撫署福建布政使周開錫駐劄
秦州分統各軍兼籌糧餉旋奉

上諭云左宗棠穆圖善奏官軍迭勦河狄竄回獲勝請將出
力陣亡各員弁獎卹左宗棠奏北路官軍克復靈州請將總
兵楊玉賢等優卹並知州尹泗等陣亡情形及進駐平涼令
周開錫總統秦州各軍總兵易德麟陣亡請卹金順奏勦辦
甯夏南路踞逆獲勝請飭山西添撥協餉並查明劉松山收

復靈州情形各摺片覽奏均悉本日已明降諭旨開復劉松
山前案處分並將總兵易德麟副將李大勝等分別優卹矣
甘肅狄河回逆糾合陝回崔三等餘黨出巢肆擾經穆圖善
派傅先宗進剿獲勝左宗棠又檄李耀南等敗賊於李家灣
一帶斬獲甚多其甯夏南路回匪楊士恭等句納陝回援應
納王各寨又經金順張曜督軍迎剿迭獲勝仗剿辦均屬奮
勉現在陝境肅清各匪已無立足之處勢必要挾甘回苟延
殘喘如能將河狄各賊巢逐一攻破斷其黨援則剿撫皆易
得手著左宗棠仍飭李耀南等及前派出之黃鼎各軍乘機

進勦毋稍鬆勁一面嚴檄南路在防將士實力嚴防以免顧此失彼穆圖善亦當札飭傅先宗等與該軍聯絡聲勢迅掃逆氛納王各寨爲回逆負固之區仍著金順會同張曜迅圖攻拔毋任憑險死守阻截官軍所有迎勦回匪陣亡之都司唐治能王振清守備楊宗英千總李集成擬保把總高齡均著交部各照官階議卹出力員弁准由左宗棠穆圖善擇尤彙保左宗棠奏查明靈州失陷文武下落情形請將各員議卹免議等語代理靈州知州尹泗卽選從九品尹溱署靈州知州甘肅候補同知鍾蘭及總兵曹加正副將陳永錫謝明

華陳明遂王榮華張福星彭友亮參將張細祿均著交部照
例議卹署靈州叅將張福吏目黃廷輝均著免其置議其劉
松山收復靈州情形與本日金順所奏大略相同該大臣現
擬進駐平涼著卽懷遵前旨將能否馳赴蘭州情形迅速具
奏回目馬化澂旣給與馬三重等僞札是其狂悖之情業已
敗露而又求總兵胡昌會保其永不反覆並力保陝回呈繳
馬械前後兩歧殊難憑信卽著該大臣嚴飭劉松山乘此軍
威迅圖掃蕩該逆如實係真心乞撫仍著左宗棠責成劉松
山相機妥辦不可爲甘言所誘輕率收撫轉遂姦謀周開錫

既馳赴秦州派令總統諸軍卽著檄飭該道將南路兵事餉事認真整頓以資臂助北路勦撫事宜著卽飭知雷正綰等與劉松山商推以免紛歧劉松山所部陣亡之總兵楊玉賢叅將趙盛國陶昭福遊擊杜雲龍都司張貞吉守備謝福有李應有千總許育萬劉占魁唐國政何義勝把總鄧寶得張先發周陞祥周以則均著交部各照官階從優議卹金順所請添撥協餉本日已諭知李宗義照數撥解矣欽此先是南路禮縣等處於八月間進勦克捷經穆圖善具奏十月二十九日奉

上諭云甘肅禮縣所屬地方於本年八月間被回匪滋擾經提督喻正祥親督兵勇節節進剿殺賊多名現在崖城等處已無賊蹤卽著加意防範毋稍鬆懈其駐紮中衛之貴字三營著照該將軍所請飭令總兵黃金山接統將前募城防之勇補足三營額數另集團隊二百名悉聽金順節制所需餉項著左宗棠飭令西征糧臺將黃金山所統三營並團隊二百名按月接濟穆圖善懍遵前旨將總督關防迅速派員齎交左宗棠接受以專責成欽此蓋深念甘肅糜爛已久非左不能肅清而省會根本之區尤資坐鎮十一月初二日

續奉

上諭云前據左宗棠奏稱驛道疏通並令黃鼎先赴蘭垣附近擇要安營此時北路情形計已粗定該大臣得以進規河州矣本日據穆圖善奏派員齎送總督關防前赴涇州軍營該大臣諒已在途祇受惟念蘭州爲根本重地該大臣接篆後於防勦一切事宜自係責無旁貸現在河州等處賊巢林立近逼省垣卽使黃鼎各軍皆能繼進亦不可無人指授機宜穆圖善旣卸督篆凡西路軍情及地方公事均覺呼應不靈該大臣能否卽由平涼親赴蘭州居中調度抑或先行派

人前往接辦或以接辦乏人仍留穆圖善暫駐省垣照料軍務該大臣酌度情形著於接奉此旨後迅速詳細奏聞欽此誠鄭重其事也維時左 已先於初一日進駐平涼本日所具之疏猶未達

上朝廷因穆圖善之奏復降

諭旨云穆圖善奏靈州降回變亂大概情形請將殉難文員優卹並暫委寶型護理安肅道篆各摺片覽奏均悉前據左宗棠金順奏劉松山收復靈州情形已降旨將署靈州知州鍾蘭等交部照例議卹前因馬化澂有給馬三重等偽札情

事又代陝回甘言求撫前後兩歧殊難憑信諭令左宗棠嚴飭劉松山等乘勝進兵相機妥辦該大臣務當懷遵前旨督率劉松山等軍分別良莠勦撫兼施不得輕率收降致墮詭計左宗棠計已進駐平涼能否馳赴蘭垣居中調度仍著迅速具奏穆圖善蒞甘數載熟悉情形現在甯夏防守緊要該將軍既已交卸督篆著將省城防勦事宜布置妥協俟左宗棠到省或左宗棠派員接辦有人卽行前赴甯夏本任以重職守所請來京陛見之處著毋庸議所有穆圖善原部各軍均著歸左宗棠調遣甘軍餉項並著該大臣均勻分撥以利

師行毋得稍分畛域安肅道員一缺穆圖善現據肅州鎮總
兵陶生林稟請暫委四品頂戴寶型護理該員係已革知縣
資望太輕恐不足以勝任著左宗棠察看如果不能稱職卽
行另委妥員前往接署欽此左 蒙

朝廷信任之專至於此極雖逆回尙稽

天討而釜底游魂終難漏網已可於此決之矣

平定關隴紀略卷七終

平定關隴紀畧卷八

同治八年十一月初一日

欽差大臣太子太保督辦陝甘軍務陝甘總督部堂一等恪
靖伯左 由涇州進駐平涼部署既定具疏報

聞並詳北路各軍戰狀疏云竊劉松山一軍十月初七日勦
賊獲勝大概情形已於十月二十六日附片陳明其時僅據
劉松山緘告故戰狀不詳拜摺後已於十一月初一日進駐
平涼續接劉松山牘稱九月二十九日克復靈州城池及十
月初二日連破里仁渠各寨賊益震懾馬化澂央總兵胡昌

會保其永不反覆並力保陝回誠心就撫劉松山屬胡昌會
飭馬化澂勒令陝回將馬械悉數呈繳去後訶秦渠南板橋
馬家兩莊納家三寨丁家兩寨劉家灣子三莊馬家灣子四
莊何家兩莊迤西蔡家橋蔡家四寨余家兩寨西南達金積
堡村莊鱗次陝回麴集其中人眾心雜投誠之議連日不決
催繳馬械則一味支吾劉松山以該回兇狡成性仍宜乘間
痛勦懾服其心初六日四鼓傳令各營分三路布疊陣一由
左進板橋一由右進蔡家橋自督中軍出板橋蔡家橋之間
馬隊張兩翼伏左右兩路之旁穩駐勿動俟步兵破賊則飛

分道鈔之部署既定各軍進抵渠南半里許賊巢角聲四起紛紛憑渠放鎗礮提督何作霖軍功董福祥各營撲近渠邊鎗礮對轟流光電掣賊仍死抗不退劉松山察看渠水深者及膝深者沒腰飛令道員劉錦棠提督蕭章開督軍搶過橋卡分枝由左右路梟水鈔擊中軍步隊亦越渠撲之賊潰向東西兩路狂奔適提督余虎恩副都統雙壽馬隊風馳雨驟而來截其歸路逆賊未及歸巢守巢之賊見官軍四集棄巢鼠竄爭出寨門西遁官軍乘勢奪門而入立將大小莊寨三十餘處一律蕩平賊巢有冒死逸出者有圍殺殆盡者

餘黨經各路馬步四面兜剿合併西趨波浪湖一水前橫逆
眾擁擠不前官軍火器環轟賊中人馬應聲而倒填積湖中
湖水盡赤官軍緊躡至金積堡外馬隊追過堡西敗賊由西
折而南向強家沙窩遁竄各軍卽分營填紮金積堡東北四
里何家莊板橋一帶劉松山卽移駐距金積堡十四里之劉
家寨是役殺斃淹斃之賊約二千有奇生擒二百八十四名
內有賊目馬福李逢昌馬滢訊畢斬之獲陝回老弱眷口六
百餘名拔出漢民數百名均派送靈州城交提督黃萬友妥
爲安插奪騾馬九百餘頭器械無算官軍陣亡員弁勇丁十

六名此十月初七日官軍進勦逆回攻克莊寨大獲勝仗實
在情形也是夜馬化澂復央胡昌會來營乞撫次日復代陝
回繳馬七十七匹洋鎗十七枝長矛一百三十二桿其餘馬
械隨後呈繳劉松山勒限三日待之自後屢次催繳僅據馬
化澂代繳破壞軍械數百件疲瘦馬騾數百頭詞愈卑而計
愈狡陝回頭目馬正和余彥祿方懇收撫而陳林馬長順則
不願繳馬械如故維時雷正綰周蘭亭簡敬臨張福齊各帶
所部於十二日馳至逼渠築壘距金積堡遠者十餘里近者
七八里胡昌會馬化澂力保陝回就撫藉稱該頭目及黨眾

實因官軍勦敗衝散一時難於清繳馬械乞寬時日悉數呈繳嗣陸續繳馬三百四十七匹鎗械八百十九件二十七二十八等日續繳馬四百三十五匹器械二百五十一件劉松山以該逆人眾心雜若必全數收撫恐輾轉需時又生他故因吳忠堡一帶甘回均已避匿金積堡所遺各堡已空令願就撫者呈造冊籍移居吳忠各堡悉繳馬械以便安插馬正和於十一月初二日先移男婦二百餘名入吳忠堡其餘正待遷移而陳林之黨東弭回眾從中截阻卽馬正和黨夥之嗜亂成性及眷口已被官軍衝散者無所顧戀亦復頓翻前

議互相阻撓各逆首不能禁也劉松山以輕率收撫必貽後患初三日飛緘雷正綰周蘭亭張福齊簡敬臨等各整隊會勦適金運昌所部已先數日由花馬池靈州馳至是日午刻約齊出隊行抵板橋各逆回知官軍進勦均由金積堡旁各堡寨吹角列隊紛紛抗拒劉松山屬金運昌率所部向金積堡西門進自分所部爲三支蕭章開王秀棣李雲貴楊清源朱德開由右路向金積堡之北劉錦棠尹興茂李占春喻執益曹義勝董福祥張俊李雙梁由左路向金積堡之東陶定昇易致中何作霖出中路劉松山自率譚拔萃周國勝李就

山爲壘陣相機策應馬隊張左右翼斜出三路之旁逆回見
官軍布陣更寬騎賊各飛奔向前步賊仍縮朒不進官軍馬
步奮威擊衝鎗礮甫止刀矛手如牆繼進立斃悍賊數百賊
大潰不止官軍縱橫盪挾將金積堡正北東北西北賊踞村
寨二十餘處一律盪平日暮收隊卽於金積堡北四里一帶
安紮營壘計是役共斃賊一千一二百名生擒一百三十餘
名訊出逆首馬受元馬中吉正法軍前奪獲騾馬八百餘頭
軍械無算此十一月初三日劉松山各軍會合金運昌一軍
勦回獲勝情形也自是日以後雷正綰張福齊周蘭亭簡敬

臨各軍皆如約會勦惟中隔金積
堡旁各堡寨湖渠環繞占地周數
故彼此戰事未能盡歸一致是夜
各頭目議將眷口輜重併歸金積
戰劉松山與金運昌商賊旣肯來
勢分布應之初四日巳刻金積保
巢而出步賊甫出半里卽止不前
劉松山飭馬隊四營嘗之遇賊攔
則各路奮起猛擊比各軍馬步工

近前然後中軍吹號擂鼓各軍奮威前進賊勢不支紛紛敗潰五路馬步官軍乘勢衝殺斃賊無算敗賊回竄各巢寨死拒其殿後者經各營掩殺壕內外屍首駢列日暮始收隊而還是役東西兩路共斃賊八九百名劉松山所部生擒八十二名獲戰馬二百數十匹員弁勇丁陣亡二十一名提督李雲貴右臂受鎗子傷譚上達右胯受鎗子傷弁丁受傷者一百一十三名此十一月初四日劉松山金運昌各軍獲勝情形也是夜訊生擒回逆知余彥祿左臂已帶子傷悍賊傷亡不少擬卽乘勝會勦迅期蕝事而連日朔風甚勁沙塵大起

咫尺莫辨不能出隊初七日風稍定劉松山會商金運昌出隊斃賊約四五百名生擒六十餘名奪獲戰馬一百六十餘匹弁丁陣亡十一名受傷六十五名劉松山以賊圖死守擬再移營逼之初八日一面出隊一面築壘賊拚死來爭官軍護脩新壘分隊轟擊斃賊三四百名生擒數十名弁丁陣亡者七名受傷者四十六名是夜賊徙巢金積堡東西各堡以避官軍東路賊勢加增復就波浪湖堰脩築長牆一道橫寬約三里劉松山旣約西路南路諸軍初九日會勦黎明會商金運昌出隊賊憑牆排列意圖死拒金運昌率所部卓勝軍

西進蕭章開等率所部出卓勝軍之左劉錦棠等各率所部由左路進朱德開各率所部由右路進劉松山率陶定昇易致中何作霖周國勝由中路均向波浪湖長牆進譚拔萃等率所部頓於陣後相機策應余虎恩率馬隊五營斜出劉錦棠之左雙壽花良阿等率吉林馬隊斜出朱德開之右賊見官軍數路整隊向長牆齊進騎賊皆下馬與步賊憑牆列隊官軍奮攻半時鎗礮雷轟噴筒火箭並注賊中傷斃已多猶死拒不退劉松山飛飭董福祥余虎恩等馬步各營繞東而西突出卡後賊勢始亂各路馬步乘勢齊撲立將長牆一律

踏平賊敗竄金積堡旁禮拜寺官軍躡蹤緊追忽大風捲地塵沙驟起敗賊復傍寺列隊回拒而金積又出賊一股約七八百循牆而來似圖截官軍之後劉松山令朱德開李就山馳擊敗之賊仍向正路敗走官軍各路愈戰愈奮鎗礮刀矛並進賊旋卻旋前者七八次均爲官軍所敗始棄巢而奔遂將禮拜寺攻破賊敗入寨時交申刻風勢愈緊乃收隊西還計是役攻破長牆回寺陣斬悍賊七八百名轟斃殺傷者約一千數百名奪獲馬騾二百數十匹鎗械千餘件生擒百餘名訊出賊目馬九林陳萬德兩名一併正法員弁勇丁陣亡

二十七名提督易致中左眼角受鎗子傷從口內出軍功董
福祥右肱肘被鎗子洞穿弁丁受傷者一百八十一名是日
南路雷正綰周蘭亭張福齊簡敬臨均力戰獲勝簡敬臨銳
欲與劉松山合隊率所部隊伍繞波浪湖傍金積堡及各寨
穿過致敗劉松山時已收隊回營不及知也初十日辰刻劉
松山令陳宗蕃由南路赴西路各軍計事晤幫辦簡敬臨營
務處廣東高州鎮總兵徐文秀始知之回馬飛報劉松山駭
悼不已立撥三營移駐金積堡東北波浪湖尾一面緘商雷
正綰周蘭亭張福齊出隊會剿十一日劉松山與金運昌仍

分兩面出隊劉松山親率五營馬隊馳赴金積堡東南簡敬臨營盤所駐漢伯堡適雷正綰亦到晤商一切詎賊探知劉松山赴漢伯堡突出騎賊千數百遮截歸路劉松山當卽督隊馳回騎賊數十團猛撲近前勢甚兇悍劉松山指揮迎擊正鏖戰間劉錦棠蕭章開瞭見督馬步各隊由南路橫截而出賊卽潰走劉松山追至各寨堡邊擒斬悍賊百餘名奪獲戰馬七十餘匹收隊回營十二日賊伏巢不出是夜西南兩面悍賊麇聚東西取磚石脩砌長牆自金積堡外壕迤而東約長三里又迤而南至波浪湖汊約里許以拒官軍十三日

劉松山飭各營出隊擊之賊憑牆穩抗鎗石紛如雨注官軍
五路馬步齊進劈山洋鎗噴筒火箭次第齊施賊中死傷已
多猶隔牆挺矛對刺官軍見其鎗子磚石漸稀卽鼓勇齊登
或聳身躍入或掘毀牆身從缺口搶入賊勢不支紛向各寨
敗遁官軍壓追至寨旁寨門未啟賊皆依寨拚死回拒寨上
開鎗拋石助之官軍奮威衝殺前者帶傷後者繼進鏖戰兩
時斃悍賊無算賊紛向金積堡南敗走一枝敗向堡東壕內
官軍躡蹤掩殺壕內外賊屍枕藉日暮收隊是役共斃賊一
千六七百名轟傷刺傷之賊約二千數百名生擒一百五十

四名內有逆目馬辛馮標郭阿忻等數名訊知僞元帥沙學德已於牆破時轟斃矣奪獲戰馬二百三十餘匹旂幟鎗械千餘件記名提督李就山帶隊衝入賊中胸膛受礮子傷立殞於陣提督朱德開右膛受鎗子傷軍功張萬會右肩受擡鎗子傷弁丁受傷者二百四十六名陣亡者三十八名此十一月十三日以前官軍屢獲勝仗實在情形也臣維陝回陳林馬正和余彥祿等自打拉池擊敗折回金積堡時悍賊不過數千老弱婦女則不計其數馬化澂代爲求撫而不悉繳馬械其包藏禍心可知經劉松山雷正綰及各軍屢次猛勦

警賊多矣而賊數不減反增於前吳忠金積爲靈州西南著名兩大堡吳忠堡雖早廢而環吳忠二三十里堡寨土人皆呼爲吳忠堡金積堡亦然環金積各堡寨亦呼爲金積堡劉松山疊將吳忠各堡寨攻毀略盡卽金積堡北面一帶各堡寨亦已掃蕩一空現存者惟東西十數堡而已陝回敗蹙併入金積東西各堡與甘回雜居其預望韋州各堡甘回曾經官軍擊敗者從而附之馬化澂又時嗾堡中回逆於夜間入東西各堡潛助逆賊數之所以已耗而旋增者以此陝回於屢敗之後意本求撫其喪失眷口之賊以無所繫戀仍思乘

冰橋北竄效捻逆故智因阻馬械不繳賊中所呼乾馬隊者也馬化澁資以糧糗鎗礮嗾其死抗官軍又一面稟知官軍陝回不悉繳馬械請急擊之賊勢之所以已窮而仍悍者以此現在冰凍已合北竄一著本屬可慮諸軍正悉力北面並咨商金順張曜嚴密巡防矣而近察賊情亦有難於北竄者有眷屬之回不肯他竄者多無眷屬之回以疊負重傷不能他竄者亦多也金積堡糧料雖多而秣馬之草無從採取近據賊中逃出漢民均稱賊之騾駝馬匹餓斃者已三分之二羣相怨懟無可如何似其勢實亦衰蹙特因獸猶鬪攻堅費

人不敢不愼以圖之耳劉松山一軍各戰之陣亡頭品頂戴
記名提督法福凌阿巴圖魯李就山卓著戰功此次因礮子
穿胸立殞陣前實堪痛惜應懇飭部議給

卹典並請

予諡以彰忠烈提督銜記名總兵周本立記名總兵易作義
儘先副將溫其林補用叅將李必貴補用遊擊王順明盛德
林張盛魁廖得英楊寶玉陳芝蘭補用都司萬友山葉宜恭
楊俊發都司銜守備謝春和拔補守備宋鳳翔拔補千總譚
連城王義勝李金山拔補把總劉萬勝劉得照軍功擬保把

總湯復盛等均衝鋒陷陣血戰捐軀應懇

天恩飭部各照官階議給

卹典以慰忠魂其雷正綰周蘭亭張福齊等戰功並簡敬臨一軍因勝後深入陣亡致挫另摺陳明戰狀並懇

天恩飭部將頭品頂戴前衢州鎮總兵鏗僧額巴圖魯簡敬臨議給

卹典並請

予諡以存其人升用提督姚連陞誼不獨生應懇

天恩予諡飭部議給

卹典提督銜記名總兵譚正明補用總兵鄧雲高等均懇
天恩飭部各照官階議給

卹典以妥忠魂疏人均蒙

俞允其南路各軍在於固城等處勦賊獲勝亦經會同穆圖
善具奏並另摺覆陳擇中駐紮緣由奉

上諭左宗棠穆圖善奏東南各路官軍勦回疊勝左宗棠遵
旨覆陳各一摺覽奏均悉提督楊世俊等軍將陝回擊敗西
竄自十月十九日至十一月初十日在固城清水驛紅土窩
等處分軍進勦殺賊甚多並生擒賊目正法其分竄東路之

逆目馬油布亦經陣斬現在各逆窮蹙北不能通金積堡之
援西不能與河州遠合左宗棠已令周開錫將南路諸軍核
實歸併分布鞏秦一帶並令黃鼎等軍雕勦回土零匪卽著
檄飭各該將領偵探賊蹤痛加勦洗一俟北路粗定卽由中
路埽蕩而前毋稍鬆勁此次在事出力員弁勇丁准其彙案
請保左宗棠現在駐軍平涼策應各路並派黃鼎等分布隆
德靜甯會甯安定一帶雖與蘭州聲息相通兩會垣防守事
宜亦不可稍形疏懈穆圖善著懍遵前旨暫駐省城就現有
兵力暫同司道各員妥籌保衛左宗棠仍當隨時兼顧其石

成器一股卽著飭令蕭宗幹等會同王仁禮妥爲安插並將秦望川等處屯政趕緊辦理北路之劉松山等軍並著催令前進以期節節疏通河州爲甘回負固之區必須破此巨巢方可迎刃而解著左宗棠察看情形如兵力足敷勦辦卽行督軍前進以竟全功欽此自是

朝廷亦深知平涼地居中要可以兼顧南北時北路各軍已進逼賊巢陝回馬正和等逆糧草缺乏遣人潛至狄道嗾逆目崔三禹得彥馬生彥白彥虎等股潛襲半角城營壘掠取糧食乘勢東犯以攻雷正綰等軍之背而解金積堡之圍十

一月二十九日徐占彪訶知逆回由狄道向安定好麥川巉口稱鉤驛等處奔走卽帶所部步隊三營會商裴思朝率所部馬隊星夜馳赴巉口擊之楊世俊卽由紅土窰率所部馬隊同至巉口會勦是夜各營瞭見張家川等處火光遍野逆眾蝟集徐占彪率馬步分路猛攻巉口飭黃志元步隊橫出稱鉤驛馬隊輔之楊世俊率張仲春楊德俊馬隊循山脊繞出其前截賊歸路巉口之賊卽向北路魯家溝狂奔徐占彪追至石峽灣而還稱鉤驛之賊分由好麥川以會合內關營之賊向西南折竄是役共斃賊二百餘名生擒三十七名奪

獲騾馬二百餘匹官軍受傷者二十五人訊據賊供巉口之賊爲崔三好麥川內關營之賊爲禹得彥馬生彥白彥虎各股卽飛報黃鼎自靜甯出會甯截之十二月初一日黃鼎各營抵郭城驛逆回已由紅堡子向打拉城長流水一帶疾馳而東初三日五鼓記名提督周紹濂誦賊將至牛角城率隊迎勦賊已近牛角城回堡僅截斃一百餘名生擒二名官軍傷亡二十餘名而爛泥溝段家溝收撫之甘回復叛應賊周紹濂所部中右後三營皆附近回堡而右後兩營已會同桂錫楨馬隊分途護運未回賊至卽以中營及右後所留之三

成迎戰眾寡不敵賊遂陷踞回堡右後兩營護運之軍聞警折回總兵銜儘先副將劉甫田率步隊二十餘名疾趨將遇騎賊刺斃多名賊眾環逼立殞陣前比及副將陳高華率右營踵至賊已遁矣是夜後營營官毛正明率隊南進天明至三十五里之高崖子有騎賊數百正圍攻民堡而東路運糧之車亦至當會同總兵王銘忠馳擊賊駭而奔迨追至牛角城漏已四下矣初四日周紹濂派毛正明陳高華分三路進攻回堡一鼓克之斃賊二百餘名獲騾馬五十餘匹官軍陣亡三十餘名帶傷八十餘名敗賊竄段家溝等處官軍始收

隊回營時道員魏光燾提督丁賢發聞警拔隊赴勦而叅將
劉錦臣馬隊亦至初六日魏光燾丁賢發馬步由固原鼓行
而北初八日進李家瓜園是夜周紹濂所部分防黑城子李
旺堡之前左兩營護糧運過王家團莊突遇騎賊劫糧良回
馬柏森馬隊在前以騎少稍卻前營營官總兵李良穆左營
幫辦副將周玉林各以所部結團陣禦之賊近則用鎗礮輪
轟騎不得逞復嗾步賊猛撲軍士鼓勇當之步賊亦不敢進
退入破堡以叉子鎗穴牆對擊騎賊分起環繞李良穆左肩
被鎗子洞穿仍裹創血戰相持至初九日酉刻魏光燾丁賢

發各率所部馳至賊死傷已多忽見官軍大至卽狂遁而西
官軍壓追至半角城魏光燾丁賢發直搏段家溝賊巢由東
川進周紹濂由西川進賊越西山遁走官軍乘勢將爛泥溝
段家溝賊巢一律蕩平躡賊至峽口該逆由長流水西竄鹽
茶始振旅而還數日斃賊七八百名生擒八十餘名訊畢斬
之拔出男婦老幼百餘口官軍傷亡五十餘名賊至鹽茶四
出掠食蔓延莎羅堡鴉兒灣一帶初十日黃鼎自會甯馳回
靜甯由硝河城黑城橫截而出十二日抵莎羅堡東十餘里
偵賊正圍甘回堡寨揮馬隊擊之斃賊四五十名餘賊遁歸

鹽茶留副將林定遠守莎羅堡而自督馬步趨行薄暮抵鴉兒灣適騎賊數百由鴉兒灣南竄飭副將黃虎臣縱馬隊橫截其腰斃二十餘名奪馬三十餘匹逆向鴉兒灣敗竄副將胡應芳怒馬直前躡近鴉兒灣四五里從間道馳出忽悍騎數百圍逼而來正迎戰間黃虎臣馬隊韋占雄李玉春步隊猝至立斃悍賊數十騎敗賊入鴉兒灣憑牆抗拒黃鼎乘月色微茫密派李玉春韋占雄挑壯士數十人倍道繞出鴉兒灣左右沿山縱火爲疑兵親督馬步直擣中路賊眾慌亂登時向西北潰走官軍三面鈔殺陣斬賊中僞領員楊黑牛藍

遇春等三十餘名奪驟馬百餘匹據擒賊供崔三越鴉兒灣西南三十里趨老虎溝其由鴉兒灣西北敗遁者禹得彥各股也黃鼎當飛飭林定遠帶隊由莎羅堡橫出老虎溝兜勦而前赴鴉兒灣合隊四鼓馬探報禹得彥去而復來黃鼎警巡邏嚴守備以待忽西北角喊聲突起有悍賊數十人撲近營壘黃鼎令軍士移燈滅火潛遣都司李洪超率銳卒數十人悄入賊中刀矛亂刺賊眾驚潰斬馘數十名生擒三名據供禹得彥度官軍遠戰疲乏嗾悍賊數百前來劫營不料爲官軍所敗林定遠所部行近老虎溝已五鼓矣詎逆回蟻聚

各回莊催隊疾進掩其不備斃賊數十名餘逆向西南狂遁
天明收隊抵鴉兒灣黃鼎分兵扼守自督馬步進水淡溝西
安堡劉家井連日搜勦而西該逆百十成羣彌遍山谷見官
兵卽遁疲驟病馬拋棄滿途據賊中逃出難民供稱禹得彥
於十三日四鼓轉鴉兒灣之後連夜向紅堡子遁走郭城驛
分股由中灘出打拉城竄靖遠而西賊糧缺乏大半煮牛皮
茹草子爲食黃鼎分途窮追詎崔三一股復由大宏溝新營
川竄石武營其地可南走硝河城以達靜甯始收隊回防十
五日楊世俊徐占彪瞭郭城驛一帶炊煙四起料東竄之賊

必經官軍截勦而西圖歸狄道當分馬步數路伏張家莊左
右破堡約以火箭爲號四鼓賊眾彙集各路官軍馬步突起
號鼓齊鳴該逆張皇挺走適張仲春楊德俊殷華廷馬隊亦
自紅土窰至分途西追三十里至馬家堡沿途斃賊數百名
生擒八十餘名奪獲騾馬無算據擒賊供此股卽馬生彥禹
得彥白彥虎崔二等逆眾同時河州回目馬占鼇等亦嗾逆
黨由大營川兩路東出巉口車道嶺迎護陝回賊眷楊世俊
徐占彪會商官軍馬隊出大營川步隊出好麥川乘其未定
擊之是夜月明如晝楊世俊督馬隊由北原出車道嶺瞭見

西竄賊縱隊擊之躡至甘草店斬殺極多餘向狄道遁逸
十七日黎明大營川忽橫出悍賊數百楊世俊知爲河州援
賊也飭馬隊三路迎敵該逆下馬死鬪官軍亦分枝改騎爲
步仍以馬隊鈔大營川之後殷華廷衝其前斬悍賊數十名
逆勢披靡紛紛潰散官軍乘勝躡至高崖斃賊百餘名奪戰
馬百餘匹該逆狂奔而西乃收隊紮車道嶺其好麥川一路
徐占彪於十六日二鼓率步隊前進行抵杜家岔溝該逆猝
不及防徐占彪步隊撲上斃賊三百餘名追至漫窪正收隊
東向山左右礮聲震裂突出馬步賊四面包來何玉超攻其

左黃志元攻其右徐占彪督隊居中鎗礮環轟賊不少卻徐占彪揮戈突陣手帶矛傷勇士如牆而進併力壓之斃賊多名賊眾大敗官軍縱追十餘里該逆擁擠不前墜巖斃者不計其數薄暮收隊距巉口六十里之蒲家堡駐紮二鼓該逆馬步復折而東連夜撲犯官軍營壘數次均經擊敗十八日黎明會合楊世俊遍搜山谷斬獲極多道員李耀南先於十六日辰刻由紅土窰整隊西行十七日抵巉口偵禹得彥等逆已經擊敗而西崔三後股又將偷越巉口率同總兵周顯明蕭賞謙副將盛照魁等步隊銜枚疾進截擊於鹽溝斃賊

甚眾奪獲騾馬百餘匹餘逆越魯家溝北奔十八日窮搜而
北崔逆已向郭城驛南趨李耀南復隨楊世俊率隊出安定
會剿十九日先後抵紅土窰二十日四鼓崔逆率千餘騎從
花尖堡越李家河楊世俊李耀南馬步分道鈔擊該逆四面
被創截成數起總兵黃儲寶追剿於後總兵殷華廷副將姜
鳳興知縣胡嗣會攔截於前李家灣一股鮮有脫者崔三率
死黨七八百騎趨王家岔楊世俊李耀南督馬步跟追鎗轟
矛刺者不下二三百名崔三率數十騎狂遁殿後數百騎經
馬步各隊圍而剿之陣斬偽元帥馬得海擒崔三之叔崔官

逸出者不過數十騎計是役斃賊二千數百名生擒三百數十名獲駝騾戰馬近千匹器械無數同治九年正月初八日經左 疏請擇尤酌保並懇

優卹陣亡員弁均蒙

嘉予陣亡者得卹如例其甘南鞏秦所屬地方當河狄逆回衝要自周開錫抵秦州後令道員湯聘珍督同提督梅開泰所部扼漳縣而營傅先宗駐軍甯遠分枝由徽成出西和禮縣節節掃蕩作爲遊擊之師十一月二十二日賊眾擾及西和攻撲民堡聞丁桂智馬隊將至全股宵遁十二月初一日

丁桂智追至禮縣屬之巖城訶賊結寨在石東溝初二日黎明率副將田大候補知府已革湖北鄖西縣知縣程光第往勦賊眾大敗把總吳振高貪拾賊物丁桂智立斬於陣軍士股栗躡勦二十餘里斃賊三百餘名生擒三十八名奪獲大旂十面鎗矛一百餘件是夜復訶得零股賊眾與敗賊合踞蔡家山陶坪莊詰朝丁桂智秣馬蓐食馳進察看蔡家山懸巖峻坂鳥道螺旋賊憑隘口以拒丁桂智改騎爲步踰山脊壓下田大程光第從峽口猛進賊不虞官軍徑擣其巢返顧慌亂號叫狂奔墜崖者眾馬隊分途截殺二百餘名生擒六

十名奪獲大旂十四面騾馬百餘匹鎗矛數百件陣亡三名
同時甯遠縣西南包家莊雙祿柱亦有賊蹤竄擾十二月初
一日傅先宗派提督高月桂總兵蘇家良馬步馳勦賊翕
聚南山初三日黎明官軍步隊伏山左右馬隊分枝鈔其歸
路以一枝挑戰該逆從峽中衝出官軍且戰且走誘其離巢
漸遠步隊從左右包鈔馬隊前後夾擊斃賊四五百名餘逆
六十七名敗向雙祿柱合股官軍乘勝擣巢一鼓而克斃賊
四五百名生擒十四名奪獲騾馬百餘匹餘逆狂遁而西兩
次生擒之賊訊明被脅漢民九名又有逆酋王老虎等六名

均陝回積年兇惡訊畢斬之初八日湯聘珍誦漳縣三岔以西逆眾千餘騎麇集令提督梅開泰挑銳卒五六百名派副將楊永成常遠藻領之乘黑夜斫賊營該逆自夢中驚起駭怖失措官軍乘機掩殺斃賊六七十名奪戰馬數十匹獲鞍屨器械甚夥敗賊逸汪家衙初九日黎明梅開泰躡至王家河沿途斬馘極多餘逆遁入狄道自十二月初一至初九日擒斬不下二千餘名經左會同穆圖善具奏奉

諭在事出力員弁勇丁准由左宗棠穆圖善擇尤酌保陣亡均

賜卹如例南路經此次痛勦後鞏秦間竄逆稍稀而平涼之固原涇州之鎮原慶陽之環縣壤地相連周千餘里兵燹之後人物彫殘回土各匪乘間出沒聚散靡常伺便刦殺自雷正綰周蘭亭張福齊徐文秀各軍拔赴金積堡秦渠一帶後左深以爲念卽飭記名提督周紹濂率所部五營分布固原以北之黑城子李旺堡半角城等處副將桂錫楨馬隊扼四百戶提督丁賢發自鎮原出固原署平慶涇道魏光燾提督劉端冕由慶陽合水步步前進遙爲犄角上年十月二十一日回民王益萬報賊騎擾及半角城迤西三十里維時

桂錫積在半角城聞信急督馬隊掩之斬殺六七十騎餘逆
倉皇敗遁生擒劉鳳才丁鳳至馬生才馬四兒等四名獲騾
馬二百餘匹雜糧三十餘石訊據賊供逆目明先行卽明七
十子喉回黨馬子英馬新明馬升老等千餘騎自固原東北
之下馬關竄來圍截官軍糧運訊畢斬於軍前收隊暫息訶
該逆殘黨北竄西陶家周紹濂派張大雄擊其東桂錫積擊
其西二十三日四鼓銜枚齊進逆騎方排山口列陣見官軍
至卽翻山鼠竄官軍乘勢鈔殺斃賊二十餘名帶傷者更多
奪騾馬三十餘匹收隊回馬家鄴忽山谷中橫出百餘騎張

大雄猛撲之斬十餘名該逆仍奪路東竄是日魏光燾率隊至環縣二十四日訶賊夜襲紅德城督隊往救賊已向西川遁去麾軍緊躡殲之得脫者僅十餘騎收隊回紅德城二十六日往山城搜捕二十七日抵萌城訊據堡回羅復章馬柏森等供始知賊目係明七十子追已無及收隊回慶陽忽接代理鎮原縣知縣廖溥明報明七十子一股竄至固原東川喉元城子三角城土回海生春馬正榮等出白家鄴攻掠姜家城堡魏光燾由環縣而西往勦丁賢發亦自固原之東來會兩路鈔截該逆向三岔河元城子宵遁其地可北愈預望

韋州以達金積堡魏光燾先期約劉端冕分派隊伍合力擣巢十五日官軍先後抵三岔捕土匪頭目吳成章斬之十八日五鼓抵白家灣近元城子土窰鱗次賊聚其間聞鼓聲驚起向元城子狂竄官軍追近土城賊馬步千餘開城迎敵魏光燾結方陣以擣中堅馬隊張兩翼夏奉朝于維槐策馬衝突斬悍賊十餘名賊眾大敗有向東奔者有回土城者官軍追擊之立將元城子及附近之磚城子等堡掃蕩一空追至白家鄴適甘大有譚楚光亦勦洗盧家灣沈家莊來會賊分道狂奔預望城收隊回元城子是役斃賊五百餘名生擒逆

目海生春之兄海生獻及其黨六十餘名分別斬釋拔出難民三百餘名獲牲畜二百餘頭勇丁傷亡七十餘名時丁賢發亦率所部出古城川大石溝搜勦土匪十九日至關堡臺偵賊數百自白家鄴竄來預伏以待伺其近而擊之斬十餘名墮崖者二三十名餘越山狂遁不復成列生擒馬福有馬正海閔起費海恭起海金剛等多名收隊回關堡臺以所獲回逆解大營訊辦忽探報明七十子敗黨復竄距元城子五十里之道蓮寺二十一日魏光燾挑壯士乘月夜襲之斃賊極多擒逆目苟幹台供稱明先行在前已先遁去不知去向

訊畢斬之二十三日魏光燾會各營偵緝殘匪至白家鄴良回楊如雨迎候甚恭據稱海生春懾伏求撫魏光燾卽以楊如雨爲嚮導派副將舒萬勝都司范潮海輕騎往提海生春並家口來營訊係爲明七十子所脅勒限悉繳馬械縛獻要犯贖罪旋據海生春率同馬得中剡文興海滿和海維江等款營待罪呈繳戰馬八十四軍械六十件楊如雨具連坐保結始將海生春交楊如雨管束以其眾八百餘口安置白家鄴左近在逃之首惡明先行剡仲祿海彥虎海興河海陽倡海上玉馬如意明集成馬占全馬正榮等仍勒限海生春網

獻同時固原州城守千總陸希正亦緝獲逆首馬歲兒子海
苟苟子各犯解營正法而代理鎮原知縣廖溥明代理平涼
知縣王啟春亦各緝獲首要土匪解營正法而固原東山一
帶漸就肅清不意馬化澂詭謀愈狡既嗾明七十子竄擾半
角城復嗾另股竄擾北山以斷劉松山金運昌兩軍糧運旋
據署延榆綏道成定康稟報八年十二月二十二日夜回逆
襲陷定邊縣城左 因附片陳奏並請
飭山西撫臣令郭寶昌於冰橋銷化後迅率所部馬步三營
由綏德馳赴定邊花馬池一帶肅清劉松山金運昌兩軍餉

道奉

上諭云陝西自甯條梁至花馬池一帶爲劉松山全軍後路糧運所經何以金運昌遽將留防各營調赴前敵詎不料及逆回詭計多端一經繞截後路全局卽虞掣動現在定邊旣被襲陷運道設有梗阻關係匪輕郭寶昌此時協防晉省河岸正當喫緊其所帶親隨軍人數無多不必令其馳赴定邊著左宗棠派隊馳援並責成劉松山金運昌迅圖攻克肅清後路一面飛咨陝省防軍合力夾擊以杜賊蹤竄擾其前敵各軍仍當飭令穩慎進攻勿稍鬆勁欽此時劉松山金運昌

兩軍進逼賊巢戰無虛日自上年十一月十四日夜該逆仍就波浪湖堰脩築長牆一道較前更堅十五夜二鼓訶賊運取馬草回寨劉松山乘月掩襲分枝直搗賊巢目督馬步疾馳金運昌營前合隊商定以步軍居後伺巢賊出相機應之馬隊張左右翼一趨西路一趨北路賊見官軍大至駭而奔馬隊馳出賊後邀其歸路忽金積堡東西兩面角聲四起援賊蠶至金運昌步隊迤西斜出劉松山步隊分三路排列正西一面嚴陣以待正相持間官軍馬隊從步軍陣後鈔出賊之左右劉松山擂鼓急進各路猛力撲之斃馬步悍賊甚夥

賊勢披靡向金積堡以西各寨狂遁官軍馬步緊躡至寨根
敗賊有奔入寨者有入寨不及越堡壕逸出者其東北一路
又經蕭章開劉錦棠督隊環攻賊猶憑牆抗拒迨將長牆一
鼓蕩平乘勝逐北追近金積堡東面各寨收隊是役斃賊千
餘名劉松山所部生擒八十餘名訊出賊目馬芝堂馬三揚
子李翔三名一併正法奪獲騾馬五百餘匹器械無算弁丁
受傷九十五名陣亡弁勇十七名十七日金運昌移營壓金
積堡西北而壘斷該逆往來馬家灘之路二十七日劉松山
會師進勦金運昌列隊於南劉松山列隊於西金積堡東面

步賊循牆出西北二三里各村莊憑礮臺抗拒馬賊則由正西馳突而來余虎恩潘運璋周雲祥彭緒忻朱德開陳宗蕃雙壽等馬步猛擊之馬賊卽敗退步賊之後蕭章開劉錦棠從左右路猛進劉松山督中軍繼之乘勢壓下立將各莊礮臺一律踏平右路之賊經蕭章開勦殺數百西南風起塵沙眯目乃收隊計是役斃賊七八百名生擒百餘名內賊目金虎馬沅哈桂清訊明正法奪戰馬器械甚多官軍陣亡十八名受傷一百零四名二十九日劉松山押牲畜赴河西運取薪芻自督馬步築壘於金積堡東逆眾傾巢突出擊敗遁去

三十夜逆賊又傍金積堡西北里許加脩土壘兩座附築礮牆密開礮眼意圖屏蔽賊巢十二月初一日黎明金運昌馬步向西南進劉松山馬步向東南進步賊憑依礮牆抗拒馬賊向正西衝突劉松山步隊分三大枝迎敵馬軍直趨正西會松明李雙梁飛馬突陣壯士繼之悍賊紛紛墜馬向正南敗走步軍直逼礮牆噴筒火箭環施兇鋒大挫登時將牆踏毀金積堡西各寨見敗賊鼠竄回巢亦棄寨飛遁兩壘一鼓下之是役計斃賊六七百名生擒百一十餘名訊畢斬之獲戰馬器械無數弁勇受傷一百三十二名陣亡二十五名初

七日劉松山擒獲賊探供稱該逆出胡家堡向甘回王洪楊明兩寨索糧距金積堡約四十里劉松山約金運昌整隊進擊初八日五鼓行抵胡家堡里許金運昌進右路劉松山進左路比近賊巢賊登時驚潰官軍分途掩殺斬馘無數共斃賊六七百名斬逆目馬連一名奪牲畜二百餘頭弁勇陣亡七名受傷三十八名自是之後陝回以索糧未遂嗾李旺堡馬家灘棗園堡等處甘回於十一夜麇集胡家堡以南向甘回馬宏芝馬雄等逼勒糧食佔踞四五寨劉松山約金運昌合擊之十二夜潛師疾起天明抵胡家堡各寨踞逆馬步三

千餘眾。蠡出金運昌擊其右，劉錦棠攻其左，劉松山相機策應，併力壓下，賊敗歸巢。各路馬步乘勝猛撲，躡蹤衝入馬家寨，賊三百餘名無一脫者。是役斃賊七百有奇，生擒六十餘名，奪戰馬三百餘匹，器械多件。勇丁陣亡十六名，受傷八十四名。陝回屢敗之餘，不能分踞各寨，盡附金積堡。壕內外支帳列居，逆眷屏錯其間，外砌長牆以資屏蔽。十九夜三鼓，金運昌率隊向金積堡西門進，劉錦棠率隊向金積堡東門進，劉松山出中路策應。兩軍比近，賊巢賊驚覺，依牆列隊。各營鎗礮雷轟噴筒火箭齊發，延燒賊帳。壯士踰牆而上，見賊卽

斫賊敗遁壕內官軍正分途掩殺間各寨甘回突出救援圍鈔官軍之後陶定昇易致中何作霖分兩路橫擊之援賊不支敗遁原巢門閉不得入循牆而遁壕內之回恐官軍擁入立將卡橋拆斷是役斃悍賊五六百名生擒一百零七名分別斬釋獲騾驢馬三百餘頭器械甚夥弁勇陣亡七名受傷三十二名劉松山回營後令軍士備雲梯草束爲進攻之具二十一日黎明督隊抵胡家堡地方步賊憑堡列隊馬賊分兩路衝來易致中何作霖張左右翼迎敵立斃悍騎多名馬賊縮退步賊兩旁官軍三路乘之馬賊狂遁步賊敗歸原寨

各營四面鈔殺共斃三四百名生擒四十三名訊明斬之弁
勇陣亡十一名受傷六十四名薄暮收隊就近安營其附近
之趙馬兩寨賊刃林立二十二日四鼓劉松山夜襲之正擲
草填壕南面各寨步賊忽從趙家堡之右鈔出各營截之而
遁適趙家寨中積薪爲官軍火箭所著煙燄騰空弁勇乘之
猱升拔其寨馬家寨之賊見趙家寨已破堅壁拒守二十三
日辰刻輪攻愈時之久寨中子藥磚石俱盡遂破之兩戰斃
賊七百餘名陣斬逆目馬世傳生擒逆目何彪訊明正法獲
騾驢戰馬二百數十匹鎗礮刀矛六百餘件陣亡二十六名

受傷一百三十二名官軍收隊回防訶陝回頭目鄒保和夥
甘回逆黨由韋州一帶攜糧而歸距金積堡數十里二十五
夜劉松山約張福齊徐文秀諸軍併力攔截二鼓賊踏漢伯
湖而過劉松山擂鼓發號催隊擊之該逆拋棄輜糧頓躓冰
中餘賊北竄各營截之而東繞波浪湖趨金積堡方近板橋
劉松山派尹興茂潘運璋截勦而前鮮有漏網計此股六七
百名歸巢者僅數十牲畜糧食器械棄盡弁勇受傷八名其
金運昌一軍生擒回逆並所獲牲畜器械不在此數雷正綰
周蘭亭張福齊各軍自上年十二月初一日辰刻經劉松山

約會出隊各軍馬步向金積堡西門進賊列隊迎敵騎賊鈔官軍之後維時官軍已直抵二道渠賊紛紛越渠索戰提督閻定邦等率隊伍一鼓壓下躡追過渠伏賊起雷正綰周蘭亭張福齊調劈山礮隊排轟之賊遁歸巢正收隊間騎賊復衝突而來劉明泰周玉堂劉忠發黃立鼇等回旂猛撲逼賊入壕內搜殺而還共斃賊五六百名生擒十名分別斬釋初六日黎明各軍整隊分三路衝進二道渠斬斃多名日暮收隊聞東南鎗礮聲張福齊周蘭亭料賊圖南竄亟挑銳卒乘黑夜馳抵漢伯堡賊正在狂奔官軍截其後股掩殺二百餘名

獲牲畜二百餘頭是夜二鼓賊騎步數百竄近徐文秀營前各營迎頭堵截格殺數十名初七日賊乘冰橋偷越廣武營雷正綰等派隊雕剿賊逸而西趨副將楊光龍率隊由張恩堡截出行三十里至鐵桶堡斬殿後賊百數十名十八夜該逆大股直撲張福齊營壘踰長壕拔花籬勢甚兇猛張福齊周蘭亭已先有備因擂鼓發號分左右路鈔出壕內伏兵齊起應之該逆狂奔回巢是役殺斃數百名生擒十二名訊明正法獲騾馬四十餘頭糧袋百餘條乾糧二百餘觔二十五日逆眾由定邊擄糧繞預望城韋州回金積堡各路官軍得

報同時準備三鼓賊越漢伯堡經劉松山擊敗趨油麻湖北
遁徐文秀張福齊兩路兜剿該逆仍折而東是役斃賊數十
名生擒九名據擒賊供此股卽鄒保和所帶經官軍截擊落
後者也訊畢斬之其金積堡迎護之賊又經劉松山擊敗歸
巢此北路各軍八年十一十二兩月戰勝情形經左 於
正月二十二日馳奏所有陣亡提督張四維總兵文官勝等
均
賜卹如例至北路黃河以北則金順張曜剿之上年十二月
間亦獲大勝奏奉

上諭云金順奏勦辦援賊獲勝攻克賊寨情形一摺王家疇
踞匪疊經官軍圍勦上年十二月間陝回趙五阿渾等糾集
大股援應經金順會同張曜督軍迎勦斃賊數千人逆酋趙
五阿渾等亦經擒斬並將馬泰納洪兩寨攻破斃賊甚多此
次官軍奮勇殺賊力將援賊擊退而傷亡弁勇亦屬不少殊
堪憫惻所有擬保遊擊駱元益等均著交部照擬保官階從
優議卹以慰忠魂金順勇往督戰致手受刀傷現在曾否平
復實深廬係著發去內府如意拔毒散二料以資調理北路
平羅縣屬黃渠橋等處現有賊騎紛擾意圖鈔截糧運且該

處距蹬口一帶不遠尤應嚴密防範著金順會同張曜飭令常福實力搜勦以清後路劉松山近日攻勦金積堡情形若何該提督駐軍處所距甯夏不遠著左宗棠飭令彼此聯絡如甯郡賊勢較重卽當分兵前往會同勦辦以資得力欽此其實劉松山一軍勦辦不遺餘力功屆垂成祇以逆回負固耐死相待故苟延旦夕使稍有悔禍懼死之心必早泥首軍門矣然至此勢已極衰計無所出惟恃句引援賊阻截官軍糧運冀解重圍以爲救死之計上年十二月崔三禹得彥馬生彥白彥虎諸逆由狄道北援金積堡壘經官軍痛勦死傷

極多狼狽歸巢馬化溼猶未及知反怪崔逆等久不赴援又遣其同教靖遠驍子虎偏頰子等央其妻弟臨洮大師謝四催崔三等急赴金積之援十二月二十八日西山各良回報河州大股逆回步騎數千突至西安堡一帶左 遂飛飭

半角城黑城子李旺堡固原州瓦亭各營嚴防並調黃鼎率所部馬步各營勦之正月初四日黃鼎自瓦亭進駐固原州初八日賊騎竄由黑城子半角城中間山徑出大路撲犯丁賢發營壘丁賢發飛飭石營楊正華由高崖山邊截勦自率親兵從大路迎頭截擊賊欺官軍隊伍單寡三路悉力來撲

丁賢發率親兵力戰穿入賊陣縱橫盪抉賊不能當斂眾退入石峽口丁賢發令楊正華伍慶雲黃義勝張玉樑張文元劉學明等從左右縱擊之賊陣遂亂一紅衣逆酋挺矛縱馬而來嗾諸賊轉鬪丁賢發策馬馳及立將逆酋刺傷而奪其馬賊眾擁之向石峽口而去峽口山徑仄狹不能鴈行丁賢發排開鎗礮轟之賊死傷相繼棄馬上山弁勇爭先奮擊至酉刻始收隊而還計斃賊數百生擒悍賊四十餘名戰馬二百餘匹騾馬二三百頭並該逆所進馬化澆黃帽藏棗等物而官軍陣亡六十九名受傷者九十五名據擒賊供該賊圖

繞山東向預望城韋州以竄金積堡比黃鼎護運各營趕到則賊已遠遁乃飛報金積堡各軍嚴密戒備以待其由金積堡竄去環慶一路擾截糧運者約有兩大支頭起爲甘回馬升明陝回海萬新等二起爲陝回藍明泰馬正剛等漢回雜湊計人馬約二千內外號四五千十二月十七日賊騎百餘攻環縣之大柴溝民堡副將蕭玉元救之十八日殺賊數十獲馬十餘匹生擒回逆劉有明馬明連訊供係十二月初五日由金積堡竄出之賊小頭目爲陝回劉得元二十一日復探各股麇至環縣之二十里鋪是夜四鼓蕭玉元率親兵及

前左兩哨列於河下知縣羅壽昌率右後兩哨由山上壓勦而下蕭玉元見山上之隊齊抵山梁麾隊急進殺賊十餘名賊卽卻退羅壽昌率山上之隊馳擊而下會合猛進斃賊五百餘名生擒三十餘名奪騾馬百餘匹訊據賊供頭目馬升明劉得元海萬新均經陣斬矣二十六日訶縣境馬房川又有賊蹤羅壽昌等馳至賊卽上山逃遁追殺二十餘名餘賊乞降驗其衣服或有或無訊知卽前次擊敗之餘也內有逆回二十一名斬之馬升明海萬新等一支已紛紛散竄不復成股二十九日署慶陽府知府謝大舒訶郡北東川地方有

賊竄至商之遊擊李奪魁挑選留防勇丁及親兵團勇共一百三十名伏於賈家橋適報騎賊已抵旋馬灣相距僅十五里李奪魁急進掩之正月初一日辰刻馳抵悅樂地方守備張金明叅將宋南山千總程炳順先以三騎誘賊賊競起逐之忽李奪魁督隊齊至立刃十餘賊各窰洞之賊蠶擁而出李奪魁背山據險整隊奮擊賊多死傷一黃襖賊目中鎗而斃賊勢大潰計斃賊百餘名奪騾馬驢三十餘頭矛桿二十餘件初二日蕭玉元出隊木波城遇騎賊數百突至其地相持三時不決騎賊亦不敢近薄暮收隊而回是夜蕭玉元羅

壽昌分三路設伏於張家灣合道城河及川西各處三更賊果大至五品軍功鄧紹禹於賊騎過半時橫截而出鎗礮分列排擊昏黑之中不辨官軍多少後股向東北奔竄前股爲伏兵截住奮力衝殺黎明向合道城河下竄走其斃賊二百有餘生擒三十八名敗賊向安家掌一路飛遁署平慶涇道魏光燾所留鎮原搜剿竄匪之總兵夏奉朝及提督甘大有連日於鎮原之張家鎮計家大岔鎮固交界之海巴子川一帶搜剿竄逆計共斃百餘名生擒十四名獲驟馬百餘匹初六日魏光燾馳回慶陽接據各路稟報當卽飛緘提督劉端

冤所部前後兩營分頭兜剿初九日卯刻夏奉朝至慶陽一
面派馬勇赴黑水寺一帶偵探中途遇逆回十餘騎當卽追
殺生擒五名奪獲騾馬七匹訊知陝回馬正剛陳瞎子馬長
順沙學德等賊黨二千餘騎由金積堡竄至惠安堡鈔取食
鹽遣千餘賊裹送金積堡自帶千餘人由惠安堡韋州堡下
馬關預望城毛居士井三岔河而來初八日三更由三岔河
竄西峯鎮蕭金鎮幫帶馬隊叅將譚吉士訊知前情率隊追
至蕭金鎮揮隊急攻立斃悍賊十餘名獲騾馬數十匹騎賊
敗竄甯州計陣亡馬勇三名受傷八名夏奉朝拔隊往追則

已由正甯竄入陝境三水矣左

聞報卽調漢中鎮總兵

李輝武所部駐寶雞兩營赴乾州總兵殷華廷率精騎百名
輔之嗣又飭李輝武續調兩營繼進而檄周開錫以吳士邁
宗岳兩營填紮其壘一面據實陳奏自請交部嚴加議處並
請

飭山西撫臣於冰橋銷化後催令郭寶昌渡河而西肅清劉
松山金運昌兩軍餉道此則馬化澁詭謀冀徹退北路官軍
者也至此猶伸螳臂而謂從前之求撫出於真誠有是理乎
特殘喘尙可暫延而大功至垂成之時不無意外事耳論者

謂劉松山每戰必先忠固有餘惜疎於保身之智不知馬化
澀厲氣所鍾必待惡貫極盈然後從而誅之歷觀往牒莫不
皆然故以劉松山數百戰之身竟殞於摧枯拉朽之日豈非
天哉骨肉未寒金積旋破或亦松山冥中相之也其遇難本
末具詳左

疏中疏云竊劉松山一軍上年十一月十五
夜至十二月二十五日進剿逆回攻破寨壘屢獲勝仗情形
經臣於正月二十二日馳報其上年十二月二十九日剿賊
新揭堡獲勝及正月初八日攻破金積堡附近地方陝回新
脩賊壘各公牘尙未接到正月二十五日接劉松山十四日

來牘據稱初十夜四鼓吳忠各營飛報有馬步賊千數百名由東南胡家堡竄至秦渠南踞石家莊一帶空堡及馬五馬八條馬七三寨劉松山以石家莊距吳忠堡東南四五里該各寨扼秦渠之要與下橋永甯洞水口緊接地勢在所必爭立督步隊四營及親軍馬隊馳往吳忠堡天明抵石家莊見賊已於西南廢堡脩成三壘矣劉松山飭譚拔萃周國勝李占椿易致中曾松明朱德開趙彩照等三路齊進各指一壘奮力齊攻一鼓克之其東西兩壘之賊逸出者投入馬五寨劉松山卽令易致中朱德開分駐三新壘計斃陝回甘回一

千數百名頭目馬幅喜亦經焚斃生擒七十二名正法軍前
弁丁陣亡者三十七名受傷者一百零七名收隊後劉松山
周覽正南馬五寨正東馬八條馬七兩寨牆厚壕深殊不易
攻留之則終爲後患遂令各營逼塞築壘以便圍攻十二
三兩日壘成十四日飭各營齊隊往攻未下午後忽有援賊
馬步約二千餘自東南馳至排列營前二三里以時日考之
當卽臨洮謝四及靖遠龔子也劉松山慮其入各寨助守以
抗官軍適是夜金運昌先勦援賊黎明各路齊出步賊陣於
各破堡之前騎賊左右排列布陣甚整劉松山令先勦騎賊

李占椿趙彩照分左右鈔擊火器迸發刀矛繼進騎賊先奔步賊仍屹立不動劉松山麾各軍奮威衝殺賊殊死鬪屢卻屢前騎賊仍縱馬回撲官軍銳氣百倍縱橫盪抉斃悍賊甚多賊始向東南胡家堡一帶竄遁沿途冰凌凝滑馳走不前官軍追殺五里乃收隊計共斃馬步悍賊近千名奪獲善馬百餘匹鎗械無算劉松山傳令乘勝攻馬五寨寨大而堅悍賊踞寨東一卡誓以死抗劉松山飭譚拔萃周國勝李占椿曾松明攜攻具攻寨飭易致中朱德開趙彩照帶所部截馬七寨馬八條寨來援之賊令金運昌率兩營列隊該寨東北

防馬五寨逸出之賊布置既定譚拔萃等揮所部由寨邊繞出逕薄外卡一鼓齊登克之外卡悍賊百數十名無一脫者劉松山急督各弁丁舉薪焚寨門策馬由寨下督攻益急忽爲寨中飛子洞中左乳墜馬弁丁負入破屋中譚拔萃等見統領受傷齊來看視劉松山叱令速督所部猛攻毋因顧我亂行列譚拔萃周國勝曾松明李占椿見統領受傷含淚而出手執火包四面梯登督各弁丁猱附繼上縱火延燒見賊卽斫寨賊焚死溺死墜牆墜井者無數生擒賊目馬五收隊繳令劉松山諭以受傷已重不得復活爾等殺賊報

國我死不恨言畢氣絕是時攻馬七寨馬八條寨之隊仍未
撤也據總理湘軍營務布政使銜卽選道法福凌阿巴圖魯
劉錦棠記名提督瑚松額巴圖魯黃萬友分統左軍記名提
督江蘇蘇松鎮總兵法福凌阿巴圖魯章合才分統右軍記
名提督綑武巴圖魯蕭章開會稟前來臣接閱之餘悲悼不
已竊維劉松山由湘鄉勇丁從征積功洊擢廣東陸路提督
轉戰湖南湖北江西廣東福建江南河南陝西山西直隸山
東甘肅各省勦辦長髮捻回各巨寇無役不從無戰不克邊
蒙

天恩頒賞小刀火鏟大荷包小荷包

賞換達桑阿巴圖魯勇號

賞穿黃馬褂

賞給三等輕車都尉世職劉松山感荷

殊恩方圖報稱自入靈州以來蕩平堡寨五十賊巢九十餘
皆策馬前行躬冒鋒鏑回逆之會犯顏行者無不聞名膽落
上年七月初師由花馬池前進時馬化澁潛調西甯馬彖三
喉撤回助逆馬彖三以千五百騎應未及一月經劉松山勦
敗喪其大半遁歸自此西甯逆回不敢復至西甯鎮總兵黃

武賢前來營時爲臣具道其詳彼時劉松山不辨其爲西甯回番與各堡甘回未形諸公牘也河州逆回馬占鼇前在甯夏大言以股眾助陝回及劉松山屢捷目覩軍威不敢復逞故此次馬化澂求援於臨洮謝四及靖遠馬驍子而河回未與之俱其威震西陲如此臣方冀靈州蕝役奏請駐師甯夏以取猛虎在山之勢爲西陲規久遠不料事未了而忽有此變也其治軍嚴不尙苛察其臨財不苟取其布陣方圓平銳疊用得古人靜如山動如水之義其居心仁厚而條理秩如語及時局艱危輒義形於色不復知有身家性命從征伐者

十有八載僅因募勇歸籍一次家居十餘日耳年已三十有七聘婦未娶者二十餘年臣由直隸西旋時知其婦家送女至南陽已兩年餘矣屬其行抵洛陽於募勇未到之暇尅期完婚適甘肅土匪二十萬蔓及延榆綏一帶臣飭其派隊由山西渡河入秦劉松山奉檄卽行屆婚期甫半月耳觀人於微雖古良將何以過之合無仰懇

天恩飭部將劉松山照提督陣亡例從優議給

卹典

加恩予諡

五知圖附錄卷八
五
飭祀京師昭忠祠並

准陝甘各省建立專祠而以所部陣亡各員并附祀其劉松山各處戰蹟並乞

宣付史館立傳表彰以慰忠魂其遺櫬一俟道路疏通臣當派員護送歸籍仰副我

皇上軫念忠勤至意疏入得

旨如所請准行另片附陳劉松山所遺老湘一軍卽以其姪總理營務處布政使銜卽選道法福凌阿巴圖魯劉錦棠接統並請

賞加京卿銜而以記名提督瑚松額巴圖魯黃萬友派充幫辦亦得

旨准行馬化澂知劉松山已故又新得臨洮靖遠各賊之援於是噉黨四出以冀截奪糧運掣動官軍而又上攻峽口下瞰下橋永甯洞欲秦漢兩渠首尾爲其所轄則金積之巢穩固官軍難於規取矣幸下橋早爲劉松山所駐雖援賊極力奮爭而每遇湘軍戰無不敗終莫如何惟峽口地處上游渠水均由此而入前雷正綰周蘭亭張福齊三軍由峽口進逼金積堡安營距峽口四十里劉松山屢以築壘峽口相商至

正月十二日雷正綰始派隊往築僅成三壘次日再築突有逆回隊伍自河西踏冰而來立將三壘佔踞比雷正綰周蘭亭張福齊督隊馳往鏖戰竟日而三壘未拔弁勇傷亡二百餘人左 聞報急檄黃鼎周紹濂丁賢發於護運軍糧之暇星馳往勦值金積堡竄回繼出致周紹濂丁賢發兩軍不能速往逆回既踞峽口雷正綰周蘭亭張福齊等營前逼賊巢後斷歸路糧運旣梗戰事更殷周蘭亭張福齊兩軍於正月二十夜以糧盡退回鳴沙洲雷正綰一軍守營出隊傷亡相繼二十三二十四等日賊用大礮對雷正綰中營轟擊哨

官多爲所斃雷正縮忍饑堅守勢甚危急至二十六日黃鼎護糧至甯安堡聞此警急不待後隊取齊卽率已至之隊會商周蘭亭張福齊各率所部由牛頭山前進賊攻雷正縮營壘正急見官軍至卽解圍迎戰黃鼎麾所部左右盪挾賊紛紛敗遁正追殺間忽黃渠內馬步伏賊齊出峽口壘賊亦由後鈔截官軍歸路黃鼎率韋占雄朱蘭亭等下馬力戰短兵相接鏖戰兩時之久斃悍賊甚多韋占雄忽中礮陣亡金積堡逆賊是日經劉錦棠擊敗亦蠶擁而來阻截牛頭山歸路黃鼎見賊勢頗重結隊徐退雷正縮乘賊與黃鼎相持率所

部突圍而出而峽口遂仍爲賊踞失一進攻之路矣劉錦棠
接統湘軍一遵劉松山舊章軍心齊奮如故訊據賊謀供稱
賊之詭謀在犯吳忠堡營壘搶永甯洞水口阻葉昇堡運道
正月十七日五鼓河西護運隊伍遇伏賊於葉昇堡河邊力
戰卻之劉錦棠黃萬友會商春融冰泮下橋永甯洞水口尤
形勢所必爭應移兵屯紮以昭穩固峽口旣爲賊踞賊得分
洩渠流以灌營壘戒備不可不嚴而連日賊謀愈多知其必
將來犯也二十六日黎明整隊出擊適賊三四千出金積堡
排列東南官軍議分三路以進正部署間適西路礮聲大震

劉錦棠黃萬友料峽口之賊已與官軍接仗也催隊急進東南步賊憑廢堡穩抗不動馬賊分鈔兩旁鏖戰逾時官軍先將馬賊擊敗併力壓步賊之前賊向東南敗走官軍躡之斬悍賊數百名生擒三十餘名弁丁陣亡十七名受傷六十三名湘皖兩軍軍糧自東道梗阻後均就河西採運賊騎每乘間鈔掠因議夾河築壘以護之二十七日黎明兩軍隊伍甫至河邊見賊自正東瞭望返奔而去少頃塵氛大起胡家堡甘回王家等寨馬步三千餘眾蠶至金攻其左劉攻其右未幾馬賊先敗譚拔萃周國勝從右路鈔出步賊之後步賊亦

敗旋令李占椿率所部留護收隊而還二十八日壘成忽胡家堡之賊千餘距新壘五六里而陣李占椿守壘金運昌迎敵正酣戰間劉錦棠率隊馳至併力壓擊斃賊五六百名生擒三十餘名獲馬械甚夥弁丁陣亡二名受傷二十名二月初二日黎明金積堡漢伯堡逆眾四五千迤東而南麴集板橋圍攻董福祥營李雲貴率隊助禦蕭章開督所部直貫賊陣李雲貴董福祥自內衝出來擊賊駭而奔官軍分途掩殺斃悍賊二百餘名拾擡鎗十七桿梯牌十餘件生擒十餘名是時冰凍漸解野潦縱橫官軍開溝築隄防維周密金運昌

之營切近馬家灘棗園堡賊寨初六日黎明棗園堡逆憑秦渠築隄設卡金運昌會蕭章開何作霖易致中分三路勦之逾時金積各堡角聲四起援賊大至各營嚴陣以待劉錦棠加派馬步助之金運昌由右湘軍由左劉錦棠自督易致中周國勝策應各路奮威衝殺賊敗過渠北蕭章開越渠擊之金積各堡復出悍賊來援何作霖併力猛撲該逆分向老巢敗遁是役共斃賊四五百名奪戰馬器械亦多弁丁陣亡十七名受傷六十二名初八日陝甘各回傾巢而出騎賊數千先近板橋步賊一出正北決隄一出正西撲金運昌營壘劉

錦棠麾軍援勦瞭見隄已被決水勢南趨渠北之賊甚厚金運昌迎勦之兵阻於水正西賊眾林立冒死撲營劉錦棠分中左右三路梟水猛進金運昌馬步應之黃萬友率陶定昇易致中周國勝越渠橫出賊前怒馬衝擊截賊爲數段正西馬步賊鼠竄歸巢正北之賊猶拚拒壩口黃萬友調開花劈山礮輪轟之賊始全數逸去各軍收隊漏已二下矣是役斃賊約千餘生擒八十九名獲戰馬百餘匹擡鎗二十餘桿梯牌多件弁丁陣亡三十一名受傷一百四十八名是夜金運昌以正北蔡家橋一壘距賊卡里許會商劉錦棠撥營聯絡

以資控制初九日五鼓劉錦棠派步隊十營出正北脩壘料賊必悉眾來爭約金運昌各伏兵渠南廢堡而以黃萬友右路之兵列陣渠北劉錦棠督中路修壘相機應之天甫明金積各堡逆眾絡繹出巢擁至蔡家橋齊隊劉錦棠戒軍士築壘若未之見也者辰巳之交賊有沿隄放鎗者有越渠撲壘者伏兵起賊駭而奔渠內悍賊二百餘無一脫者中右兩路乘勝壓勦賊敗歸金積棗園二堡而東南胡家堡王洪等賊復決開山水溝以淹吳忠堡赴河西運道劉錦棠令各營環壘脩堦引注小渠合流入黃初十日午後各營正分段開決

渠溝忽胡家堡及各寨步賊千餘騎賊一二百隔水搦戰官軍用開花礮測準擊之一轟而退二鼓渠溝通暢金積堡逆眾復搬磚石築卡於北環以長隄意在引馬連渠水以困官軍十一日黎明劉錦棠金運昌令各營攜鉏鍤分道並進寨賊亦紛集隄邊抗拒官軍躍馬衝入賊陣當者辟易羣賊併向金積堡東門敗走官軍平其卡而還連日共斃賊七百數十名生擒七十七名奪戰馬十二匹弁勇陣亡十一名受傷七十一名此劉松山歿後劉錦棠金運昌兩軍戰狀也在馬化澂之意以爲劉松山旣死湘軍必難久持况峽口之險復

奪而踞之從此斷其糧運淹其營壘官軍之退可計日待也
不意彼之所籌官軍已早備之及悉眾來爭又連遭敗衄舍
卑詞求撫更無他策矣迨奉左 批示又洞燭其隱衷進

退無據欲罷不能僅恃秦漢兩渠爲負隅緩死之計值陝西
自定邊陷後馬正剛一股由三水擾至永樂店陳瞎子繼之
馬呼來馬長鳳竄赴甘泉與延榆綏土匪句合擾及靖邊堡
未幾定邊之逆復陷安定進擾甯條梁而米脂同官蒲城韓
城邠陽中部宜君長武大荔等縣羽檄交馳先後告急陝西
自肅清回逆後前敵之軍隨赴甘肅留防之軍間有裁遣土

回各匪皆生長陝甘熟悉路徑有兵之處繞而過之虛空幽僻挺而疾走遂至忽東忽西莫可指數署陝撫劉典據以入告既而晉撫李宗羲以河防喫緊奏留郭寶昌繼之豫撫李鶴年以潼關密邇大荔防務需人奏留馬德昭又繼之左

疊奉

嚴旨抽撥勁旅回顧陝疆軍書旁午不能專籌北路故馬化澂得以苟延其實陝西之警因倉猝而嚴追陝西各軍張佑庭吳賢華劉厚基喻步蓮等既調齊赴敵甘肅之軍李輝武魏紀崑夏奉朝丁賢發等刻期往勦遂如發蒙振落全股撲

滅者有之零落回竄者亦有之股數雖多一擊立敗數戰之後已羣知其不足慮矣馬化澂亦深知其不可恃也遂嗾逆黨潛通河回使其東犯又嗾馬正和馬萬春楊達娃併圍預望城二月十三日馬柏森飛稟告急周紹濂及統帶旌善馬隊已革壽春鎮總兵蘇如松由半角城率馬步隊急起援之十五日抵李旺堡前進甫三十里至馱驪腰嶮地方遇賊三四百騎周紹濂卽督隊分路猛撲斃賊五十餘名獲驪馬四十餘匹賊奪路狂奔蘇如松率馬隊先抵預望賊聞官軍大至翻山竄走十七日周紹濂抵預望城則賊竄已遠忽回民

報是夜二鼓有賊千餘將阿布條回堡攻陷殺傷良回李萬
梗等現猶踞堡搬糧物周紹濂急率所部擊之十八日馳抵
楊家灣見賊踞對山齊施鎗礮周紹濂督隊下山鳧水而前
飭周玉林由中路毛正明由左周曙良由右三路併進蘇如
松率馬柏森李百寬等旌善馬隊亦至分兩路鈔擊官軍衝
上山梁賊亦由山梁下撲官軍鎗無虛發連斃執旂悍賊三
名紅衣騎馬賊一名賊勢稍卻官軍一齊搶上山梁鎗矛並
進斃賊無數賊紛由山旁亂竄適馬隊馳至截斬悍賊數十
奪賊馬十餘匹賊向阿布條狂奔官軍追及之堡中賊紛出

迎拒官軍悉銳衝殺斃賊八九十名生擒二名賊棄堡下溝
向老虎灣狂竄馬牛糧食拋棄滿地官軍追至老虎灣始收
隊阿布條堡將所獲糧畜給還難民訊生擒賊目馬生香馬
伯壽等知馬正和圖破預望阿布條等處以擾李旺黑城子
官軍運道訊畢將馬生香馬伯壽等斬之周紹濂令馬柏森
馳回預望守城而偕蘇如松各率所部追賊十九日黎明賊
眾攻圍李旺堡守堡副將李光賓靜以待之賊欺其單薄併
力猛撲李光賓俟其逼近測準轟擊鎗無虛發賊每撲一次
必傷斃數人乃解圍潰竄李光賓開壁縱擊斃悍賊二十餘

名斃紅衣騎馬賊目二名訊生擒馬八兒馬元娃供稱賊目一白姓一帥姓皆馬正和所帶東弭悍黨也是夜三鼓賊分股竄至何家溝攻破良回何家位寨二十日李良穆率所部馳擊甫近何家溝接張大雄周曙良飛報賊之大股經李旺堡擊敗併竄黑城李良穆急掣隊回勦行十餘里見賊已越黑城十餘里而來似圖與何家溝賊合隊李良穆帶所部由西山橫截而出奮威衝殺賊駭懼失措紛紛潰走官軍乘勢壓擊斃賊甚多其何家溝一股自後衝出敗賊復回旂抗拒李良穆率所部搶入土堡一紅衣賊追近堡門揮刀斬之又

有紅衣騎賊領悍賊繼至經排礮轟斃賊始大潰官軍乘勢掩殺收隊回黑城子一面飛馬邀張大雄周曙良來勦是夜三更賊折向北竄一股仍竄回東山二十一日子刻張大雄周曙良自李旺堡馳至中途遇賊賊見官軍卽竄擒斬數十名昏夜未便窮追天明李良穆帶隊繼至則賊蹤已遠搜獲落後賊李來娃子及趙三夷等僉供馬正和於二十日接仗時猝中礮子自鼻梁穿入腦後透出當經賊夥用紬旂裹擡逾時氣絕其弟僞元帥馬魁同時轟斃良回柯大有等所報亦同黃鼎所部徐占彪奉檄率步隊二營馬隊一營馳援黃

鼎更以步隊兩營益之十九日抵預望城是日申刻馬柏森報有賊目李花喜馬有全蘇文舉李德隆率賊千餘由金積堡竄出韋州過下馬關盤踞距預望城四十里之吳家腦徐占彪等卽於是夜潛往黎明行近吳家腦見該處峯高路狹非用眾之地總兵陳玉春趙興隆叅將林定遠等飭馬柏森前行引路由王家山黑溝繞至虎家山麻兒灣設伏以待徐占彪率兩營逕薄吳家腦賊甫驚覺徐占彪麾軍縱擊斃賊百餘名擒賊六十餘名賊紛向虎家山敗遁徐占彪率陳萬春猛躡之甫抵虎家山陳玉春自山後截出林定遠由左趙

興隆由右兩面鈔來將全股賊眾困在中央各營縱橫盪抉
馬柏森亦下馬步戰立將賊目蘇文舉擊斃生擒賊目李花
喜馬有全並瑣保鳳蘇成功馬海望李保成馬有保李有俊
蘇成明馬得印等及悍賊七十餘名轟斃二百餘名墜巖死
者無數奪騾馬二百餘匹是夜派隊搜山復獲賊四十餘名
斬之二十一日收隊還預望訊據賊目李花喜馬有全等供
奉馬化澂穆生花命率領五營於十六日由金積堡竄出走
韋州下馬關至預望圍攻堡寨並探路徑如無大兵阻截卽
率股分途赴陝攜糧此股賊目祇李德隆一犯漏網餘賊逸

出者亦無幾二十二日馬柏森報稱馬正和殘黨將歸金積堡已竄近下馬關二十三日徐占彪率步隊五營追之巳刻抵下馬關結方陣而進行十餘里遇賊各營奮威衝殺賊不能當紛向韋州敗遁追殺五十餘名獲騾馬七八十頭是夜訶賊麇聚花子臺徐占彪以三營扼韋州堡自率兩營及馬柏森馬隊襲之賊倉猝駭息紛竄官軍乘勢掩殺斃賊無數生擒悍賊十二名獲騾馬六十餘頭金積堡此次出竄之賊存者無幾而此時定邊環慶竄擾陝西各股近由慶陽鎮原預望一帶北竄歸巢均經各營隨時次第截斵斬獲頗多經

左 據實馳奏並請將出力之周紹濂蘇如松李良穆等
優獎其餘擇尤酌保陣亡之員弁勇丁

飭部從優議

卹奉

諭均如所請維時署陝撫劉典亦以官軍追勦竄回疊勝陝
省現無賊蹤陳請

獎卹亦奉

諭准如所請旣而河州竄回崔三爲馬化澂所喉率眾東犯
竄踞鳳翔所屬之陳村經李輝武等疊次擊敗復由醴泉高

陵竄至渭南編紮木筏欲搶渡渭河經防軍擊退時繼劉興撫陝者爲蔣志章會銜奏報勦辦機宜亦會商熟計竄回亦不能逞而湘皖兩軍之於金積堡防勦迄未少疎自二月十二日以後馬化澂被勦窮蹙惟圖決渠洩水以困官軍嗣官軍傍壘環築長隄濶三丈高丈餘北抵黃渠南接金積里許復開濬深溝以資堵泄賊計仍窳復憑東南山水溝設卡築壩以擾官軍赴河西運道分股犯官軍營壘二月二十日黎明金積附近堡寨角聲四起陝甘各回馬步紛紛沿漢伯堡波浪湖隄出胡家堡而東其時黃萬友尙督隊赴靈州護運

也潘運璋王秀棣等會合金運昌派駐守之兵憑牆抵禦轟斃多名追飛調前敵大隊馳擊賊已向吳忠堡遁去是晚各軍行隊均宿吳忠老營適黃萬友所部亦至劉錦棠傳令軍士准備勦賊二十一日五鼓整隊向吳家堡進天甫明瞭見山水溝賊脩成三壘近壘之處野潦縱橫馬步賊萬餘隔水排列壘前劉錦棠金運昌揮隊梟水擊之金運昌進左路劉錦棠進右路黃萬友督周國勝王秀棣李雲貴何作霖王承贊尹興茂李雙梁分兩大枝一鼓直前劉錦棠督中軍爲策應各路正逼賊壘步賊分股入壘踞守大股隨馬賊衝突而

來勢甚兇悍各營鎗礮環轟子如雨注馬賊稍卻軍士併力
壓下騎賊紛紛墜馬步賊傷亡亦眾相率潰散官軍乘勢躡
至壘邊守壘之賊憑堦放鎗敗賊亦倚牆抗拒壯士不避鋒
鏑愈戰愈奮劉錦棠復飛令譚拔萃易致中羅照昇更番助
戰壘外之賊自量不敵狂遁胡家堡漢伯堡而西黃萬友從
各堡中空之地追出比見壘門未閉守賊仍植立不動卽令
何作霖督隊防敗賊回援調洋鎗洋礮手分堵中左右三壘
出路劉錦棠金運昌督各營合圍之壘賊見各營四面環攻
銳不可當登時慌亂壯士有奪門而入者有猱騰而上者立

將三壘一鼓攻克悍賊一千二百餘名無一脫者各營平其壘而還二十二日黎明劉錦棠誦馬步賊二千餘赴山水溝廢壘收屍飛商金運昌出隊行四里許馬賊四五百名竟出山水溝挑戰劉錦棠以六營結方陣猛攻猛進躡近溝邊騎賊返撲陣前步賊踰溝踵至零股步賊乃伏溝中相持至午刻各營已進至王秀棣營前金運昌亦率隊自北路鈔出劉錦棠飛令各營前後夾擊馬賊奪路遁去步賊落後兩軍縱橫盪抉斃賊五六百名餘賊向山水溝敗回胡家堡其徘徊溝中逆黨亦望風先潰官軍乃收隊還據擒逆目周斌之子

長順供馬化澂因官軍緊逼金積堡附近之秦壩關棗園堡板橋漢伯堡不能耕種堡中存糧無多有岌岌難支之勢故日嗾陝甘各回築壩洩水以圖退兵不料屢爲官軍所敗前二十一日山水溝脩壘步賊係甘回馬九王洪袁老九等馬賊係陝回臨洮謝四各股王洪之姪王天福已經官軍轟斃壘中矣訊畢將周長順斬於軍前自是之後陝甘各回連日伏巢不出二十九日五鼓馬九王洪復嗾馬禿子楊三棘西甯逆回張阿渾及陝回余彥祿黨眾出胡家堡之東廡聚靈州西南五里之王銀柵排立戰壘兩座分股入踞其中大隊

蔓延各破堡蓋欺靈州兵單意在覬覦州城圖劫各軍東路
運道也是日午刻劉錦棠得報整隊卽起出吳忠堡繞河岸
而東二鼓潛入靈州城傳餐小憩三十日五鼓合分防靈州
城兩營成列以出行近賊巢守賊尙未覺黃萬友率李雲貴
何作霖曾松明各營分左右路襲各破堡踞賊劉錦棠率譚
拔萃周國勝易致中李樹棠各營直指王銀柵賊壘各路號
鼓齊鳴火器並發各破堡之賊自夢中驚起爭向新壘狂奔
壘賊開壁迎戰官軍三路猛撲壘內外賊登時潰敗四
路奔逃官軍乘勢鈔殺匿賊搜斬無遺兩壘一律蕩平振旅

而還數大捷之後馬化澂計無所施又率其子馬耀邦具稟到劉錦棠軍中乞撫以春耕緊要爲詞求大兵退吳忠堡劉錦棠許其耕墾不許退兵仍勒派悉繳馬械據擒賊供近來馬化澂已挨戶派糧三次矣經左 馳奏陣亡員弁

賜卹有差維時上年由定邊環慶竄陝之回經各軍截勦後陸續向甘境回竄二月二十二日由永壽竄入靈臺縣屬之邵寨崔木等鎮吳士邁率所部追及之賊分股而遁二十三日折竄長武道員朱明亮自涇州截出敗之賊由焦村向蕭金鎮荔家堡西趨署平慶涇道魏光燾得報分兵守慶陽挑

兩營疾趨甯州二十四日追至距焦村十五里地方揮隊擊之截賊爲兩楸一支折回焦村提督戴佑勝等扼剿於後一支趨蕭金鎮魏光燾督叅將袁海壽譚吉士壓剿而前賊悉銳以抗魏光燾返旂回撲馬步夾陣外環刀矛間以鎗礮鏖戰一晝夜軍士勺水不入於口至二十五日黎明賊之精悍傷夷已多陣勢漸亂乘機衝突賊大潰向蕭金鎮鼠竄而去是日總兵熊道濱副將蕭玉元知縣羅壽昌等亦由驛馬關西峯鎮馳剿截賊於打家河夾擊敗之驟馬糧食拋棄殆盡向三公河預望城一帶狂遁值徐占彪蘇如松截剿馬正和

殘黨獲勝收隊之時二十九日訶賊自預望城東南三十里毛居士井狂奔而西徐占彪蘇如松商定以夜襲之戒軍士成列以出派土民爲鄉導三路齊集大呼陷陣當者披靡蘇如松忽率馬隊從後兜勦而來該逆全股遁往毛家墩又遇伏兵截擊該逆狂號亂竄騾馬衣物糧食委棄殆盡向下馬關敗走三十日追及之但見零落星散踰溝越嶺而逃不復成股始振旅而還據擒賊秦成崔文煥郝三元等供馬阿渾卽馬朝元自正月初旬糾陝回十三營由甯條梁竄入北山到甘泉與馬正剛合人數漸增東犯韓郃走高陵涇陽醴泉

乾州扶風永壽一帶出靈臺折竄董志原馬正剛已於陝西
轟斃其子亦擊斃於道左鋪零星回巢不過百餘人由金積
堡竄陝之回大略將盡其固原鹽茶土回種落蕃衍桀黠者
間出劫掠值金積堡回因饑四出土回亦間廁恣擾二月初
旬西山李野賊李存昇李讀兒馬百長楊茂林等聚眾五六
百人蠶至馬騾掌楊家溝等處周紹濂飭張大雄周玉林自
李旺堡進勦擊之於滿家川斃賊數十初九日賊聚楊家莊
張大雄復襲之斬馘甚眾獲牲畜糧食器械並驛遞所失文
報餘匪四散遁走同時明七十子一股盤踞劉家臺子黃鼎

飭徐占彪領馬步四營由固原拔行初九日至劉家臺襲之
斬獲甚多初十日誦七十子及母仲元等逆竄踞東北之狼
兒溝元城子黃鼠鑽爲巢徐占彪飭陳春萬趙興隆劉心灼
分三路擣之多有斬殺餘匪復聚教場川十一日往勦則賊
已宵遁適李野賊殘黨竄踞圓圪塔紅麻川良回王益萬飛
報丁賢發卽派吳起雲張玉梁整隊馳勦二十八日圍而攻
之斬二十餘名生擒楊滿志馬環環子李七餘子馬割臍子
等十一名楊滿林斃於鎗墜巖死者不計其數其竄入鐵家
溝者又經于維槐及穆進善旌善馬隊勦之生擒回目馬宗

祥供稱李野賊自預望城嗾之使來途遇陝回數十人夥出掠食已擒斬無遺矣是日東山匪目剡仲祿擾至三關口剗掠糧馱護運副將盛照魁所部哨弁楊霄亮猝爲所害盛照魁率隊追及斃賊數十名盡奪其糧馱而還初八日提督陳廣發自瓦亭率隊護運行抵海口子偵知明七十子之黨馬步數百出巢因伏山溝左右賊至擊之多所斬獲賊奔固原黃鼎所部黃虎臣揮馬隊截之擒斬數十名初九日趙興隆何玉超林定遠等護運至高崖子遇賊遂率隊由黑子山溝進勦賊據險抗拒官軍冒險急攻良回楊如雨將逆目海滿

寬縛獻正法軍前降其餘眾十四日抵楊老莊誦明七十子
剡仲祿踞狼兒溝十五夜襲破其巢斬獲無算楊如雨言剡
仲祿帶傷後被亂刀斫死驗之良確明七十子單貴兩賊隻
身遠竄黃鼎飭楊如雨捕之餘賊悉投誠安插其分竄環慶
者賊目爲李化魁蘇進萬李良友張義全均由金積堡竄出
署平慶涇道魏光燾署慶陽府知府謝大舒署環縣知縣余
甫勳派隊截擊陣斬蘇進萬李良友張義全餘賊無幾已不
能成股惟河狄逆回乘官軍方勦北路又爲馬化澂所嗾時
出竄擾自上年十二月二十八夜有賊自狄道渭源出漳縣

之三岔乘度歲以伺官軍之懈道員湯聘珍令軍中備之正
月初一日親督梅開泰往剿而賊已遁黃香溝初四日黎明
馳赴晉家堡僅截殺尾隊數十名初五日梅開泰與周文翔
會合剿之於石灰溝口斃數百名十一日殘黨復聚老幼店
范銘迎擊之略有斬獲同日有馬步賊千餘竄渭源之熟羊
城進瞰鞏郡王得勝彭忠國分兩路擊之賊敗而遁追至熟
羊城而還二十五日賊糾馬步三千餘刼周文翔營壘湯聘
珍得報令王光富率馬步隊前驅自督行隊策應近石灰溝
口見周文翔正與賊相持而賊氣驕甚王光富怒馬衝鋒直

劈賊陣馬賊遂亂步賊自山口來援湯聘珍麾軍鈔其後賊勢遂潰衝散之騎賊經周文翔分道擊之擒斬尤多據擒賊供此股逆目卽劉四花鄉約馬元張四皆西和禮縣逆回上年九十月間闖越西禮經官軍勦敗負傷而逃此次由陝回嗾之東竄鞏岷冀牽綴官軍陝回得疾行竄陝是日敗後遂由甯遠之灘歌禮縣之馬隴疾行而南傅先宗派丁桂智王銘忠率所部出新寺鎮截之賊已越鹽關蔓及成徽兩當周開錫飛檄王得勝自伏羌繞成徽而東會同丁桂智王銘忠馳出賊前高月桂李奉清陳天佑擣中堅傅仕海守鹽關扼

歸路賊已知之乃由間道竄秦州之甘泉寺迄不得戰周開錫復令田連考挑精銳百二十人扼朱家祠檄追兵倍道躡其後二月二十五日騎賊數百奔至田連考猛擊之而卻是夜官軍雲集劉家堡約定詰朝會勦賊未之知二十六日黎明馬步賊二千餘犯田連考營壘軍士堅壁禦之持至兩時之久高月桂等馳至內外夾擊賊遂不支向康家崖狂遁官軍躡之蘇家良馬隊亦自秦州駛至乘全勝鈔擊賊大敗南遁白蠟溝二十七日官軍追至白蠟溝賊已奔禮縣之永平鎮丁桂智王銘忠追及之賊不敢戰向西急遁官軍緊躡鈔

殺賊奔益急輜重拋棄山谷間拔出難民數百名餘賊出甯
禮交界之栗子坪西奔河狄方官軍追賊徽兩之時陝回崔
三禹得彥李經舉及河回米阿渾等同出狄道越安定之馬
家河二月二十一日楊世俊率兩旂馬隊猛截之遇伏賊四
面包鈔楊世俊改騎爲步揮刀督陣相持四時之久楊世俊
左脅中叉子鎗傷士馬亦多損失乃裹創嚴陣而退其零股
竄謝家河敖天印率步隊會合楊世俊所部分防馬隊張仲
春楊德俊勦之自午至申鏖戰三時賊敗向馬家河合股東
趨連日擾及通渭之榜羅鎮秦安之龍山鎮清水之張家川

撲犯城垣周開錫飛檄湯聘珍率馬步自漳縣轉旆而東並
令王得勝田連考會擊清水之賊其花馬等股敗回則以丁
桂智王銘忠躡之三月初三以後賊攻清水縣城甚急城多
坍塌勢極難守初七日湯聘珍軍至圍始解初八初九等日
王得勝田連考亦先後至分途進剿賊趨張家川齊張家川
之陝回海成等逆東行一由閻家店入陝西隴州馬鹿鎮至
汧陽一由赤沙入香泉鎮赴寶雞分股由椒川擾鳳縣境李
輝武調各營截之頗有擒斬初十日親督所部擊之縣頭鎮
敗之十一日吳士邁至汧陽賊已於先日合股出寶雞之賈

村東趨鳳翔之陳村十三日李輝武進至寶雞十六日以六營分三路擣陳村賊巢適吳士邁自汧陽馳至合力進勦賊大驚潰向柳林鋪奔岐山官軍跟蹤緊躡而殷華廷馬隊亦奉左 檄馳至十七日會勦羅局鎮李輝武殷華廷穿入賊陣併力猛撲賊遂大潰吳士邁先伏兵出路追賊分途狂竄伏兵突起斬殺極多餘賊分爲兩股一東竄扶風一西竄鳳翔東竄者爲陝逆禹得彥李經舉河州逆目米阿渾等人數不過三千而馬多於步時張福齊所部已奉檄回陝勦賊敗之扶風醴泉之間賊竄至渭南水師遏之遂竄蒲城趨白

水張福齊緊躡其後二十三日追及於白水新窰鎮復敗之
殘股向宜君中部界劉端冕令甘大有擊之魚鱗川賊入甘
肅甯州界署甯州知州楊大年率城防勇丁截之二十八日
竄至拜家河署平慶涇道魏光燾擊敗之竄鎮原之孟壩寺
江得意截之於三岔河四月初一日至固原之白家鄴黃鼎
率馬步七營截之徐占彪與戰於炭溝大獲全勝陝回李經
舉卽李金菊河回米阿渾卽閔阿渾及從金積堡竄出之士
回單仲明均經陣斬惟禹得彥四百餘騎仍由鹽茶一帶竄
走其西竄之崔三一股賊數約二千餘由隴州竄張家川復

由秦安竄至莊浪隆德之間徐文彥勦之屢敗之餘不能復東由是馬化澆益失其所望湘皖兩軍之逼仍無能望其少緩矣三月十四夜訶金積附近各寨人聲沸騰逆眾數十成羣零星散佈乘夜脩濠意在引馬連渠之水入濠阻官軍進攻西南之路劉錦棠令各營伺賊稍近用鎗轟之賊晝則歸巢夜仍加濬如故十八日劉錦棠傳令各營挑壯士攜鋤鍤分道往平賊濠而旋毀旋脩仍如故二十一日劉錦棠整隊擊賊賊寨角聲四起傾巢排列濠邊蕭章開喻執益曹義勝前驅各路馬步繼之步賊憑濠拒敵騎賊分鈔東南雙壽花

良阿余虎恩躍馬陷陣將馬賊擊敗蕭章開乘機越濠以擊步賊軍士從之悍賊紛紛倒地餘眾不支向金積東門逸去二十三日天明賊出堡東各寨旂幟如林沿濠列隊翼蔽脩濠之賊馬賊數千鈔過東面劉錦棠令步隊各營分三路迎勦令馬隊應馬賊部署既定陶定昇督周國勝張俊猛撲中路步賊死拒馬賊一併回頭雙壽花良阿馬隊一氣壓下劉錦棠飛催何作霖蕭章開分左右剗濠而進各路悉銳衝殺賊屍枕藉餘向各寨狂奔生擒逆目馬二虎陳金子等百餘名訊明一併正法賊連被重創後晝則踰伏夜仍脩濠官軍

亦多掘溝道防之四月初一初二等日秦渠馬連渠之水被賊決放勢如潮湧平地成川各營正併力疏濬忽西北風緊水漲數尺激湍衝齧長隄勢甚洶涌李占椿各營隨機堵截或密排木椿或盛以布袋用茅包土實其中悉力捍禦初三日風止水勢漸消賊計仍不得逞馬化澂復喉零股馬步偷渡黃河西竄大壩分水嶺三關地方刼官軍廣武中衛山後糧運初八日黃萬友督隊由葉昇堡渡河分枝赴三關搜剿自率李占椿喻執益駐大壩初九日擒獲賊諜訊知有賊自山後刼牲畜將回便設伏待之少頃賊馬步三百餘絡繹至

伏起擊之賊狂號亂奔官軍分途躡殺淨盡並全獲其所有
十三日陶定昇張俊余虎恩由山後護糧東行三關五六里
偵知有賊因伏大隊於後而以寡迎之賊爭出奪糧伏起斃
賊大半餘逆四散據擒賊供初九日大壩所勦係馬正和餘
黨十三日所勦係陝回閻明馬順之也金運昌因東道梗阻
派提督王鳳鳴督帶馬步回顧花馬池定邊安邊梭巡後路
運道三月初七夜遇賊百餘殲之罄盡初九日搜山斃賊百
餘獲雜糧數石初十日訶賊攻東南民堡馮殿英何全忠襲
之斬獲甚多逆首馬繼元伏誅二十二日王鳳鳴令馬心勝

率隊赴安邊護糧遇賊數百於磚井堡王鳳鳴揮隊猛撲賊
敗而遁官軍躡至張家圈何全忠衝入賊中頭中木棍傷墜
馬王鳳鳴向前策應連受矛傷裹傷力戰斃賊百數十名餘
逆四散奔遁據擒賊供馬化濇喉張福保帶馬步四百餘刦
糧於東路是日已損三分之二矣經左 陳奏湘皖兩軍
陣亡員弁均蒙

賜卹如例在事出力之員

獎敘有差至西竄之陝回崔三一股自三月二十日至張家
川周開錫派王得勝一軍出清水迎勦梅開泰繼之田連考

湯聘珍出秦州秦安之交邊賊南竄楊世俊敖天印出紅土
窰而東王得勝會丁桂智王銘忠擊賊於清水之富家川賊
攻民堡正急各營馬步蹙之賊敗仍遁張家川蔓及王家堡
二十四日王得勝督馬步逕擣賊巢突遇賊伏首尾不能兼
顧損弁丁二百餘名王得勝斂兵保清水適吳士邁已躡賊
後楊世俊敖天印之兵亦先後抵通渭賊畏官軍分道進攻
於二十五日越秦安竄田家坪蔓及靜甯之水洛城王得勝
由西而北與田連考湯聘珍梅開泰會合四月初三日追賊
至田家坪分左右路先擊步賊稍卻馬賊拚抗如故田連考

謝復雲怒馬衝之手刃數賊餘眾大潰官軍躡至石門再敗之初四日進勦水洛城賊正與堡民相持見官軍至卽奪路狂竄高月桂李奉清緊躡之多所斬獲初六日賊趨隆德之門扇岔徐文秀楊正茂奉帥檄往勦會同全福之馬隊截之賊遁靜甯之威戎鎮總兵蕭賞謙率所部平江營截之賊由靜甯通渭之間西竄覓歸巢之路楊世俊敖天印偵其所向疾出馬營監李耀南亦派總兵周顯明自會甯來會嚴陣以待初八日賊大股竄近傅家岔華家嶺草芽溝雙墩堡等處均緊距馬營不遠初九日官軍分三路勦之楊世俊馬步抵

傅家岔賊列隊抗拒官軍縱擊之斬數十名賊陣大亂敖天
印正敗草莽溝雙墩堡之賊出傅家岔會隊兩面鈔擊之賊
不能支悉棄其所有踰溝竄紅土窰楊世俊截於前各軍逐
於後悉數就殲殘逆數百遁馬家河狂奔歸狄道正躡追問
謀報通渭之渭陽堡續到回逆海澄王占鼇一股楊世俊敖
天印回軍勦之一戰斃其精悍再躡之於馬家店孫家坪斬
殺更多並生擒逆目海洋花馬三阿達子等斬之崔三一股
回巢者已無幾禹得彥自敗竄鹽茶後不復成列早已潛回

河狄經左

穆圖善會奏奉

旨獎卹有差時金積堡乏食已久陝回老弱婦女餓斃者多馬化澂喉陳林領三千餘眾向花定一帶掠食四月初一日金運昌派往之都司牛允誠擊之大矩灘獲勝初七日五鼓賊乘風雨交作襲攻花馬池城有賊十餘人已梯城而上提督隋君廷聞警率馬勇登城步戰文武紳民亦併力堵賊於巷中賊之已入城者登時殺盡天明開城躡之頗有擒斬賊敗而遁初十日賊竄安邊攻王家堡副將宋雲田叅將李占標遊擊邵維常分道擊之賊竄磚井鎮守備王允功用伏敗之十三日賊回竄安邊攻李家寨宋雲田掩至賊駭而奔追

至白家寨斬逆目楊葫蘆等多名二十七日午允誠出定邊之東王鳳鳴出其西兩路鈔擊賊頗受創二十九日五鼓王鳳鳴乘賊熟睡襲破其巢斬悍賊無算牲畜糧械略盡據賊目余金兒供係余彥祿之弟馬化濬令隨陳林東掠磚井鎮之戰陳林中礮傷甚重訊畢斬之方陳林之東竄也劉錦棠黃萬友慮後路接餉之隊單薄令總兵沈先梅率數十騎赴花定偵探午刻抵磁窰鎮獲賊謀供陳林派逆目楊興隆帶隊數百自花馬池運糧回金積堡將至比飛報劉錦棠添兵截勦二十三日劉錦棠伏兵靈州東南十餘里之歡喜梁辰

刻賊果擁糧畜至突起擊之馬賊返奔步賊棄所有回竄軍士分途壓勦賊無脫者陣斬逆目楊興隆二十七日何作霖余虎恩率馬步出花馬池接餉遇零股斬數十名據擒賊供陳林尙踞田家掌迨各營進勦則已竄定邊一帶鈔掠至於鄜坊環慶時統帶前路五營劉端冕奉檄會陝北諸軍妥籌防勦署平慶涇道魏光燾奉檄嚴扼環慶五月初十日劉端冕誦賊竄鄜屬之油坊派所部分兩路迎擊自率馬步出黑水十一日抵王家角驟遇賊騎相持未決適總兵陳光明黃承佐循巴掌窪山脊壓下併力撲之追至張家灣總兵文明

章副將溫宗秀又自和尙原截出賊首尾受敵踰溝狂奔各營乘之擒斬不少據賊洪起益供陳林在磚井負創受傷極重齊帶死黨轉金積分馬步賊一千餘交逆目馬長元趨定邊甯條梁圍竄山外掠食不料敗於此地訊畢斬其悍者八十名釋脅從三十一名其由廟村奔合水之固城川者甘大有截之敗奔甯州之襄樂鎮蔓及蘇家川署甯州知州楊大年派譚新盛率防勇襲之賊由正甯出邠長竄靈臺之邵寨魏光燾親督所部馳至頗有斬獲賊奔崇信副將彭清和奉檄馳往截之賊遂散逃訊據生擒賊供陳逆腰受鎗傷子未

拔出不知死活黨眾已盡余彥祿之黨卽存亦無幾馬化澄
聞之率其子耀邦哀詞乞撫並繳馬七百匹鎗械五千餘件
劉錦棠仍未准撫蓋深知其亂心之未屢而詭謀叵測也

平定關隴紀畧卷八終

平定關隴紀畧卷九

同治九年夏六月

欽差大臣太子太保督辦陝甘軍務陝甘總督部堂一等恪
靖伯左 駐節平涼維時東竄逆回旣靖出掠之眾亦殲

金積堡宜可速下矣第進剿祇東面一路尤應厚集兵力而
由中衛進兵則有峽口之阻必先奪峽口以扼賊吭由固原
進兵則以馬家河爲總要以韋州爲間道必先清馬家河以
保運道守韋州以遏賊衝方足以制其死命馬家河回民頭
目軍功監生馬忠海性本兇狡從前曾受馬化澂誠正王僞

封就撫以來陽順陰逆屢嗾其黨劫掠官運嫁禍陝回並藏
匿河逆海隆李山珍等與馬化澂潛相勾結周紹濂悉其奸
狀具稟卽密飭周紹濂誘馬忠海赴平涼飛令馮桂增潛率
所部馬步三營徑擣韓家水巢穴馬忠海至平涼訊詰奸謀
堅不承認適馮桂增稟到六月初一日抵韓家水布隊圍下
中上西南東南五堡將巢穴次第攻破生擒惡黨回目馬繼
會等十一名並河逆海隆一名逆回三百餘名訊實概予斬
決搜出疊次搶掠軍裝號衣帳房數百件據錄送馬存先供
詞馬忠海劫掠戕害弁勇行人及與河州金積堡各逆回交

通情事一一確鑿並搜出各處逆信多件馬忠海無可狡賴乃磔之平涼傳首固原等處示眾韋州堡管事回目蘇兆明本金積逆黨綽號小光棍曾受元帥僞職其姪蘇文榮亦號二元帥前因官軍進勦道出韋州蘇兆明乞撫暫釋未誅乃蘇兆明仍持兩端凡由金積堡出竄之回往返皆由韋州經過蘇兆明窩留屯紮供給資糧良回馬柏森嘗以爲言左因飭丁賢發進扼韋州就便掩捕六月二十三日師抵韋州賊已聞風先遁丁賢發駐營堡外自帶親兵百人入駐堡中密察逆黨蹤跡佯與約期議事七月初二日蘇兆明蘇文

榮蘇韋阿渾海滿德僞百長蘇隆揚蘇漢馬正德金玉美何生靈王有泗蘇三甘昌畢集丁賢發數其受撫後交通馬化澆馬正和崔三謝四之罪斬之一面出示安撫回民令各安堵無恐積年之患旣除遂飭黃鼎雷正綰總統中路諸軍進攻峽口此時值麥穗將熟馬化澆穆生花旣乞撫不得遂嗾老弱回民赴湘皖兩軍前乞就板橋琴橋吳忠一帶廢堡暫架棚厰居住以便耕作劉錦棠等商定姑漫應之靈州首逆王洪又請修秦渠之隄放水蔭田亦暫許之數日後果有回民百餘試修官軍相戒勿動是夜五鼓劉錦棠率隊分三支

一伏永甯洞一伏下橋一伏渠北伺之至次日巳刻王洪楊明王忠等果糾大小回目帶壯丁數百名齊來修隄比至永甯洞下橋中間伏兵突起生擒王洪及送回二百數十名餘悉殲除無一脫者訊據獲賊金海鼇供稱犯本四川勇丁投入賊營充保全營百長此次王洪留兄王鵬守寨所有大頭目楊明王忠僞叅領楊添默白珠強馬學吉楊天龍王先友僞先鋒馬英楊珠秀等以爲官軍中計趁此奪回下橋與板橋琴橋及棗園廢堡聯絡一氣將官軍截爲兩段不料自墮官軍計中訊畢斬之察看波浪湖水勢甚漲永甯洞既經官

軍堵塞馬八條馬七兩堅寨均被積水淹透遂商定乘漲攻之六月初二日三更劉錦棠率隊鳧水攻馬八條寨金運昌攻馬七寨五鼓克之據擒賊供馬七馬八條均馬化澂之弟四月初旬已逃入金積此股係馬生彥夥黨上年馬生彥竄河州時此股經官軍截斷折回金積堡向馬化澂乞糧馬化澂每日按人給糧三合令守兩寨今此股已盡矣而王洪楊明伏誅後餘黨猶踞其寨招致陝回乏食者助其拒守時中路胡家堡洋麻湖海子墩大沙井之麥漸熟劉錦棠料賊必將搶收初七日約金運昌出隊刈麥是夜五鼓率馬步各十

營並吉林馬隊金運昌馬步隊齊向楊明各寨進黎明已至
各寨正放牲畜官軍橫出截之殪其人奪其畜餘仍退縮入
堡劉錦棠縱丁夫割麥盡日而歸次日五鼓抵王洪寨賊倚
寨以拒而令其眾割麥官軍頓旗不動俟其所割漸多縱馬
隊衝之盡獲其所有而還是夜會商進攻靈州西十里之杜
家寨初九日黎明至其處賊已憑牆列隊相持至一時許南
面賊稍卻縱而擊之遂拔其寨人盡殲焉回途經王洪寨南
縱令割麥並調靈州難民同割收隊駐吳忠堡初十日割胡
家堡之麥破其二卡陣斬逆目馬隆焚其卡始收隊十二日

會攻王紅連寨寨中守禦極周官軍帶傷者已眾幸寨外禮拜寺頂高與牆齊因令就其頂砌牆留孔施放鎗礮官軍豎梯而登賊復傾撒麥粥鍋盃齊下進至六七次稍稀乃瞰賊少處捲旗躍上壯士隨之首逆王紅連伏誅賊始紛遁乃毀其寨是役譚拔萃肩被磚傷李雲貴腿中鎗子傷勇丁傷亡百餘人攻堅之難如此十三日馬步分三路由胡家堡至王洪大寨斬殺已多稍憩齊隊衝殺破大寨外卡並搜各堡積麥而還於是逆回所種之麥存者幾希而糜粟膏粱彌望亦賊之糧也因議一併割之十七日刈青於洋麻湖余虎恩飛

報正南山邊賊隊紛出立飭各營截勦擒斬極多訊擒賊供始知此股係寄居陝回並無頭目乏食已久欲由郭家寨繞橫城渡河買糧者也郭家寨者賊赴河西取糧之路也遂於十八日往攻苦戰逾時克之寨中之人殲焉十九日連克王洪寨據寨賊供此股係余彥祿之黨頭目卽已斃之楊幅其黨已盡於此矣官軍並刈其青而還大寨旣克小莊自易於是胡家堡東北胡家堡以西及大沙井一帶小堡其人斃於鎗矛其稼悉就芟薙而士之陣亡者咸奏蒙

卹典焉南路河狄各回自四月負創歸後復竊出渭源而南

意圖牽綴官軍使不得併力於金積也周開錫飭傅先宗由鞏昌進取而令王得勝彭忠國梅開泰湯聘珍各率所部繼之飭楊世俊田連考等由秦州出伏羌比傅先宗進至丁家門賊眾已蔓及汪家衙王家河石灰溝矣連日進勦斃賊一千餘名擒斬賊目麻曜廷等百餘名賊竄伏羌之禮辛鎮楊世俊馳至賊又竄甯遠之樂善鎮柏家山大石頭官軍分途進勦一創之於大草川再創之於禮縣之馬隴追賊遁鹽關周開錫已先派管春林率宗岳軍先至大被截殺據逆目馬轄比馬生兒等供河回馬俊麻曜廷馬六十及叛附狄河之

鞏昌逆回馬一麻張二司務鹽關逆回馬元等六七千眾分爲大小四股本圖由鞏昌禮縣甯遠走徽成擾甘南腹地崔三馬朶大師等隨後踵至不意連遭痛創馬俊麻曜廷斃於甯遠下川馬元墜巖馬一麻斃於大石頭餘眾冒死西趨不復成股傅先宗遂合王得勝彭忠國何建威等馬步二十二營鼓行而西抵首陽城誦逆眾千餘竊踞渭源城中陝回與狄河各回正爭糧私鬪聞官軍至惶懼思遁傅先宗等遂收復渭源縣城乘勝奪一桿旗之險就地築壘距渭源十里狄道百里爲西南一大關鍵周開錫令梅開泰分營扼之諸軍

一意進攻六月初二日傅先宗王得勝彭忠國何建威等分三路進遇逆首六阿渾禹得彥等憤戰之賊大戰於秋東三十里鋪捷焉沿途賊卡悉平遂直薄城下王得勝衝入北門傅先宗入東門巷戰逾時賊敗由西門狂竄越洮河而西官軍感之斃其眾畧半牟佛諦守堡之賊開門乞撫傅先宗麾軍急進殘賊敗入堡中官軍躡之立復牟佛諦堅堡餘賊鳧水逃竄而洮岷一帶周開錫原派范銘一軍分駐秀石關酒店子木寨嶺等處敗賊竄至喇嘛口范銘整隊迎擊賊敗竄秀石關官軍由鐵鼓溝大車廠搜斬而西斬殺極多生擒河

州賊目阿洪議布納等賊遁歸巢復嗾其黨犯洮州糸麻亦
爲副將張廷秀土司楊元所創此次南路大捷經左 穆
圖善會奏奉

旨獎卹如例而規取次第必先甯靈而後河湟亦纒陳

聖鑒焉值陝北零匪逐漸殲除陝撫蔣志章同時陳奏於是
東路無虞不致再分兵力而北路劉錦棠黃萬友金運昌等
亦知中路之軍必將奮力合剿因益籌進攻之路兼絕賊中
之糧以期速蕲厥功緣金積正北之蔡家橋跨秦渠之東賊
設卡於橋西半里迤西而北而東南爲長隄隄之外引秦渠

三定國附錄卷之九
馬連渠之水爲濠環之非奪蔡橋水口不能薄金積也六月二十八日會同金運昌馬步越秦渠列陣分兵扼蔡橋水口立營正部署間金積堡秦壩關棗園堡各寨之賊傾巢而出官軍前隊屹立待戰後隊趕緊修壘午後賊爭水口益力官軍悉銳向賊寨猛進馬隊橫截而出賊敗退回寨日晡壘成分營駐之官軍旣得水口遂圖平沿濠賊卡七月初四日三鼓劉錦棠潛師夜起令軍士各攜草束至卽填濠而過就地築壘分馬步兩支鈔出以護砌礮臺之隊乃各堡角聲四起賊黨分布寨邊搦戰官軍俟其盡集分數起突擊之賊向金

積敗遁初五日黎明賊仍蜂出瞥見金運昌所部各隊恐截其後乃縮入寨中官軍踏毀長隄數十丈分營駐守而還其毗連蔡橋者爲棗園堡迤西有小何家寨寨東爲蔡家寨皆濱大河劉錦棠察其形勢可急攻而下初七日約金運昌馬步各攜攻具先攻小何家寨一鼓拔之蔡家寨賊見鄰寨已破慌向大何家寨遁走官軍縱馬鈇殺步隊奪門而入斬逆目何登榜及其眾五百餘名棗園金積援賊見兩寨齊破鼠竄而遁馬化澧恐官軍逼攻愈緊復於卡西築隄瀦水旁溢以阻官軍初八日黎明湘皖兩軍馬步會合向蔡橋而進金

積秦壩棗園之賊排列堡前金運昌率隊沿渠堰列陣劉錦棠率隊一列渠南一列渠北騎賊鈔過北面步賊繼至雙壽余虎恩躍馬突陣斬騎賊甚多各路一齊猛撲鏖戰兩時賊大敗狂奔而西初十日會割棗園堡北之麥襲攻周家寨垂破之際忽金積秦壩大股來援官軍敗之取其麥而還十五日下攻王洪寨金運昌詐敗誘賊賊果出隊遠追約四里許劉錦棠馬步橫出截賊爲兩金運昌轉旗突擊賊之前股盡殲雙壽敗東面之賊擒斬亦多據擒賊供王洪寨首逆王鵬已被矛刺墜塹而死僅尾股遁入北門所存亦無幾因日已

暮收隊而還自賊隄成後路多積潦仍礙馳驅因商定扼紮賊隄逼水反灌十三日傳令步軍由東南鳧水前進皖軍從左湘軍從右賊沿隄開礮抗拒各路奮威衝殺賊望風而潰官軍登隄卽趕砌礮臺一面嚴陣以待金積秦壩各賊果傾巢而出官軍俟其近以鎗礮輪轟賊敗而復前者十餘次薄暮復糾大股悍黨索戰官軍齊奮壓勦直薄金積卡前賊始拋械而遁是役擒斬更多據供馬化澂喉陝回余彥祿陳林馬老五馬長順馬必政沙學賢馬政國各選悍賊以決死戰圖奪長隄不料連敗訊畢斬之十四日壘成決水反灌賊復

築隄禦之而馬連渠上新立三壘亦賊近日之所築僞參領
金嶺踞之以與官軍板橋營相抗二十二日五鼓徑擣其中
一壘預令陶定昇易致中伏壯士於膏梁叢中賊開壁放牲
畜伏起奪門而入大隊隨之賊之得脫者奔左壘官軍搜獲
僞檄係飭僞協領何生洲僞參領馬兆圖金嶺等助逆目王
鵬者也據賊供金嶺已中礮死馬兆圖卽馬八條之子並陝
回李長春均斃於初八日之陣官軍進攻左右壘方麾軍與
援賊酣戰間而右壘已破士氣倍奮乘勝再撲左壘賊仍拚
死救之乃調開花礮環轟炸彈衝入壘中賊始亂併力撲之

遂克於是縱兵四出進攻馬連渠之李花橋踏毀大小賊卡十一所自是金積與王洪胡家各堡聲息不通而河西糧路亦斷官軍增壘於金積堡正東賊眾放鎗以拒鏖戰終日而壘始成訊之擒賊知逆目何標馬允吉均於十二日破壘伏誅而連日所斃之賊約近二千二十五日官軍見金積賊眾紛紛西趨急捕賊訊之知中路雷正綰黃鼎諸軍已奪峽口之險劉錦棠亦乘機攻李花橋迤西賊寨金積堡仍出步賊入寨助守攻未卽下申初西路塵氛大起劉錦棠知爲敗歸之賊撤攻堡隊伍截之斃賊無數而日已夕劉錦棠知中路

諸軍已集圍攻期將不遠遂連日督隊收其秋稼惟李花橋之戰總兵趙彩照躡賊至金積濠邊額顱中大礮子登時陣亡實爲可惜此北路六七兩月戰狀也中路諸軍旣奉檄於中衛之四百戶取齊七月初四日訶僞領員袁希義綽號皮英者率悍賊入張恩堡是夜各派馬步襲之初五日黎明至其堡賊已驚覺官軍搶入外堡賊焚薪於門誓死守半日未下而金積援賊又至乃分兵截擊仍併力攻堡壯士登而復墜乃令環濠築壘而暗掘地道攻之初六日悍賊開壁突圍官軍遮擊得脫者實鮮乘勢搶入堡中搜斬淨盡袁希義旣

得免奪路狂奔徐占彪所部張永興張占彪追擒之據供本
先鋒袁希孟所踞因奉調歸金積馬化澆急嗾袁希義死守
以固峽口訊畢將希義正法軍前袁希孟乃降而復叛之賊
叛後助惡加厲河南北屢受其害至是袁希義伏誅羣情爲
之大快時提督陳廣發已率所部扼峽口北岸初十日截刦
糧之賊畧有斬獲而雷正綰諸軍亦進牛頭山逼峽口而壘
徐文秀復奉檄至會師牛頭山二十二日黃鼎約陳廣發進
兵唐渠口是日馮南斌率隊斃刦糧之賊於八塔山據擒賊
供逆目馬四子已溺河中二十四日黃鼎雷正綰等會攻峽

口徐占彪督陳春萬朱蘭亭先進戰方酣而金積迤西各堡
援賊至黃鼎督提督黃有忠何玉超黃虎臣陳攀仙趙興隆
遊擊李洪超李登高等扼牛頭山右截之徐文秀各軍爲策
應當援賊之敗轉旗助勦峽口陳廣發令馮南斌等亦於隔
河用鎗礮排轟賊勢不支遁入壘中徐占彪所部躡之入壘
徐文秀率總兵蕭寶林遊擊陳締高繼之連破二壘雷正綰
閻定邦各營復破其三殘賊東逸黃鼎派隊急截之無一漏
網擒賊供稱逆目王大閑丁逢翔馬紀成均斃壘中矣峽口
旣得秦漢馬連三渠之首皆爲官軍所據二十八二十九等

日金積出馬步萬餘列隊古靈州城護賊於秦漢兩渠中間築卡濬濠以抗官軍黃鼎雷正縮會商先奪古靈州城三十日徐占彪徐文秀越漢渠立壘旣成徐占彪夜襲賊卡破之乘勝搶入古靈州城八月初一日黎明馬賊沿山包裹而來步賊分股伏漢渠隄下雷正縮麾隊迎擊馬賊徐文秀各營合擊步賊黃鼎率大枝傍渠布陣以防伏賊馬賊敗而復前雷正縮正揮刀督戰徐文秀隊伍一齊撲上馬賊不支沿渠步賊蠢起挺矛直前徐文秀橫貫賊陣縱橫盪抉賊大敗歸巢屍骸枕藉官軍薄暮收隊初二日再戰於乾渠頗有斬獲

初三日五鼓黃鼎徐占彪挑選壯士直撲賊卡賊自夢中驚起倉皇狂遁官軍搶過賊濠守濠之賊不敢抵拒爭入丁家堡官軍躡至堡根卡內礮石雨注未能卽克徐占彪卽扼卡而營雷正綰列隊濠外更番仰轟徐文秀施放後膛開花大礮炸彈飛落卡中各營乘勢一躍而入卡中賊盡殲堡賊猶憑牆以抗黃鼎令各營繞漢渠出中空之地築壘斷金積援賊徐文秀復開後膛大礮堡中賊眾慌亂遂突圍而出將趨金積堡雷正綰徐文秀催隊從堡牆缺口躍入遇賊卽斫殺無遺其先時逸出之賊黃鼎督各營殺之幾盡據擒生賊

常愷供本靈州廩生同治二年陷入金積者馬化澂以丁家堡地形扼要唆逆子耀邦建邦領悍賊駐守初一初二等日悍目楊大娃子丁永等均經陣斬馬耀邦敗走洪樂堡此堡破時逆目丁一剛伏誅開壁遁者逆孫馬進孝也初四日官軍分途攻勦連克大小逆堡二十餘座逕逼洪樂堡立營此中路由峽口進攻戰狀也兩路疊捷同日馳奏在事尤爲出力各員均蒙

敘獎餘亦准擇尤酌保陣亡者

賜卹如例自是金積逆勦可以兩路夾攻矣七月三十日金

運昌襲秦渠迤北賊卡克之丁韓各寨援賊皆被創而退八月初一日黎明金運昌之軍攻正西韓家寨破寨外二小壘乘勝越秦渠衝入西南各賊卡賊鼠竄而逃遂平毀其卡是時劉錦棠及雙壽擊賊李花橋將各莊內外賊眾一律殲除正會同追勦適金積之賊突出應援劉錦棠金運昌麾隊奮擊賊大潰劉錦棠縱馬隊步軍追至馬連渠金運昌追至金積堡根克秦渠水口兩卡而還初二日商定緣蔡橋溯秦渠而西令馬步同進賊見官軍雲集棄壘狂遁馬隊正追殺間秦壩關之西突出賊騎數百劉錦棠截之訊之擒賊始知爲

中路勦敗東奔者嗣是連日收割秋稼初四日金運昌率隊襲何家大寨遞進環攻至初五日黎明按隊稍憩賊從堡內鑿小竇遁出官軍佯爲不知俟其漸多縱馬步猛鈔得免者少乘勢劈寨門而入見寨內屍骸枕藉訊擒賊供知逆首何一會已伏誅劉錦棠雙壽遂督隊割胡家堡之麥王洪等堡悍賊救護皆敗而遁收隊回營得中路各軍逕逼洪樂堡之信卽繞赴黃鼎雷正綰營中會商定計先奪秦壩關以聯絡西北官軍營壘而斷馬家灘接濟之路十二日劉錦棠金運昌雙壽等各督所部直指秦壩關賊眾悉銳以抗官軍三路

衝擊賊勢披靡躡至秦壩關西黃鼎雷正綰徐文秀皆至賊
狂奔四散追官軍收隊賊復回撲各營夾擊之賊始敗遁訊
擒賊供余彥祿之弟僞副帥余彥喜已中礮斃於陣中於是
劉錦棠再築壘金積堡東賊畏官軍之逼亦於堡東添築卡
壘嗾黨死拒十三日徐文秀率所部帶後膛開花大礮螺絲
礮會合北路馬步各營進攻甫抵賊壘金積堡傾巢而出一
面分兵堵斂而以大礮轟其壘壘牆洞穿賊眾稍亂軍士擲
草填濠壘中木石俱下援賊亦合勢來撲官軍併力壓之乃
毀其卡乘勝從礮眼猱升格鬪逾時乃悉就戮據擒賊供礮

子落壘中斃傷數十眾懼思遁馬化濼三傳僞令止之逆目
楊洪傑梁惠一亦拚死抗拒壘破伏誅立派隊駐其壘自連
破賊壘進駐之後距東關賊寨僅百步十七夜劉錦棠令軍
士銜枚襲之寨賊驚覺鳴角放鎗金積悍賊蠶起劉錦棠伏
兵西南護築礮壘而以大枝擊援賊火器迸發夜明如晝相
持至五更援賊敗遁而礮壘亦成十八日天明金運昌隊伍
齊至寨牆經大礮轟裂守賊慌亂軍士乘之克其外卡遂從
寨牆缺口躍入拔之寨中包小寨甚多賊皆棄之而走馬隊
攔途遮截復跟蹤搶入東關賊憑街口死鬪軍士短兵巷戰

馬隊鈔過東關之北賊眾失措乃護眷向寨東狂遁棄輜重滿道官軍將寨卡二十三座次第踏毀焚鋪屋三四千所十九日訶敗賊護眷踞金積南門牆根與李花橋迤西賊寨爲犄角二十日黎明劉錦棠會師進勦各寨逆眾排列官軍步隊分數路布壘陣馬隊取遠勢鈔之衝殺里許逆眾仍返旗回撲各營揮刀斫陣奮勇齊進賊始敗潰乘勢攻拔各寨卡自是金積東南北三面蝟穴埽平劉錦棠壓東關而壘俯瞰賊巢而中路諸軍自進逼洪樂堡後賊黨連日增築卡壘與各寨聯成一片爲堅護洪樂堡之計蓋馬化澂祖墳所在俗

傳風水有異者也黃鼎雷正綰會商必先攻破老馬家各堡而後可圖洪樂初八日各軍會圍老馬堡凡晝夜一周連放後膛大礮牆裂丈餘軍士乘機猛撲平其外濠賊眾力捍牆缺至初九日洪樂各堡赴援黃鼎乃督何玉超等從米姑寺逕襲洪樂堡之虛雷正綰督劉治均等隨後策應洪樂援賊悉回堡拒守陳攀仙趙興隆督隊跟踪躡殺何玉超等繼之見金積援賊兩路包鈔洪樂敗賊亦回頭死鬪各營勢幾不支黃鼎急令黃虎臣率隊橫貫賊陣雷正綰令馬隊下馬持矛合步隊盡力衝殺徐文秀派隊從老馬家堡旁出以截援

賊各軍士奮威壓勦賊眾大潰鼠竄歸巢老馬家堡之賊見
外援已絕勢已垂危慌亂失措徐文秀蕭寶林執旗先登徐
占彪繼之遂拔其堡堡賊無一脫者初十日進石屹塔平賊
壘三座割其秋稼徐文秀移駐之自是中路北路營壘以通
十二日各堡賊紛紛東竄黃鼎等方督隊攔截而劉錦棠金
運昌已自東而西兩面鈔擊賊之生還者實鮮十六日各軍
併力攻田家橋賊壘黃有忠護大礮對賊壘緊轟裂其牆垣
雷正綰麾軍躍入遂拔其壘官軍正內外鈔殺金積洪樂援
賊大至黃鼎徐占彪迎擊洪樂之賊徐文秀彭清和等軍擊

金積之賊麀戰逾時蕭寶林躍馬斫陣軍士競奮從之兩路之援大潰黃鼎麾軍撲附近各壘陳春萬等帶隊平濠冒險力攻克之黃鼎進軍田家橋馬化澂復遣其弟馬玉澂陝回西彌頭目普洱馬阿洪赴黃鼎軍前哀詞求撫黃鼎諭令先繳馬械毀平堡寨馬化澂求官軍暫退峽口黃鼎不許連日金積堡眾逆趨西門其向滾泉羅山竄遁者黃鼎亦令駐韋州滾泉馬家河各軍截之疊有擒斬二十三日徐占彪攻克洪樂堡外兩小寨連日進攻洪樂堡賊守備甚周外援皆盡官軍更番疲之而死抗如故逆賊知官軍已逼罪無可逃故

戰益加厲何玉超李洪超陳春萬李全貴等均負重傷陣亡
弁丁更多陳奏奉

諭北中兩路各軍均邀從優

獎卹值幫辦軍務頭品頂戴記名提督瑚松額巴圖魯黃萬
友積勞成疾於八月初七日歿於營次附片陳奏奉

旨賞給一品封典照提督在軍營立功後病故例從優議卹
加恩予諡附祀劉松山原籍及死事地方專祠以慰忠魂而
金積堡勞師日久亦奉

嚴旨責催故攻勦益急八月二十一日劉錦棠以東關既克

當掘濠築牆鎖圍以困之商定湘軍由東北掘東南兩面皖軍由東北掘正北一面二十四日興工賊初撲皖軍金運昌督隊且掘且戰劉錦棠派隊由西門截之賊始潰遁入堡午後復出大隊攜帶鋤鋤意在拚死填濠金運昌停工猛進鏖戰一時之久賊始大敗二十五日金運昌預伏精銳而以羸弱赴工賊自牆頭覘之以爲無備也馬步蠶擁而來勇夫棄鋤佯遁誘近濠邊伏兵突起賊卽敗遁據擒賊供余彥祿之弟余彥壽馬正和逆目馬光貝等均斃於此戰是時峽口旣得官軍堵塞渠源凡渠皆涸前此阻水之永甯洞馬家兩寨

俗呼爲雙桅桿又名油坊寨非船不能來往者至是已與陸通二十七日劉錦棠令董福祥等夜襲之以四鼓往登時破其寨寨頭馬重生縋牆遁入油坊寨僅以身免二十九日加派譚上連陳宗蕃等率馬步助之亦應手而克寨內搜殺無遺兩寨之破前後凡三日計兩軍所掘之濠已深丈餘寬二丈牆上亦累高八尺餘矣乃派隊分段以守九月初一日議攻西門外支帳護堡之陝回五鼓潛師夜起劉錦棠會同雙壽率所部銜枚疾馳沿馬連渠直上西南三里許分派何作霖王承贊李樹棠等由左羅照昇朱德開周國勝潘鳳翔等

由右其餘各營潛伏渠旁馬隊齊進左路之左以備鈔殺金
運昌亦於五鼓出隊接應黎明左路逕薄西門火器環施回
眾驚呼回竄馬隊兩旁鈔殺無從漏網忽金積堡牆鎗礮紛
注甘回縋牆下撲劉錦棠飛令伏軍分兩路衝出接應而關
外卡中之賊突出鈔湘軍之後金運昌督隊迎擊賊甫敗潰
忽金運昌帶傷落馬賊復回撲張懷玉高得勝率所部橫截
將賊擊退忽洪樂堡騎賊越馬連渠而南金積堡復出步賊
直犯正南官軍馬隊迎擊騎賊董福祥等趨正南與步賊接
戰雷正綰黃鼎各軍急出洪樂堡前以掣賊勢賊始敗退初

四日劉錦棠親至中路晤商黃鼎雷正綰徐文秀合成鎖圍
湘軍於金積西南再紮兩營中路各營由洪樂堡分營東向
修壘掘濠以期聯絡一氣初五日午刻劉錦棠正欲出隊忽
飛報金積逆回悉數西趨徑撲中路各軍劉錦棠知會皖軍
帶隊馳往金運昌亦裹創督隊截擊金積援賊賊見前後皆
官軍縮朒不前黃鼎雷正綰徐文秀督軍壓之湘皖兩軍夾
擊賊敗入西關伏巢屢日各軍得一意修壘回眾見官軍日
逼惶懼益甚十二日黃鼎徐文秀正督軍移營逆回忽出大
股來犯劉錦棠金運昌率各營馳往鏖戰逾時賊仍縮退入

堡訊逃出難民供稱陝回急謀竄走劉錦棠金運昌令各營以五成站隊守濠每夜躬親查閱十三夜四鼓回逆循堡南折趨東南撲近長濠各營轟擊而退旋聞西面鎗礮更緊派弁偵之報稱陝回二千餘人由西南衝出劉錦棠金運昌派隊馳追一面攻余彥祿賊堡一鼓克之辰刻追騎回營據稱追至十餘里見人馬蹤跡折轉正南沿山腳東竄獲落後回逆七名訊之供稱余彥祿馬步千餘人擬赴王洪堡索糧仍回金積堡陳林因傷重未去十五日陝回果回金積維時金積甘回紛紛出巢撲近長濠希圖夾攻劉錦棠金運昌擊之

輒敗因議王洪楊明棗圍三堡與漢伯堡狼狽相依皆在長濠之外宜併除之十六日各派步隊分左右路擊之馬隊分列以防溢賊專用螺絲礮連轟斃賊甚多而矢石雨注不能遽近是夜伏兵堡旁賊之潛出者皆被擒殺十七日督隊於長濠外復掘重濠而約黃鼎徐文秀會攻漢伯堡十八日猛攻久之未克已收隊回營劉錦棠惜棄前功督隊復往以火器護梯四面環攻旋擲火包延燒前寨柴草寨賊始亂後寨之賊潛出金運昌盡斃之十九日天明火熄據擒賊供逆目丁春已赴火自焚隨攻馬家寨亦未克二十四日夜忽報馬

家寨賊棄寨而逃追而殲之河干回營督修重濠圍攻益緊十月初一日官軍昇開花大礮安向東門測準轟之見堡內塵坌大起喧嚷甚急半日始定是夜獲逃賊訊之供稱是日辰刻馬化澂登東城催修牆垛忽礮子飛穿城樓碎片擊斃五人馬化澂左耳受傷倒地昇歸醫治既而各營獲賊所供皆同劉錦棠念漢伯堡未克深以爲恥意欲攻之初五日劉錦棠黃鼎雷正綰徐文秀三路並進雙壽亦率馬隊前來劉錦棠督軍築兩壘兩卡各軍列陣營前堡賊倚牆開放排鎗拚死抗拒王洪堡復出騎賊來援余虎恩雙壽馬隊截擊敗

遁午後壘卡並成賊之倚牆列隊者益密官軍以開花大礮連番轟擊悍賊傷亡已多逆目金大川中礮立斃而濠塹深闊未可飛越急令囊沙縛草爲填濠之備各營將士分伏濠外伺之二鼓堡賊穴牆出竄官軍齊起奮擊其得脫者馬隊截之洋麻湖倖免無幾中路各軍自八月二十三日攻克洪樂二小寨後馬玉滢詣營乞撫奉黃鼎面諭久不見報至二十九日乃再詣營請獻米姑寺兩堡並洪樂堡商定漫應之卽夜緘會北路出隊黃鼎雷正綰於九月初二日率徐占彪閻定邦蕭寶林移營前進適北路力攻陝回獲捷遂乘勝移

駐洪樂堡初九日黃鼎派黃有忠陳攀仙兩營雷正綰派李廣珠一營移紮西南半里間徐占彪朱蘭亭列隊護之已刻陝甘各回集眾萬餘來撲官軍禦之小勝陣斬偽元帥鄒麻子追至金積濠外朱蘭亭右膀中鎗子傷張友德王宗譜陣亡方將收隊賊乘勢復出黃鼎飛調李吉安冷玉超禦之雷正綰徐文秀調隊接應劉錦棠金運昌從後鈔擊賊遂大敗黃鼎雷正綰急督各營掘濠修壘因丁家馬家譚家十一堡未克不能合西北之圍初七日雷正綰飭所部分爲三支各攻一堡堡前作勢急攻堡後施梯潛上各軍如令行之果克

丁家三堡斃賊數百生擒甘回頭目丁玉貴丁玉洪斬之其附近廖家三小堡亦棄堡而逃初九日圍攻譚家堡未克傷亡幫辦哨官六員並弁丁二百餘名黃鼎雷正綰徐文秀憤甚督隊猱騰而上賊猶拚死格鬪血戰逾時始將堡賊殲盡生擒甘回頭目嚴鼎均嚴洪發莊紅等三名斬之時已薄暮令軍士傳餐少憩接攻馬家等堡各賊知勢不敵棄堡而逃惟馬家堡賊穩踞如故是時大風捲地軍士順風施放火器堡內房屋柴草延燒人聲鼎沸官軍四面緣梯而上賊潰圍紛竄官軍搜勦極多自是金積西南一帶堡寨大小百餘所

一律剷除十一日徐文秀徐占彪復移營進逼金積西門午刻金積賊眾傾巢出撲各軍力戰賊始敗歸十三夜四鼓陝回逕撲新壘苦戰卻之追至米姑寺河邊賊正搶渡官軍掩之斃賊千餘接攻秦壩關堡及下寨一鼓克之忽有另股逆回乘夜由中路各營中空之地衝出向漢伯堡遁去劉錦棠截而勦之約斃其半訊據賊供首逆余彥祿於竄出時受鎗子傷自左腮下穿入右耳邊透出昇至王洪堡氣絕黃鼎所獲賊供亦同而各處亦以此報則伏誅無疑矣此逆兇狡異常自陝西敗後以金積形勝率黨附之知其不可保及早去

之固自以爲得計矣而不知己身之死在金積未破之先又
卽率眾逃死之日天果可逃乎哉余彥祿旣死其黨於九月
二十五日竄至半角城李旺堡一帶周紹濂會同李振國屈
聖祥等勦之二十九日竄至倒洞子周紹濂迎擊之賊翻山
遁野宿草間周紹濂乘夜襲之屍骸狼藉訊擒賊供此股係
馬長順李映春丁三保丁普雲馬永等所帶欲往河州就食
者也十月初二日派隊搜山復斃逆目丁三保等多名餘竄
黑城子一帶署平慶涇道魏光燾詢賊繞道竄西山羅家峴
卽夜率所部追之五鼓抵羅家峴賊眾倉皇列隊勢已先頽

官軍奮力撲之應手而潰適已革山西臬司陳湜奉檄馳至步賊遂淨惟騎賊之先逸者獲免要亦無幾此余彥祿之黨求緩死而反得速者也官軍旣逼金積從外度之其城周九里有奇東自吳忠至靈州堡寨四百五十餘所僅存王洪楊明兩堡西自洪樂至峽口堡寨一百二十餘所僅存馬家灘四堡馬家灘者河中之洲四面皆水官軍旣無暇攻取亦不能濟賊緩急馬化澂可云窮蹙極矣所恃以支旦夕者堡牆高近四丈厚約三丈許堡中有堡爲首逆老巢黨眾呼之爲王城中間牆壁縱橫儲備盈足皆從前詐降後晝夜掘築刦

運以爲負固計者也逆黨之忍驚比馬化澂尤堅馬化澂每
次求撫多爲其黨所持緣新教比老教尤毒自蘇四十三倡
亂以後根株未淨或謂馬化澂卽蘇之遺孽縱不盡然然嗜
亂輕生是其本性未可以常情例也此時馬化澂所望者祇
河州陝甘各回而河回念切唇齒亦急欲東犯以綴官軍九
月二十一日河州馬步賊二千餘名由康家崕水淺處偷渡
洮河楊世俊率馬步五營護餉過安定探得確託設伏赤沙
峴以待二十二日賊竄通安驛周道欽禦之眾寡不敵哨官
向宏猷楊占元死之賊旋竄赤沙峴伏兵突起賊敗走石山

川二十三日楊世俊之軍追至石山川痛勦之賊復敗而四散潛踪回巢據擒賊供此股係馬阿渾劉阿渾馬二張狼嘴馬三師務五大頭目所帶因金積求援出巢探試者也而中路黃鼎等軍攻克漢伯堡後以西南數里張家泉全家堡地方尙存團莊兩所初七日黎明各帶步隊往攻賊不虞官軍猝至閉門不及官軍衝殺而入兩莊之賊殲焉僅存王洪楊明兩堡雖經劉錦棠擒斬首逆而黨類尙多且爲漏網殘回遁逃之數商定會合進攻十一日四鼓各率馬步前進十二日辰刻齊集楊明堡外黃鼎雷正綰駐紮正東以備王洪堡

援賊金運昌徐文秀紮西南以杜堡賊外竄王衍慶運各洋礮列於東北劉錦棠督大隊護之各軍正揮鋤修壘賊遂依濠列隊尙未交鋒後膛礮已衝塌垛牆丈許賊懼縮入堡中時已薄暮矣十三日王洪堡賊率馬步來援黃鼎雷正綰等敗之追殺數里而還王衍慶連放大礮衝塌寨牆五丈餘各軍奮撲濠邊攀援直上堡賊磚石紛下弁丁受傷者眾乃夤夜分伏濠中二更後賊放火焚巢突圍而出伏起斬賊巨楊洪開楊十五於濠其衝過濠溝者馬步四面遮截無一漏網堡中老幼自焚軍械悉付火中僅存焦麥數十石而已官軍

平毀寨牆次日進抵王洪堡見堡牆堅厚有過楊明試以大礮不能洞入遂收隊而還值河州陝回崔三禹得彥竄擾平番縣境南宇兩營禦之於沙溝失利提督張萬美總兵彭清勝陣亡賊逼縣城經青海大臣豫師署莊浪協副將鍾本起督隊力擊賊向東北山溝遁去穆圖善馳至親督馬步追勦斃賊極多餘逆遂竄鎮番穆圖善令鍾本起另募勇五百名以資助守仍率所部回省左 恐該逆由阿拉善旗地繞竄甯夏河西以援金積檄飭諸軍預爲之備劉錦棠等會商馬家灘懸居河中恐爲援賊所踞宜先取之遂於二十一日

會師濟河二十四日將所有小堡小寨及附近團莊一律掃
除僅存兩堡連日進攻未克緣堡牆數重均係沙土築成不
似磚石堅土易於著手地雷炸彈轟塌數處而賊處必死之
地心力易齊隨坍隨補依然如故悍賊雖多死亡而將領壯
丁因仰攻而受傷者亦復不少左 念金積之賊困猶負
固馬家灘堡又窮於力攻勞師愈久殺戮愈多因飭撫定陝
回頭目劉秉信前往營中設法引導陸續投出老弱數百其
壯丁則悉爲逆首所持欲出不能其已投出之回目馬清壽
卽普洱阿渾當經安插平涼以資誘勸原不忍盡誅其人也

乃河州逆眾急思援救金積劉阿渾馬阿渾負創歸巢後挑
選悍黨率馬步二千餘由三家集渡洮出柳林溝一由大寨
子渡渭而南一由站灘出好麥川而北十月十五日楊世俊
李耀南立率所部出嶠口截之賊正偷過該處官軍突出截
賊隊爲兩段未過者敗退而回已過者向北原狂奔官軍分
起進擊各有擒斬追殺數里而還連日派勇偵探該逆潛伏
山谷不知何往楊世俊等始回馬營監二十日該逆竄靜甯
之蔡家堡與余彥祿殘黨丁步月米自元等合股並沿途勾
結零匪共三四千名駐靜甯總兵蕭賞謙急率所部往勦麩

戰凡兩晝夜斃賊百餘名卒以眾寡不敵致挫還防迨劉明
燈殷華廷馬步兩營及親兵四哨奉檄馳至賊已望風而遁
追及於通渭之董我堡會同李耀南擊之賊敗向秦州之蓮
花城南趨楊世俊李耀南訶而擊之於邵家堡該逆列隊抗
拒另伏悍賊於李家川以圖鈔截楊世俊登高見之將伏賊
先行勦除麾步隊直擣中堅血戰數時之久弁勇頗有傷亡
適馬隊鈔出賊後合勢圍殺賊眾駭奔官軍奮勇追殺賊屍
枕藉川流爲斷墜嶺者尤不知數連日搜殺所至無遺據擒
賊供此股自金積竄出經官軍連次擊敗與河回合竄張家

川其領員丁步月沙自元丁以全馮奇等均於陣前伏誅劉
阿渾馬阿渾及僞元帥伍老三沙成均分散潛逃急派勇四
路偵探楊世俊一面率隊出秦安得回報賊匿崔家磨等處
卽乘夜往襲陳台劉三元周道欽等率步隊繼之初三日黎
明齊集賊尙未覺遂將崔家磨之賊圍殺淨盡孫寺灘鐵爐
坡賊黨來援官軍乘勝猛擊之斃者無算生擒僞領員馬開
忠等斬之餘賊向禮縣狂奔復經李輝武迎勦於蔡家河殘
股散入南山藏匿官軍晝夜追勦至是已歷兩旬亦可云苦
戰矣比經會銜奏請

獎卹乃該逆遁入南山後邀脅各處回眾人數漸增劉明燈
蕭賞謙殷華廷等疊奉嚴檄冒雪搜捕周開錫亦派虎威等
營會勦閏十月中旬賊竄徽兩之間經駐兩當之提督胡國
珍總兵蕭德林擊敗竄至石家灘李輝武設伏敗之賊棄驢
馬翻山四竄李輝武縱兵追擊斬馘愈多生擒逆目趙福玉
蘇咸喜等斬之賊遂敗而北竄劉明燈蕭賞謙殷華廷田連
考謝復雲等預料其南竄不遂必折回張家川以有撫回李
得昌爲之宗主也乃先據隴州之若絲灣石莊子兩處扼險
待之十八日敗賊果至蘇家河是夜三更會大營之親兵四

哨疾馳前進十九日黎明齊集賊方出谷乍見而驚官軍奮
威乘之所斃甚夥賊翻山而逃官軍連夜追殺賊東西分竄
復經總兵邵永齡副將王光發截之唐家河稍有擒斬戴定
邦再截之於三寨鎮而陳湜所部又截之於靜甯之合水川
賊竄安國鎮楊芳桂等痛勦之遂星散不復成股因分別收
撫而此股已無回巢之賊其自平番竄鎮番一股亦經遊擊
韓廷芝等迎擊而敗餘衆遁往柳林湖其地愈西聲息益隔
金積逆巢旦夕垂破已不能待其救援延至十一月中旬糧
已淨盡馬化澂乃自詣軍門哭泣請罪劉錦棠等商定羈之

幕中一面平其堡寨飛稟請示左 據稟馳奏疏云竊北

路中路諸軍會攻馬家河灘所餘兩堡晝夜更番猛撲及撫
定回目劉秉信救出難回數百口回目馬清壽挈眷投出各
情形已於十一月十一日馳報馬家河灘之賊經各軍更番
痛勦死傷山積劉錦棠等復增築礮臺逼之賊於堡內穴地
而出夜襲礮臺又經蕭章開何作霖徐占彪等殲之臺下堡
賊窘急乞降然令其繳械毀堡則仍疑懼不決閏十月二十
二日據劉秉信引出之賊供稱陝回飢困日甚羣思冒險竄
遁見官軍方聚攻馬家河灘金積東北濠牆之守必虛圖於

夜間猛撲突圍而出劉錦棠黃鼎雷正綰金運昌徐文秀等會商初更抽隊潛伏牆內靜以待之夜半月上賊二三千由堡根潛趨東北直抵濠邊見牆上更鼓稀疏人語靜悄乃越濠攀堞而上官軍鎗礮齊施開壁縱擊斃賊無數賊敗歸巢黃鼎雷正綰徐文秀等復截之半途計斬賊近千名生擒二十餘名訊稱陝回馬大師已斃於陣馬化澀之死黨譚生成受鎗子傷甚重劉錦棠旋於金積東門外搶築兩壘併築礮臺俯瞰賊巢黃鼎復擬抽隊逼紮西門賊益恟懼不知所爲嗣是堡內堡外老弱婦女日詣劉秉信所駐濠外號呼救命

慘不忍聞詢知賊中惟馬化澹親屬及其死黨尙有存糧陝
回之能戰及堡賊之守堞者日給糧一筋近亦漸減此外皆
以草蘘黍根雜牛皮死屍爲食首逆陳林情急因劉秉信求
降於官軍劉錦棠黃鼎雷正綰徐文秀姑漫應之十一月初
十日陳林閻興春于兆林馬振江金明堂馬化鳳黑清泉等
挈老弱婦女八千餘赴黃鼎雷正綰營外長濠跪求收撫自
言易子析骸逃生無處之慘聲淚俱下且言官軍如准收撫
餘衆該頭目等死亦心甘劉錦棠黃鼎雷正綰徐文秀等數
其罪孽令悉數呈繳馬械聽候轉稟撥其男丁分起安寘各

營婦女則安寘外濠之外給以賑糧聽候安插馬化澂見官軍已撫陳林等遂求陳林轉稟願撥馬家河灘糧食三百石給濠外婦女求撤馬家河灘之圍劉錦棠等許之責馬家灘悉繳馬械卽日自平堡牆聽令比因收繳馬械入堡檢視見堡內之馬已悉數轟斃殘賊穴地而居以死馬雜衣被氈絮器物填塞轟坍各口遮抵鎗礮堡賊四五千存者不過千餘精壯者不過數百然皆身無完膚也仍令暫居故處十五日馬化澂復求陳林轉稟請平王洪堡堡目王洪前已伏誅回民馬三仲王鵬等自毀其堡以堡眾降劉錦棠收其馬械亦

令仍居故處馬化澂因已就撫料必無他十六日親身赴劉錦棠營濠外伏地叩頭令隨行一人踰橋遞呈具言罪民所犯情罪自知不赦叩懇恩施如蒙念族眾無辜者多轉稟曲宥僅以罪民一人抵罪死無所恨劉錦棠令開壁納之一面馳告黃鼎雷正綰金運昌徐文秀王衍慶等會商所以處之者諸將士怒其久抗顏行羣思縛而磔之以報私仇而雪公憤黃鼎雷正綰諭慰再三定議飛稟請示劉錦棠卽寘馬化澂於幕旁派弁監護之一面飭馬化澂速繳鎗礮畜械丁壯不許持寸鐵自平堡寨牆垣地上不准留壞土開造戶口名

冊候示遵辦二十四日臣接來牘再四籌維西陲之不靖於
今九年關隴諸回率視金積爲嚮背其狡謀兇醜實異尋常
馬化澂非窮蹙至極必不輕冒鋒鏑以求生今旣隻身來投
並非誘致則操縱在我因而誅之不可謂武且馬化澂乞撫
之詞顯欲一身塞責市德諸回爲要結人心之計因而誅之
亦且墮其術中卽於來牘批示令馬化澂本堡馬械繳盡牆
垣毀盡後接辦王家疃通昌通貴各堡撫局再辦河州西甯
撫局如皆盡繳馬械盡平堡寨撫局有成再當具奏請
旨陝回陳林就撫後各陝回聞風而至統計陝回男婦大小

共一萬一千有奇老弱婦女近九千名除馬長順一股數十名因其眷口爲宋軍俘獲現尙留昌貴二堡尋覓眷口外餘均分三起解赴平涼聽候安插自此甯靈一帶無陝回蹤跡矣臣前於平涼縣大岔溝邢家溝北原安插陝回戶口數千給以賑種其餘荒絕地畝雖多然不成片段又平涼係入甘肅大道居關隴之中北達甯夏南通秦鳳東連涇原邠甯西趨金城湟中形勢最要不宜多居種人勘得平涼華亭交界之化平川寬六七里長三十餘里窖洞三百餘兼有破屋土沃水甘人跡斷絕可安插萬餘丁口近挑已撫回民稍壯者

百名裹糧前往稍加修葺俟各起回民解到卽量地居之給以賑糧種籽牛驢農器督其耕墾所有建置經界規制禁令容臣就近察辦隨時陳奏其金積堡繳到馬械尙未據劉錦棠等冊報前來堡樓堞口均已平毀惟聞堡身堅厚異常兼值冰凝土凍程功未能迅速其散遣安插遷徙善後各事宜雖皆預定規模而先後緩急之間審機致決未可稍涉疏畧已委臣軍總理營務已革山西按察使陳湜前往會同劉錦棠黃鼎等妥爲籌策以冀萬全所有此次統將員弁勇丁血戰頻年備嘗艱險忠勇彌著卒能掃穴擒渠消除異患勞烈

未可掩抑應俟大局底定再由臣秉公據實隨摺馳陳願懇
天恩破格獎敘以明激勸惟陳湜處分尙未開復茲派赴金
積會同籌辦機要諸務責任匪輕該員到營以後已著戰功
應請

旨先開復原品翎頂以肅觀瞻合併陳明蒙

溫諭優獎悉如所請惟陳湜一員到營未久此次金積堡將
士尙未請獎若將陳湜先行開復殊不足以昭公允著俟續
有勞績再行保奏密片一件留中欽此旋於十二月二十九
日續奉

上諭云左宗棠密陳馬化澂稔惡三世從寬必滋後患此時暫議緩其誅者以王家疇非猛攻所可驟得宜先圖王家疇俟撫定後將馬化澂父子兄弟親屬夥黨重者誅夷輕者遷徙等語所奏不爲無見若不照該大臣所請恐於該處軍勢賊情不甚相宜馬化澂著暫緩正法俟王家疇等處就緒卽將該逆等分別重輕相機辦理屆時不得以收復各處代爲乞恩以伸國法而快人心所稱該逆在北省各口開設店鋪分布夥友探聽衙門消息足見黨與眾多應如何密爲防範用靖奸宄並不動聲色藉安反側之處左宗棠妥籌具奏交

結洋商一節是否僅爲購買外洋軍火等件抑另有句結重情並著密訪奏聞欽此自是北路逆巢僅存王家疃通貫通昌各堡金積旣破心膽俱寒矣彼馬化澂蓄謀造孽已數十年卽無陝回之變亦不能帖伏久安況陝甘糜爛至此於是詭辭求撫而陰修其窟集其黨時其儲相時而進退之詎不謂萬全可恃卒之埽穴擒渠逆種遂無遺育天之假助不善豈真相之哉

平定關隴紀畧卷九終

平定關隴紀畧卷十

同治十年春正月

欽差大臣太子太保督辦陝甘軍務陝甘總督部堂一等恪
靖伯加一騎都尉左 駐節平涼籌辦金積堡逆黨分別

誅宥各事宜具疏馳奏云竊陝回就撫首逆馬化澂就擒情
形臣於上年臘月十一日拜摺後卽委總理營務處前山西
按察使陳湜馳赴金積堡會商各軍統領分別次第慎密籌
維期於周妥維時據劉錦棠稟稱堡牆冰凝如鐵該堡回民
掘毀不速因派勇丁助其掘毀一面勒催逆弟馬九逆子馬

耀邦及逆黨譚生成等搜繳馬械旋據劉錦棠黃鼎雷正綰
續報馬化澧遣人招撫河西王家疇逆賊並招回前遣助逆
之何生洲等二百四十餘人歸金積就撫馬耀邦等呈繳車
輛大銅礮四尊九節礮四尊威遠礮二十八尊劈山礮二
十尊鳥鎗一千零三十桿擡鎗二百九十三桿刀矛二千四
百十八件洋鎗一百八十桿火藥五簍鉛子七百觔硫磺二
百九十觔臣宗棠知其隱藏甚多終爲後患密飭各統領將
堡回勒限遷徙以便清釐堡逆分別首從辦理以愆後患劉
錦棠黃鼎雷正綰徐文秀等會商陳湜於陝回悉數起解後

首令馬耀邦馬允等將堡眾挑選精壯千名馬家灘挑選精壯四百名王洪堡挑選精壯百餘名及何生洲夥黨三百餘名爲義勇真之濠外空堡中分交官軍就近鈐制次清點堡中貧易僑寓及被擄被脅各甘回造具戶口名冊聽發遣散遷移安插次搜捕通匪文武員弁一面勒令馬化濠馬耀邦馬允盡繳鎗械馬匹旋據繳到馬四十二匹據供近因官軍圍逼草料早乏實無存留軍火洋鎗實無藏匿如經搜獲心甘坐罪取具切結適助掘堡牆勇丁於堡根掘獲洋鎗三百餘桿旋於堡內又掘出洋鎗一千零數十桿陳湜劉錦棠黃

鼎雷正縮徐文秀金運昌會議諸務均經料理就緒各堡回
民漸釋驚疑乃遷王洪堡回眾於靈州城附近地方安插遷
馬家灘回眾於張家圈安插正月初七初八等日乃遷馬化
澹父子兄弟及各親屬眷口於濠外各廢堡申初十一等
日提馬化澹馬耀邦馬九譚生成等分別熬訊有無藏匿軍
械及北口開設店鋪交通洋人情事馬化澹盡誘其子馬耀
邦比晝夜熬訊馬耀邦復茹刑不吐惟詰以既具結軍械並
無隱匿存留何以官軍復掘出洋鎗洋礮至千二百餘桿之
多無詞抵飾賊情之狡猾兇頑始終叵測如此十二日劉錦

榮提馬化澁徐文秀提馬耀邦馬中邦馬參三犯黃鼎提馬成澁馬恆邦馬定邦馬建邦馬正邦飛飛子六犯雷正綰提譚生成父子三犯金運昌提馬九一犯同時凌遲處死其分置各廢堡之悍黨及逆黨何生洲部眾一千八百餘名內統領參領佐領等偽官王六馬喜等八十餘名概予駢誅無一漏網其貿易僑寓之客民及被擄被脅之甘回三千餘名解赴平涼安插金積堡老弱婦女一萬二千餘口解赴固原州附城數十里地方分撥荒地安插其賊巢保生堡偽號王城僭稱東府西府一切違制器具什物儀仗概予銷毀仍留房

屋爲將來建置文武衙署兵房及死事諸臣祠廟之用於是元惡悍黨殲滅無餘而罪不至死者亦無稍寃濫矣該逆陸續呈繳金銀銅錢三項共合銀十九萬兩有奇除分賞前敵馬步七十一營每營二千兩老湘一軍在事最久出力最多酌量加給外餘銀提爲遷居靈州張家圈各回民購辦賑糧及水八堡修復渠工中衛採辦麥種之用察看情形邊患無虞地方安謐人心稱快

天討亦伸非仰賴

宸謨獨運

訓飭周詳樞部諸臣籌撥餉需乘東南底定全力注之何以
及此至辦此賊與辨髮賊捻逆機局不同方畧亦異如湘勇
之由晉入秦先平土匪繼穿重險千餘里堅堡數百座奪踞
要隘擊退西甯河州援賊逕擣老巢中路諸軍之徑趨峽口
不顧餉道不防後路皆犯兵家之忌將領士卒半帶重傷而
戰無虛日氣不少衰卒能履險如夷平茲積年巨患其功固
偉其勞苦尤爲可矜合無仰懇

天恩破格優獎以昭激勸其餘前敵各軍出力員弁及各軍
擬保文員應請彙入攻克金積堡案一併保獎以資鼓勵臣

宗棠衰病之軀智慮鈍拙一切勦撫機宜次第均密商督辦甘肅軍務甯夏將軍臣穆圖善贊理軍務陝西巡撫臣蔣志章酌奪辦理俾免疎誤謹合詞恭摺馳報並另片請復陳湜原官原銜奉

上諭左宗棠等奏平毀金積堡賊巢首要各逆伏誅甯靈肅清出力各員請獎一摺甘肅回逆馬化澂於同治八年秋間擁眾復叛盤踞靈州所屬金積堡旬結陝甘各回四出竄擾經左宗棠派軍分投截勦節節掃蕩並令道員劉錦棠等力擣逆巢壘將附近賊壘攻破四面鎖圍該逆勢窮乞撫勒令

平毀堡寨呈繳軍械猶敢遷延觀望並於堡內埋藏洋鎗洋礮一千餘件匿不繳出是其居心叵測怙惡不悛實屬罪無可逭現經劉錦棠等將首逆馬化澂父子兄弟及逆黨譚生成等概行正法洵足以伸天討而快人心現在堡寨一律平毀餘眾分別安插其起獲銀十九萬兩零除分賞各軍外著左宗棠將所餘銀兩爲遷居靈州之回眾購辦賑糧俾安生業仍督飭各軍將各股回匪次第進剿以期全省廓清陝甘總督一等恪靖伯左宗棠運籌決勝調度有方著加恩開復降三級留任處分並賞加一騎都尉世職甯夏將軍穆圖善

陝西巡撫蔣志章協籌防勦均合機宜穆圖善著交部從優
議敘蔣志章著交部議敘道員劉錦棠接統湘軍克平巨寇
著加恩賞給雲騎尉世職並賞穿黃馬掛所有尤爲出力之
道員黃鼎著賞穿黃馬掛提督雷正綰著開復革職留任處
分並照一等軍功從優議敘金運昌著賞穿黃馬掛總兵徐
文秀著開缺以提督遇缺題奏提督王衍慶著賞換業普肯
巴圖魯名號次至各營將領分別升擢其餘出力員弁准由
左宗棠彙案保奏山西已革按察使陳湜著開復原官原銜
以示鼓勵欽此其進攻楊明堡馬家灘陣亡各員另片請卹

亦奉

諭均如所請緣陝甘逆回既視馬化澂爲向背而金積堡地勢雄阻糧餉充足又特異諸巢故湘皖兩軍竭力攻戰至一載有餘中路諸軍奪險協勦相持又復數月蓋馬化澂數世不軌之心與其死黨固結之念不至於糧盡援絕事極時窮必不肯甘心待斃也

朝廷論功行賞一出至公此次

獎敘恩綸實優且厚宜乎三軍感悅我武維揚敵愾同仇不留餘孽也况大憝既誅逆謀愈沮士氣益張乎由是王家瞳

堡逆自馬化澂稟請委員同往招回何生洲悍黨三百餘人
通貴通昌兩堡亦由馬化澂寄信招致後金順張曜兩軍旋
將王家疇外垣踏破鏖戰竟日並攻破其內垣堡逆概行勦
洗通貴通昌陝回二百餘名赴黃鼎營前就撫其堡均經平
毀崔三禹得彥馬生彥一股亦由涼州西甯折回河州而河
逆馬占鼇馬尅大等亦稟求張家川撫回李德昌前赴河州
議撫金積關逆回全局指日可以解散惟是就撫之回尤宜
妥籌安插計陳林一起男女一千五百餘口馬振江一起男
女八百餘口赫選青一起三百八十餘口馬化瀨一起一千

二百餘口閭與春余兆臨拜萬江金明堂安傑等起五千五百餘口除挑壯丁四百名交安傑藍明泰帶隨征勦外餘俱解赴平涼實待安插之眾尙一萬有奇均發化平川安插其地水源有二一爲化平川一爲聖女川合流匯白面河入清水縣界川中橫寬五六里長約三十里因奏請

旨添設化平川通判化平營都司彈壓而鎮治之改白面河爲北面河聖女川爲聖諭川並令宣講

聖諭以化頑俗飭千總牟春陽帶土兵二百四十名分紮關山三才鎮各口而以總兵喻勝榮帶所部平江營扼紮化平

川以終金積堡勦撫之局其自平涼以北甯夏以南計程尙千餘里山谷間伏匪零回及金積堡鎖圍未合以前出竄未歸之回早經預飭中路各軍平慶涇各軍及旌善馬隊並已撫良回嚴密偵探隨時擒勦未幾周紹濂所部左營李良穆派弁李昭林及回目馬益順王益萬李存昇等追勦逆回生擒逆目王玉旌善馬隊馬柏森生擒要逆譚生成之弟譚生邦並丁萬圖馬三保三犯解營訊決撫回陳聚安探報野賊李映春僞先行明七十子匿張家川之瓦窰堡卽飭陳聚安會同李德昌密速掩捕明七十子就縛伏誅李良穆續獲

李映春之黨楊太山導引官軍生擒李映春及其子李存英
正法署平慶涇道魏光燾報稱良回馬宗保捕獲逆回馬奇
海馬俊馬捨娃子三犯良回李存昇拏解要逆楊太娃子係
首逆穆生花黨中之僞順天王曾帶萬餘人者也馬柏森復
報捕獲逆賊馬義等十九犯馬元帥王添發等四犯解營訊
決楊正茂護運赴省亦於景家口陣斬逆目袁和合等百餘
名於是著名竄逆僅狗齒牙子靖遠龔子馬才棕馬母驢閻
希孟金添委等數名尙稽天誅惟南路范銘所部之眾歷稱
黑頭勇其人皆河狄洮岷之人始因召募而集繼而蘭州叛

兵入焉各處潰勇又入焉一人當勇閭家隨營人數旣多桀
驚日甚前藩司林之望力庇之厯任督辦大員以其尙能戰
也亦曲意拊循之遂至果於標掠怯於戰鬪自周開錫接統
後挑選裁汰稍加鈐束好亂之徒頓萌潰變襲踞岷州城中
范銘不能制懼而逃匿其眾益亂上年十一月間與官軍接
仗連次衝突均經擊退十二月初旬周開錫調傅先宗劉明
燈各率所部及大營親兵四哨並宗岳各營齊赴岷州察知
城東南四五里之教場堡香芳崖地勢高峻爲賊所必爭謀
先據之初八日督軍前往修壘楊世俊張仲春各率馬步往

護日午賊果以大股七八千人分兩枝並出鎗礮如雨呼噪
而前官軍靜以待之俟其逼近揚旗伐鼓齊進擒斬數百賊
勢披靡官軍縱馬蹴踏步隊繼進圍之於東南川中斃賊無
算敗賊負創狂奔入城不敢復出屢次央人乞撫未許仍更
番攻擊炸彈所及樓堞多圯城中食盡自西門突出掠糧官
軍設伏要其歸路斬悍目師仲延潘榮華等城賊出援復爲
官軍所截斬殺極多生擒悍目楊朶會尤得祥賊眾大潰入
城劉明燈等知其困極必竄撥馬步四面緊圍署鞏昌府知
府湯聘珍奉周開錫檄至岷所帶營弁鄭福章廷苞皆河狄

人也令其入城曉諭潰卒涕泣聽命十二日潰勇頭目包天成隻身詣營乞撫並請先質妻子官軍許之十四日齊詣營門聽命逆首尤芝政安桐貞見人眾皆散撫局已成乃亦詣營謝罪傅先宗等數其倡亂抗拒之罪斬之以徇餘眾怙服乃散粟以賑其飢挑其壯健分置各軍編立副中一營餘三千餘人胥歸傅先宗殷華廷編營安插老弱萬餘安置岷州署知州呂恕奉檄編審安插給以賑糧籽種督令耕墾各食其力而黑頭勇大股多寡始有確數可稽旋據岷州紳民張旋乾邱映斗王映奎白生彩及各老民等稟稱自招收黑頭

勇以來受害最酷始而攔路劫搶繼而攻堡殺人比賊尤甚
地方官不敢過問數年巨患至此始弭民情實深慶幸惟范
銘逃匿之處現無的實下落尙俟偵訪經左 據實陳奏
另片請讓騎都尉世職奉

旨嘉予所有在事出力及陣亡將弁准由左宗棠奏請獎卹
劉松山屢著奇功歿於王事朝廷軫惜殊深已明降諭旨賜
祭一壇俟甘肅軍務一律肅清屆時再降恩旨該大臣所請
將騎都尉世職追賞劉松山令其嗣子承襲之處著毋庸議
欽此從此南路諸軍益形和輯用命而西路鎮番所屬柳林

湖竄逆經馬隊連日進剿獲勝敗賊圖竄西甯米拉溝穆圖善豫師飭署莊浪協副將鍾本起協力防剿不致再分兵力肅州等處除提督楊占鼇駐營防守外尙有提督成祿一軍駐紮惟關外烏魯木齊等城經逆回殘破後民戶凋殘牧令亦多懸缺難民無所適從不得不各自謀生其最著者有綏來縣所屬沙山子之趙興體民團千餘名河西劉鄉約民團四百餘名迪化州所屬南山之徐學功民團五千餘名古城奇臺等處有馬進福鄧生玉民團七八百名自同治三年以來屢次團練皆係自備資斧不敢申報自城池失陷後逃避

他方皆設立公田公種公收公食公用規畫約束粗有可觀以萬里外邊氓相維相繫於顛連困苦之日且能應調集團隨營勦賊官軍所至輸粟維殷非

深仁厚澤浹髓淪肌其能使民心固結至於此極乎此時關內尙未肅清無力兼顧關外諸大臣兵餉俱乏無策可施特其輿情忠順實有不可泯沒者附著於篇亦未始非感發興起之資也至辦理金積堡全案馬化澂蓄謀既久植黨亦多除首逆伏誅餘眾安插外尙有親屬眷口及甘心助逆爲法所不宥者亦經分別妥擬準罪行誅其陳奏疏云竊臣前將

金積堡首逆馬化澂暨馬耀邦馬定邦馬正邦馬九馬三馬
成澂馬恆邦馬定邦等凌遲處死並將從逆要犯概予誅夷
各情於同治十年正月二十五日由驛馳報在案嗣派員將
逆屬馬玉澂馬五十六馬五十九馬樹邦馬彥邦馬繼邦馬
三和馬飛飛馬化澂馬進孝馬由宗馬鎖馬沙杷馬七十子
馬啞啞馬阿西子等男犯十六名馬馬氏馬譚氏馬閻氏馬
何氏馬毛抓抓馬毛啞啞馬三苗七口又雇工牛占元楊阿
肚子等二十六名僕婦使女等九口一併提至平涼委員審
取確供臣覆加研訊馬玉澂卽馬七係首逆馬化澂堂弟前

經手繳過鎗礮係購自陝回均不堪用並據雇工及其親屬等供該犯曾與馬化澂經管鎗礮等項眾證確鑿應按照共謀反逆凌遲處死例凌遲處死雇工牛占元牛占寬等本黑龍江回民據供在馬化澂家受雇已十餘年往來包頭等處領本置貨同治七年官軍進剿該犯卽在金積堡並未外出其同謀抗拒可知應卽斬決比提馬玉澂牛占元牛占寬辨結外其馬五十六係馬耀邦之子馬五十九係馬建邦之子馬樹邦係馬九之子馬彥邦係馬三之子馬飛飛係馬成澂之子馬由宗馬鎖馬沙杷馬七十子係馬定邦之子馬繼邦

馬三和係馬玉澂之子均年未成丁訛明不知謀逆情事應照反逆案內問擬凌遲之犯其子訛明不知謀逆情事者無論已未成丁均解交內務府閹割發往新疆等處給官兵爲奴例應解內務府照例辦理馬五十六馬五十九馬飛飛馬由宗馬鎖馬沙杷馬七十子馬三和俱年在十歲以下應照例牢固監禁俟年十一歲時再行解交內務府照例辦理馬化瀛係馬九期服兄又馬阿西子係馬九已死期服兄馬化椿之子馬進孝馬啞啞係已死馬定邦期服兄馬安邦之子應照緣坐男犯並非逆犯子孫例發往新疆等處給官兵爲

奴馬阿西子馬啞啞現均在十五歲以下應牢固監禁俟成丁時再行發遣照新章改發黑龍江惟現據賊供黑龍江近亦有新教之黨在彼傳教應改發閩廣給官兵爲奴至女犯馬馬氏係馬化澹之妻馬譚氏係馬正邦之妻馬閻氏係馬正邦之妾馬何氏係馬建邦之妻馬毛抓抓馬毛亞亞係馬化澹之女俱當緣坐應照嘉慶十九年山東反逆案發往閩粵等省駐防爲奴除馬馬氏業已據報病故應毋庸議外其馬閻氏之女馬三苗例無緣坐明文應准該犯婦帶往遣所馬毛抓抓馬毛亞亞俱年幼應暫行收養俟及歲時再行

發遣其訊無從逆之雇工僕婦使女等均發交平涼縣安插
擇配此馬化澹親屬也再巨逆穆生花卽穆三其祖穆大阿
渾傳習新教與馬化澹之父馬二交好新教中推爲大善人
穆大阿渾臨死以其常服白帽紅衣傳之馬化澹令其眾歸
馬化澹管束穆生花與其弟穆四穆五均爲新教阿渾行教
於秦安清化交界之蓮花城一帶與馬化澹相首尾其攻陷
平涼府城固原州城也屠戮民人慘酷殊甚平涼數萬戶僅
存百四十七戶數百里煙火寂然白骨黃茅彌望遺黎泣訴
耳不忍聞穆生花兄弟遷居金積堡助抗官軍至上年五月

間知事不濟仰藥自盡穆四穆五已於軍前正法其眷口數
黨俟解到時分別擬辦再從逆武員一爲王錫爵供係雲南
蒙自縣回民由武進士花翎侍衛報捐都司分發甘肅隨征
立功保升花翎遊擊署花馬池營叅將同治元年甯夏鎮派
令帶兵一千名赴陝防堵在陝城北關外偵探賊蹤卽同所
帶回兵投入陝回賊營七年到董志原其眷口由花馬池移
至金積堡以其女嫁馬化澂之孫爲妻董志原破後遂歸金
積堡一爲鐵秉忠供係長安縣回民由行伍出征歷保藍翎
都司銜守備前陝甘總督委護靈州營叅將八年賊陷靈州

該犯投賊攜眷移住金積堡一爲袁世榮供係鳳翔縣回民
由行伍出征歷保都司銜花翎守備署陝西磚坪營都司七
年挈家投入金積堡三犯均從逆武職助逆抗拒官軍最爲
盡力尤屬覆載所難容研訊明確後一併凌遲處死以昭炯
戒此係勁逆悍黨亦經另片陳明二月初旬有肅州投誠陝
回一千數百名由成祿派員護送前往平番之米拉溝限期
十日回肅該回竟敢四出殺掠青海大臣豫師急飭所部並
署莊浪營副將鍾本起防勇登時擊退該匪紛竄入山經穆
圖善豫師陳奏奉

論平番防勇無多著左宗棠穆圖善抽調勁旅協同防剿以資厚集而成祿瀝陳軍務掣肘情形亦奉

諭著左宗棠統籌全局遇有該提督咨商一切機宜應行應止務當會商妥爲經畫庶免該提督無所適從等因故北路甯靈等處雖已肅清仍未能一意籌剿南路河州零股逆回不時竄越滋擾正月十四日督帶平江營蕭賞謙率隊由靜甯出向會甯一帶搜剿至老河溝遇賊馬三百餘騎蕭賞謙揮隊衝擊適分駐康家堡華家堡之哨隊繼至敗之賊由馬營東北向通渭大路竄走旋分而爲兩一駐通渭後鋪川旋

竄鋪路鎮一竄城西北三十里之坡兒川瓦坊堡一帶擾及秦安清水各縣界適楊世俊勦平岷州潰卒奉周開錫檄至石佛鎮駐紮訶知秦州街子口有賊立飭馬隊馳往截勦並函會總理宗岳軍營務提督張仲春截賊必竄之路張仲春得報後訶知賊竄廖家莊二月十二日黎明挑率馬步馳往賊斡睡未起官軍四面圍擊賊驚覺死拒官軍鎗轟矛刺斬馘殆盡訊據擒賊供稱此股頭目張運隆係河回領員已斃於陣楊世俊又訶有另股分踞秦安縣北魏家莊一帶復調馬隊北趨任當川扼賊東竄十一日遇於任當川賊見官軍

卽向西飛遁十二日追及於李家店偵賊熟眠弛備急起掩之擒斬甚多餘賊狂奔十三日追至馬家岔復痛勦之鮮有脫者訊據擒賊供稱首逆沙母驢子馬尅四等由沙河三甲集竄出已均斃於陣矣其另股回匪由成縣竄階州白馬關卡者代理州判烏克松阿力不能制二月二十九日竄及階州之大石山守卡都司李宏珍擊敗之折竄黃鹿山管帶楚勇署階州知州道銜知府洪惟善副將鄧光耀率所部馳扼羅家堰而令彭德沅王斌武周正秋躡賊後李廣全扼大水壩胡彪扼小關嶺賊至黃鹿山王斌武周正秋擊之賊潰竄

向大水壩李廣全擊敗之賊折由瓦房川出竄彭德沅擊卻之復折羅家堰鄧光耀痛勦之賊翻山紛竄團眾截之賊棄牲畜甚多追至小關嶺經胡彪迎擊餘賊之竄雷家壩者已無多矣此次竄逆妄意官軍方勦潰卒有隙可乘而不知岷州事已早定自是劉明燈帶所部馬步八營奉檄進駐馬營監以向安定徐文秀奉檄撥四營紮會甯修治蘭州中大道轉運軍糧軍火存儲靜甯州城徐圖進取因究回民好亂之由奏請禁絕新教以弭衅端其全疏云竊回民以西戎族類雜居中土自古已然載籍詳矣就回民自數之典言之祖曰

阿丹生於天方之野產七十二胎每胎男一女一自爲夫婦至囁撒而其教始興又六百年當隋開皇中有穆罕默德者生而神靈闡明清真之教回眾翕然從之其教始盛今回民稱天方教自稱曰穆氏以尊穆罕默德故也又曰膜民以阿丹初生之祖言也其書有天經一部回族稱爲穆罕默德所受之天者又天方性理天方經典兩部則明代金陵回民劉智所撰皆發揮天經遺意以華人文字潤色之其教以識主爲宗旨似儒者所言明心見性以敬事爲工夫似儒者所言制外養中其教規所謂天道者五一曰唵謂誦經一曰禮謂

報恩一曰齋謂絕物一曰課謂忘己一曰朝謂歸真所謂人
事者五謂倫常之理七日一禮拜亦與泰西各國同蓋其原
本出於天主耶穌而時雜以佛氏之說稱華人爲大教自稱
小教非如奇袤詭異之流傳以句結爲事煽誘爲能也是故
雜處中國千數百年婚媾未通俗尙各別傳習不同而未嘗
敢萌他志歷代任其翔泳於區宇之內譏禁無聞我
朝錄其人才准其仕進回族由文武科甲得官擢至督撫提
鎮者亦不乏人固未嘗以其異於中國而外之也乾隆年間
兩江總督臣奏回教不宜留於中國

高宗純皇帝特加訓飭

聖謨洋洋足爲百世法矣乾隆四十六年逆回馬明心蘇四十三由西域歸詐稱得天方不傳之秘創立新教煽惑愚回謀爲不軌四十九年田五繼之大軍先後致討罪人斯得然其根株未能淨絕也嘉慶年間有穆阿渾者與首逆馬化澂之父馬二復以新教私相傳授至馬化澂而其燄漸張託名經商到處煽誘回民行其邪教近據各賊供

京師北門直隸天津及黑龍江吉林之寬城子山西之包頭湖北漢口等處均有新教徒黨在彼傳教傳教之人曰海里

飛如內地之稱經師曰滿拉如內地之稱蒙師而品望皆在阿訇之次馬化澁則自稱總大阿訇也其教規大約與回回老教亦同惟老教誦經則合掌向上新教則兩掌向上而不合老教端坐誦經新教則夥誦唧噥頭搖而肩聳老教送葬不脫鞋新教則脫鞋送葬凡茲細節異同固無關彼教輕重然新教之所以必宜斷絕者爲其自託神靈妄言禍福行爲詭僻足以誘惑愚回俾令甘心役使同陷大逆而不知加以顯戮而不悔一如白蓮清香無爲圓頓諸邪教之足以釀亂階而禍天下也臣於金積各犯解訊時細心推鞠有供稱馬

化澂能知未來事者如遠客來訪必預知同伴多寡之數從前官軍攻勦甯靈馬化澂父子兄弟悉眾抗拒預言官軍將退回民無事之類有供稱馬化澂時露靈異療病則愈求嗣則得之類有供稱馬化澂於投入新教之人向其自陳過犯撻罰皮鞭代爲識悔卽可免罪之類回性多疑善詐異於常人然一經新教蠱惑卽如醉如癡牢不可破方金積長圍久合時陝甘各回困苦殊常至殺人以食而馬化澂父子兄弟藏有餘粟無敢竊議之者迨至局勢危迫至極猶且互相寬慰謂總大阿訇必有保全之法馬化澂詣營求撫意在一身

塞谷見好諸回而諸回目踵營看視者日凡數輩見馬化澀
輒雙膝齊跪不呼之起不敢起如非迷惑陷溺之深豈宜至
此茲幸誅夷遷徙異患可冀永除惟新教傳染已久凡回民
聚集之處率有傳習新教之人不及時嚴加禁絕仍慮歷時
稍久故智復萌不逞之徒時思竊發又將重煩兵力也除已
獲海里飛阿訇諸逆穆四穆五馬承祺牛占元牛占寬等業
經訊明懲處未獲之金師傅馬篆鮮二犯咨行各省一律捕
治外一面出示曉諭所屬各府廳州縣回民嚴禁傳習新教
其從前誤被新教迷惑之人概准自首悔教免其治罪庶幾

漸趨覺路永拔迷津新教絕而回族安關隴可保百年無事也至各省傳習新教爲時尚淺良回僉稱新教傳染雖廣各省回民亦頗知爲彼教異端多有不肯遽信者如黑龍江回民約二千餘而傳習新教者僅祇百餘卽其明驗若乘此時嚴加諭禁無難預杜亂萌合無仰懇

天恩飭下各將軍督撫大臣嚴禁回回新教出示轄境各回寺詞後遇有新教阿訇海里飛等到境煽誘愚回卽由各回寺首董縛送所在官司訊明懲處其從前被誘誤入新教之人仍准首悔免罪則愚回有所懼良回有所慕不但地方可

臻安謐卽回民亦長荷

高厚保全之恩於無旣矣臣每釋

廷旨分匪良不分漢回敬仰我

皇上仁育義正之德上符

高宗實握千古治戎機要謹就愚昧之見據實陳奏奉

上諭前據左宗棠奏請禁絕回民新教一摺所稱乾隆年間

逆回馬明心等創立新教惑眾滋事先後伏誅根株未絕至

馬化澂之父馬二等復以新教私相傳授遂至釀成變亂皆

由新教行爲詭僻足以誘惑愚回迷而不悟現在馬化澂雖

已伏誅而新教傳染漸廣必須嚴加禁絕以杜亂萌等語所奏自爲思患豫防起見惟回民散居各省同隸編氓各安生業若因區別新教舊教設爲厲禁地方官稍不加察書吏藉此搜求騷擾必至回眾驚疑轉生枝節從前乾隆四十九年回逆田五等滋事以後欽奉

高宗純皇帝聖諭查辦此事止當分別從逆與否邪正之殊不必論其教之新舊欽此嗣於乾隆五十四年經勒保奏稱新教爲回教之大害擬令靜甯等處頭人訪察稟首復奉聖諭令其設法化導不可區別新舊之名仰見

垂訓周詳具有深意此次馬化澂及身既被刑誅徒黨亦遭
殲戮正可借此剴切曉諭俾該回眾等及早改悔不致誤入
迷途自陷罪戾該督現既出示所屬州縣禁習新教並准自
悔免罪仍著嚴飭該地方官妥爲開導不可操之過感致激
事端所請飭令各省一體禁絕之處可從緩辦理也欽此
聖朝恪遵

祖訓於斯益可見矣回民沐浴

恩澤而不能洗心向化尙得謂之人類乎於時鹽茶固原所
轄東西兩山界連慶陽甯夏涇州各府州其閒伏莽潛藏不

時竊發各將領嚴探密緝異地同心
部之魏紀整勦馬孽子一股於紅羊
傷極重伏鞍而逸周紹濂派隊攻羅
甚眾內有袁希孟王添發兩名袁希
極力助抗官軍者也與王添發同爲
時伏誅周紹濂嗣又會商魏光燾各
萬海兩逆皆馬添發之黨也馬添發
善馬隊馬柏森管轄乘閒刺殺馬柏
之於下馬關白家鄭楊家莊等處馬

竄入西山深處與馬龔子李百寬馬才棕等句合意圖竄附
河州李百寬攜眷居先周紹濂所部右營遊擊周曙良訶知
之會同署鹽茶廳同知范廷樑乘夜截之斃賊無算生擒李
生雲馬五十二馬六个子等逆訊據賊供李百寬伏紅羊坊
以防前路不虞後路官軍驟至現已回竄賀家堡等語魏紀
鎔得報往勦馳至張家原值李百寬攜眷避雨匿窰洞燎衣
作炊見官軍至出窰列隊魏紀鎔率馬隊衝入立斃執李字
旗賊兩名馬步旣齊強占魁劉進義率隊伍縱橫盪抉李百
寬退入窰洞喉黨死拒勇丁何來福差弁張貴元張吉飛馬

生德等躍馬向前遂生擒李百寬眾軍四面搜殺並獲其眷屬多名同時復有另股之賊竄至隆德縣之野雞峴署知縣周其俊暨護運馬隊哨長王有慶李松林率團丁親兵往擊忽大股繼至眾寡不敵三人同時遇害丁卒陷焉管馬隊副藍旗副將尤成章由高臺堡搜山到新營探馬報有騎賊百餘步賊二百餘由巴斗溝而來假稱官軍破良回王家堡逸去尤成章拔隊往追馳抵三岔口時已昏暮遙見對山窰洞中透露火光卽挑壯丁密傳口號以往比至賊始驚走斃於亂刀者不少黎明追至雙樹賊拚死回抗尤成章及營弁喻

永勝孫成德各受重傷因念孤軍無繼奮威力戰賊乃大敗擒斬甚多據新裏民馬福海供陣斬之黃衣賊目爲馬才棕卽隆德縣戕官者也靜甯州防軍總兵吳隆海探勦於王家溝捷焉追至焦家河拔出難民十四名此皆金積堡出竄之逆無巢可歸伏匿山谷者也此次閻希孟金添委馬母驢卽沙母驢子馬才棕等逆均經陣斬李百寬就擒著名各逆僅狗齒牙子馬彥澁李萬海三犯矣而南路之兩當縣境忽有回逆數百假裝官軍馬隊沿途肆擾李輝武所部之總兵文德盛敗之於簸箕灣賊竄徽縣之娘娘壩胡國珍蕭德林又

敗之賊由前川進秦州竄走楊世俊原奉檄駐紮石佛鎮訕賊至王家山一帶刦糧飭馬隊張兩翼向王家河猛撲步隊跨山脊壓下賊勢不支官軍四面環逼擒斬無算據擒賊供此股頭目馬秀馬貨郎麻哈等由康家崖竄出此外尙有悍目馬榮蘇萬祥劉羊等意圖合股刦奪糧運不料馬秀馬貨郎被斬於陣餘眾散亡等語另股之賊擾及禮縣鹽關一帶楊世俊度其必循古城而西潛師於麻子溝鹿家山以待賊至伏起突擊衝爲數段馬步縱橫掩擊得免者僅數十名悍逆劉羊復擾及梁家大莊楊世俊痛勦之斬百餘級餘向西

奔追九十餘里至大草灘及之斬劉羊於陣其眾悉誅無遺其竄擾甯遠之馬力坡一股約數百騎張仲春訶知之出隊掩擊悍賊約去其半賊奔禮縣之王家寺張仲春冒雨窮追飛飭所部仁義禮信各營分投痛勦遂重創之殲其目何二於陣中賊由娘娘壩竄伏羌之楊家寺張仲春馳赴固城度賊必由東溝出走設伏伺之賊果中其伏官軍奮起轟擊屍橫遍野生擒賊目張善善子馬逢楊復子數名解周開錫行營正法其由娘娘壩分竄觀音店一股經虎威中營田連考及鎮西營道員田應龍窮追一扼龍潭壩截竄徽之路一馳

抵徐家溝緊躡賊蹤及與賊相值候選知縣田治元督隊衝
突身受重傷官軍稍卻賊眾蠶擁合圍正酣戰聞忽溝西礮
響田應龍率王仁和謝復榮馳至田連考突圍合攻賊敗而
遁揮軍急追斃賊百餘名生擒八名次日復截擊於柳家溝
賊復敗向通渭會甯閒竄走駐通渭之副將李華敗之於曹
家川賊之餘孽不復能軍適奉

寄諭著將近日軍情確切查明具奏並詢移營機宜左

因據實覆陳疏中縷晰軍情娓娓千言皆可覆按其後幅云
至進規河州之策前奏已略及之現時遞運三箇月糧料草

東尙未竣事若急於前進則旋運旋耗後無可繼之糧河州
夏收約在六月底秋收約在七八月若急於前進則未及成
熟前無可因之糧非穩著也又洮河深淺廣狹隨處不同而
溜勢湍急與黃河無異由狄道隴西安定進兵每路皆須造
船架橋所需各器具亂後人物凋殘勢難立辦而鹽固東西
兩山餘匪及甘南一帶游氛均應趁此閒暇逐加料理以免
後顧之虞防軍未移之先無旬不有戰事亦非坐食虛糜可
比察看近日軍情並未稍涉驕惰臣亦不敢因
聖明詰責之嚴故爲諉謝也用兵之難若此夫惟成算在曾

濟之以持重是以鮮有敗事大功豈倖成哉况自去冬以來
金積王家曠通貴通昌等堡雖破而河西餘孽麇聚納家聞
負嵎伺釁其地北可竄阿拉善東北可竄包歸中路若果前
移亦可南竄鹽固句合伏匿零匪爲患滋深凡此苦心實爲
當局所獨喻幸金順張曜圍攻納家聞餘逆二三月之久得
聚而殲之罔有漏逸至此北路之功始竣定安金順疏報後
奉

上諭定安金順奏甯夏西岸三縣回匪勦辦完竣請將道員
汪景度簡用定安奏西來回匪滋擾烏拉特旗界內金順奏

請將管站各員獎勵各摺片覽奏均悉納家開賊巢業經攻克甯夏甯朔平羅一律肅清本日已明降諭旨將定安金順張曜交部從優議敘出力各員照請獎勵矣其投出回民業經金順張曜分起發交地方官安置靈州逃來之回亦解交該州收管著左宗棠張曜密爲查察妥爲鎮撫毋令再滋事端金順現應前赴烏里雅蘇臺將軍新任甯夏一帶如尙有潛匿餘匪著張曜統率各營認真搜捕務絕根株陝回尙有老弱男婦五百十五口應否解至平涼安插著左宗棠會商金順張曜妥籌辦理甯夏軍事現已完竣金順張曜所部兵

勇應如何分別撤留或包頭纏金一帶有須添兵防剿之處
著定安金順張曜細心會商妥速籌辦阿拉善鄂爾多斯等
旗並殺虎口等處管站各員接遞文報尙無貽誤著定安查
明擇尤請獎毋許冒濫道員汪景度已交軍機存記密片一
件留中西來回匪由阿畢爾特旗竄至白任濠賚及古爾班
賽坎一帶分路搶掠嗣有賊匪三百餘人竄入烏拉特中公
旗境內在庫克鄂爾濟巴克那等處擄掠續又在中公所屬
之洪庫勒搭拉民屯盤踞烏拉特旗在黃河之北直達歸綏
無險可恃亟應派兵兜剿以期就地殲除薩薩布帶隊前進

計應與賊相遇著定安飛催該副都統親督全軍星速遄行
迎頭截擊迅掃逆氛並催直字營馬隊迅赴包頭之西一面
分飭駐紮纏金之卓勝營暨大同鎮總兵馬陞各派勁旅由
東南面節節兜剿毋任分竄杜嘎爾務當偵賊所向躡蹤追
剿與薩薩布等軍前後夾攻爲一鼓聚殲之計其餘各股現
竄何處著定安杜嘎爾確切查明認真剿辦烏城軍情緊要
非有知兵大員前往不足以資調度金順諳練戎機戰功卓
著著卽迅速起程前往妥籌防剿以副委任吐爾扈特汗布
彥鄂勒哲伊圖有赴杜嘎爾軍營之說該副都統與該汗是

否素識會否前來謁見來見時如何情形著杜嘎爾卽行據實奏聞欽此又據金順另奏奉

上諭金順奏甯夏回務已竣現籌分兵布置一摺甯夏爲北路巖疆刻下雖臻靜謐而西路賊氛尙熾自應分布設防以資捍衛金順會商張曜分派各隊扼紮磴口橫城等處所籌尙屬周密金順啟程後卽著張曜派飭各軍嚴密防勦毋稍疎虞河西三縣投誠之回均已造冊交地方官編立保甲妥爲安置其附逆之徒並由被害漢民指名控告者亦經金順等搜獲正法至四百五十餘名之多該回經此痛勦自當懷

德畏威不至再生反側惟附近漢民亦不得有意尋仇致成釁隙本日明降諭旨一道著張曜刊刻謄黃遍行曉諭俾漢回永遠相安以副朝廷一視同仁至意阿拉善旗地方既有西來竄匪搶劫牲畜之事張曜務當飭令馬步隊伍迅往防剿勿任蔓延花馬池一帶亦有匪蹤出沒左宗棠當檄飭東路官軍實力捕剿張曜仍妥籌兼顧毋稍疎懈河州等處逆裔方張左宗棠總當激勵諸軍鼓行而西滅此朝食豈可頓兵不進致軍心懈弛將士思歸以勝兵而轉成暮氣該大臣自金積堡克復後久未據報進兵機宜實深慮念著懷遵疊

次諭旨迅將籌辦情形據實具奏不得粉飾遷延致誤大局
欽此

朝廷軫念西陲有如飢渴亦由遠隔數千里此中情形無由
深悉也而甘涼肅州一帶兵力單薄亦奉

上諭著卽派兵分投截剿正力難兼顧之時而新疆吐魯番
城池忽被安集延夷酋怕夏襲據逆回皆投順之經提督成
祿暨哈密辦事大臣文麟等人奏奉

諭著選巴里坤總兵肅州鎮總兵前往接署殷務蝟集軍書
旁午忽得南路稟報總統道員周開錫積勞成疾日漸增重

南路既乏分任之人而河州出竄之回出沒無常益煩調度自前四月十三日周開錫所派督隊搜剿之總兵蘇家良等訶知成縣所屬之任家莊山頂有賊竄匿遂改騎爲步圍之忽一賊手提首級一顆自賊中出跪陣前乞降蘇家良訊之自稱姓海名富兒所提首級則所殺小頭目查老五也查老五本陝回楊生公所部悍賊上年崔三等逆敗後楊生公潛赴傅先宗軍營求撫行至中途事覺爲崔三所殺餘眾復欲就撫又爲查老五所阻海富兒忿其屢梗撫議遂斬之以降蘇家良受之並呼三十人呈繳旗幟伏地求撫餘則偃蹇如

故蘇家良率部猛撲皆中礮墜崖死因將降眾安插隊伍申
充作餘丁緣蘇家良以良回積功擢總兵所部本回騎也階
州山谷叢雜最易藏奸向有給匪一種據險爲巢時出肆掠
爲地方患署知州洪惟善訪有段世才翟煥周李奎三人皆
積年巨惡恃其險僻雖白馬關有分防之軍無如何也前此
逆回闖入白馬關時段世才等乘隙擄搶迨回逆敗竄洪惟
善飭副將彭德沅守備周正秋率隊往勦並令白馬關州判
烏克松阿集團協捕該匪各匿巢中礮石雨注及官軍併力
攻破而段世才已縋巖潛遁僅獲其礮械多件嗣破李奎匪

巢擒李奎李俊張昭蒲煥軍楊仕將五犯訊明正法訶知段世才逃匿翟煥周之石巖洞地勢尤險官軍集隊往捕攻至深夜始克獲段世才之父段明德並其妻段李氏及餘匪王三胖子多名訊據供稱段翟兩匪又先繼遁段赴略陽翟赴廣元矣惟匪巢悉破黨眾已誅不能復聚積年之患始除而南路總統周開錫竟於五月十五日病故業據駐馬營監提督劉明燈報五月二十日督隊護送由秦州赴蘭省軍火便道搜勦零回途中訶有賊蹤一面分軍護運留大隊分途探勦至二十四日據花鼓樓堡民報稱隴西所屬之八里灣有

馬步賊數百名攻堡劉明燈派王前程楊開茂率馬步隊馳往是日三更後步隊先至張家堡詢知賊伏深峽溝廟中王前程乘其不備四鼓疾進黎明抵廟前賊倉卒出隊技未及施大敗而奔官軍乘勝急追賊避入土洞中官軍縋之僅一人附繩而上訊係義岡川漢民黃香香子供稱洞中賊八九十名知縋上必死縋亦無益官軍乃傾土填之前後斃賊二百名生擒數十據擒賊供此股頭目馬老五本鞏昌回民上年逃入河州五月初六日由康家崖竄出者也而周紹濂所部之周玉林會同旌善馬隊王益萬於臭蒿灣搜勦零回

斃賊甚多生擒逆目田如貴等四名訊據賊供田如貴乃馬化澂戚屬上冬竄附河州五月十五日由河州竄出正法軍前李良穆於六月初二日黎明誦有馬步賊數百率隊馳勦賊敗竄後河官軍躡擊之適大風捲地雨雪交作斃賊僅數十名魏紀鏊搜勦道家原踞匪擒斬回目馬得魁等十餘名鄭連拔擊賊於田中溝亦有擒斬而前此首戕馬柏森之馬成禮亦被馬彥隆所裹之良回楊保俊所戮並帶同騎夥十八名赴于奇泮營前就撫西山之伏莽漸就殲除矣左

因南路總統無人爰令營務處陳澍先往靜甯州駐紮並督

運糧儲進規事宜始略有頭緒乃詳切具疏上紓

宸廑疏云竊甘肅回亂雖由陝回構釁牽連而起實則新教
久懷不軌卽無陝回牽連亦不能保其不變適因漢回結怨
得所藉口以迫脅其族類變乃益速值東南兵事方殷重兵
巨餉不能分布不得不勉事羈縻而玉關內外遂無完土矣
茲幸

皇威震讐金積蕩平陝回窘蹙歸誠又經畫地安插

朝廷仁育義正之懷天下共喻回民雖善詐多疑自忖黨堅
耐戰孰如陝回堡寨之密鎗礮之多孰如金積其不敢妄肆

鷓張固意中事也春間清水縣張家川撫
河州諭撫馬尒大馬占鼇臣知河回央請
投不准招致蓋自行投首准與不准官操
來設有不可撫者礙難處置一涉操切轉
其心也李得昌行至洮河東岸馬尒大等
西用兵心懷驚懼疑李得昌之給己李得
忿懼而歸嗣西路各郡縣見蕩平金積緣
涼固原化平川等處安插陝甘各回安民
悟撫局終無可疑馬尒大馬占鼇等求撫

於李百寬馬彥濇等投入河州時拒不容留亦可概見此時而言招撫固可省兵力而速戎機然以地勢言之河州西甯卽漢唐河湟故地爲歷代戰爭之場蘭州東西南三面均緊連河州河州賊氛不淨蘭州不能解嚴以賊勢言之河回嗜利輕生性善剽掠無事時卽常騎馬遠出鈔掠變亂十年未受懲創更無畏忌此等嗜亂之民非創鉅痛深固難望其永久怙服也現在甯夏慶陽涇州鞏昌秦州階州各屬大致實已肅清賑撫耕墾安插遷徙兵屯民屯善後諸務實已具有端緒雖中衛鹽固一帶時有游匪出沒不常甘南之徽兩西

禮等縣亦時有伏匿之匪伺刼運道然統計不過數起人馬
多者數百少則數十而已倏隱倏現如蝨蝨著體殊費爬搔
然固無能爲害現擬令黃鼎雷正綰魏光燾左日升等各營
自中衛至平涼扼要分駐其南路徽兩一帶加派提督殷華
廷馬隊護運搜緝游匪一面慎選地方官會同各防營嚴密
掩捕以淨根株而重後路據各路稟報浮橋渡船已辦各營
芻糧軍用粗備道路修治已平乃檄各將領尅期會師而前
進規河州記名提督涼州鎮總兵傅先宗率所部馬步由狄
道進以其半渡洮而西修立堅壘以其半駐洮東岸爲中路

記名提督楊世俊率所部馬步隊及提督張仲春宗岳馬步隊取道南關坪進峽城爲左路記名提督劉明燈由馬營監進紅土窰由紅土窰進定安縣埽除零匪以扼康家崖之要記名提督徐文秀由靜甯州進會甯繼之爲右路俟中路渡洮之師修壘畢左右兩路乃渡洮繼進其岷州及洮州廳地居河州西南山徑叢雜以五營分駐兩城調土司楊元帶番勇守隘口相機防勦統歸楊世俊調遣會甯西北安定東北均接靖遠地境當北竄之衝檄黃鼎分所部步隊八營益以副將桂錫楨馬隊三營歸記名提督徐占彪統領由中衛進

靖遠南搜會甯安定游匪西顧蘭州臣俟諸路布置略定卽率親兵由隆德赴靜甯安定督勦俟河州大定乃圖西甯也西甯著名逆首馬尒三已於三月內自伏冥誅陝回崔三禹得彥白彥虎等近時兇燄頗形消阻至涼州甘州肅州本無大股耐戰之賊惟未覩兵威故爾時形倔强如果鋤其桀黠寬其良愿辦理悉當人心則勦足令其畏撫足令其懷自可永期安謐臣惟殫誠盡瘁慎以圖之不敢遷延以誤事機亦不敢草率而貽後患以求仰紓

宵旰憂勤於萬一而三品卿銜總統老湘全軍道員劉錦棠

前奉其叔劉松山遺命金積堡不破不得扶骸歸葬今破金積已久劉錦棠屢請給假扶櫬南旋左以河西未靖未之許也至是復申前請並聲稱帶傷病員弁勇丁回湘暫將全軍併爲十一營以節糜費而以蕭章開權統之安葬之後由湘選募丁壯來甘等情因據情附片陳奏飭蕭章開統帶各營分駐金積吳忠靈州甯夏等處其時金運昌一軍已奉調歸綏遠城將軍定安調遣故老湘全軍僅數分布又查諸軍馬匹不敷因委員赴歸化城採買戰馬二千五百匹馬鞍五百盤以資添補亦經另片奏明凡以爲進規河州計周且

密也適中南兩路諸軍搜勦零匪名有斬獲黃鼎雷正綰周紹濂等勦賊於米包山斬馘無算周紹濂所部生擒逆目李文虎楊天朝等八名黃鼎所部生擒馬二楊耳環子等多名訊據李文虎供稱五月初六日由河州帶馬隊九十名出竄到楊萬春處伏匿旋經解營正法楊萬春者半箇城撫回也已撫復叛罪愈難容各奉嚴檄飭勦雷正綰周紹濂會師直擣米包山巢既至賊猶未覺卽揮軍痛擊搜獲旗幟號衣軍火諸物巢賊殲除罄盡其先時出掠之賊聞警回巢亦無倖免訊之擒賊知復叛逆首楊萬春楊百成金忠明丁萬明等

皆已伏誅其中尙有馬化澂戚屬譚生林亦已伏誅此股實無漏網平西營營務處副將楊德俊駐三陽川探知秦州平南川有馬步賊東趨甘泉寺會同田連考各率所部進擊斃賊甚多追至麥積巖遇雨收隊次日黎明追至梨子園乃盡殲之據擒賊供此股逆目劉洪本鞏昌回上年逃附河州此次由安定潛來謀劫糧運被斬於陣平西營都司王勇詢知後營與賊相持卽率隊往助至汪家衙夾擊之賊敗走追二十餘里再敗之擒逆目閻得順馬遇澂斬之宗岳營統領張仲春亦探知有賊竄至出隊向馬隴邀截賊避竄岷州駐岷

副將張登桂率隊赴防領餉遇之於大坪急揮隊擊之賊狂奔比至百家莊張仲春探知之二鼓率隊以往五鼓至其處賊方酣睡圍而殲之忽又探得禮縣敗賊由西和竄至復率隊前往夾擊所斃亦多賊翻山竄去時四更昏暗不辨路徑始收隊回防而階州縉匪餘黨亦經洪惟善訪確飭縣丞李文瑞會營搜捕略盡於是後路稍清遂於七月十二日移營進駐靜甯州就近調度值陝回分竄西甯攻撲高寨威遠等堡擾及高羌堡董家寨經穆圖善所派總兵黃武賢堵勦屢獲勝仗白彥虎復攻陷小南川漢堡據之崔三一股竄踞曹

家堡禹生彥與爲犄角河州回逆馬占鰲等亦率撤回攻陷民莊會銜奏報後奉

上諭著左宗棠迅卽撥隊馳往助剿淨埽妖氛此時進規事重實有萬難分撥之勢因會同穆圖善據實陳奏旣而成祿在肅州所撫陝回潰叛東下甘涼二府戒嚴又奉

諭著左宗棠酌量撥兵策應豫師又以西甯南川一帶村莊被賊焚掠兵力難分函商左 撥軍助剿等情具奏奉

諭著該大臣酌撥得力隊伍前往協助成祿復奏撤回潛結西河回匪肅州防剿緊要請飭督臣撥兵會剿奉

上諭前左宗棠覆奏摺內有西路相距遙遠目前無兵可撥擬俟進規河州卽派兵赴西路勦賊等語此時肅州情形危急該督已移營進規河州著卽酌撥勁兵選派得力將領統帶鼓行而西相機進勦以保關內要地不得稍涉遲誤未幾復奉

特諭據總理各國事務衙門奏俄國西悉畢爾地方官銅線致該國駐京公使信函內稱七河省巡撫鄂派兵前赴伊犁五月十七日將伊犁代爲收復等語並聞俄人尙欲帶兵前往收復烏魯木齊今日已諭令金順奎昌等查明確實情形

並令榮全前往收回伊犁城池妥籌布置令景廉帶兵相機規復烏魯木齊矣伊犁淪陷兵力未能顧及致俄國從而生心難免覬覦要求情事若烏魯木齊再爲該國收復則更難於措手成祿本係烏魯木齊提督卽統率所部出關與景廉會合力圖收復所有該軍餉需著戶部遵照前旨迅速查催並寬爲籌撥以資飽騰肅州一帶關係緊要著左宗棠迅卽抽派勁旅前往扼剿竄匪替出成祿一軍出關剿賊毋得以兵力不敷稍形推諉劉銘傳所部已諭令鼓行而西繞赴蘭州北路由甘涼肅出關節節前進爲收復新疆各城之計左

宗棠身任兼圻本應統籌全局况鎮迪一帶又係該督所轄尤當妥籌兼顧當此事機緊迫諒該大臣必能力任其難以紓朝廷廬系穆圖善如有可撥之兵並著會商左宗棠酌量調派以資厚集將此由六百里各密諭知之欽此所云劉銘傳者係李鴻章所部淮軍分統從勦捻逆有功李鴻章所最倚任者也先是同治八年冬逆回偷陷定邊全陝震動豫晉同時戒嚴

朝廷命李鴻章率所部入關助勦劉銘傳實充前部先行比至而竄回已靖李鴻章不果來因以劉銘傳填紮乾州一帶

以固後路此次

諭令出關亦就近調遣易於成行也左

妥籌覆陳疏云

竊維俄羅斯與我素無釁端其取伊犁也名爲收復詞近順而心甚狡關外回部向本愚弱不如內地雜居各回之狡悍特甚而富庶過之所云五月十七日收復伊犁揆諸弱肉強食之常乘閒抵隙之事亦毋足怪惟據稱尙欲帶兵前往收復烏魯木齊則舐糠及米漸近中邊於理既有不協於勢復有不可

諭旨飭成祿出關會合景廉先復烏魯木齊

飭劉銘傳統所部全軍鼓行而西節節前進爲收復各城之計

飭臣與穆圖善會商撥兵進駐肅州

宸謨廣運預矚幾先跪聆之餘曷勝欣佩以隴中局勢言之自宜先規河湟杜其紛竄然後壹意西指分兵先扼玉門關斷其去路乃策全功此時興師遠舉尙非穩著然當此強鄰覬覦狡焉思逞之時則固有未可拘執者臣接奉

諭旨已飛函穆圖善詢其能否派隊一面咨商劉銘傳統定進兵道路一面飛飭記名提督哈西巴巴圖魯

賞穿黃馬掛徐占彪統所部馬步十二營由靖遠防所取道
蘭州踰甘涼兩郡以抵肅州緣徐占彪勇敢能戰所部多百
戰之餘尙堪一路之寄而該軍餉事已經清算臣復擬資以
兩月滿餉冀可收飽騰之效其徐占彪所遺靖遠防務甚關
緊要臣已檄飭蜀軍統領黃鼎派營交道員張玉文統帶移
駐合併附陳奉

上諭左宗棠奏派軍前赴肅州一摺新疆軍務朝廷本欲俟
甘省大定後次第籌辦此次既有俄人代爲收復伊犁之事
勢難置爲緩圖前令劉銘傳一軍由甘涼肅一帶出關昨據

覆奏河湟未靖轉餉艱難江皖之人又不宜衝寒涉遠該提督仍請賞假養病業已有旨賞假一箇月在營調理一俟病體就痊卽令督率所部前赴肅州屯紮毋庸出關以便成祿等軍壹意西行惟關外事機緊迫劉銘傳須俟病痊再行拔隊前進尙恐緩不濟急朝廷正深焦灼茲據左宗棠覆奏遵派提督徐占彪所部十二營由靖遠取道蘭州前赴肅州實能力顧大局該軍旣堪當一路之寄著卽飭令迅速前進不得因有劉銘傳屯紮肅州之旨稍涉遷延一面咨催成祿先行部署一俟徐占彪到後卽令成祿拔隊出關並將起程日

期奏聞肅州防勦事宜卽責成徐占彪妥爲籌辦將來劉銘傳到肅後亦可商同布置成祿現在出關糧餉最爲緊要該軍雖有專撥之餉深慮各省未能如期解到左宗棠亦當代爲籌畫隨時按濟俾利師行正月間據奎昌等奏稱綏來等處民團可用當諭令左宗棠或派員出關或飭口外鎮道妥籌安撫該大臣究竟如何籌辦儻所派之員因道路梗阻未能西行卽可隨同徐占彪大隊赴肅並與成祿一同出關將該處民人加意撫綏務使各團樂爲我用以收指臂之效也然進規河州究爲當務之急左

以軍情不可遙度也爰

於七月二十九日復由靜甯輕騎取道會甯八月初二日抵安定審察地勢知自狄道渭源克復後河州之回出巢剽掠必由洮河西岸三甲集渡過東岸康家崖然後分竄金縣安定會甯或東趨鹽固或北擾靖遠是康家崖乃賊踪必由之津要也因令徐文秀一軍由安定西北嶠口出金縣稱鉤驛以達站灘劉明燈一軍由安定東南馬家河韓家坪出關門口內官營抵站灘與徐文秀合隊進攻康家崖八月初四日各營先發初六日徐文秀劉明燈拔營繼進初十日徐文秀途遇竄遁之賊揮軍擊之斃數十名擒賊目馬得雲等二十

四名總兵陳汝俊副將陳締高同時搜花峴子伏賊斬數十級擒賊目武邦賢等十五名均訊明正法初八日由好麥川楊婆廟一帶躡追而前登嶺瞭望羣賊馬步約二千餘正紛紛竄走徐文秀揮所部各營分途截擊至沙合嶺遇雨收隊是夜雪霰交作初九日冒雪馳抵黃石坪查逕抵康家崖路較捷遂不赴站灘之約初十日踰馬寒山至下營子距康家崖僅三十里劉明燈一軍初四日由馬家河一帶向西北折而南趨抵柳林溝十一日劉明燈令總兵黃宏藻劉正高叅將楊正茂各帶所部由三十里鋪沿洮河東岸前進飭叅將

殷德益都司鍾鳴鳳叅將羅瑞秋副將鄧得勝由大營坪斜
鈔而前徐文秀率總兵鄭守南叅將劉仁和由魏家河出柴
賀家溝總兵沈玉遂率陳締高陳汝俊由大營坪出東溝合
攻康家崖逕薄賊卡堡賊千餘見官軍逼近出卡抗拒徐文
秀列隊迎擊而陳締高等已由東溝鈔出賊後矣康家老崖
堡中復出步賊數百來援洮西騎賊二百餘亦渡河助勢徐
文秀令鄭守南陳汝俊陳締高劉仁和等分支兜擊陣斬悍
賊二百餘名步賊縮退入卡馬賊見勢不支急上船西渡正
爭渡間官軍薄之溺斃無數卡賊憑牆放鎗死拒弁丁傷者

數人軍士愈憤周麾而登立破其卡斃賊約三四百名生擒賊目哈童布等五名餘賊退入大堡劉明燈一軍是日甫出柳林溝口卽遇馬步賊數百揮隊擊之賊敗入新田鋪合守卡賊併力穩抗適殷德益鍾鳴鳳羅瑞秋鄧得勝等從大營坪橫截而出賊敗狂奔各營奮威衝殺斬百餘名賊退入康家新崖及孫家堡劉明燈率馬步各營躡踪壓追立將兩堡攻破斃賊二百餘生擒十一名賊叫號亂竄各堡賊亦相率潰奔併入康家大堡其渡洮西竄者均逼入急溜中溺斃無數兩軍旣合卽下令布圍康家大堡及各小堡分撥甫定大

堡內賊穴牆衝出各堡賊亦皆棄堡向洮河亂竄官軍分途追逐沈玉遂王前程橫出截之殺斃遂多計是役破大小莊堡十餘處徐文秀劉明燈卽分據康家新崖孫家堡康家大堡立營訊據生擒賊供賊首馬爾和哈元麻已斃於陣十四日派隊搜山至距康家崖二十里沙碾子地方多所擒斬兩軍察看路徑康家崖對岸十里爲三甲集雖屬狄道轄境實爲河州門戶由三甲集而西卽太子寺大東鄉等處均逆回麴聚之所洮河西岸山高境險賊勢亦較中左兩路爲重必過河立營然後可戰必架造浮橋然後可渡值秋霖屢降河

漲溜急船隻纜索雖備須俟水退乃可成橋兩軍之士迫不能待漲稍落卽羣往架橋大半鳧水奈康崖對岸山腳壁立河邊水濱僅通行人無列隊之處近岸水面雖僅數丈而深則滅頂所謂高山之下必有激湍者也鳧水之士至此能過者亦少而是年秋雨不時河水旋落旋漲迄難得手徐文秀劉明燈兩軍焦灼已極抑地勢阻之無可如何也左 再 審地圖加以探訪得別徑焉乃令提督傅先宗楊世俊將造成船隻於狹道先架浮橋緣狹道對岸地勢寬坦又北距賊巢尙隔山溝數重非若三甲集岸峻溜急正對賊巢爲賊所

必爭也二十二日各督所部放船牽纜橫渡抵岸卽派營濟河築壘三日而橋工成二十六日傅先宗督彭忠國四營營於西坪二十七日楊世俊以張仲春宗岳四營營於三叉河何建威四營營於陳家山頂每結壘賊必來窺然亦不敢戀戰惟陳家坪山頂之營與三甲集賊巢漸逼二十八二十九等日賊亦於黑山頭築四壘七卡又於大坪山紅莊連築數壘與黑山頭互相聯絡其附近之高家集胭脂山亦添築賊壘以防狄道官軍九月十二日賊來撲營被挫而退是夜四更有賊千餘潛襲彭忠國營彭忠國預知之先伏精銳於左

右山溝賊至伏發賊復敗去十八日傅先宗楊世俊會攻高家集傅先宗由平川楊世俊由西平山梁何建威由楊家嶺同時並進立將當路十數卡一律踏平賊皆望風潰遁師抵楊家嶺西適黑山頭出賊來援總兵敖天印擊走之乘勝破紅莊賊營十九日仍分三路疾進步卒整隊排行馬隊分左右鈔擊立將高家集八營一律踏毀敗賊縮退高家集大堡傅先宗楊世俊令步軍合圍堡賊以馬隊遮格援賊甫將大堡外木柵拔毀叅將廖嵩鼓勇先登中礮而殞將士憤甚四面猱附而上立克高家集大堡分兵平毀新集子壩平川吉

家山各莊堡兩日共斃賊二千餘名生擒馬玉等二十一名
軍前正法紅山各賊壘亦以次攻破二十六日楊世俊所部
攻克馬家集向草灘前進行至中途瞥見騎賊一起從西馳
至卽設伏截之擒十餘名而奪其馬餘賊驚覺突圍竄去訊
之擒賊供稱竄去者爲甯河賊目馬五馬沅亮之黨官軍疾
馳追及立將馬五馬沅亮等餘逆悉數擒還訊據馬沅亮供
本名馬格力布卽上年狄道陣斬巨目綽號張非之弟在甯
河充阿渾管回眾二千餘名因斬決梟示而徐文秀劉明燈
兩軍以扼於洮河不得寸展技癢已極乃親赴狄道接管船

纜順流而下駛過鄧家灣賊壘副將喻友才叅將殷德益中鎗而殞幸各營隔岸開劈山礮將船纜搶護提歸東岸賊亦稍創九月初一日梟水衝渡攻奪隔岸礮臺弁勇淹損三十餘名適營務處前福建布政使王德榜道員朱明亮奉帥令前往察看形勢飭所帶親兵兩哨列隊助勦共開洋鎗測準轟擊斃賊二百餘名賊復由皮船紛渡康家崖上下游及沙泥站等處圖劫運道初七日徐文秀擊之賊由洪濟橋渡過沙泥站官軍用劈山礮擊之沈其船一隻十二日見水勢稍退議挽纜牽船搶過河灘築壘賊出大股排列河干徐文秀

連施開花大礮並放螺絲後膛礮轟坍對岸礮臺一座斃賊極多餘賊紛紛駭竄軍士撥船牽纜乘勢急進卒以水深溜急廢然而返十七日賊由上游柳林溝口偷渡經總兵黃宏藻擊卻之副將眭金城被飛子洞穿左脅殞命二十三日總兵楊芳桂赴蘭州運糧回營所部叅將楊其昌率步隊百餘由沙隴迎護中途遇伏力戰陣亡弁丁從難者七十餘人徐文秀劉明燈各派營援護賊眾敗退徐文秀因水勢漸落不能成橋憤甚改議由狄道過浮橋從黑山頭橫擣三甲集蓋其力亦已殫矣稟奉帥批謂渡船皮船既爲賊有則賊之偷

渡難防而黑山頭一帶賊壘林立官軍踰溝數重仰攻已難設師期稍滯而賊乘船競薄東岸留防兵力已單尤非妥策因飭暫輟此議而令王德榜朱明亮率大營親兵千餘名益以提督陳廣發副將凌春臺步隊兩營提督陶生林馬隊一營於站灘間道過狄道浮橋以趨八羊溝並飭調楊世俊所部宗岳數營以厚兵力飭傅先宗率所部力攻黑山頭以掣賊勢飭劉明燈預備柳林溝架橋飭徐文秀預備康家崖架橋如見王德榜師出八羊溝則列隊東岸以待二十九日王德榜率數十騎由站灘先行過楓樹灣突遇逆回自叢薄間

衝出刺傷數人王德榜測準發鎗連殲二賊正相持閒大隊
已至賊始駭遁旋派隊窮搜擒斬三十餘賊訊供此起乃甯
河回黨聞頭目馬格力布檻送安定伏此以圖刦囚也十月
初一日王德榜朱明亮由狄道過浮橋楊世俊調宗岳軍親
率馬隊同進審看地勢見黑山頭賊隊憑高俯瞰官軍仰攻
非便惟石鼓墩與黑山頭共一山梁官軍立壘於此足以據
賊之中左掃黑山右掃邊灣均爲得勢初五日五鼓潛師夜
起王德榜楊世俊帶宗岳營總兵高登玉親兵營總兵鄧榮
佳副將余起立各率所部上石鼓墩搶紮兩壘適值昏霧四

塞賊不辨官軍多少未敢徑前撲犯比壘成霧散賊以大股來撲官軍憑牆轟擊則賊已立敗矣黎明賊以一股圍撲石鼓墩一股踞山腰徐文秀等於隔岸遙見官軍已到石鼓墩卽列隊架橋搶渡山腰之賊飛赴邊家灣助守王德榜揮隊截之圍攻石鼓墩之賊見勢不支亦撤回來援官軍分途縱擊勇氣百倍朱明亮怒馬衝鋒手刃三賊陶生林繼之高登玉鄧榮佳余起立從石鼓墩壓下合攻邊家灣賊壘破之徐文秀劉明燈麾所部搶過西岸立成三壘隨派隊助勦斃賊無算初七日傅先宗率所部由石鼓墩進攻黑山頭各壘王

德榜分宗岳兩營及親兵兩哨助之而自率親兵八哨及陳廣發凌春臺陶生林等營會同徐文秀圍攻鄧家灣三甲集賊眾見鄧家灣被圍急喊悍黨萬餘由山梁紛馳來援官軍分禦援賊一面緊攻壘賊鏖戰兩時賊屍山積立將鄧家灣賊壘攻破援賊敗潰不可止馬隊沿岸掃盪步隊上山躡追愈戰愈奮遂將三甲集附近各村堡一律破除據擒匪供稱逆目謝頭號王海發均斃於陣傅先宗攻黑山頭之軍探悉該逆緣岡結壘綿亙二十餘座又與新路坡紅馬家賊巢相連既需仰攻尤防牽制因飭王得勝設伏蓮花山腰遏新路

坡等處援賊飭何建威率所部攻黑山梁爲中路彭忠國率所部繞八羊溝出黑山之南攻其前敖天印張得勝率所部攜鋤鍬循樵徑出黑山之北襲其後自率所部爲中前兩路援應其石鼓墩赴黑山頭之路爲賊所挖峻削難登又守以堅壘惟飭石鼓墩兩營作進攻之勢以綴其力部署後銜枚各發四更時中前兩路皆抵賊壘鎗礮雷轟賊死拒歷兩時許何建威拔幟先登破其第一卡守賊墜濠鼠竄彭忠國朱廣運亦督隊猛進繼破左右兩卡各壘之賊天明悉銳來援傅先宗揮隊衝突正酣鬪間敖天印已攀藤緣磴從山後壓

下賊咸驚愕傅先宗突入賊陣手刃悍逆二名賊慌亂不及入卞四散奔潰各營風馳電埽立將黑山頭表延數十里大小賊壘悉被剗平陣斬五百餘名其新路坡之賊聞黑山頭礮聲於卯刻由蓮花山後擁至王得勝伺其逼近由山腰截出賊遇伏氣奪王得勝繞前擊之賊敗奔返巢初八日傅先宗留彭忠國兩營並建字兩營分紮黑山要隘自率所部緣黑山後嶺搶上三甲集南山巔立營瞰得黑山敗賊屯紮八甲口兩傍依山爲固以阻大東鄉之路當飭親兵中右兩營下山逼紮川中禦八甲口之賊調馬隊向王家坪一帶沿河

搜勦各村回出馬步四千餘結陣負嶠提督丁桂智總兵王銘忠分兩路包鈔賊亦分隊以應敖天印率隊由山巔壓下賊腹背受敵奪路紛逃馬步各隊立將三甲集以西村寨土堡掃蕩無遺王德榜破賊後紮黑山迤南三甲集之前傅先宗因紮三甲集後以相犄角徐文秀劉明燈於初七日將康家崖浮橋搭成劉明燈駐守之徐文秀接紮趙家地以聯聲勢而楊世俊亦於初七日率其所部破油油溝等處賊壘三座斬擒合計數百撤隊後接王德榜函會約攻三甲集巨巢遂於初八日率馬隊翻山南下初九日會攻三甲集王德榜

朱明亮出其前宗岳軍繼之楊世俊率馬隊沿河順川而進
楊芳桂楊正茂繼之徐文秀尤成章橫埽而進沈玉遂督果
軍繼之傅先宗據山俯擊瞭遏援賊劉明燈沿河截勦黎明
各路以次進逼逆首馬占鰲初猶嗾黨登牆防守鎗礮如雨
繼以木石各軍冒險猱升前者墜後者繼自卯迄未我師畢
登馬占鰲雜敗賊中奪門向八甲口而逃各軍又分攻康家
陽垓各大小堡卡十餘所破之共斃賊二千餘名生擒百七
十四名獲礮械糧食無數官軍亦有傷亡徐文秀移紮三甲
集餘軍分扼要隘以規太子寺及大東鄉經左

穆圖善

會銜馳奏出力各員

准擇尤隨摺請獎陣亡者從優議卹自八月以來楊世俊張仲春等既奉檄進赴前敵秦州敗匿餘匪乘閒復出九月二十一日殷華廷訶得賊蹤約會田連考截勦於黃渚關嗣復探知湯聘珍暨安左營副將張養吾困賊於白馬寺復改騎爲步踰越險阻以往會二十七日五鼓進勦賊敗翻山向閭家河竄去與另股之賊合其燄漸張二十八日田連考殷華廷張養吾會師往勦賊造飯未熟見官軍至悉力抗拒田連考在前奮力擊之斃紅衣賊目並餘賊甚眾賊大潰官軍緊

躡之賊分隊登岳拋石以拒官軍冒險窮追踰嶺五重斃賊約四五百生擒亦數十名訊係河州悍回六月間自河州竄出被擊散匿者也至是黨眾無多仍分匿山谷難於搜捕矣鹽固山閒狗齒牙馬彥澐之黨亦乘機出掠八月初旬雷正綰據穆進善稟報有賊竄入北山穆進善卽會民團先自乘夜進擊賊敗走三營雷正綰偵知爲馬彥澐逆股派提督陳義赴東山繞前截擊自率總兵李廣珠副將郎永清馬步向北探勦遇之於毛居士井正揮軍掩殺忽有另股步賊從山溝衝出郎永清迎頭擊之鏖戰半時賊猶死抗迨前賊已敗

陳義等趕至賊始負傷遁去分防之後營叅將李積慶強營
總兵易元壽誦賊至亢家灣於三更後乘其睡往撲之殺數
十人賊驚起相抗混戰逾時始竄投山澗墜崖死者亦多據
擒賊馬五娃供逆首金忠明楊百成前由河州竄米包山被
勦詐死匿亂屍中得脫竄往各處沿途會合成股者也訊畢
斬之餘賊敗後潛與馬狗二逆合股其黨復眾九月十三日
竄至環縣之二十里溝環捷營副將王楚仁調隊不及卽率
親兵百餘人往勦敗之於途乘勝追六十里至紅德城時已
初更矣聞賊聚火燄山徑往襲之復獲大捷跟踪緊追賊仍

回抗王楚仁方鼓勇追殺忽頭中礮子殞於陣中叅將楊振家余植樞亦戰歿各弁勇憤甚復斃賊多名賊始遁去適前路提督甘大有聞警往援賊聞之分途四竄大股仍向打拉堡一帶狂奔雷正綰派精選各營追之屢有擒斬賊分匿荒山無踪可跡王德榜王衍慶奉令督率親軍馬步入山搜捕詎賊向好麥川竄走官軍追及之斃賊無算追殺十餘里不見賊蹤乃還是日夜間徐文秀探聞有賊偷渡洪濟橋急派沈玉遂鄭守南分頭迎擊鎗斃紅衣賊目暨步賊多名餘賊翻山竄去據擒賊朱二娃子供逆目馬姓由固原一帶回竄

河州巢穴官軍疑卽馬彥濫而無由得其實窮詰亦不能知
乃斬之而狗齒牙一股尙未知伏匿何所惟竄往西甯之陝
回崔三禹得彥白彥虎馬五九兒鄒保和馬生彥馮君葵哈
連金等寄信化平川撫回閻興春陳林等央其代求收撫經
辦撫務之記名道馮邦棟稟聞奉帥批令陳林等前往西甯
諭令該回先將眷屬送至蘭州安置一面相機扼截渡口以
遏河賊西竄若能設法直擣河巢則免罪之外且准敘功凡
以體

朝廷廣育之仁勦撫兼施也惟時安集延夷酋怕夏竄赴南

八城肅州陝回竄擾安西玉門敦煌經哈密大臣文麟烏魯木齊都統景廉具奏奉

諭著催徐占彪迅赴肅州認真搜捕務將馬四老巢迅速攻毀成祿如尙未西進亦著督率將士協力搜剿以絕根株涼州副都統瑞雲亦派王仁和等駐紮永昌以防東竄奏奉

諭旨獎勵而景廉又以現經籌畫妥協俟成祿到後卽進兵規復烏魯木齊具奏奉

諭嚴催徐占彪赴肅旣而劉銘傳又奏稱病難速痊未能前赴肅州奉

旨賞假三箇月准其回籍調理前任甘肅提督曹克忠曾在甘省勦賊諳悉戎機著卽前赴陝西接統劉銘傳所部淮軍迅赴甘涼肅州一帶辦理軍務准其專摺奏事惟兵將恐不相習曹克忠到陝後著劉銘傳與之會商將一切駕馭機宜籌畫妥協一面將辦理情形會同具奏欽此值大軍徑擣大東鄉而河冰凍合隨處可以偷渡逆回出竄防不勝防左

因商之穆圖善派軍扼防穆圖善亦以事關機要卽派所部三營扼紮柳林溝旋以兵勇不敷調遣具奏奉

上諭穆圖善准左宗棠知照東路空虛前敵無兵可撥因派

總兵李佑清統帶三營扼紫柳林溝遏賊旁竄惟省城密邇巨寇兵力僅有六營實屬不敷分布曹克忠接統淮軍前赴肅州一帶須由蘭省經過如屆時河州尙未攻克卽著該提督會同穆圖善或將所部分紮省城附近各隘騰出穆圖善之兵前往省外各要隘分布似於防勦兩有裨益欽此

聖慮周詳可不謂至且極乎然曹克忠赴陝接統尙需時日而徐占彪赴肅九月閒雖已拔行亦不能刻期遄往時勢所在誠有智勇俱困者左 因據實覆陳疏中聲敘徐占彪遲緩之由實因民戶蕭條行糧待購車馱缺乏不敷周轉該

軍分三起拔行於十月初九二十三十月初一等日先後
行抵涼州得陝回竄甘之報卽率步隊六營馬隊一營於十
一月初六日先赴甘州留提督黃虎臣副將桂錫楨暫駐涼
州候調繼進據稟抵甘州後擬以兩營先赴高臺填紮成祿
防所以便成祿出關俟蕭宗幹將甘屬糧運辦有端倪續調
駐涼五營前進等情上紓

宸廬亦極費幹旋矣而河州逆回自三甲集潰退後敗賊羣
聚大東鄉並分踞甘坪大貝坪等處結壘負嶠各將領會商
機宜均以甘坪壘多且逼悉銳掃除則大貝坪之氣自奪於

是王德榜朱明亮率親兵等營攻甘坪之西劉明燈率所部
攻其北楊世俊張仲春率所部進八甲口攻其南徐文秀牽
制大貝坪之賊傅先宗當川列隊兼遏太子寺七家集援賊
鈔襲之路十月十二日整隊分進甘坪守賊出馬步萬餘屯
據山梁王德榜揮軍仰攻於礮石交下之際冒險猱升旋躡
旋登將及嶺巔賊悉力下壓朱明亮及鄧榮佳等猛進立斃
執旗賊目四名趁勢追殺躍濠攀堞連破賊壘四座劉明燈
率隊繼至鍾鳴鳳率右營破堡前一卡鼓銳攻堡弁丁多受
石傷劉明燈急抽正中營及左營從堡後繞入賊正失措鍾

鳴鳳已大呼先登分隊衝殺徑抵甘坪楊世俊甫近八甲口適大東鄉之賊以另股來援麾軍禦之仍飭張仲春分攻山南各卡參將周乾山等填濠而進立破兩卡楊世俊將援賊擊退三路兜剿將甘坪堅壘十餘座悉數蕩平傅先宗遙見甘坪得手會同徐文秀攻大貝坪之南自率隊繞出其後賊知甘坪不守均棄壘狂奔各軍電掃風馳立將大貝坪張家坪張家灣各堡壘掃蕩無餘斃賊千計生擒六十四名十三日訶知鮑家莊大坪等堡賊懾於兵威紛紛宵遁劉明燈等率隊躡剿連破堡壘十餘處十四日會剿大東鄉口前隊甫

至守賊已望風披靡驅殺入谷見山溝紛錯料有伏賊留敖
天印尤成章各率所部紮谷口備援應各軍銜接銳進搜殺
二十餘里毀賊卡數座至陰窪泉地方突見伏賊全起層層
環逼官軍整隊衝殺賊愈戰愈增王德榜等下馬督戰回目
于海潮袒臂陷陣總兵沈玉遂手刃之士氣益奮敖天印聞
鎗礮聲急分隊從谷口衝入力斫守隘悍賊多名兩路遙合
賊不能支均遁踞山脊官軍連環收隊而還十五日傅先宗
復率隊踰溝而進節節掃蕩仍飭敖天印列隊策應行次紅
莊立破賊壘數處賊分由兩山壓下官軍分勦之殲悍賊百

餘名生擒逆目馬祖拜烈斬之餘賊駭退是日劉明燈率所部沿河西下先抵包家嘴攻破其堡賊向太平堡狂奔又分兵破其下寨會攻太平堡賊憑崑俯瞰一徑繚繞官軍甫抵山腳賊卽發滾木擂石官軍於隙處鼓勇而登鎗斃執旗指揮之賊目一名弁丁蟻附登牆擒賊目馬行三斬之以徇其奪門出者值朱明亮攻破竹影臺堡後縱兵截擊殲斃極多救出難民三百餘口劉明燈以包家嘴爲大東鄉出犯後路各要隘遂留營據之該逆雖屢敗逆燄猶張並嗾撒拉逆回在董家山謝家坪等處築壘抗拒一面於紅莊一帶增築

堅壘一面分詣各統領營門乞撫並獻良馬二十二匹諸將知其爲緩師計也限令數日內悉繳馬匹鎗礮許爲轉稟大東鄉逆首馬悟真仍藉詞支展十一月初六日王德榜張仲春率四營進紮李家臺白嘴莊逆首馬占鼇畏官軍進勦帶其黨駭及撒拉回遁歸牟泥溝老巢王德榜等復進紮上七甲集大東鄉援賊紛至徐文秀等嚴陣以待楊芳桂以馬隊分伏林中俾王德榜得一意築壘追賊愈逼愈近分股擾及營後官軍奮起擊之沈玉遂擣其中堅傅先宗在左徐文秀在右交鋒之際馬隊從林中突出颯馳電掣分鈔賊後賊不

能成隊沿河狂遁其繞出營後者朱明亮以守營之軍橫出截之賊均敗走夜閒訶知七甲集之賊併入謝家坪張仲春進據其遺壘是日大雪楊世俊偕各將領登高瞭望見謝家坪炊煙全起知賊麇聚此閒意入甲口內果圍紅莊八戶掌等處賊勢單薄機有可乘商同傅先宗徐文秀各率所部循八甲口攻紅莊各賊巢楊世俊王德榜取道趙家溝攻謝家坪十五日子刻傅先宗率隊入溝銜枚疾走途獲賊諜訊知逆目周七十現駐紅莊卽飭王得勝趨紅莊之前彭忠國分扼山腰張得勝攻其後大呼猛進賊倉猝不知所爲朱運廣

由堡後距躍而上手刃逆目周七十堡賊鼎沸旁壘見大堡火起悉數奔逃再擣果園馬隊分途鈔至立將各壘踏毀計陣亡哨官許得義等四員徐文秀徑抵八戶掌之前以火蛋拋入賊壘鄭守南鼓勇先登沈玉遂破其後壘餘賊棄壘鼠竄王德榜至朱家坪賊尙未覺立破四卡二壘再往趙家溝守賊憑壘抗拒弁勇齊施火器余起立冒煙衝入敗賊亂竄康家莊之賊亦不戰而潰楊世俊令張仲春攻小陳家坪自攻馬家坪立毀三壘正分途追殺聞適康家莊敗匪突至復擊卻之王德榜徐文秀會隊復攻謝家坪賊棄堡狂奔楊世

俊列隊平川遏太子寺之援朱明亮助攻董家山參將廖福景已破山腰一卡接攻次卡忽被飛子貫腦而殞將弁憤甚力攻其卡斃賊甚多然地險賊眾究未能破也是日各軍共破大小堡壘五十餘處是夜劉明燈訶知沙泥對岸三十頂莊科它莊有賊竄伏急往截勦遇賊新店子頗有擒斬賊駭而奔人馬踐冰而過陷入深溜者甚夥此時進勦之機亦可云極順矣無如董家山一帶山梁綿亘數十里西接太子寺北蔽大東鄉山嶺高削大小堡壘林立得以俯瞰官軍左熟悉地勢知此險之不易破也因飭總理營務處陳湜親

往相度形勢會督諸軍力規進取諸將領以董家
西稍夷謝家坪一羊坡陂陀迤邐尙可攀登商山
五日賊眾紛聚謝家坪正圖築壘官軍以開花礮
走二十六日傅先宗進紮朱家坪二十八日劉明
中傅先宗楊世俊徐文秀三路並進賊據半山力
隊鏖戰後隊卽就陣後築營更番疊進自辰至午
朱家山成三營徐文秀於董家山腰成五營前隊
銳不可當賊敗走官軍躡踪猛追連奪陳家山柵
數卡斃賊數百復排隊窮追賊不及入壘壘中賊

遁遂將董家山一帶大小賊壘一律奪取徐文秀分營據各大壘太子寺騎賊未之知也順川來援劉明燈擊卻之步賊仍列隊繼進陳廣發怒馬斫陣手刃其渠賊始敗潰是役殺賊千餘內有僞總帥馬肥人等數十名生擒馬油綠布等數十名自此路徑疏通可直擣太子寺巨巢矣是夜有賊伏王家山牛溝莊圖阻官軍前進並潛襲各營高月桂擊退之十二月初二日傅先宗進攻新路坡五卡克之初三日楊世俊進紮四厚子徐文秀派營護其築壘築未半賊馬步紛紛來撲楊世俊擊敗之連日楊世俊滾營進紮馬占鼇敗遁牢泥

溝後見官軍日逼復糾聚悍黨及循化各處撒拉悍回與大東鄉甯河逆回麇聚太子寺環太子寺掘長濠深約二丈餘闊倍之壘卡林立北與石納奴溝潘家火等回堡互相犄角力圖久抗初七日五鼓楊世俊徐文秀等各率所部尋食前進黎明各路猛撲鏖戰四時奪賊長濠並破山頭一壘楊世俊卽移一營據之賊未敢犯初八日陳湜楊世俊徐文秀劉明燈等各派隊分攻太子寺北大紅莊等賊堡因山高徑仄不能列隊堡賊礮石雨注相持數時援賊麇集乃一面撤隊一面接戰得捷而還傅先宗以北山各壘不能遽下商擬由

南山進攻十二日傅先宗列隊南山頂直擣賊巢楊世俊徐文秀各率所部由東面而上甫及山腰悍賊萬餘蜂擁來撲官軍整隊迎戰奮力無前賊眾死傷相繼一悍賊騎馬持刀斷後勒羣賊反鬪屢卻屢前刀矛戛擊有聲如是者十數次鏖戰四時楊世俊麾所部衝入賊陣力斬此賊賊乃大敗官軍兩路壓勦殺斃鎗斃及墜崖斃者約千餘賊之創亦極矣生擒悍賊馬哈思訛知持刀悍目爲馬有阿渾乃馬占鼇手下領員大東鄉人陣斬兩騎賊一爲馬麻五是六阿渾手下領員一則六阿渾之子也是日白巾悍回及撒拉回死者以

數百計此十二月十二日以前戰狀也官軍雷厲風行而逆回之頑梗仍如故蓋河回自叛逆以來未遇官軍痛勦此次雖屢戰屢卻猶以爲技有可恃地有可憑以乞撫相嘗試而實非其本心猶然馬化澂故智也未幾陳林等回自西甯稟稱崔三已赴肅州尙未回巢比至大南川一帶察看情形見陝回約數千戶聞陳林至無不喜其來而恨其晚因崔三未回無從議撫祇得暫回請示等語旣而豫師來信亦與所稟相同惟大東鄉未下時值隆冬冰合隨處需防而兵力不敷分布設有疏虞河回得以西竄不特撫局無成且數處相合

其談必張所關非細其時運糧回空馱驢屢被刦奪弁丁傷
亡至百餘人曹克忠所部淮軍勢難望其速至左
熟籌
之爰檄駐金積堡之蕭章開派譚拔萃帶湘勇三營董福祥
等三營張福齊帶所部兩營兩旗徐萬福帶所部一營均於
安定取齊聽調旋擇要而分布之然後駐防周密狡回始無
隙可乘夫以大東鄉一隅重險俱失而殘回忍死抗拒致運
籌極費苦心大功之難成詎不信然哉

平定關隴紀畧卷十終

平定關隴紀畧卷十一

同治十一年春正月左

駐節安定行營據署理西甯府

知府馬桂源稟轉據各廳縣回目馬永福等呈稱西屬回眾因封齋起釁兵燹十年其閒良莠不一現在認真改過乞賜撫綏請委大員來甯查辦等情並准青海辦事大臣豫師咨同前因爰預定受撫款目觀其能否遵行旋准豫師咨覆款目內已量增數條俟馬桂源由省回甯時會列三銜出示令其帶回西甯曉諭並委員會辦往復咨商已定又據馬桂源詳轉據大通縣回目稟請委員驗收馬匹器械情詞迫切與

府屬公稟悉同。因委前辦化平川撫務道員馮邦棟前往察看辦理。一面催調譚拔萃、張福齊、徐萬福等各營布防要隘。而大東鄉太子寺前敵則已委總理營務處陳湜前往督催。雖值隆冬，沍寒進剿，實無虛日。自上年十二月十二日楊世俊攻石梁坡大捷後，乘銳進奪其外濠。該逆亦於寨外加濠深濠二道，並以重利邀結撒拉循化八工米拉碾伯各痞回及四鄉悍賊，拚死抗拒。除分股繞襲運道外，南由瓦房山、丹豆山迄塌馬池，北由大兒混堡循河而下，折抵黑山之尾，築壘六七十座，遙遙合圍以斷官軍狹道糧路。二十三日又乘

夜在黨川鋪北築二壘橫亘甘南建字兩營之間糧道復梗二十四日楊世俊傅先宗抽隊合擊遊擊石補天拔鰲先登各部繼進立將兩壘攻拔守賊殲焉傅先宗飭總兵李占椿分哨真紫旋報賊犯石梁坡各壘楊世俊收隊回援詎悍股緣間突出徑撲填紫之壘李占椿中礮而殞何建威亦赴援受傷兩壘復爲賊據二十五日賊分撲石梁坡各營張仲春率隊腰截擒斬多名二十六日賊傾巢大至南踰長溝北踞河川東及宗岳營之後分股圍攻薛家坪平西等營楊世俊密飭各營堅守勿出午後賊勢漸懈張仲春督所部衝出楊

世俊繼之各營均開壁夾攻縱橫盪抉賊死傷枕藉逋賊於履冰時自相踐踏在坪上者強半追墮深澗生擒馬老虎馬禿子馬格力等九名斬之惟總兵易金雄戰歿兵勇亦多傷亡二十六日賊又大至專攻石梁坡及薛家坪營盤拔柵填濠抵死不退張仲春率隊來援川中另股截出接戰楊世俊督隊猛進身受兩傷裹創力戰賊始返奔各軍乘之賊滾巖死者甚眾生擒米一麻木馬兆沅等四名供稱二十六日之戰撒拉大頭自馬鄉老爲官軍陣斬黨川鋪乃也阿渾挑悍黨死守以梗糧運者訊畢斬之是役總兵張得志遊擊陳有

祥董金成都司洪明泰守備韓鳳鳴主簿楊興藻均血戰而
殞二十八日天未曙賊由四山鈔至楊世俊預約傅先宗各
以五成隊迎戰分三路齊上鎗礮刀矛各逞其技官軍愈戰
愈奮賊敗而奔追殺百餘名陣亡都司王照益把總陳佩麟
二員時各營乏糧宰馬爲食士氣仍壯總理營務處陳湜派
徐文秀劉明燈及大營親兵各哨各率所部裹糧赴援是日
與傅先宗等晤於建右營議以徐文秀劉明燈攻新路坡傅
先宗楊世俊攻黨川鋪二十九日分道並進各賊壘鎗礮如
雨官軍整隊猛進副將歐陽吉星唐尉廷越濠先登立破新

路坡一壘援賊沂河峰至張仲春率所部禦之賊殊死鬪徐文秀派隊從山梁出賊之後賊乃敗走時提督李漢卿及歐陽吉星唐尉廷等奮威衝殺連破賊壘奪礮械無算楊世俊傅先宗各督所部縱橫盪抉立將黨川鋪各賊壘概予埽平三十日徐文秀回三甲集劉明燈回康家崖各防所傅先宗抽振威前營填紮各廢壘正月初四日賊復乘夜於新路坡迤東振威前右兩營之間復偷築三壘更據爛泥溝四莊一壘爲犄角之勢糧路復梗初五日傅先宗率同王得勝彭忠國攻三壘未克初六日復會楊世俊攻之三壘環峙每壘約

千餘賊皆以善鎗者穴處牆下另以悍股力抗官軍王得勝彭忠國攻其左楊世俊攻其右傅先宗攻其前刀矛旣接戰士踴躍爭先援賊盡卻官軍分撲三壘壘賊鎗礮迸發均冒險直前力拔木柵弁勇帶傷者多傅先宗振臂大呼自執大旗先進突爲飛礮所中由右額貫顛立仆陣前援賊及爛泥溝守賊見大旗忽倒從後蜂至楊世俊麾軍力戰王得勝彭忠國等將傅先宗昇回則氣已絕矣初七日陳湜商派徐文秀等率所部裹糧赴援會師爛泥溝鼓勇進攻立將四莊一壘悉數攻克斬馘頗多乘勝再攻山壘賊固守不出始收隊

還初八日楊世俊以傅先宗所部主將戰歿軍心不固商令振威一營親兵三營退紮黨川鋪以通糧路賊乘我軍築壘未就分股來犯徐文秀等合傅先宗所部擊卻之初九初十連日賊攻石梁坡各營均經楊世俊隨時擊退然傅軍旣退石梁坡各營之勢遂孤糧路益梗楊世俊亦力主解圍退紮之議徐文秀已赴援轉戰至黨川鋪見太子寺東西官軍解圍退紮慮大東鄉之賊乘虛犯董家山各營歸路必梗飭所部回董家山原防自率親兵三百駐強勇中營助守以資鎮壓十一日大風揚沙賊乘勢攻傅部振威前營及強勇中營

徐文秀率所部出營迎擊賊敗而退是夜賊以全力復撲營壘振威前營營官副將田大勝強勇中營哨官千總張承前同時棄壘而遁傅部中營哨官叅將李天禧都司徐正華千總文志懿熊得勝等以營官張得勝幫辦林正祥均先出營養傷營中無主亦相率潰退徐文秀憤極率所部親兵傍壘列隊鏖戰時許身受三矛力竭陣亡總兵鄭守南李其祥楊文林劉篤志副將盧才華王福昌叅將吳明勝遊擊陳東海都司李湘南張有才舒有貴均歿於陣壯士同時殉者一百四十餘人時夜深月落官軍與賊莫辨弃了百餘從重圍中

殺出繞由狄道回營報知陳湜陳湜飭董家山三甲集康家崖各處營壘嚴扼要隘一面馳稟大營左得報立派前福建布政使王德榜接統傅先宗之軍查明首先潰退統領營官罪狀一面嚴加裁併以期復振飭沈玉遂接統徐文秀所部後路及果勇各營滾營進逼軍威復振查悉平西營營官遊擊王勇軍功韓祿總兵周道欽已棄所部隨潰卒遁去王德榜查點傅先宗所部完竣申明紀律士氣益新逆首馬占鰲詢知官軍增壘復進新調各軍絡繹奔赴知官軍之不可力抗也因遣回目馬俊馬正元馬全福馬成龍唐成貴等

詣三甲集行營涕泣求撫請遵准撫各條先繳馬匹軍械乞
官軍暫緩進剿陳湜見其情詞真切一面飛稟請示一面遣
撫定回目馬壽清赴太子寺覘之回營具言河回各頭目遵
諭盡繳馬匹鎗礮刀矛頂經立誓永無反覆並稱西甯回目
馬永福等亦到太子寺竄赴肅州之陝回崔三禹得彥已於
正月初二日折回大小南川均具稟署西甯知府馬桂源赴
安定乞撫馬占鰲亦於上臘十六日稟求馬桂源乞撫聞馬
桂源已到蘭州十七日馬桂源果隨同道員馮邦棟自蘭州
到安定稟見並帶同撫回陳林閻興春前來所稟與馬壽清

所查無異並面呈上臘十六日馬占鼇稟詞極爲迫切蓋因逆黨傷亡過多又聞陝回土回及米拉三溝回眾均已就撫番部亦聞風響應出路悉斷勢極窮蹙故也比馮邦棟馬桂源至三甲集則馬占鼇已先繳馬七百餘匹鎗械五六百件計自正月以來共繳馬二千六百餘匹又子鎗九百餘桿刀矛四千餘件此時尙按日呈送馬桂源回安定稟覆賊中疑懼情形漸釋從前助逆各回及撒拉等回均歸故巢各處回民知官軍准撫均歸家及時耕種乞撫情形實無可疑惟自正月以來值傅先宗徐文秀之變整頓潰軍查明逃遁各處

逆回乞撫均須斟酌核實故奏報稍稽時日而他處既有所聞卽已先行馳奏奉

特諭河州賊悍巢堅地勢險峻屢經諭令左宗棠督率各軍穩慎進取日久未見該督奏報塵係殊深近聞官軍進取新路坡迤東賊卡未能得手傷亡多人統領大員有臨陣捐軀者有不知下落者現在各軍退紮高家集一帶帳房軍裝等件多有遺失勇丁亦有逃亡而自狄道至鞏昌糧運仍是梗阻此等情形如果屬實則賊勢復張兵威頓挫而糧餉又不能繼後事殊不可言左宗棠規畫河州圖維已久當此事機

緊迫應如何整頓戰守疏通糧路之處想必已悉心籌畫以作士氣而固軍心一切辦理情形卽著迅速奏聞甯靈一帶需兵鎮壓現分紮若干營張曜一軍向稱得力尙駐甯夏等處若左宗棠前敵急需添兵就近調張曜之兵會勦足壯軍威著左宗棠斟酌全局妥爲辦理前據該大臣奏劉錦棠請假六箇月回籍卽令募勇來營等語刻下假期已滿卽著左宗棠檄催到甘派赴前敵以資得力欽此

朝廷張弛咸宜人心罔不畏服

聖謨廣運烏可量哉行營奉到

寄諭之時疏報已先發在途矣所有戰狀勝負均經切實敷陳記名提督甘肅涼州鎮總兵傅先宗衝鋒冒險中礮陣亡十一日之戰記名提督廣東高州鎮總兵徐文秀赴援苦戰力顧大局中矛殞命均請

飭部照提督陣亡例議卹並於死事地方建立專祠其同時殉難之總兵鄭守南李其祥楊文林劉篤志副將盧才華王福昌叅將吳明勝遊擊陳東海都司李湘南張有才舒有貴義不獨生被害最烈應請

飭部各照所保官階從優議卹並附祀徐文秀專祠以妥忠

魂惟當時臨難苟免各員傅先宗所部之副將田大勝叅將李天禧都司徐正華千總張承前文志懿熊得勝當徐文秀力援苦戰時棄營先遁致徐文秀勢孤力竭與壯士百四十餘名同時戰歿核其情節實無可寬應請

旨正法軍前以昭炯戒記名提督河州鎮總兵王得勝補用總兵朱廣運記名提督彭忠國不能嚴督所部極力堵禦庸懦無能應請

旨革職留營以覘後效據提督楊世俊稟所部總兵周道欽遊擊王勇軍功韓祿於移營高家集之先棄營潛逃已飭嚴

拏正法楊世俊所部營壘距賊營僅里許糧路隔絕傅先宗陣亡後勢難久駐其退紮尙有可原惟當徐文秀血戰捐軀時未能迅速援剿咎有應得念其平時打仗勤奮應請

旨革去勇號褫去黃馬掛降爲叅將留營帶隊以覘後效蓋以甘南諸軍狃於從前姑容積習非核明功罪從嚴懲處切實裁撤歸併以求精實不可均經附片陳明奉

諭悉如所請適接徐占彪稟報上年十一月十九日行次甘州府探悉逆回先期遁赴肅州遂抽帶三營於二十七日馳抵高臺與成祿會晤接防以步隊兩營分紮撫彝高臺派總

兵胡應芳帶馬隊百餘騎護送委員赴肅州南山各堡採買糧食十二月初四日抵清水地方遇賊零騎胡應芳追至五六里許遇大股約二千餘清水都司胡祥麟紳士王惠率團丁助戰畧有斬獲徐占彪在臨水得報卽夜率步隊三營往勦成祿亦派鍾文遠帶所部一營同行初七日二鼓抵清水初八日黎明分路進擊賊不及備立斬數十名賊大駭而奔跟追五十里至金佛寺復獲大捷而裹糧已罄乃留馬步各一營駐清水自率所部回高臺官軍凍斃十餘名凍傷九十餘名據逃出難民李八斤子供此股爲崔三禹得彥胡天喜

等逆眾約三四千欲回西甯就撫不期清水遇勦死傷太多
走回肅州驚懼之極已出關去矣營官安杰自肅州偵探回
報亦同並云賊意由關外繞竄西甯就撫又前竄擾安西之
馬長順及蘭州回目馬朋擬就徐占彪處求撫請自備馬械
効力贖罪其稟求安杰轉遞肅州亦漸安靜無驚惟徐占彪
請示之稟自正月十一日發遞至二月十八日始至安定驛
遞延誤故奏報稍遲成祿尙未出關而以出關六難具奏猶
以請

飭徐占彪西進爲詞曹克忠接統淮軍正募新補舊之際開

拔亦尙無期調度之難有如此幸河回自求撫後已無出竄之騎而賊之伏匿南北各路者自去冬以來各防軍隨處皆捷北路廣武石空牛家營之役黃鼎蕭章開所部之何玉超劉治均譚拔萃等擒斬二百餘名其股畧盡韋州紅溝密半角城田家溝各役雷正綰所部之易元壽穆進善及良回馬守成丁飛鵬等陣殲逆目馬天簡賽滿喇馬天彥金忠彩李萬海等二百餘名捕斬逆目金忠才等數名招降馬三海三十餘人南路周文翔襲賊於鞏北三十里鋪斃三十餘名擒斬逆目張占魁等十一名復追敗之熟羊城梅開泰躡賊於

狄道二十里鋪斃賊數十葉占魁王光富迎勦於密店緊躡於東峪溝追逼於甘溝擒斬百餘名內有馬三胖張三娃二名逆目也殷華廷田連考等往來搜勦時有擒斬所云零匪者也而糾股抗拒之賊則於松樹溝斬十餘名張家灣斬六十餘名及田連考田應祥扼紫平南川賊犯營壘二人身帶多傷裹創力戰斃賊百餘名及賊竄榆樹川殷華廷與裴思朝強鳳岐尤成章楊德俊馮桂增等追及於白蠟峽斬六十餘名擒三十名至中路各防備賊尤謹上年十二月初旬賊犯站灘楊正茂營壘經官軍痛勦而退正月十一日賊犯柳

林溝李佑清相持未決王衍慶援之遂獲全勝十八日周曙
良勦賊於會甯之高界斬賊目張五等數十名生擒十名二
十日搜殺更多要皆二月以前之事此時河州回眾已繳馬
三千四百餘匹又子鎗並雜械七千餘件隨教漢民拔出六
百餘戶馬占鰲馬尅大等自限半月繳完後再請委員察驗
撫局已無中變之虞所繳之馬挑補馬隊之缺撥發驛站餘
悉散給貧民各營所駐之地悉令趁時耕墾徐占彪勦辦肅
州之回亦報疊獲勝仗馬四受傷前所稱馬長順一股近因
成祿襲殺數十名遂欲挈眷赴西甯就撫亦無他變惟狗齒

牙黨眾經蕭章開勦敗後竄赴定邊復經陝軍截擊回匿慶陽山谷間未能盡殲既而肅回馬四傷愈復出劫掠二月初九日以千餘騎撲近官營徐占彪初分三路繼結方陣賊始敗退斬執旗賊目斃數十騎二十九三十等日探有賊騎出掠設伏全家灣以待賊亦偵知之繞路回竄官軍追之賊列隊回抗戰歷兩時賊不能支追至沙子山賊不得已再戰復敗鼠竄回城三月十五日賊攻臨水對河民堡官軍擊之捷十六日賊復攻老鶴堡官軍將至賊已返奔追至城根多有斬獲城賊出援之而入訶賊蓄憾已甚不久將爲背城之戰

徐占彪戒備之二十一日飭步隊四營伏十里外之亂古墩而以右營馬隊防援賊自率馬隊並團勇會同署安肅道何元普赴東關誘戰賊果出紅白旗馬步迎拒徐占彪且戰且走誘至亂古墩伏兵突起徐占彪回軍夾擊賊不能支追至城濠斃賊無算城中復出藍旗綠旗花旗悍賊分三路來援官軍迎戰久之賊復敗馬四見事已急自率黃旗死黨至叅將蕭蘭玉連放開花大礮賊人馬紛倒馬四之坐馬傷蹶徐春先驟馬往擒忽右膊爲飛子所中馬四乘間逸去於時桂錫楨三營由臨水來援肅州鎮王子龍及成祿所部副都統

明春亦同至賊危極乃急求馬長順由南山一帶遙爲赴敵之勢冀官軍分力接應乃得縮退入城自相踐踏死者益眾是役共斃賊近千據被裹難民供城中巷哭馬長順爲馬四所留未得先往西甯至是羣相詬厲而肅賊之膽寒甘南零股逆回知河回已撫無可乘藉遂欲竄秦階深山而遊勇士匪與之合勢復蔓延自榆樹川敗後竄至西和雪水河踞山峽廢堡意圖負嵎尤成章改騎爲步猱升擊之斃二三百名生擒十名二十一日另股闖入白馬關值署州判羅映霄會副將楊隆昌先期赴白楊灘捕匪署把總周德身中矛傷幕

友留浙補用知縣李舒萼湖北補用縣丞郭怡副將孫萬榮
同時遇害二十三日羅映霄聞警馳回而賊已遁王聲揚率
隊探蹤跟剿二月初一日追及於杜家堡與從九金森從山
腰下擊賊棄所掠牲畜狂遁殲百餘名竄略陽界合另股犯
太石山李宏珍擊走之初十日夜襲階州之小關經遊擊胡
彪轟擊而退追至大關與周正秋夾擊之再捷十八日夜竄
拋沙河殷華廷強鳳岐會李輝武所部總兵鄧貴華副將劉
楚華合剿於康家灣陣斬並墮巖者甚眾三月十三日王聲
揚張養吾常遠藻訶賊踞西禮交界之鐵鎖橋率隊擊之斃

賊無算救出難民二百餘名生擒賊六名其黨時分時合遇擊卽竄飄忽聚散迄無定蹤十四日以後賊竄略陽之郭家壩李輝武所部王照南蕭德林勦之遁入階州屬境楊隆昌痛擊之殪賊目一名追及於麻巖子殺戮愈多賊竄長壩官軍乘夜襲之賊之存者少矣據逃出難民供此股賊目米相公馬三均經擒斬其初黨類無多皆沿途勾合而集者也殘賊聚匿木瓜嶺田連考探知之直搗其巢殷華廷繼之其股略盡狗齒牙一股自河回就撫後復竄北路雷正綰所部副將趙連科勦之羅家胡同擒李四箇子等十二名訊係馬生

彥之黨由河州隨狗齒牙出竄者也李積慶勦之於元城子賊未戰而遁易元壽勦之丁家溝追至護書溝易元壽身受矛傷其馬亦蹶乃裹創換馬與總兵金品勝分隊鈔擊賊不能支而遁鄧林楓左日升截之於魏家地賊敗向花定一帶狂竄二月十八日犯定邊縣城防營出擊遊擊秦正明守備馮憲章均歿於陣署定邊副將王雲孚率兵勇繼進賊始退去副將李萬盛劉文彩緊追是夜襲之於柳樹嶺賊敗二十日延榆綏鎮劉厚基派隊赴定邊換防至三里灘遇賊遊擊劉秀維銳進勝而復挫力竭陣亡老湘軍湯彥和聞警往援

賊駭而奔追四十餘里擒斬數十再往窮追賊已遠遁提督
蕭元亨襲之紅柳溝頗有斬獲署延榆綏道成定康派所部
彭緒炳進擊賊小挫二十九日定邊知縣饒兆麟會圍於黑
梁子逆目馬小五一股全數殄滅賊遂分竄三月初九日湯
彥和搜勦至三汊土人告知六十里廢莊中有伏匿之賊湯
彥和夜往襲之賊驚起四竄未獲盡殲南竄一股由紅德城
竄至木波鎮左日升追敗之賊竄石溝驛湯彥和截之新東
坡易元壽復截之長流水賊潰圍挺走擒斬約百餘名郎永
清雷天恩擊之苦麻井趙連科探追至長峪河賊困而回抗

趙連科左手被傷四指俱墮千總周保泰陣亡郎永清馳至
合擊之賊敗而散惟狗齒牙尙未知竄伏何所也時甘南逃
匿潰弁王勇韓祿二犯已於番地緝獲解營正法挑汰各潰
軍員弁遣撤二千五百餘名劉錦棠報稱三月初三日行抵
漢口惟成祿全無出關之意雖屢以糧餉軍火爲言其實觀
望遷延不願開拔而於勦撫機宜每多方以誤之馮均幅實
心就撫成祿受之不肯資以兵力致馮均幅爲馬四所害又
不撫輯其眾致馬四得收而有之其弟馮均貴等遂引其眾
南附河州成祿馳檄沿途各軍令其截殺馬長順竄赴關外

聞徐占彪西進卽返肅輸款於成祿成祿旣與徐占彪謀受之矣馬長順始兼通款於成祿忽成祿將護送寶型之陝回二十餘名一夜殺盡馬長順因懷疑懼不敢回西甯就撫現與馬四合勢死拒成祿又自言合力攻克肅州而遇事復不與徐占彪相商反從中牽制之無非藉詞會攻肅州以緩出關之行又欲肅城緩克以爲自固之計蓄養戲班廣置姬妾以荒邊爲安樂之窩左 忍之旣久至此始據實陳奏緣軍機所關非得已也成祿亦自知清議難逃始以定期拔隊分起出關陳奏兼請山西撥餉綏遠購駝旋又具奏請

飭籌辦車馬及後路轉運事宜並採買糧石百端要挾幸賴
聖度如天但責令迅速出關一切置之不問此時馮邦棟由
平番進抵碾伯陸續將陝回宋全德等呈繳馬匹鎗械戶口
冊籍分別點驗其軍功馬振鳳等帶到回駁于海潮馬世魁
禹召林等暫回原處聽候查辦經豫師據情陳奏而河回就
撫各事宜亦已一律就緒因於行營陳奏疏云竊維河州土
回馬占鼇馬尕大等憑誠求撫呈繳馬匹鎗礮刀矛均經疊
次馳報嗣據該回目自限分途按戶搜繳一月完竣出具並
無隱匿存留切結計先後共呈繳馬匹四千有奇鎗矛一萬

四千有奇候補按察使陳湜委員同時分起赴各鄉按村勘
驗無異方馬占鰲等之自限分途搜繳馬械也各遣子弟併
偕各回目馬永瑞等十二人赴安定軍前獻馬五十匹具稟
悔罪投誠臣宗棠宣布

朝廷威德諭以生死禍福聽其自取比仍縱令歸巢催繳馬
械該回民疑畏益釋誓爲良民至是據報馬械盡繳乃明白
曉示准其就撫從來辦撫之道以編審戶口爲要編審戶口
以遷徙客回安輯土回爲要河州全境周五六百里回多漢
少雜以番眾同治元年變亂以來陝回多避居其中自陝境

肅清金積掃蕩固原東西山相繼平定所有各處倡亂之回亦多寄孥其間以避誅戮此客回之應遷徙者也其本籍漢民有受河回脅制甘心役使名爲隨教以圖保全者有仇隙已深逃至洮岷狄道充當勇丁而親屬仍留河境者宜分別拔出以杜釁端此本境漢民之應遷徙者也其外來漢民有因陝回裹脅而隨其同竄河境者有被河回裹脅而認爲義子齒諸奴僕者應逐一勒令交出護送原籍以別種類而資完聚此外來漢民之應遷徙者也撫事既定乃次第圖之顧謀遷徙必先定安插之地安插之地漢回各有攸往漢民安

插狄道金縣安定會甯一帶凡近城驛漢民聚積之處宜也
回民則近城驛非所宜近漢莊非所宜併聚一處非所宜從
前安插陝回如化平廳平涼縣大岔溝及北原各處丁口已
一萬數千既未可多所附益又此次安插回民有籍隸陝西
者有籍隸甘肅者當其併力抗拒官軍固無彼此之分也一
且繳馬械就撫還爲齊民則甫被新恩旋尋舊怨不但陝回
與甘回氣類攸分卽陝回與陝回甘回與甘回亦有不能併
域而居者以撫局論分起安寘渙其羣孤其勢計之得也卽
以回情而論亦非分起安寘不可乃預飭安定會甯平涼隆

德靜甯州各牧令覓水草不乏川原荒絕無主各地自成片段者以便安寘旋委員分途履勘乃度其廣狹遷陝回於平涼之謝家莊桃家莊張家莊曹家莊於會甯之姚王家曲家口於靜甯州隆德縣之王家下堡劉戴家山於安定之劉家溝石家坪好地掌等處遷甘回於安定之劉家溝遷漢民於安定之青嵐山新套河夏家營坊其陝回中親屬有已安寘化平廳平涼縣境者漢民中親屬有已流寓隴西狄道州各境者聽其自行投赴完聚而皆給以賑糧大口每日八兩小口每日五兩其遷出稍晚尙能播種粟藁蕎麥者照所墾地

畝給以籽種其節候已過不及下種者令其盡力耕墾以待
明春所需農具一律酌給惟陝回馮均祿一起住河州西北
二百餘里黃河北岸已在彼耕墾栽種乞俟收穫後遷移聽
候安插而鹽茶固原回民從前寄居者尙待清查其應遷之
漢民亦有求緩俟收穫者然丁口亦無多矣遷徙安插漸有
頭緒乃令署河州知州潘效蘇赴任新授河州鎮總兵沈玉
遂帶所部後路五營赴河州鎮任署河州州判米聯璧赴太
子寺分駐任所據潘效蘇沈玉遂稟報沿途漢回列案焚香
迎送絡繹馬占鼇馬尒大馬永瑞及各回目阿渾等咸跪道

勞曷拜感泣並納糧百萬斛備軍食因亂後空城僅存於關
廂建知州官廨暫資辦公沈玉遂五營列帳城中分飭所部
果軍四營由城關外延綦甯河一帶提督張仲春領所部宗
岳六營進駐太子寺一帶提督陳廣發總兵凌春臺以所部
輔字良字等營駐三甲集提督王衍慶所部左路五營及鎮
西忠營兩營仍駐康家崖總兵張福齊所部六營由沙泥站
分布北由阿干鎮以達省城南出沙崙接康家崖前福建布
政使王德榜所部定西等營仍駐狄道河州撫局雖定而諸
路連環布置仍未稍疏也惟西北二百餘里循化同知所轄

番回雜處毘連西甯卽前史所稱吐谷渾地今爲撒拉回巢地險民悍爲甘肅邊患久矣亂後番回自相殘殺人物彫耗文武不能履任遂以化外置之茲因河州撫定撒拉各回目亦赴軍前求撫陳湜詢知狗齒牙馬彥濛馬聳子等敗後竄匿河州境地密諭馬占鼇掩捕馬占鼇陸續將狗齒牙馬彥濛馬聳子獲解其希圖立功自効之情尙似可信現籌辦理善後要務如清釐地畝編審保甲分給門牌安設驛站修葺城垣關隘各事宜正在次第辦理上忙已報開征民間輸將亦覺踴躍察看情形人心大定各路大致又漸次肅清臣宗

棠料理完竣即可進駐省垣矣所有河州撫定收復城池辦理善後實在情形謹合詞恭摺馳陳再逆回狗齒牙卽楊繼芳及馬彥濳馬龔子等經陳湜密飭河州撫回馬占鰲擒獻訊辦其死黨虎滿喇前經鹽茶廳城防回勇哨長楊馥廷獲解雷正緝營訊辦又中衛長流水新撫回民金生智獲逆目黑卯廖馬二利木等解總兵馮南斌營訊辦其馬才棕一犯據獲賊供已於上年轟斃此外各起零匪經靈州鹽茶固原平涼隆德靜甯會甯安定靖遠各防營掩捕追剿誅戮亦多惟敗殘餘匪多或數十名騎少則十數騎竄伏空山伺便突

出見有官軍則竄逸無踪雖於大局無害而千餘里防軍林立未能解嚴蓋土著之回路徑熟習賊數既少蹤跡易藏較之勦辦大股翻形喫力也亦經附片陳明甘南零匪自三月中旬木瓜嶺殲其一股後四月十一日殷華廷偵知西和之香山有賊自率隊伍馳往賊敗竄白家關殷華廷出桃坪截之而賊已先期逸去二十一日王銘忠趙得禮聞之勦之鐵佛寺次日復設伏宗淡溝陷之先後擒斬約數十名二十六日鄧貴華劉楚華躡之於李家溝小有斬獲而殷華廷踵至合擊之賊大敗而遁同日楊德俊搜捕至雪水河遇騎賊百

餘甫與交鋒卽走追至趙家山賊棄馬投林正搜箐窮勦間忽有另股步賊向東疾走徑前薄之賊不戰而狂奔追之至白草坪鏖戰三時賊始大敗狂遁五月十一日賊攻朱家河民堡楊世俊聞報馳往分三路鈔擊賊遂越山張成倫已先繞據山頂賊慌駭不知所措前後夾擊斬馘無算餘賊遁入深箐誘之不出忽有另股自太石河至與之合乘夜潛遁田連考截之岳家壩二十日楊世俊追抵階州楊隆昌率寶勇營自後來擊賊奔南坪山再竄馬家壩設伏以拒揚世俊飭寶勇跟追而別以馬隊擊其伏斃賊極多緊躡至漫坪田連

考橫出截之楊世俊復窮追之於佛崖於秀山於包家山於
白家關於碧玉河所至皆有擒斬而其股遂散訊擒賊供賊
中頭目爲馬麥成劉三蘇舍利夫馬姑九馬麻兒五名皆鹽
關土回欲附肅州而未能者也至肅州回逆自三月敗後日
於城外增築堅卡爲負固計四月二十四二十五兩日桂錫
楨逼卡誘敵見大卡之外環築小卡賊縮匿不出徐占彪飭
所部滾營進逼二十七日叅將齊懷松移紮中河橋甫定遽
率馬隊百餘騎覘賊將近塔爾灣見各卡外牲畜遍野卽揮
軍迅進殲牧賊十餘名而奪其馬卡賊出援齊懷松已整隊

護所獲而還五月初一日桂錫楨率馬步疾抵城下城卡各出馬步賊數百列陣迎拒桂錫楨以步隊居中馬隊分兩路包鈔奮威齊進賊敗奔趁勢猛追直抵東關口關閉不啟賊賊競逃入卡桂錫楨麾軍逼攻立破大卡一座賊墮濠死者頗多獲戰馬三十六匹生擒馬元等五名斬之以徇初二日桂錫楨以一營預伏十里墩率三四兩起馬隊在東南角往來馳騁賊由東關突出馬步千餘名奮前猛撲官軍且戰且走誘近十里墩伏兵繞由賊後突起桂錫楨回軍夾擊賊遂奔潰追斬百餘名生擒十四名奪賊馬十八匹訊據獲賊及

逃出難民僉稱馬四分向關外及西甯各回族求援續有新
出難民告知有關外賊目魁頭老四帶纏頭馬步賊三千餘
入城助守提督黃虎臣率隊偵之列軍河灘見城中花紅黑
白各旗魚貫而出知爲賊之舊隊大黑旗繼出約眾二千餘
計係關外新賊排立城邊就渠沿環施鎗礮誘之不前黃虎
臣繞北路回營奪獲牲畜數十頭徐占彪以賊情狡詐必賺
之遠出始克痛剿密飭歸化營回勇暗約馬四十八日出隊
當作內應繞旗爲號是日徐占彪親率精銳乘夜潛出伏城
西南老馬堡黎明先以步隊兩營逼城而陣賊眾爭出官軍

且戰且退賊仍疑卻不前忽見歸化營在亂鼓墩上繞旗數
轉賊喜內應已確大股突出桂錫楨時伏深林中俟賊過甫
半橫截而出賊見伏兵無多尙分隊抵禦歸化營迎頭猛擊
官軍繼之徐占彪由老馬堡分三路馳至逕衝賊隊縱橫盪
抉賊屍枕藉敗賊分兩股一趨城關一奔入朱家堡徐占彪
麾軍攻堡鎗斃守賊甚眾賊殊死抗撤隊誘之城賊復飛馳
來援徐占彪縱擊斬賊多名將賊擊退並搜殺麥地伏賊數
十名是役約斃賊數百官軍亦有傷亡二十一日徐占彪繞
城巡視賊環城列隊徐占彪折至塔爾灣賊出隊護牲畜殺

賊數十名肅州城堅濠深馬四甘心叛逆又益以關外之援徐占彪雖力圖攻拔其勢尙未能也甘州涼州本無踞逆五月初五日忽有馬賊數百竄擾撫彝廳境署甘涼道蕭宗幹聞報會商署甘肅提督楊占鼇撥隊截勦楊占鼇飭提督張慶雲率隊以往將抵撫彝賊已折竄東樂返旆追之則又竄山丹張慶雲躡擊之初十日遇於紅寺湖小有斬獲十一日又有另股馬賊竄鎮番署鎮番遊擊李效現副將王禮和會擊於唐家寨斃匪三四十名殲執旗賊目二名十二日追及於爛泥溝賊不戰而走所斬無多是日張慶雲追賊至黑

城有另股自扁都口竄出與前股合約一千三四百騎張慶雲扼之駝嶺山賊折竄入口十六日賊攻大馬營署永固副將扎拉芬與張慶雲會隊援之戰於周家莊官軍被賊圍截傷亡頗多尙未確知爲何處賊也道署涼州鎮總兵王仁和稟報高古城勦賊獲勝始悉賊踪由西甯竄出而平番之柳川口亦有西甯陝回竄擾穆圖善派副都統常明率馬隊勦之該逆敗逃入山嗣西甯鎮總兵黃武賢稟報陝回畢大才馬五九等糾眾二千援肅由大道北原竄出禹得彥白彥虎等股悍匪多在其內馮邦棟亦稟云西甯回日馬永福頗明

大義現已率西甯米喇溝西馬營各處回目傾誠求撫據稱
陝回禹得彥白彥虎崔三等占踞大小南川尙未就撫慮其
反噬不得不各留馬械防之一俟陝回了事卽將馬械盡繳
陝回惟崔三求撫甚切禹白等逆則心懷疑畏據陳林等稟
該逆等私議如官軍速進當竄蜀竄滇以延殘喘崔三亦不
能制而舉大才援肅禹白崔等逆亦未同行左 知撫局
難恃因飭何作霖統所部步隊六營益以馬隊兩營由康家
崖拔行直赴碾伯駐紮檄道員劉錦棠率步隊四營馬隊兩
起由平涼拔行赴蘭前往調直隸州知州龍錫慶率所部綏

定兩營步隊會師碾伯繼進飭馬永福馬占鼇先將陝回去
路遮截定議先攻西甯後規肅州均經縷晰陳明而肅逆馬
四於距城三十里之塔爾灣堅築堡垣環以濠卡連接黃草
壩各賊堡與肅城相爲犄角徐占彪周覽形勢知不破塔爾
堡必不能規取肅城值其時小麥漸熟一面出隊刈麥以絕
其糧而誘之戰而賊竟不固爭卒未得一痛擊五月二十七
日徐占彪飭黃虎臣每日出隊雷臺廟一帶牽制該逆而自
率馬步五營裹帶行糧商同署肅州鎮王子龍並調紅水臨
水團丁夜趨塔爾灣飭桂錫楨率馬隊爲兩路策應比至而

天尙未明乃分所部爲十隊各指一堡攻之賊不意官軍夜至倉猝抗拒官軍已乘間躍入立破數卡逕薄堡根火器迸注鎗礮雷轟堡中火起守賊奪門四竄自寅至巳克賊堡四座墩卡十九座生擒十餘名塔爾堡之賊出紅白旗來援馬隊擊卻之旋閉堡門不出徐占彪揮軍圍攻賊拚死拒守官軍因就地爲營是夜復分隊襲破附近墩堡六座其焚墩自竄者又十餘座是日黃虎臣師抵朱家堡城中以步賊出禦正接戰間突有馬賊數百東趨三仙洞桂錫楨回軍擊之殺賊數十名而奪其馬賊返奔入城二十九日徐占彪調開花

礮連轟塔爾堡謀報城賊出馬步數千分道西馳來援徐占
彪按陣不動靜以待之馬賊數百一近陣前旋即縮退徐占
彪知其有伏飭陳春萬出北路繞伏賊之後王子龍擊其前
賊分股接戰馬隊橫攻之賊敗遁追抵黃草壩始收隊還三
十日飭各團丁分道刈麥以馬隊由三仙洞往來遊駛爲疑
兵仍分軍輪攻塔爾堡晝夜不息六月初一日賊又以悍股
赴援凡三次均經馬隊擊敗陳春萬復乘勝攻克東大堡生
擒賊渠萬萬長金自鳴斬之賊益洶懼塔爾堡以東焚堡夜
遁者以十數計初二日徐占彪進紮黃草壩督正營歸化等

營圍攻塔爾堡益急是夜軍功回目藍明泰奮威先登守備
徐春先繼之立將塔爾堡攻克守賊鮮得免者獲千觔大礮
一尊鎗械牲畜無算訊據擒賊供稱二十九日之戰口外回
目萬長赤斤老二千長冶老四已經官軍陣斬初三日徐春
先攻開文殊山前堡二座其餘七座夜遁塔爾灣以上各壘
皆空初四日各營分攻黃草壩三堡未下初五日徐占彪繞
堡東築營絕其糧道連破賊墩數座賊知不敵開門競逃被
斬者無算復乘勝攻克小堡二十餘座於是肅城西南墩堡
百餘座均一律蕩平各營合紮沙子壩距城僅三里初六日

大南門擁出賊眾五六千均穿白衣紮白巾加縛黃紙前斜
排兩行中排方營後列散隊蓋賊中所謂喪門陣也既成列
殺一婦人一狗於陣前似爲厭勝之術者旋狂譟齊撲官軍
營壘徐占彪令各營勿出俟賊之前隊盡過中隊逕薄陣前
中營鼓聲起各營奮威衝出賊殊死鬪蕭蘭玉以開花礮向
賊叢測準轟擊桂錫楨率馬隊逕穿賊陣賊隊大亂徐占彪
麾軍乘之躡踪跟殺屍橫遍野直追至城根始行收隊據獲
匪供稱逆首馬四之弟馬六元帥額角中礮子眾賊搶回城
中是戰斃城內外兇渠數名馬步悍賊無數蓋徐占彪第一

惡戰也初賊排妖陣以出誓決死戰迨二段方陣撲近營前時方風日晴朗將弁均奉令挺刃以待忽西北雷聲大震黑雲飛墮賊陣雷雨交作各營聞鼓聲奮躍衝入賊陣賊驚悸之餘繩藥盡溼官軍所用多洋鎗不畏風雨人人喜荷神助縱橫盪挾所向披靡然將弁之傷亡者亦二十餘員名自是連日出仗各有勝負賊堵渠口徐占彪見渠流頓涸遂知其謀急率隊馳往斬守賊決渠引流賊爲之氣奪十八日辰刻城賊七八千由南門蜂擁而出伏麥地開鎗向營轟擊徐占彪飭各營按隊勿出僅以劈山礮遙轟之相持至未申之交

賊已困乏鎗聲漸稀中營乃鳴鼓角桂錫楨李洪超由北路
秦玉盛黃祖福由南路藍明泰齊懷松由中路徐占彪率宋
賢聲康得勝李玉山程連璫等繼之各領所部橫躍入陣將
賊衝爲數段立斬悍賊百餘名生擒五名賊眾紛潰遁入枯
樹堡是夜徐占彪令各營選銳卒百人與馬隊之趨捷者數
百人襲香莊廟大堡四鼓銜枚而進斬巡賊四名令隊伍分
伏左右麾壯士先登噴筒火蛋齊發賊酣臥始覺倉卒不知
所爲壯士畢登立將香莊堅堡攻克斃賊數百千總周二級
手斬千長馬建功守備鄭光平勇丁牛金勝生擒阿渾張景

幅訊據供稱係瑪納斯阿渾又據賊目馬七供稱初六日之戰賊中千長死者十餘名受傷者尤多內有萬長楊才已經官軍擒獲提訊楊才供認不諱肅城首逆復哀詞乞撫徐占彪憤其狡詐諭以且決數戰再議左念該軍勤奮苦戰歷敘前後情形具奏奉

諭獎卹有差適南北各路防軍先後稟報雷正綰將馬母驢卽馬成榮並其死黨二十餘犯悉數弋獲處以極刑甘南回目蘇舍利夫馬姑九率殘匪二百餘名款營呈繳馬械已飭分別安插清水逆目鄧大有一犯經階州防營轟斃海珍等

一起經總兵馬有才截之於王家堡悉數殲之李萬海一犯
經蘇家良生擒解營訊明磔死後路已就肅清左 因擇

於七月十五日進駐省城以憑調度西進時劉錦棠已分撥
步隊三營馬隊兩起派譚拔萃帶往金積堡替出蕭章開率
准假舊勇回籍而親赴行營商妥機要率馬步各營前往西
甯穆圖善奏奉

上諭該將軍於左宗棠進省將現辦防務分晰移交後統帶
所部馬隊並挑選步隊率以東行在陝西乾邠一帶扼紮妥
籌防勦以副委任左宗棠到省後派兵接防倘不敷分布卽

可將該將軍所統酌量留防

聖慮亦極周詳矣是時西甯各回意見不齊勦撫尙無定議故官軍暫留碾伯惟肅回雖屢乞撫而負隅仍如故徐占彪以近城堅堡未下攻城更難而枯樹三堡六墩負城設險尤爲賊之所恃六月十七日旣截勦刈麥之賊遂親挑奮勇百二十名夜率以行仍列隊河灘作勢仰攻並調開花礮向堡轟擊賊憑牆以禦徐占彪先已繞伏城濠以洋鎗測準擊守陴之賊應聲而倒賊遂驚潰各墩堡同時竄逸遂移營填紮其堡二十一日追獲搶收餘麥之賊於塔爾灣因見四壩十

一堡麥穗黃熟二十二日飭新左新中及三四起馬隊繞東
關濠邊撲入兼堵朱家堡援賊飭正右營歸化營呼敦右營
攻其南自率桂錫楨護開花礮隊馳入壩中左右轟擊又令
副新後兩營由三仙洞橫攻各堡自卯至午副新後兩營先
破東大堡一座餘堡奪門四竄追斬極多旋移營紮入加築
木城所遺三仙洞營壘以團勇填紮自是東西兩路各營始
聯成一氣二十四日城逆四次具稟請退兵十里願獻城池
自贖徐占彪穩知其詐不允攻朱家堡益急斷其糧運及出
沒之路賊益洶懼二十五日各營備攻具填濠齊進逕薄賊

牆賊棄堡狂奔追殺無算調右營進紮該堡自是肅城東西
南三面賊壘盡矣惟北崖頭有廢堡尙爲賊據二十九日徐
占彪率隊馳往賊正刈麥見官軍卽潰官軍焚之賊入廢堡
憑牆放鎗徐占彪之坐馬傷乃棄馬步戰弁丁益奮立克其
堡派隊分擊各堡之賊亦悉數擒斬初一日官軍誘戰賊未
出初二日復出隊歷遍各壩迄無賊踪撤隊後城逆遽以三
四百名出東門割麥桂錫楨回擊之半就誅夷餘悉梟水逸
去官軍之勦辦若此亦可云不遺餘力矣而肅逆怙終不悛
負隅死抗者則以城高池深糧儲尙足也然以大軍臨之亦

無難滅此朝食無如西甯土客各回至此猶懷觀望劉錦棠
至碾伯後土回續繳馬械到營馬疲械鈍與前無異劉錦棠
以回情多詐恐老師糜餉誤我兵機因出示曉諭土回安堵
無恐以便直搗陝回巢穴留龍錫慶綏定兩營紮七里鋪親
率馬步進紮平戎驛該處地勢平闊逼近陝回所踞之大小
南川並分兵聯紮馬營灣及三十里鋪與小峽毘連察看沿
途土回堡寨僅留壯丁守待收穫餘均早逃劉錦棠詢其有
異飭所部毋犯秋毫免其藉口初十日余虎恩率隊入觀音
堂溝放水土回開鎗抗拒傷勇丁二名十一日劉錦棠率馬

隊至峽口周覽地勢突見堡中出馬步百餘施放鎗礮官軍
舉鎗還擊賊遁十二日馬營灣各營瞥見馬步賊千餘由山
頂繞至檢柴溝劉錦棠飭譚上連董福祥張俊李雙梁等由
左路登山邀擊陶生林熊隆各率馬步沿溝列陣山險路窄
該逆排列峯巔恃險穩拒劉錦棠分軍揮隊上山立斃悍賊
多名該逆滾溝而遁是日另有馬步悍賊二千餘由府城而
來竟奔峽口撲近三十里鋪營盤滄河北岸亦有賊數百隔
河吶喊助勢何作霖因修壘未成僅派洋礮隊出伏破屋及
山溝內向賊轟擊該逆見大隊未出又恃紅水溝之賊已繞

後路遂愈撲愈近何作霖俟其攻撲逾時氣早衰竭整隊猛
出擊之該逆驚潰追逾山原數重據擒賊供稱紅水溝係白
彥虎畢大才馬鎮國等逆峽口一帶係禹得彥崔三等逆內
雜有西甯土回劉錦棠計該逆既糾股出戰決不遽回老巢
預飭余虎恩分伏馬營灣各山谷復飭譚和義蘇大德熊隆
名等由馬營灣渡湟擊峽口北山之賊又調陶生林李雙梁
張俊等赴三十里鋪助勦十三日該逆果率大股三四千分
布峽口南北兩山馬賊繞至峽東各營仍照常築壘陶生林
等先後齊集遂飭何作霖等衝撲峽口張俊李雙梁分起仰

攻南山陶生林由山溝鈔賊後該逆已先於夜閒在峽中砌石卡二座憑卡放鎗南山之賊亦憑險死拒鎗礮如雨血戰逾時譚和義等已渡湟馳上北山立將山頂踞逆擊散徑趨硤口以西陶生林亦從溝內鈔出南山之南賊乃大潰何作霖乘勝衝入峽內攻破石卡卡賊無得脫者生擒禹逆所部頭目李金良斬之是日馬步賊數百由紅水溝迤邐而出亦遇伏驚竄十四日諜稱平戎西高疆溝口桌子山有賊乘夜修壘並有大股賊在溝屯聚劉錦棠卽率馬步馳抵高疆遙見山巔堅壘已成溝內有土回空堡五座仍爲賊踞各山頭

賊旗林立眾約五六千當飭陶生林余虎恩等由左路入溝擊踞堡之賊飭譚和義等由中路登山徑攻賊壘熊隆名李雙梁由右路擊各山援賊弁丁奮躍直前賊憑堡穩抗山上之賊併力下援陶生林熊隆名等揮軍合擊鏖戰逾時斃悍賊無數山上賊先潰堡中各賊亦奪門逃竄踞壘之賊遂齊隊衝出譚和義等截之復退縮入壘各路敗賊又麇聚回援陶生林譚上連等分路堵擊自辰至酉賊始敗奔各營會攻山壘壘賊鎗礮併發急攻不下時已昏暮劉錦棠督軍露宿環攻五鼓時風霜凜烈該逆趁月光陰翳時由壘西峻壁滾

身潛遁追斬數十名其墮折手足及自盡受傷者尤眾是日
另股數千出峽口攻何作霖營盤何作霖及尹興茂席大成
等力戰卻之十九日飭李雙梁分哨紮平戎以西大股賊仍
由高疆溝口而出劉錦棠揮軍分三路進擊賊知不敵仍退
縮入溝官軍追之賊且戰且退官軍結方陣以進直擣高家
堡卽逆首白彥虎行巢也白逆嗾眾返鬪官軍如牆而進殲
悍賊百餘賊棄巢狂奔官軍焚其巢而返是日有步賊二千
餘出峽口撲何作霖營壘復有騎賊由北岸渡湟鈔出壘後
勢甚兇悍何作霖堅守不出及午賊氣已衰官軍開壁齊出

尹興茂扼其前何作霖及席大成繞壘後包鈔又分哨先堵渡口馬賊倉卒搶渡中流沉溺者數十名渡河不及者悉被截殺壘前之賊亦負創而遁二十一日劉錦棠督軍在馬營灣修壘聞峽口礮聲又見馬賊數百已由何作霖壘後繞至上紅莊一帶密飭陶生林等率馬隊分伏廢堡步隊修築如常馬賊漸逼新營見僅有步隊修築營盤遂放膽進撲忽陶生林等馬隊由廢堡躍出步隊合力夾攻該逆奔逃不及大敗而奔鼻水者淹沒落後者悉被擒劉錦棠分兵扼河親率熊隆名董福祥等馳赴峽口何作霖鏖戰已久見援兵大至

奮威猛撲各營繼之賊乃大敗山頂尙有賊數百放鎗助勢
熊隆名等下馬步戰逆遂滾溝而逸計自進兵以來擒斬已
二千餘名高疆溝之捷礮斃紅衣賊目據擒賊供係白彥虎
總目素稱馬六元帥最兇悍者也此時官軍僅十八營若非
決計急進則該逆必終以求撫爲詞俟秋穫而動西甯之蕝
事愈形遲緩矣况肅回負固猶昔官軍亦僅十二營假令抽
顧西甯則肅逆必四出竄擾更將不可收拾故論殄滅次第
則必以西甯爲先而勦辦之師則肅州亦不容偏緩也自七
月初十日城逆馬七馬得鎮等款營乞撫徐占彪知其爲緩

攻計也姑漫應之密覘該逆數百成羣日夜收糧割草往來
不息十九日率馬步繞城巡視瞥見南城外劉家空堡二座
復有賊千餘據其中又朱家堡北舊墩三座亦各踞賊百餘
見官軍至卽施放鎗礮及爲官軍所創仍退縮入堡二十日
率各營分攻三墩城逆以二千餘援前墩陳春萬擊卻之回
軍圍攻賊棄墩而逸復有二股援中後二墩黃祖福等禦之
徐占彪以親兵破其中墩守備孫三級躍上牆垣手刃千長
楊逆及悍黨多名身受七傷力竭而殞是夜藍明泰襲破後
墩守賊鮮有脫者二十一日徐春先等夜攻劉家堡出賊不

意以火器拋入賊奪門而走官軍伏暗中擊以鎗礮賊多不
免二堡旣克官軍卽填紮之二十二日陝回王萬有等以城
逆發糧日減且與歸化營回勇半屬親故遂以二百餘騎至
歸化營請降願勦賊自贖徐占彪允之二十四日城逆數百
自北門出馬隊擊之斬多名擒八名新收之回勇戰尤力傷
亡數名是時秋糧繼熟賊每乘夜出穫三十日徐占彪率隊
搜勦至黃草壩見搶穫之賊約四五百揮軍擊之復全勝盡
取其所有再至塔爾灣又遇賊三百餘載糧回城見兵而潰
追殺之後又盡其所有而取之八月初一日徐占彪以無兵

可增乃分所部馬步一營爲兩營環城聯紮距城僅一里半里不等各相閒以里許自城西迤邐而南又繞城東迄北城角僅餘北門一面未克合圍正修壘間城逆由南門出賊千餘西衝新左新中等營東門亦出賊千餘撲歸化等營當飭附營馬步左右鈔之兩路之賊均敗伏濠沿以蔽鎗礮徐占彪調蕭蘭玉赴正營李道修赴左營各以開花礮對城轟擊子落城內極多人聲鼎沸又密調劈山礮隊排指東南兩門一面傳令各營收隊伏濠之賊見官軍收隊急趨入城劈山礮隊一齊轟發賊應聲倒競奪門入自相踐踏屍骸枕藉初

二日悍賊三四千出北門圍攻歸化兩營甚急徐占彪飭馬隊繞後擊之抽正副新後各營截其歸路餘營排列東西城下賊正與歸化兩營相持馬隊馳至兩面夾攻遂敗退城下而歸路又爲官軍鈔截不能收避匿濠中遂折向東路鼠竄而遁各營轟擊約斃數百名其分匿東南濠沿者開鎗外拒城上亦開礮助之對轟竟日始收隊初三日馬賊二名遞呈乞撫北門旋出賊六七百循城東下意圖收屍當派齊懷松截其後賊抵死鏖戰馬隊亦從旁鈔至賊不能支敗竄回城初四日大股賊出北門分爲四股每股約千餘人一循濠而

東至副營前排逼濠沿一圍攻歸化右營一由四壩北面繞出歸化營後一列隊城東北徐占彪當飭徐春先禦營前之賊飭陳春萬黃祖福由四壩攻賊後飭陳登雲出四壩以東鈔之馬隊往來爲援副營前之賊拚死猛撲不少卻徐占彪親率馬步由左路橫衝賊隊徐春先亦由右路截之賊敗退北城角與列隊城下之賊合爲一起李道修以開花礮向城擊之垛口應聲崩裂磚石飛落城下賊多傷亡遂奔匿城濠徐占彪折馳四壩陳春萬正與賊戰賊伏溝坎鎗礮不能及城上護以鎗礮勢難逼攻乃飭蕭蘭玉以開花礮轟其城樓

擊塌樓檐一角伏溝之賊亦驚起向四壩奔逸其圍攻歸化營之賊填濠攀堞逼攻甚猛徐春先等援之賊分隊抵禦千總郭三超怒馬斫陣直擣中堅馬隊相繼衝入藍明泰開壁夾攻賊多折損餘賊敗奔北門惟四壩潰賊未及入城城中出馬賊五六百由北崖頭迎護陳春萬黃祖福率師腰擊賊敗而遁飭桂錫楨移紮北崖頭以斷其路收糧之賊未能入城者均西竄出關據逃出難民供稱連日之戰賊中傷亡千萬長十五名阿渾三名然其黨尙眾官軍僅足相持未可以攻堅也兵力之單如此因奏請

調湖南提督宋慶全軍由神木拔赴甘肅助剿以張曜填紮金積堡替出譚拔萃率所部前赴西甯一面飭統領奇捷營降補叅將楊世俊迅帶青旗馬隊一營及捷勇步隊兩營由狄道沙泥赴省其分紮各處之紅旗白旗藍旗馬隊先後調至馬營監取齊由安定一路赴省八月十八日楊世俊至省正商令前進填紮忽接安定防營前路統領劉端冕飛稟紅白藍各旗馬隊行至馬營監次早開拔忽鼓噪騷潰倡逃各犯持刀斷路迫眾東行營哨官呵禁不止楊世俊卽前往撫諭將未潰隊伍交原帶營哨各官帶赴蘭省據楊德俊等稟

報倡潰弁丁係五隊領旗王錦如三隊領旗路鍾字紅旗右
哨長呂長樂後哨長張志才馮高山白旗副哨長楊富貴藍
旗哨長王士清前哨領旗王盛懷皆江皖人揚言餉項積久
將近一年西北寒苦尤不慣受自脅其眾倉皇奔潰計同潰
者三百九十六名馬四百三十餘匹由馬營出通渭過伏羌
趨禮縣駐紮長道鎮之副白旗旗總張成倫力戰遇害挈其
眾南趨蘇家良截殺數十名卽夜由秦州竄清水之關山楊
世俊馳至收回副白旗弁丁一百四十騎白沙堡圍眾疑爲
潰卒後隊阻不得行致潰卒竄隴州分而爲二一竄鳳翔一

由崔木鎮竄靈臺幸曹克忠督所部馬步各營由乾邠分道截擊之竄鳳翔一股投於徐邦道其出崔木鎮者投於潘萬才遂悉數收輯忽據西甯道稟報署西甯知府馬桂源擅便出城與眾回商抗官軍兩日不返城內漢民習知其詐乘機閉城拒守請西甯道郭襄之及縣令主辦城防不准馬桂源等入城緣馬桂源本循化廳回民捐納候選同知西甯駐劄之青海辦事大臣玉通於回初亂時力持撫議先委馬桂源署循化同知同治八年又咨穆圖善委署西甯知府而以其兄馬本源署鎮標遊擊代辦西甯鎮篆務自陝回肇衅以來

西甯卽藉辨教爲名乘機煽變玉通力不能制則抑漢以扶回其時回目馬尒三狡黠異常旣以撫局愚官復挾官以鈐制漢民凌虐殘殺無所不至漢民競言於玉通無如何也幸馬尒三上年已伏冥誅西甯回目係馬桂源之叔馬永福接充馬永福在湟回中尙稱謹愿惜性懦不能制諸回其子馬三娃充新教海裏飛馬永福亦不能制劉錦棠至碾伯曉諭官軍進勦大小南川在此路經過土回毋庸驚恐比抵大峽口則土回已與陝回合股抗拒矣據撫回閣興春探報馬桂源在西甯東關私宅密約禹得彥白彥虎崔三等逆抗拒官

軍馬本源自稱統領陝湟兵馬大元帥馬桂源仍稱西甯知府盡帶城中回兵回民出東關調集土回爲陝回助勢馬三娃亦在其中現亦不能入城八月二十四日馬步賊數千分爲二股一循山而下直撲李雙梁防營一出彥才溝阻截前路各營劉錦棠率熊隆名董福祥陳宗蕃分道往擊遙見撲營之賊僅五六百而山谷溝坎伏賊甚多因揮軍急進李雙梁亦出壘夾攻先將撲營之賊擊敗原上之賊預砌礮臺憑高下擊適譚和義蘇大德羅照陞陳啟明陶鼎金各率馬步由平戎驛馳至賊之出彥才溝者知勢不敵縮退溝內熊隆

名乘勢壓追譚和義等鼓銳登山立殲悍賊賊乃大潰是夜設伏彥才溝賊知之未出二十五日羊角灣賊數千列隊小峽口各山頭另有賊千餘由三十里鋪撲譚上連營壘何作霖余虎恩出隊援之譚上連亦憑壘力擊礮石雨注賊負創遁劉錦棠聞報密調後路馬步合紮三十里鋪並於營傍修礮臺安放後膛開花車輪大礮以待二十六日賊匿不出而湟北陝回營內出騾馬千餘放草鄧增度礮所可及以車輪大礮向人馬聚處轟之礮子半飛入賊壘半落人馬叢中賊棄壘越山而逃是夜收屍之賊紛呶徹曉所斃蓋可知矣二

十七日各營仍依山設伏午刻賊由山頂迤邐而下熊隆名以馬隊誘之賊見隊少徑前來撲鄧增連施大礮何作霖等分隊擊之賊大潰旋據西營子防營李雙梁報稱是日馬步賊千餘撲近營壘官軍憑牆力禦有賊揮大刀撲近營濠爲官軍洋鎗擊倒羣賊以矛桿昇之而逸二十八日各營仍於三十里鋪設伏賊知有備不敢復出劉錦棠復抽隊夜抵彥才溝口二十九日見馬賊百餘馳騁溝中大股繼出陳宗蕃佯作敗狀誘其深入賊噪而前伏隊四起賊駭而奔追殺十餘里賊屍枕藉遙見駱駝堡賊卡十餘座官軍緊追賊不及

入卡守卡者亦相隨狂竄時已黃昏卽就賊壘分軍駐之次
早檢視賊屍計五百餘具據生擒土回領隊馬仲供稱白彥
虎爲鎗子中傷左乳馬桂源之弟馬真源爲礮子洞穿左肋
撒拉回目多拜已被擒斬而該逆仍恃眾穩抗時龍錫慶督
所部綏定營駐大峽口初五日率所部左營循探賊踪抵郭
爾堡遇賊龍錫慶擊之賊不戰而走追抵沙溝破賊壘一座
遂入據之忽有大股驟至逼堡環攻傷亡弁丁數百人營官
叅將李恩齡力竭而殞劉錦棠聞龍錫慶深入被圍初六日
黎明飛調馬步向觀音堂溝赴援入溝十里許破道旁賊堡

七座賊棄巢奔立焚其巢復追八九里大堡中出馬步賊千餘另股由兩山鈔出力戰三時之久賊始潰退適龍錫慶亦已旋營遂收隊初八日小峽之賊以大股出撲營壘另股由左面山溝鈔出劉錦棠飭譚上連等列隊壘前飭鄧增以大礮向擊賊譚潰官軍跟踪馳追山溝之賊從旁衝出陶鼎金等下馬步戰何作霖分路鈔之賊不能支追越山巔而返初十以後劉錦棠飭各營穩慎迎敵而抽隊赴平戎驛修橋渡湟至紅崖子溝築壘以通威遠堡糧路威遠之馬圈口班家灣等處時有回逆出擾壘經黃武賢搜剿十四日平戎橋工

將竣有數百賊騎從觀音堂溝彥才溝鼓噪而來劉錦棠飭陳啟明陶鼎金等率馬隊衝擊南山復有大股賊至綿亘二十里陳啟明等以眾寡懸絕收隊憑壘施放鎗礮劉錦棠飛令各軍渡湟而南賊趁官軍半渡四面猛撲適譚和義蘇大德齊至士卒直前奮擊賊未能逞能隆名董福祥在馬營灣聞平戎驛礮聲甚急疾馳而來席大成尹興茂等亦至張兩翼分鈔羅照陞陳啟明乘機猛進賊大敗官軍合圍兜追斬馘數百生擒十名十五夜賊乘雪於李雙梁營壘之西三里山巔聯築七卡大股分紮隔截前敵各營十六日劉錦棠前

往察看馬賊擾至平戎驛步賊排列護卡約近萬人劉錦棠
飭李雙梁堅守勿出飛率各營渡橋直上馬賊向前抗拒官
軍鎗礮齊發立斃多人追抵馬營灣對岸劉錦棠令蘇大德
等築壘羅照陞等列隊以待賊忽大至馳下平川適何作霖
席大成尹興茂等馳至鄧增亦護大礮前來連開數礮賊稍
卻各軍分左右力戰賊縮退壘中官軍力攻之壘中礮石紛
飛官軍傷亡者眾劉錦棠令勿撤隊是夜風雪嚴寒裂膚刺
骨軍士露立通夕無敢稍懈十七日黎明劉錦棠由北岸亂
流而渡令鄧增以大礮向山頂連轟賊不能支大股走匿山

回乃整旅折赴馬營灣河灘令董福祥連夜添造木橋二十日分三營渡湟築壘令譚上連何作霖分扼湟南北以遏賊衝少頃賊果率大股下山何作霖等分途盪挾賊敗上山梁未幾復率數百騎由北岸山溝衝近河邊劉錦棠飭各軍迎勦令鄧增以大礮隔河轟之賊大敗而逸二十二二十三等日賊修數壘於紅莊對岸防官軍北路進攻劉錦棠佯爲不知日夜督修橋壘橋之兩旁並築礮臺護之二十八日五鼓大股撲近新修之卡白彥虎畢大才之黨約土回由馬營灣山下平川渡湟兩股約七八千人劉錦棠分軍渡湟猛撲之

賊惶懼縮退回撲席大成營董福祥馳至夾擊之湟南之賊見湟北賊敗渡水來援尹興茂等折回來擊賊翻山而竄是日步賊千餘至小峽分股伏溝中昇大鐵礮攻何作霖之營礮子墜壘中者約重二觔餘何作霖率眾從壘中躍出擊散賊眾並奪其礮劉錦棠令於北岸山下及新營西增修營壘爲進逼計十月初二日小峽口賊千餘來撲營譚上連等擊敗之生擒三名訊據供稱是日陝回往北川攻寨掠食劉錦棠令各營分左右捲旗疾趨奪高寨之險高寨前一小卡守賊數十人見官軍突至逃入高寨高寨賊三千餘列械出拒

官軍馬步齊進忽隔河開花大礮子飛墮賊叢賊益洶懼驀
山越澗而逃官軍謹噪乘之賊屍枕藉十餘卡壘一律踏平
比小峽大股馬隊來援亦經大礮擊退據擒賊趙起太於積
屍中指認回目蘇九和一名並供此股陝回最多是夜官軍
卽填紮其寨初三日劉明燈及副將滕春山等奉檄助勦至
高寨與劉錦棠晤商劉明燈所部馬步六營從七里鋪延紮
至彥才溝替出劉錦棠所部左右翼兩營及綏定兩營以便
滾營進取又增修三壘賊見官軍連日高寨增壘意南岸必
虛初五日大股出撲迄未得逞官軍增修卡壘數處初七日

賊大股圍撲新修之卡官軍但以鎗石火蛋禦之賊見官軍
不出各持馬刀紛入濠溝何作霖譚上連等分兩路挺矛直
出賊稍敗退鄧增運大礮至對路狹賊多處連發十餘礮賊
乃敗潰初八日分軍扼小峽與賊相持有一股甚兇悍何作
霖奮力擊之始敗去劉錦棠以南岸難攻於初九日潛師夜
起率各營由馬營灣過橋至高寨會襲小峽賊壘分前左右
銜枚疾走馳近北岸賊壘賊始驚覺官軍已蜂擁而上次第
奪山麓三壘拔幟立幟正追逐間忽小峽內塵沙蔽日賊約
萬餘由山頭及中路奔來官軍整隊迎擊左翼一營列隊左

山之巔賊力爭此地自辰至申血戰不少卻譚和義等皆身被數鎗仍裹創力戰大呼突陣賊皆辟易紛紛敗退是夜劉錦棠令各營急運磚石增修廢壘並於山頭添築一壘扼之而賊亦於對山築數壘十二日偵賊大股匿峽中守壘之賊堅壁不出劉錦棠懸重賞挑選壯士攻南山各卡其北山四壘分各軍攻其三劉錦棠親率各營隨後接應夜近賊壘乘賊未覺火器紛飛著處卽然賊驚起拒戰而壯士已從濠中躍起以肩爲梯攀壘騰上矣須臾三壘以次悉破南山賊卡亦同時攻克各卡壘約近千人無漏逸者官軍卽夜分填所

奪三壘駐之十三日賊大股來犯劉錦棠飭三壘各以一營守壘餘列長陣羅照陞陳宗蕃李雙梁等率所部奮擊立將所破賊壘修築完好護糧入壘並接修運礮車大道十七日署西甯道郭襄之遣人縋城來告被圍兩月城中糧食將盡十四夜五鼓賊乘梯襲城雖經擊退然勢甚危迫乞速應援適馬桂源稟請官軍暫退碾伯卽誠心就撫又撤拉八工回昂貨奴勒亦具稟代西甯土回乞撫劉錦棠知其意在緩兵十八日黎明飭余虎恩席大成護五十里鋪各壘自率各營護大礮上北岸山頂正在分撥之際賊忽分三股一由小峽

口南山一由馬營灣逕犯官營妄意乘南岸之虛其大股則向北山急進劉錦棠以南岸各卡修繕完固足以制賊令鄧增測準北山賊壘開大礮轟擊令譚和義護之一面分飭兩路攻左右賊壘一路擊正中大股一路策應兩時之久發大礮子六十餘賊三壘牆垣皆坍塌避匿溝中劉錦棠麾各路猛進賊大潰官軍躡踪緊追連破北山四面卡壘十餘座乘勝壓下山梁賊棄山麓各壘而逃一由湟北竄韻家口一鳧水渡湟而南當將峽內羊角灣羅家堡二十里鋪十里鋪一帶卡壘悉數踏平其南岸之賊見官軍自北而南截其歸路竄

走南山之南余虎恩席大成追之破其山上卡壘十餘座越山至羊角灣會隊其竄韻家口一帶者見董福祥羅照陞等引軍突至均棄寨向西甯而逃薄暮劉錦棠飭各營歸隊分紮兩岸賊壘一面修整濠牆防賊回撲夜分馬賊數千復拚死來犯官軍結隊衝擊賊屍遍野卽時敗遁十九日黎明瞭見西甯附城各莊寨火起劉錦棠飛調馬步迅進比抵東關逆首馬本源馬桂源等已同土回頭目於先夜三鼓各挈逆眷向東川竄走殿後馬賊數百被陶生林等追擊四散向南川而遁計連日斃賊約三四千馬驟軍械遺失滿路署西甯

道郭襄之西甯知縣恩祿率城內難民男婦三萬餘人望塵
迎拜劉錦棠遂加撫諭令其照常防守其城外老弱回民約
千餘口願乞曲貸生命亦令免死安插並諭土回被裹者准
其歸正安插劉錦棠孤軍深入以馬步十八營分紮八十餘
里兩月有餘大小五十餘戰又邊地苦寒大小峽山谷盤互
冰凌凝結最早計五十餘戰中半係夜不收隊露立冰天雪
窖中厥功懋矣偵馬本源馬桂源二犯帶同土回頭目挈眷
將逃入撒拉已抵巴燕戎格陝回亦焚棄大小南川巢穴竄
踞西川意圖由甘往肅與馬四合勢積年巨憖始懾兵威西

甯漢民共慶更生無怪其喜極而涕零也事聞

賞給劉錦棠白玉翎管一枝白玉搬指一箇大荷包一對小荷包兩箇火鏢一把以示優異各將領

賜號進秩有差其餘出力員弁勇丁

准其彙案保獎歷次陣亡各員交部分別從優議卹適奉

諭旨前據左宗棠奏兵力不敷分布請調宋慶一軍當諭令該提督赴甘助剿茲據鮑源深奏稱該軍駐紮河西晉省河防深資屏蔽值此冬令冰堅倉猝之間無從另調別軍填紮毅軍拔隊遠征籌辦軍裝糧運事宜亦需時日且冰雪長途

行走難於迅速可否飭令稍緩西進容得另籌調度等語著
卽照鮑源深所請知照該提督暫緩拔營妥籌防堵仍一面
豫爲布置俟來歲春融卽行迅速前進不准藉詞耽延甘肅
西甯一帶攻勦情形若何現在毅軍暫難成行該處自應另
籌調度左宗棠當斟酌軍情妥爲布置勿稍疏虞欽此其時
西甯府城雖已解圍而首逆尙未就擒陝回猶在西川雖劉
明燈滕春山楊世俊吳隆海等軍奉檄繼至其奈搜勦防守
處處皆資兵力未能抽顧肅州也幸曹克忠所統淮軍已奉
旨飭劉盛藻接統因奏請

飭曹克忠交卸淮軍後迅赴蘭州於所募步隊三營擇其願隨西征者率以俱來到蘭州後或酌撥馬步數營歸伊統帶逕赴甘州署理提篆就近派撥馬步會攻肅州雖奉

諭旨俞允而臬司劉盛藻係劉銘傳之族丁憂在籍尙未知何時至陝俾曹克忠得交卸來甘亦於肅州目前無濟也徐占彪獨任肅州之役自派桂錫楨扼紮北崖頭後八月初八日黎明偵賊由北門馱運糧草密飭齊懷松武朝聘率馬隊夜伏潘家屯莊以待並飭李洪超陳登雲藍明泰率步隊爲援待至日午賊仍未出收隊歷草湖灘突遇賊七八百分爲

兩股一循北城濠渠一出短牆逕前迎撲忽有馬賊四五百由北門疾馳而出齊懷松等背湖列陣分隊迎擊李洪超等率隊循渠逆上賊亦分股力拒正鏖戰閒鄭光平率小馬隊與新歸化馬隊由南壩沙根繞衝賊右官軍合力奮進賊駭而奔各營乘勝追抵北門全勝而返由是賊不敢出者旬日二十日辰刻北門出賊二千餘循濠下至城東分三股圍繞歸化三營城上連放大礮護之陳春萬等出隊衝殺徐占彪飭徐玉盛等以馬隊繞鈔城東北角齊懷松列隊城南宋賢聲黃祖福等各率隊繼至賊不敢近惟伏渠中施放叉子鎗

相持既久忽城西鎗礮大震徐占彪率小隊親兵及徐春先馳往見城西之賊二千餘正逼攻河北民團營壘民團勢將不支徐占彪飛令遊擊陳吉陞把總熊飛鵬督隊直搗中堅賊始敗竄陳吉陞自旁橫擊之侯定邦鄭光平復繞截其歸路賊負創狂走官軍追至城下城上鎗石雨注始收隊城東之賊亦經總兵龍得勝及藍明泰齊懷松等擊敗返奔守備李得宜瞥見殿後賊目卽前乞撫之僞萬長馬俊躍馬斬之各營乘勝追殺賊復大北徐占彪恐民團畏怯因撥副右等營勇丁助之二十一日兩戰皆小勝是夜徐占彪令各營環

城南挑掘長濠二十二日賊以千餘犯新左後各分壘蕭章
林擊之而逸是夜賊出千餘偷毀濠牆官軍潛往以洋鎗自
後擊之賊大潰官軍仍葺牆而還二十四二十五兩日城南
長濠已掘成七百餘丈是夜諜報有賊數百赴塔爾灣收糧
徐占彪飭藍明泰率歸化馬隊躡踪捕勦賊正乘月搶穫官
軍遽起掩之未被擒斬者空手奔逸而城西禮拜寺有踞賊
數百見長濠修近中渠礙其出入乘夜於渠西築二卡相抗
二十七夜徐占彪率壯士襲賊卡各攜麥草填濠殺入賊驚
覺狂竄遂焚其卡二十八日賊於城西增修二卡是夜悍賊

二千餘直攻新左營勢甚兇猛張成義及蕭章林環施鎗礮賊三伏三起撲及營門蕭章林挺矛奮刺賊稍卻徐占彪率各營分道馳援忽大風揚塵賊所恃之叉子鎗不能施放官軍大呼斫陣賊勢披靡屍橫里許生擒十一名訊據擒賊馬六兒供稱是役賊共斃四百餘名內千萬長共十餘名九月初一日賊伏西南城下開鎗又於城上放九節大礮忽斷忽續徐占彪見賊不出戰惟攢聚城濠覺其有異率親兵潛赴城南時城上寂無人聲循濠而西見溝中新開地洞二處深甫五六尺旋至黃草渠又見渠中一洞正對新左營壘深五

丈有奇徐占彪飭蕭章林張成義等亦深掘營外濠溝當之
初二日營濠已掘至二丈許忽黃草渠黑煙突起有聲如雷
昏霧中見渠中伏賊紛紛爬濠亂竄莫喻其故趨視渠中始
知賊自失火引然所安火器轟塌地洞洞中之賊已焚斃無
數矣初三夜賊復出城南偷掘濠牆火光如螢倏忽隱見鄧
洪貴暗排鎗礮以待俟賊逼近鎗礮迸發賊敗而回竄比及
踰溝徐占彪率隊馳至又夾擊之斃賊遂多自此以後無復
有大股出犯回情多詐官軍備之益密至二十四日賊復分
兩股出撲新中兩營其眾約三四千人又以馬賊五六百排

列黃草壩徐占彪飛調桂錫楨及秦玉盛藍明泰各率所部迎擊馬賊飭李洪超陳登雲攻其左路親率小隊及徐春先宋賢聲等攻其右路秦玉盛等揮隊直前馬隊亦拚死力拒樊振海怒馬斫陣銳不可當藍明泰復以健騎襲攻賊後賊大亂各軍譁噪追逐徑抵北門殺賊數十而奪其馬右路之賊已逼新中營濠徐春先自後擊之賊回拒約一時許李玉山知賊勢已竭開壁夾擊賊果敗走左路之賊經康得勝吳占勝分途接戰賊敗伏河邊以叉子鎗連環施放有賊目執旗嗾黨麇鬪降回認爲馬尅元帥吳占勝率壯士挺矛大呼

陷陣伏賊爭起攢刺吳占勝手刃馬尃元帥而奪其旗賊駭
奔徐占彪合隊掩殺賊敗入卡蕭蘭玉躡追直薄賊卡賊復
卻退徐春先順渠鈔之計斃賊共二百餘生擒七名二十九
日馬步賊千餘順草湖而下徐占彪列陣以待比賊逼近飭
桂錫楨鈔其後秦玉盛攻其前賊依廢堡分股穩抗徐占彪
俟其稍懈親率精銳橫攻之馬賊先逸步賊四潰追殺百餘
名生擒四十七名此九月以前戰狀官軍固未嘗少挫也奈
肅城地面寥廓兵力不足以合圍而西甯尙未葺事營伍亦
不能移動據稟報土客回目互相猜貳不得已而乞撫劉錦

崇遵守定章令先將馬械悉數呈繳然後定議該逆回心難
遽一輾轉因循遂延時日計西甯縣屬已繳馬一千六百餘
匹鎗矛四千餘支大通縣屬已繳馬五百餘匹鎗矛一千餘
件觀音堂溝土回亦繳馬數百匹鎗械千餘件陝回崔三土
回治興馬福壽等皆款營獻良馬自限按日追繳馬械其
西甯城關各回民隨馬本源馬桂源遁巴燕戎格者劉錦棠
飭馬永福往招之計陸續逃歸復業者三千數百名後至者
尙絡繹於道馬桂源見黨夥已離赴劉明燈營前遞呈悔罪
馬永福在西甯回中最稱樸愿本係馬桂源之堂叔馬本源

等糾陝回叛亂馬永福在城中助官民守禦甚力其子馬德源卽馬三娃爲彼教之海裏飛素兇狡馬永福不能制至是因促馬桂源等速歸就撫爲馬本源等所殺而馬本源兄弟亦遂爲其族眾所不容陳湜因預約八工撒拉回眾截其八撒拉之路自是西甯回逆可無反覆之虞但未能刻期就緒耳比因肅州攻勦僅徐占彪十二營成祿本非可靠之軍近亦將拔隊出關金順雖奉

旨援肅報明九月十五日由甯夏起程亦未知何時抵肅且非徐占彪所能節制因於西甯各營內抽撥陶生林所部赴

肅助勦以防該逆外竄而合圍聚殲則必俟西甯事竣轉旆而前耳至後路雖已肅清忽又有羅三朝馬正榮二犯向時本非著名回逆自諸賊殄滅後該犯潛伏各處湊合數十騎往來環慶花定閒乘閒劫掠忽隱忽見及見河州就撫西甯解圍自知罪難倖免央撫回馬義才至平涼求撫武威營營官總兵魏紀盩卽率弁勇數名帶同馬義才及撫回陝得榮前往行經定邊四合原地方適遇羅三朝馬正榮竄至魏紀盩推誠開導羅三朝見無隊伍隨護頓起殺機魏紀盩暨帶往弁丁同時遇害陝得榮正言責之亦爲其所戕嗣經雷正

縮派隊搜捕生擒羅三朝及其死黨馬海受馬海明三犯交
平慶涇道魏光燾訊明並馬義才一同正法至是後路之零
匪淨盡而踞城抗拒之逆亦僅肅州一隅矣

平定關隴紀略卷十一終

平定關隴紀略卷十二

同治十二年春正月左

駐劄蘭垣節署接據各路稟報

西甯撫務將次就緒惟馬本源兄弟竄赴巴燕戎格尙未就擒大通縣城及向陽堡逆回皆馬桂源心腹抗不呈繳馬械然有陳湜劉錦棠及諸軍在彼自能辦理裕如惟肅州續調之軍未至攻剿僅十二營實深焦灼該逆回自上年十月屢敗後伏匿不出惟分股於城西禮拜寺附近添築堅壘爲犄角徐占彪分派各營輪班攻撲十二月十九日城賊出馬步三千餘分撲王子龍黃祖福營勢甚兇悍徐占彪飛調陳春

萬藍明泰循長濠擊其前自率宋賢聲齊懷松徐春先秦玉盛等從黃草壩鈔其後復飭李洪超陳登雲越長濠擣其中堅三路並進王子龍等見援兵已集亦開壁出迎賊腹背受敵退踞城西北隅官軍三面環攻如牆而進賊結隊拚拒抵死不退官軍鼓勇而前縱橫盪抉自卯至申鏖戰歷六時之久殲賊已多復以劈山礮向團結處轟之賊更不支向北奪路而遁徐占彪麾軍追殺適桂錫植武朝聘各馬隊由北崖頭馳至兩路夾擊賊屍枕藉餘賊竄入北稍門時已二鼓矣陣斬之外生擒二十八名據擒賊供稱馬四以援絕勢感挑

悍黨千餘啖以重資爲此背城之役訊畢斬之徐占彪以城西賊堡守備甚嚴逼攻徒傷精銳計惟用地雷轟之飭各營弁勇輪挖地道二十三日工竣爰置藥匣引線二十四日初更飭黃虎臣徐春先陳春萬率隊順黃草壩繞至堡前阻其出路兼截南稍門出援之賊飭李洪超陳登雲黃祖福率隊潛伏堡北遏賊北竄兼截北稍門及禮拜寺援賊親率馬步環伏堡之左右四更時地雷轟發立塌堡牆一丈有餘守牆之賊多飛墮牆外餘賊開堡四竄伏軍四起呼聲動地賊眾自相踐踏官軍趁勢躍入賊壘陣斬僞千長馬文擒六十三

名內有催兵百長馬四把子堡內賊無一脫者城內出援之賊亦被李洪超等擊敗馬四把子求人城諭撫徐占彪知其詐未許時陶生林戴宏勝等馬步五營奉檄赴肅已報行抵甘州矣而西甯馬桂源等逆以爲官軍必盡赴肅潛約其死黨復叛緣自劉錦棠推誠撫諭後陝回如崔偉畢大才禹中海等土回如冶福興馬福壽卽江湖三楊保元等悉矢志輸誠人心漸定惟大通縣地居邊徼未覩軍威向陽堡逆目馬進祿下亂泉逆目韓起壽卽半角頭本馬本源馬桂源之腹心大通營都司馬壽尤爲狡黠劉錦棠飭總兵胡萬亨赴大

通督收回眾所繳賑糧本形踴躍馬桂源由巴燕戎格遣人
暗勾馬壽等糾黨戕害領賑難民數十人撫回崔偉畢大才
禹中海等願勦賊自効劉錦棠派譚慎典率數十騎督同前
進上年十二月二十六日遇賊於姑姑家莊敗之撫回與賊
各有傷亡劉錦棠布置郡防率隊繼進正月初一日悍賊數
千撲崔偉等營盤崔偉等率馬隊擊走之追殺十餘里斃賊
八九十名生擒四十餘名訊出叛弁馬壽之姪馬良才斬之
初四日劉錦棠進兵攻向陽堡提督吳隆海蔣月華陳汝俊
等由左路熊隆名陳啟明繼之余虎恩董福祥由右路親率

席大成進中路前西甯鎮總兵黃武賢亦飭遊擊黃金福率師來會分道猛進出擊之賊約二千餘分東西南三面正修砌礮臺見官軍至拚死抗拒官軍鎗礮齊轟繼以刀矛賊敗縮堡中憑壘放鎗擲石官軍冒險肉薄而登傷亡不少吳隆海陳汝俊蔣月華憤甚麾軍燬其堡門奮躍而入各軍亦攀堞齊登立將巷戰之賊千餘悉駢斬之賊之奪東牆走者尙三四百人熊隆名陳啟明率馬隊及郭蟒寺練總陳海馬隊追殺淨盡堡中之賊遁入二小堡登樓上屋擲石放鎗仍圖抗拒吳隆海董福祥立破其一尙餘一堡正派隊圍攻聞礮

樓屋頂之賊呼號乞命自稱爲賊目所脅請官兵緩攻願盡
縛賊目以獻問其姓名始知馬壽馬進祿韓起壽及河西著
名匪徒悉在其中當令縛獻首從四十餘人提馬進祿韓起
壽二犯陣前磔死餘逆概予駢誅惟留叛弁馬壽飭令飛告
縣城各回勒限出城並緝獻爲逆者始免勦洗撫回馬福壽
又於賊眾中辨認與馬本源兄弟暗相勾結之逆回三十餘
人訊明斬決餘眾千餘概行釋免各處回眾聞風畏懼搶餽
哀鳴願繳馬械獻匪人求免勦洗劉錦棠遂加撫諭惟大通
營及永安一帶回巢距大通縣城百餘里尙須移軍勦辦遂

於初六初七兩日進規大通察看一路堡寨林立乃留六營
擇要駐紮一面整隊速進初八日撫回治福興馬福壽由縣
城馳至稟知城關回眾約三千餘惟叛弁馬壽之黨千長馬
長忠韓喜文王成宗僞軍師袁拉滿等及其死黨仍誓死抗
拒餘皆畏懼兵威並無固志劉錦棠飭董福祥留守向陽堡
親率各營縛馬壽以行甫抵城邊踞城之賊礮石紛下劉錦
棠麾軍環攻令治福興馬福壽繞城而呼獻城迎降者免死
擒賊者重賞忽見回眾數百開西門奔出羅拜馬前劉錦棠
整隊入城逆賊嗾眾下城巷戰各營乘勢猱騰而上立克縣

城劉錦棠撫諭降眾飭令導引官軍覓擒賊目當獲二百餘名斬之飭各營分屯城關查點城內漢民據供向有三千餘人逆回馬壽自小峽敗歸戕其丁壯現僅留老弱婦女六百餘口號哭之聲慘不忍聞劉錦棠遂提叛弁馬壽磔於市漢民爭摘其心肝啖之立盡並擒其死黨馬長忠等一百八十餘名盡戮之河東西及近城莊堡各頭目踵營納款均請盡繳馬械細獻匪黨求免進剿西甯道郭襄之委留陝補用知縣黃仁治署大通縣篆劉錦棠飭辦善後遷城關回民於河東西另招城西北遜布馬廠利順張家寺各漢堡難民實之

路旁回堡亦量與漢民更易十一十二等日降回紛至大通營及永安一帶回目望風款附共繳馬六百餘匹又子鎗二百餘枝十四十五等日各莊緬獻匪黨一百五十餘名悉斬以徇人心大定十九日劉錦棠率隊仍旋西甯陝回之在西甯者丁壯老弱婦女統計尙二萬有奇崔偉禹得彥畢大才等傾心向化劉錦棠挑其精壯立爲旌善馬隊向陽堡之役助勦尤異常出力惟白彥虎一起狡黠異常自知罪孽重大慮不爲官軍所容雖亦僞詞乞撫而責其呈繳馬械則遷延支展觀望不前崔偉等亦陰告劉錦棠預爲之備劉錦棠時

在大通飛飭冶福興率隊駐小峽一帶扼之十四十五等日
兩戰皆捷十六日深追遇伏所部傷亡甚多冶福興被賊生
擒不屈死之白彥虎旋率眷屬黨羽約二千餘潰出由永安
南山草灘一帶狂竄劉錦棠以方遷徙陝回各巨股不遑追
截各陝回均俯伏哀鳴聽候安插當分爲三起約二萬人派
隊押赴平涼秦安清水等縣擇地安插西甯境內自此無客
回羸雜之患皆劉錦棠一軍之力也馬本源兄弟竄踞巴燕
戎格城自知罪在不赦意圖負嵎聞劉錦棠進勦大通復糾
股竄札巴什城冀襲後路時劉明燈敖天印奉檄扼中隘口

該逆懼不敢前而陳湜沈玉遂亦奉檄率河州各軍於正月二十六日抵大何家偵知該逆眷屬均在巴城因商派張仲春陳廣發楊芳桂戴定邦率撫回馬占鼇馬仲友馬良義等分起夤夜疾趨查大何家赴巴城之路一由循化一由米拉三溝兩路稍平而較遠乃議取道番地翻山直擣巴燕戎格廳城攻其不備連日大雪迷漫各軍衝寒度險二十九日抵端莊距巴城二十里回目馬永福等率眾迎降詢知馬本源兄弟帶其死黨數百騎甫赴札巴什城正圖擊眷他竄陳湜等立飭馬占鼇率馬如蛟馬德等急進沈玉遂等督輕騎繼

之馳至巴城叛逆業經西竄餘黨正絡繹奔赴官軍急分隊入城一面躡追十餘里及賊後隊賊仍返旗抗拒官軍奮威衝殺截獲逆眷六口及其姻黨十餘名二月初一日劉明燈敖天印率所部由米拉溝來會分駐城關賓所獲逆眷於獄時大雪不止知該逆未遠遠颺也劉明燈沈玉遂飭弁帶回勇楊生魁周世祥蔣來成馬仲魁馬永昌馬伏清等深入賊中諭以脅從罔治之意回眾爭繳馬械乞撫叛逆馬本源兄弟見人心已離惶懼益甚陰遣死黨求救於軍功馬占鼇馬占鼇飭其盡繳馬械初四日齊赴城外東山乞撫一面稟知

沈玉遂沈玉遂密派馬步隊環伏東山要隘比該逆至遂俯首就縛陳湜赴巴燕戎格先提其死黨馬主麻海乙什馬肖箇麻箇子等三十餘犯斬之下馬本源馬桂源馬楨源於獄派隊搜拏餘匪勒限五工撒拉各頭目悉繳馬械撥各營扼要駐紮稟報之後奏請

獎卹有差而西甯之役已竣其逸出之白彥虎一股經過鐵賣溝等處楊世俊奉檄率所部馳往截擊頗有擒斬因沿途迫脅其黨日多眾寡不敵未能聚殲該逆無處逃匿一意赴肅合股勦辦悉歸肅州矣其時金順一軍已抵肅州進紮城

外北崖頭而陶生林金慶元戴宏勝等馬步五營亦於正月
初二日抵肅徐占彪連日於城西北添築六壘扼賊出入要
路初八日黎明北稍門出步賊二三千馬賊五六百騎撲官
軍新築各壘徐占彪以此路爲賊所必爭飛飭各營三路並
進各壘亦開壁出擊賊退踞城根抵拒並多匿溝中遮蔽鎗
礮幫帶歸化營從九徐鹿鳴裏創督戰竟日之久賊見官軍
愈逼愈緊初更後溝內匿賊潛遁入城官軍追殺至北稍門
乃收隊還初九日東稍門出馬賊四五百騎北稍門出步賊
千餘仍撲新築各壘徐占彪率各營分路擊之賊尙未退忽

南稍門出步賊七八百衝至官軍濠邊徐占彪飛調陶生林齊懷松方友升等縱橫擊之兩路賊均敗入城訊據擒賊供稱初八日之戰高臺老二僞元帥戈什頭目王連萬長千長頭目十餘名均被陣斬初十日夜三更後探報新到關外援賊四千餘帶叉子鎗多桿並運糧駱駝千餘隻由北稍門偷入徐占彪飛調武朝聘方友升等馳往堵剿正值該逆絡繹入城之際官軍鼓銳截殺斬獲甚多訊據擒賊供稱馬四上年派口外阿渾李德隆赴紅廟子求援此股援賊係紅廟子逆首妥鄉約後隊阿渾裸萬材帶來徐占彪以前在城西北

添築之壘距北稍門之路尙遠且過於單薄十三日察看北門河灘忽見馬四於單家屯莊就廢堡連夜築成大方堡一座牆垣堅厚濠溝二道外加木城二道徐占彪以此堡不破則北稍門之圍猶有罅漏因於是夜派金慶元戴宏勝等環賊堡逼築四壘十四日黎明北稍門出馬步賊三四千分爲兩股一伏近堡廢牆內一撲戴宏勝營壘徐占彪親率鄭光平陳春萬宋賢聲等迎頭猛擊令陶生林桂錫楨秦玉盛馮桂增等分左右後三路鈔之金順亦派隊會勦戴宏勝乘勢出戰將兩股賊隊圍困一處賊拚死衝出敗退城下徐占彪

以鎗礮轟擊忽礮聲不震正詫異聞瞥見賊殺二婦人倒豎陣前似以妖術厭勝者官軍搶進掘而棄之連放二十餘礮轟坍堡垣丈餘堡賊竄出二三百被官軍圍殺略盡餘賊仍踞堡死守城上鎗礮雨集官軍攻至黃昏收隊徐占彪知堡賊必已膽落是夜潛派各營環伏堡外旋令施放開花後膛礮聞堡內人聲鼎沸知斃賊已多忽堡內竄出賊三四百匿堡後濠溝被伏堡後官軍截斬百餘徐占彪乘勝衝殺入堡堡內殘賊鮮得脫者天初明城中鳴鐘發鼓北稍門出馬步賊六七百名與敗竄餘賊合股循濠而來適遇伏堡西官軍

突起截之伏堡右官軍躍出來攻其追殺堡後竄賊之官軍復從中路橫衝賊隊斃賊多名賊大潰城中鐘鼓愈急徐占彪知賊必出大隊拚命鏖戰飛調各軍分五路進勦部署甫定北稍門果出馬步賊數千圖奪附城新堡並分股撲堡外官軍城上以鎗礮助之徐占彪令對賊麇聚之處連開大礮又向城頭轟擊賊紛紛倒仆時陶生林桂錫楨分東西馳至徐占彪率隊從中路衝殺金慶元等由東湖灘橫截而出金軍馬步亦至賊應接不暇秦玉盛等又由北稍門截賊歸路賊殊死鬪官軍四面盪抉賊遂敗潰二十一日賊復由北稍

門出馬步二千餘循北河灘疾趨直撲戴宏勝營壘徐占彪飛飭各營張兩翼擊之親自率隊衝鋒而前至地勢平坦處賊復走匿廢堡牆內徐占彪以前途無險可憑察看賊情有異勒兵勿進潛派各營於東南一帶分起設伏少頃東稍門忽出馬步賊二千餘衝撲藍明泰等營壘頃刻間逼近長濠各伏兵覘賊已深入一齊突出金軍亦派隊會擊賊敗竄回城北稍門匿賊亦退是夜三更徐占彪令出賊不意襲攻禮拜寺每營挑壯士數十令方友升馬隊亦改步隊與黃祖福等伏寺之北陳春萬等伏寺之南徐占彪率隊伏寺之西東

面距城僅數百步五更後調後膛礮對寺轟放子落開花寺賊惶懼急起出寺拚鬪東北兩面伏兵齊起賊不知所措躍入城濠竄匿寺內餘賊欲逃無路天將明金軍馬步亦至徐占彪於寺西架立雲梯督隊直上又飭壯士趨寺東面斬關搶入寺內立克禮拜寺中賊無漏網者派黃虎臣以副營三哨駐之黃昏時賊復自北稍門出死黨千餘循濠而來多攜門板敗車城上又縫下皮襖數十束似爲深夜奪寺計徐占彪精選壯士百名令各持擋牌以避城上鎗子當先衝擊賊將門板敗車堆繞寺外牆門官軍分兩路鈔截一面將火

撲滅副營亦由寺後殺出賊仍敗回此金軍抵蕭後戰狀經
左 具奏並懇

恩卹陣亡員弁金順亦另疏陳奏請

飭張曜前赴甘涼助剿而成祿復以軍裝糧餉未備不能赴
哈等情具奏奉

上諭成祿奏後路官軍截剿竄匪並糧餉軍裝久滯情形一
摺據稱該提督所留關內馬步各營分紮蕭州金塔高臺等
處因軍糧車馬地方官推延不辦未能進發餉銀軍火等項
存儲高臺亦未設法運解等語前已密諭金順馳赴關外接

統成祿所部傳旨將該提督革職拏問金順接奉前旨計已
剋期前進凜遵辦理成祿所部各營自應妥籌整頓所有關
內外分紮各營應如何調度布置之處著金順酌度情形妥
爲籌畫欽此

朝廷之於成祿已無可再寬矣嗣是金順一軍又將拔隊肅
州兵力仍單長圍不能遽合而白彥虎一股沿途裹脅日夜
西奔二月初七日楊世俊偵知該逆零騎擾及扁都口關門
等處初八日早派馬步隊於口外扼截賊果蜂擁而來楊世
俊直前迎戰賊恃眾而囂爭先馳突鏖戰四時之久斃執旗

賊數名賊敗走官軍由南山追至費家寨賊復返樸官軍鼓
銳奮擊陣斬二百餘名生擒賊目藍添紅一名悍賊四名賊
由山谷紛紛亂竄是夜擾及紅水西北訊據擒賊供稱此股
係白彥虎馬長順余老虎並西甯蘇家堡二司付等因畏罪
不敢就撫暗糾西甯西北兩川及大通永安敗匪合股北竄
初四日探報賊竄山丹屬之下四旗楊世俊卽率馬步四營
並紅水紳士軍功王應庚等率練勇百名分爲三路迅往掩
襲黎明行抵該處賊瞥見卽遁楊世俊等及其尾隊頗有擒
斬而賊竄甚速無心戀戰日暮已竄至東樂地方楊世俊料

其必由甘州北竄初十日黎明取道石岡墩一帶直至甘州以圖攔擊訶賊已於是日竄甘州十餘里之梁家堡署甘州提督楊占鼇及張慶雲王節文各率隊馳往正值該逆分股渡河隊伍散亂張慶雲率馬隊迎頭奮擊楊占鼇率步隊隨後策應賊倉猝不知所措驚惶四散官軍乘勢掩殺賊仍敗過河北而去初更時楊世俊馳至探報賊踞距甘三十里之紅沙窩一帶十一日五鼓官軍分三路前進張慶雲爲右路楊世俊爲左路楊占鼇及署甘涼道蕭宗幹爲策應行十餘里馬步賊五六百奔突而至官軍鎗礮環施賊遂敗走楊世

俊以前面必有巨股接應非進與決戰不能痛挫其鋒因與各軍整隊逐之白逆果憤前賊之敗親率死黨前來拚鬪勢甚兇猛官軍聯爲方陣四面接戰賊乘銳衝突自辰至申官軍屹立不動俟賊勢稍懈乃四面包鈔而前鎗轟矛刺賊大敗而退十二日賊數十騎馳突城外去而復返楊世俊等知其有詐派隊搜其伏逆旋即敗去十三夜賊盡西竄楊世俊張慶雲及叅將陶世貴疾追之及之於撫彝廳屬之鴨子渠板橋賊正圍攻民堡官軍乘其不備急擊之賊敗官軍追之賊回頭死拒官軍張兩翼鈔之仍不少退楊世俊揮軍陷陣

賊始潰官軍追殺數里始還十五日賊由撫彝竄往高臺焚燒搶掠逼近城垣經城上鎗礮轟擊敗去是夜踞距城二里許之下河沿又河南竄來一股與之會合踞鎮夷西山寺維時徐占彪慮後路運道梗塞亦派陶生林桂錫楨馮桂增等馳至賊知前途有備折而西趨楊世俊詢賊中逃出難民知河南一股係肅城遣迎白逆入城者肅城之賊知徐軍分隊遠出營壘必虛是夜賊出隊四五百圍攻官軍營壘徐占彪先已分路設伏賊至伏兵齊起被圍之壘亦開壁迎敵前後夾攻斃賊十餘名賊退入墩下廢牆內墩上火彈齊拋燒斃

不少復敗入城十八日白逆竄擾毛目雙樹屯一帶民莊連陷十餘堡是日肅城南稍門亦出步賊千餘伏城濠內徐占彪督隊迎擊鎗礮火彈並發斃賊目二名悍賊更多賊卽敗退官軍復三面鈔之賊亦分股死鬪逾三時之久官軍衝入賊陣賊大亂敗入濠溝官軍乘勝衝殺賊不能禦南稍門復出步賊來援徐占彪飭守備陳文英以後膛礮向賊叢轟放賊益不支金順亦親率隊會勦兩股餘賊皆退縮入城據擒賊供稱上年僞元帥馬得鎮赴西甯求援前夜始回偷越入城與馬四商議自逆等擬先將眷屬安置毛目北山內親率

大隊赴肅應城逆之援毛目爲高臺縣丞分駐之所逆意圖陷此城以便安置逆眷十九二十等日白逆攻毛目城甚急架梯掘牆蜂擁上撲經縣丞李彭把總楊春督率紳民固守滾石鎗礮下擊雖斃賊目而仍未退二十三日陶生林等與金順所派馬隊及成祿留防高臺馬隊自肅馳至出賊不意殺戮頗多城圍立解追至二十里外馬賊又多爲所戮生擒逆目二名小頭目二十餘名二十四二十五兩日復敗賊於白柳灣萬年渠乘其渡河復追而創之二十六日賊竄金塔所屬之牛頭灣楊世俊先已取道斜出該處爲攔頭截擊之

計是日伏隊於三塘壩各要隘二十七日辰刻賊騎千餘攻莊擄掠官軍伏起猛擊賊遽狂奔官軍追擊十餘里二十八日賊大股麇至楊世俊飭高登玉高月桂馬有才鄒金本等三路分勦鎗礮轟斃已多賊復直前奮擊短兵相接擒斬相當陶生林金順各軍先後會合三面攻勦擒斬更多據擒賊供稱白逆右膀已被礮子中傷矣賊連日竄距肅城四十里之野麻灣徐占彪方慮兵力難於分布適陶生林楊世俊等均已繞出賊前迎敵三月初六日白逆全股攜帶眷屬竄距肅城三十里之塔爾灣廢堡卽肅逆馬四舊巢前經徐占彪

攻破者也初七日辰刻城賊開前經堵塞之大南門出賊二千餘直撲官軍長濠徐占彪率隊衝擊商調各軍及肅州鎮章洪勝安肅道史念祖派來護勇憑濠抵禦施放洋鎗並放後膛礮四十餘響賊惶亂不能成列正攻擊間白逆馬步三四千分五股由塔爾灣鈔來一撲方友升營壘一撲武朝聘營壘餘三股分撲各營長濠徐占彪調陶生林齊懷松秦玉盛徐鹿鳴等由西鈔擊楊世俊金慶元戴宏勝黃祖福等由東北鈔擊徐占彪親自督隊由中路衝擊賊殊死戰金順亦督隊前來會勦鏖戰三時賊全股敗潰徐占彪麾軍趕殺十

餘里奪獲白逆紅旗二桿前鋒花旗五桿小旗十九桿生擒二十八名割取首級一百二十五顆耳級一百三十七副奪賊馬一百二十一匹共殲斃賊四百餘名肅城之賊見白逆大敗始竄入城初八日賊千餘由南門出撲長濠官軍憑濠施放鎗礮徐占彪率隊從水卡衝出金順督所部馳赴南門策應又調後膛礮連放二十餘礮賊紛紛倒仆仍敗潰入城賊前隊各帶草束後隊各帶鋤鍬意在填濠以迎接賊不虞壘次被創志不得逞也訊據擒賊供稱白逆將於初九日五更來撲長濠徐占彪與諸軍商議俟援賊來而戰莫如先擊

其虛是夜三更分派各營嚴守長濠防城賊出竄一面率馬步分三路別由小路銜枚疾進直擣援賊巢穴行至距塔爾灣三四里探報該逆二三千已由大路赴援肅城矣徐占彪飭各路取齊速進天明抵塔爾灣賊始驚覺狂呼亂竄老幼婦女伏地號哭人聲鼎沸徐占彪令毋殺賊眷見強壯者則斫之立破其堡賊向南山狂竄官軍躡追十餘里共斃四五百名生擒二百餘名訊據生擒賊供已絕糧三日擇牲畜疲頓者宰以充飢故行不能速是時援賊已抵城南南門內亦出賊千餘夾攻長濠各營分頭迎擊連環施放鎗礮援賊屢

卻屢前正相持閒忽賊中隊伍自亂悉撥馬返奔蓋聞官軍已破塔爾灣回顧巢穴故也城賊見援賊掣轉亦縮退城濠適徐占彪等追賊收隊行過塔爾灣十餘里見援賊奔回前署肅州鎮王子龍提督李登第都司劉芳海千總李道修等遽策馬衝入賊陣手刃數賊中鎗殞命徐占彪飭各營整隊繼進斬賊二百餘名適金順飭所部馬步馳同會勦賊紛紛潰竄官軍回營見城賊未退復乘勝越濠勦賊始敗退初十日白逆分股由南山竄文殊山官軍追之生擒二十餘名收回眾婦女百餘名十一日徐占彪楊世俊商定金軍於十

二日仍勦援賊黎明三路鈔去距賊二里許賊出步隊五六百列堡外拒戰官軍先搜其伏伏賊先敗官軍勇氣百倍所向披靡飢疲之眾有竄南山者有竄關外大罩灘黑山峽等處者官軍追勦出關之賊至二十餘里陣斬之外生擒十餘名收隊回營留桂錫楨馮桂增兩營馬隊駐關防堵是夜三更援賊二司付馬步六七百復來衝撲長濠官軍扼濠堵之賊下馬越濠官軍前後夾擊奪賊馬三百餘匹擒斬甚多餘賊由金湖灘橫逸衝至金順所部各營濠邊復經金順殲斃百餘此股漏網無幾十六日三更城賊千餘頭裹白巾撲東

湖官軍長濠並攻營卡徐占彪由北而南楊世俊由南而北截之時賊已有數百名突過長濠遇官軍包鈔夾擊斬白巾悍賊數十名生擒數十名餘賊仍滾溝縮入城中據擒賊供稱城賊自援逆屢敗後益洵懼不知所爲前由關外來援之賊已傷亡過半彼此怨悔急思棄城逃竄又限於重圍不能潰出僅恃城寬且堅得以苟延旦夕耳是時陳湜等將馬本源兄弟眷屬解赴省城訊辦後卽進軍循化劉錦棠亦率所部前往八工撒拉回中之兇悍難馴如青科莊之馬乙麻馬米力治主麻等眾卡勒工之十莊均已勦辦就緒惟肅城未

下又添白逆外援金順亦慮官軍單薄因奏請留肅助勦暫緩拔隊出關未蒙

俞允左 因將新穀未升駝隻亦未收厰甘涼車騾缺乏糧運俱艱急難出關情形據實縷陳

朝廷廛念關外緊急仍以金順出關接統成祿所部爲要但無切責之詞耳於時張曜所部已赴鎮番宋慶亦派蔣東才率所部赴東山以期迅蕺肅事而圍肅如徐占彪各營攻戰更無虛日自三月十八日黃虎臣擒獲城中逃賊供稱城賊以禮拜寺係由塔爾灣出嘉峪關大路旣爲官軍奪據竄路

愈窮遂挑悍黨多名冀奪回禮拜寺以便狂奔出關十九日南門果出悍賊八九百頭裹白巾裝束詭異循城濠呼躍而來南稍門復出賊二千餘繼之圍攻禮拜寺勢甚兇猛徐占彪率隊憑濠迎擊鎗礮環施黃虎臣據寺牆以洋礮劈山礮轟擊賊小挫退伏濠內連放叉子鎗城上鎗礮如雨相持兩晝夜二十二日二更後徐占彪商派各營潛師夜起令陳春萬楊世俊徐春先等由西南鈔擊金慶元戴宏勝方友升等由城濠下擊徐占彪親自率隊由寺側轟擊金順亦督軍會勦均袒左臂分路齊進將近賊前賊始驚覺昏黑間不辨官

軍多少先放鎗礮蜂擁來撲官軍從鎗礮中衝殺斃賊頗多
賊縮退城濠四鼓復來衝撲官軍步步緊進鏖戰良久賊死
傷狼藉天明安肅道標勇丁肅州鎮標勇丁馳來策應賊退
踞城根廢牆內外掘深濠又於濠內築牆憑牆施放鎗礮並
於濠邊長牆內潛開地道徐占彪飭於禮拜寺四面開浚深
濠截之並於寺西長濠內添築礮臺移後膛礮向賊壘轟擊
賊驚懼無措連日晝伏夜動以避礮子復相持四晝夜官軍
更番戰守賊猶苦抗二十六日擒賊供稱賊開地道四處已
被官軍掘濠截斷二十二夜之戰黑痣萬長及千長二名均

被轟斃賊死傷以數百計並稱賊中最畏後膛螺絲礮將誓
死來奪是日賊於西南添築礮臺施放又千鎗斷禮拜寺出
入之路徐占彪飭開後膛礮轟擊礮臺立即掀倒臺上之賊
盡斃徐占彪防賊乘夜來犯預爲部署三更後賊果猛衝官
軍長濠官軍併力抵禦洋鎗所斃甚多賊仍不退天明徐占
彪又移後膛礮向賊叢連放四十餘礮賊紛紛倒地金順亦
派隊馳來賊敗入濠溝復相持兩晝夜徐占彪料賊必夜出
令陳春萬黃祖福陳登雲宋賢聲藍明泰等挑壯士八百名
並楊世俊兩營金慶元戴宏勝方友升等三營於二十八夜

三更後分三路襲擊直抵西南角城根官軍更番進攻勇氣百倍賊拚鬪日久困憊已甚無復鬪志紛向北城逃竄官軍趁勢趕殺金軍亦由東北迎勦前後夾擊賊敗仍入濠溝始由濠縮退入城自此以後連日閉城不出各軍加濬長濠一以防賊乘機偷越一以防賊暗挖地道四月十六日城中逃出漢民供稱賊見官軍鎖圍既合知無生路擬突圍狂遁又爲眷口所累將殺眷而逃徐占彪以回性殘忍事或有之飭各營晝夜防守加修濠牆並於金慶元戴宏勝營外重開長濠緊逼河灘誘其出戰十八日辰刻北稍門出賊二三千直

撲金慶元戴宏勝營壘阻官軍工作徐占彪會同金軍及楊世俊馬步分三路由西北越長濠繞出賊後疾馳鈔擊賊又于鎗裝放較緩不及官軍洋礮便捷往來盪抉數十次賊之亡失已多午後始敗退背城施放鎗礮城上礮聲連震官軍直前突之相持至夜賊始入城是夜官軍並未收隊十九日黎明賊復出四五百名來犯官軍一面工作一面拒戰適金順亦派隊會勦賊敗退而官軍濠牆已成二十日賊放出漢民老幼婦女四百餘口皆飢餓垂斃據稱城中糧乏以老弱婦女徒坐耗食驅之令出並稱十八十九兩日之戰死者不

計其數現紛議殺眷出竄與逃出漢民所供略同二十四日金順移營近紫湖潭賊瞭見卽出賊二三千來爭該處地方坑坎高低不平賊伏低處放叉子鎗金軍衝突數次賊殊死戰時徐占彪派金慶元戴宏勝陳祖福宋賢聲等由西北橫截而來並移後膛礮轟之子落開花當者立斃賊隊大亂徐占彪又飛調楊世俊及方友升陳春萬徐春先李洪超等前來金順又添派隊伍分四路環攻鏖戰四時之久賊敗向北稍門狂竄因歸路已斷倉猝由南稍門入城據擒賊馬百衣保供二十四日之戰萬長馬得幅中礮陣斃計自三月十八

至四月二十八日共斃賊千餘名時宋慶所派提督蔣東才亦率前隊馬步六營於五月初十日抵肅逼東城而壘十六日接仗獲勝宋慶續派總兵李寶林率兩營提督馬玉崑率三營繼進二十八日親赴肅州與金順徐占彪會勦蓋肅城本邊關重鎮城高三丈六尺厚三丈有奇外環深濠深二丈有奇闊可十丈逆賊馬四竊踞其中與關外援賊卽馬振國拚死拒守雖孤城僅存而攻堅究無善策官軍所挖地道屢被城賊驚覺由城內掘濠截斷官軍不能入城幸鎖圍旣合賊無可竄之路而關內踞逆僅此一股卽循化所屬回番均

已讐於兵威俯首帖伏緣自三月間勦撫卡勒竣事後陳湜
移軍甘都工查訪該工撒拉回民甘心從亂者不過數人皆
聞風逃竄當飭拏獲卮善拜排壹五八迭巴子等八犯戮之
甘都地與循化僅一河之隔循化八工撒拉大小頭目先後
款營請命其下四工爲孟打工章哈工奈曼工清水工上四
工爲街子工又家工大寺工蘇治工均依令先後呈繳馬械
備辦船筏接渡官軍四月初四至初六等日官軍耀隊河干
成列以濟以馬占鰲馬永瑞兩旗登岸而壘各軍分紮循化
城內外城中民房無幾官廨荒廢殆盡而城堞坍塌尤多當

派令各營先修城垣兩日畢事傳令回目縛獻逆首兩旬之
中上四工縛送最稱梟悍之馬八十馬玉連沈五十七韓麻
亥買綻八十九馬亥必保查山白住麻等二十餘名下四工
亦解到數賊並戮以徇連日運送糧料軍有餘食衙署廟宇
各回聯名具呈懇准繳賠修銀一萬二千九百兩由代理循
化廳汪聲元經收辦理諸事既定規畫巴燕戎格循化地勢
全局分營擇要扼紮西甯鎮總兵何作霖率老湘軍五營及
回目崔偉馬隊仍回西甯陳湜率親兵回蘭州於是著名逆
回僅白彥虎一股已竄關外馬四一股竊踞肅城矣金順亦

念肅州城圍喫緊因派員將成祿催赴肅州傳

旨拏問押解起程而派副都統明春前赴玉門一帶接辦該
軍事務具奏陳明奉

上諭成祿所部必須金順迅往接統大加整頓方能得力且
賊匪近又紛竄出關尤當隨時督隊截剿免致蔓延等因蓋
文麟適以白逆股匪竄擾安敦玉一帶具奏故也而肅州圍
攻各軍既於城西禮拜寺修築礮臺安放後膛礮位六月初
一日連開一百五十礮轟塌城上女牆七處城身外面磚石
坍塌三丈有奇而城身仍未迸裂初二日復轟一百二十礮

傾圮之處亦多當令每營各挑壯士百名預備乘勢登城賊
於西城南北兩角伏匿死黨二三十名並於城上加砌橫牆
以備堵禦夤夜將城上轟坍之處補砌完好徐占彪以城身
堅厚轟攻驟難得手察看附城東關房屋櫛比舊爲市廛埠
頭城堞雖與內城一律而附城之土稍薄利於轟擊初六日
會商宋慶於關外叢冢中逼築營壘修築礮臺初八日三更
南稍門出賊七八百來攻城上城下又鎗如雨官軍一面以
洋礮劈山礮迎擊一面興工初九日各營卡成遂於營卡中
急築礮臺三軍聲息相接初十日未刻南稍門復出賊兩股

一撲宋軍長濠一撲徐軍水卡徐軍以洋礮劈山礮憑濠施放賊卽敗遁宋軍越濠追勦賊復拚鬪宋軍繞出賊後左右衝突勇氣百倍金順又派隊前來助勦賊向墳冢低窪處避匿鎗礮稍息仍敢直前猛撲時已晚矣徐占彪調後膛礮轟之賊始敗竄入城金軍亦於東關重濠內逼築礮臺與徐軍互爲犄角地勢均與城高俯瞰關內瞭如指掌據逃出漢民供稱城賊見官軍愈逼愈緊各懷怨忿由關外來援巨酋馬六元帥卽馬得振圖向關外竄走土回馬四欲留之共守議仍未決十五日修築工竣礮臺距東關城垣僅一矢之遠一

濠之隔十六日疊轟百二十礮毀城堞十餘處城身坍六七尺寬三丈有奇賊復於夜閒囊土堆砌以氈包草篋門板仍行堵閉連日轟倒城身寬六七丈高約七八尺金順亦用開花礮於東北角轟塌關城三四丈正擬騰躍而上惟緊隔一濠深約三四丈濠內注水約二三丈內有眼泉數處冬夏不涸古所謂酒泉也賊於濠頭築壩蓄水深不可踰仍廢然而返徐占彪派隊夜探濠頭係用木椿密楸外加木板土封牢固難以抉洩徐占彪飭各營夜穿暗渠避賊鎗礮伏行至濠口併力紮卡以便開掘二十一至二十三等日城賊屢出來

爭均經擊退營卡已成金宋兩軍亦在東北東南兩角添築
二壘聯絡聲勢賊見憤甚拚死奮拒鎗礮既止短兵相接官
軍大呼陷陣與賊扭襟捉髮縱橫搏擊陣斃僞千長馬孔一
名餘賊無算賊始敗縮入城閏六月初四日夜壩頭掘開濠
水漫溢徐占彪令用樹枝青草填濠爲賊擲火具所焚不果
初五日飭各營多運土石初六日晨餐後乘守賊稍懈徐占
彪商之宋慶各挑壯士越濠猛撲徐占彪親率李玉春方友
升武朝聘等首先登城賊由南北兩面蜂擁來撲均頭裹白
巾袒臂譁噪適金宋兩軍均蟻附而上立將東關克復賊焚

燬關內房屋糧料紛紛遁入大城閉門拒守忽北稍門南稍門大南門各出死黨分路夾擊官軍之後時宋軍總兵姜桂題擊退南稍門之賊總兵李寶林都司馬玉書合金軍擊退北稍門之賊賊已死傷塞路徐占彪一面派隊紮東關正門樓一面撥隊擊退大南門之賊宋慶榮東南角樓金軍紮東北角樓賊復出馬步撲官軍南濠守南濠遊擊秦玉盛分三路怒馬馳擊生擒沙洲五營僞元帥蘇洪有肅州大阿渾何福榮馬玉修等初九日徐占彪督隊於中街紮卡守禦城內擁出賊二三千奮力奪卡官軍巷戰卻之徐占彪左腿被賊

鎗子洞穿兩處幸尙未損筋骨初十日徐軍幫統黃虎臣率李玉春由大街直進金軍由大街之北宋軍由大街之南分三路於街中築壘距東城根約一矢之遠賊晝夜拚爭官軍雖屢勝而傷亡亦不少據城內投出回民馬咸奉供稱初九日撲卡之首逆馬得振卽僞元帥馬六又名馬正國本關外著名悍賊是日左額中鎗子重傷卽時伏誅十一至十六等日黃虎臣合金宋兩軍進逼城根修築營壘十七日復於大街壘卡中修築礮臺用大礮對門施放並開掘地道二十日徐占彪以各軍進紮關廂長濠頗覺空虛徐占彪又因調治

三
二
三
腿傷未能領隊慮賊從南突竄遂商金宋兩軍仍駐東關徐
軍移紮長濠並令黃虎臣於大南門外逼城修築礮臺適副
將賴長由省城管解後膛礮並開花礮子到營二十六日徐
占彪飭新左正右兩營連夜修築營卡二座距南城根不及
半里二十七日辰刻賊見官軍紮卡扼其吭賴長施放二礮
轟塌二垛忽大南門突出悍賊二千餘分兩股飛奔奪卡均
時卡牆甫成弁丁正搬運鍋帳守卡兵單不能抵禦兩卡均
被奪踞方友升見賊已入卡牆率所部騎兵下馬陷陣賊悉
眾出卡猛撲鎗子雨注方友升頸中飛子重傷直貫脊骨賊

乘勢直撲礮臺賴長令步隊勇丁用洋鎗測準連斃悍賊十餘並開大礮擊後隊之賊維時鄧增亦由濠內馳至助同守禦開礮轟擊左手指被鎗子斷折徐占彪正養傷營內急調各營馳援賊見援兵大至又所踞卡牆已經大礮轟塌無可藏匿仍狂竄入城官軍仍將營卡修築完固撥兵駐守此次官軍員弁勇丁傷亡頗多蓋困獸之鬪其噬必更毒也左

念肅州一隅勞師日久而又傷我統將焦勞益切遂定於七月十九日由蘭啟節前往肅州親督攻勦並籌關外糧運關內善後各事宜一面將省垣應辦各事宜及日行等件分

別委代而署烏里雅蘇台將軍科布多參贊大臣常順以陝
回大股出關北竄匪蹤擾及阿畢米特遊牧請

飭迅克肅州俾金順得以率隊出關等情具奏既而署伊犁
將軍烏里雅蘇台參贊大臣榮全烏魯木齊都統景廉各以
關外軍情緊急籌防增餉調援紛紛具奏適安敦玉等處經
副都統明春總兵胡可均等屢戰克捷金順復派副將和正
興等選帶隊伍出關接應文麟所派馬隊亦到該逆遁逸入
山經金順據實陳奏奉

上諭肅州自攻克東關後各軍添築卡壘連環攻擊不難一

鼓蕩平著左宗棠金順督飭該將領剋期攻拔以安邊圉金順一面部署出關事宜早日成行勿稍延緩欽此等因仍與疊次

諭旨無異於是肅州諸將領攻勦益急自七月初一日據逃出難民供稱賊因東關攻克長圍愈緊各逆目造長車數十架每架長二丈四尺寬一丈五尺上安擋牌瓊片以禦鎗礮下用軸轆以數十人共推一架意圖駕濠而過徐占彪傳諭各營預爲部署初六日五鼓大南門果出悍賊四五千均推擋牌長車分爲三股一撲歸化營新築營卡一撲新右營長

濠一撲左營長濠並拔濠外木椿蜂擁爬濠徐占彪令各營以洋礮劈山礮憑濠環擊轟毀擋牌無數爬濠之賊爲守濠隊伍刀砍矛刺紛紛倒仆維時撲歸化營之賊亦經該營擊退楊世俊率所部奇捷營急由西南角馳至合陶生林桂錫楨馮桂增方友升秦玉盛武朝聘等馬步各營及安肅道護勇齊隊奮威越濠追殺鄧增賴長以後膛大礮連放三十餘響擊斃尤眾各軍奪獲擋牌四十餘架賊卽敗遁時金軍於東北角用開花礮對城轟攻宋軍排列東南鎗礮環施賊仍向南門敗竄回城復由城中馳赴東北與金軍拚鬥仍敗遁

入城據擒賊供馬四欲乘徐占彪傷尙未愈突圍狂竄也十八日徐占彪以楊世俊所築城西南之苦水堡地勢較高商令修築礮臺攻西南兩面二十三日礮臺成高與城齊寬能排置大礮二尊臺側有水溝二道便於設伏溝西南土原層疊而原畔距城根僅十餘丈溝南原中又有破牆溝西原直接禮拜寺官軍營壘二十五夜徐占彪派新營副將康得勝撥隊南原就破牆築卡副營總兵宋賢聲於西原原邊築卡李玉華率先鋒親兵營列隊護之元亨正新左新中右捷申左等營幫修卡濠賊見官軍逼城添築卡壘城上鎗礮施放

益緊鄧增賴長以後膛大礮指轟始退縮城下兩卡均連夜築成二十六夜徐占彪令元亨副新中四營及楊世俊所部捷中左兩營由西原開挖深溝一道橫通禮拜寺正右新左兩營由南原挖溝橫通礮臺側之水溝口仍派李玉春率先鋒親兵營於前面列隊以護每營分挖三十餘丈深約五尺寬六七尺連夜竣工晝以步隊十營各挑壯士暗伏溝內待後膛礮轟塌城身乘機進取夜則飭派馬隊改步伏之抽步隊四營守濠是夜城賊鎗礮如雨鄧增賴長以後膛礮連轟乃息忽城西出賊三四百名蜂擁來撲官軍擊卻之二十七

夜徐占彪以水溝口礮臺距城較近令先鋒營於溝南紮卡商派楊世俊紮卡溝西互爲犄角飭鄧增賴長陳文英日用頭二號後膛大礮測準轟攻計西南城角轟塌垛口七十餘箇城身外面磚石亦多塌卸十二日左 至師駐節城南二里許十三日巡閱長濠察看各軍碁布星羅鎖圍密合其西北及南門外稍有單薄處所旋飭隨帶鎮西副中兩營分撥駐紮與諸將領商定約期會攻時金順已於東北角開掘地道準備至期舉發擬商宋慶合攻東北因飭徐占彪楊世俊各挑壯士於城西南角開花礮轟塌處所填塞城濠以便

騰躍而上一面派隊嚴扼長濠防其衝突首逆馬四卽馬文
祿知節帥遙臨十四日遣人賫稟赴徐占彪所部歸化營乞
撫自請出關討賊贖罪左 深知其詐全未批答雖出示
城中曉諭老幼婦女免死其誠心乞撫者准詣營投審聽候
分別辦理馬四奉到告示匿不張貼十五夜三鼓徐占彪楊
世俊督隊填濠城上鎗礮連聲不絕賴長等連用後膛礮指
轟五鼓填濠登城楊世俊麾隊猛撲甫及城腰賊乘高死抗
鎗子石塊紛集如雨官軍未能驟登十六日黎明東北角地
雷轟發宋慶所部營官遊擊張林急麾壯士冒鎗石登城賊

負嵎死鬪張林身中數鎗裹創血戰旋復中子殞命十七日
徐占彪楊世俊於西南城根各掘地道賴長陳文英李思經
以後膛礮向賊叢連轟副將鄧增移大礮一尊置東北角礮
臺晝夜指轟各斃賊無算十九日五鼓徐楊兩軍地道掘成
同時舉發楊世俊率奇捷各營壯士奮勇先登副將歐陽吉
星率副中營繼之連撲數次斃賊甚多逆賊於城上斜掘深
坎伏踞其中坎上密排叉子鎗伺官軍上城連環施放官軍
稍卻楊世俊憤甚持刀督戰甫上城頭忽飛子貫腦將士扶
救歸營次日竟殞徐占彪見楊世俊創甚仍督將士分隊猛

二五
三三
撲復陣亡數十員名帶傷者五百餘名賊之負固如此左

因念仰攻徒損精銳不如增修濠壘一面用後膛開花大礮向城中測準轟擊一面加掘地道困之時劉錦棠在西甯聞節帥親赴前敵率隊由西甯取道永安赴甘州候調稟報至肅左 飭帶數營前來助剿以所部之河湟撫定番回本賊舊黨可以用奇也九月初四日金順派所部將士由東北城缺口搶登城頭紮卡斷賊城上往來之路悍賊連日猛撲均經大礮洋鎗擊退其西南各城土回老弱紛紛款營乞命訊據供稱城中糧盡悍賊宰騾馬充飢老弱乞其皮煮食

度活餓斃已不知其數聞官軍不殺老弱婦女故偷出逃生也爰設局臨水地方留養聽候安插初十日劉錦棠率湘軍五營及已撫回番至肅駐營南門陝回軍功崔偉禹中海畢大才甘回軍功法鏡泉馬福壽等日馳馬城下呼馬四及各賊目告以死期已至善自爲謀馬四自知生路已絕哀懇出城乞撫十五日親詣節帥大營泥首乞命時金順宋慶徐占彪劉錦棠均在坐明告以罪在不赦仍宜遵前諭先繳馬械次造客土各回戶口清冊聽候審辦安插並令將各悍目分班帶赴大營聽候面諭馬四唯唯聽命嗣是陸續款營呈繳

叉子鎗一千一百七十餘件劈山礮過山鳥鎗狗頭礮拍鎗數百件矛千餘桿刀叉無數惟戰馬僅繳七十餘匹據稱連日飢甚已將餓瘦之馬悉數宰食所贖止此比飭客回分繳冊籍籍甘州者出東門由宋慶點驗籍關外沙州者由金順點驗籍西甯河州循化及陝西者由南門出歸劉錦棠徐占彪點驗各軍預於廢堡分男女安置二十一夜土回頭目金自明領賊數十潛由大北門竄出金順督隊轟擊殲之金自明伏誅二十二日點畢核對冊籍人數有多復拔出漢民男婦一千一百餘口二十三日令提逆首馬四卽馬文祿及馬

永福馬照馬金隴馬涼臣卽禿鄉約王得勝卽王大漢馬金才卽貴德老四馬梁成尅阿渾等九犯數其罪磔之中軍號礮三響畢金順宋慶徐占彪劉錦棠立將各起兇悍客回一千五百七十三犯悉數駢誅是夜諸軍入城縱火鎗轟矛刺計士回五千四百餘名除拔出老弱婦女九百餘口外盡付焚如肅州以平二十四日安肅道史念祖署肅州知州李宗笏入城圍殛屍骸枕藉卽老弱婦女亦頗不免蓋昏夜亂刃交加有不及辨者矣計逆回竊踞肅州已歷十年始由土回鞏岬繼則馬文祿藍吉楨受首逆安得璘僞封元帥兇燄更

張藍吉楨死馬文祿以西甯獵戶糾聚撒拉回番及西甯河州劇盜偷息於此以通關內外花門消息西路妥逆中路馬本源馬桂源東路馬化澂皆資其聯絡中閒就撫受職更名馬忠良實則自稱馬文祿人仍呼之馬四而已當就撫時城內漢民尚三萬餘口該首逆殘殺其精壯擄辱其婦女至今僅存老羸男婦千一百餘口其客回從逆者關外則沙州哈密紅廟子各種關內則西甯河州循化保安營隴西狄道伏羌甘州各種及陝西流徙之回約共兩萬有奇能戰者半之漢民日微回黨日聚殘虐之慘至斯已極自十年徐占彪一

軍進勦由高臺甘州轉戰而來大小數十戰逼賊併聚一處
金順繼至而圍始合宋慶繼至而圍益密東關旣破儲積空
矣關外賊走外援絕矣猶敢倔强一隅誓死決鬪是其堅悍
之性誠有異他賊者茲幸積年巨憝按籍而誅屠豕刳羊無
一漏逸人心爲之大快十月初七日會銜奏報並請

獎敘奉

上諭左宗棠金順奏克復肅州城垣首要各逆殲滅淨盡請
將各員獎敘一摺肅州回逆自東關克復後該逆踞守孤城
猶敢負隅抗拒左宗棠於本年八月閃馳赴肅州飭徐占彪

等分投進攻十五十九等日斃賊甚多復添調劉錦棠各營助剿九月初四日金順派所部搶登城頭紮卡斃悍賊多名逆首馬四自知罪不容誅於十五日出城乞撫二十三日左宗棠親提該逆並馬永福等犯悉數其罪當卽正法金順宋慶徐占彪劉錦棠並將各起兇悍客回立予駢誅諸軍隨卽入城將士回悉數殲除當將肅州克復逆回竊踞肅州城垣於今十載實屬罪無可逭現經左宗棠金順將首要各逆殲滅淨盡實足以伸天討而快人心左宗棠親臨前敵激勵各將領協力攻剿克復堅城實屬督率有方深堪嘉尙金順督

軍助勦共奏膚公亦屬奮勉可嘉除再降諭旨加恩外提督徐占彪身先士卒卓著戰功著加恩賞給雲騎尉世職在事出力各員均屬著有微勞自應量予獎敘提督宋慶總兵劉宏發等各進秩有差陣亡員弁另片奏請

賜卹如例嗣復奉

特恩諭旨昨因肅州克復降旨將在事出力之徐占彪等分別優獎因思陝甘逆回擾亂十有餘載勢極披猖自簡任左宗棠總督陝甘數年以來不辭勞苦次第勦除此次親臨前敵督飭將士克復堅城關內一律肅清朕心實深嘉悅自應

特沛殊恩用昭懋賞左宗棠著授陝甘總督協辦大學士該大臣前經賞給騎都尉世職並著改爲一等輕車都尉世職將軍金順督軍助勦共奏膚公洵爲奮勉著開復革職處分以彰勞勩欽此未幾又奉

上諭前據左宗棠奏肅州克復關內一律肅清先後降旨將左宗棠及在事出力各員優嘉獎勵因思該省各路統兵大員或扼要設防或相機雕勦同心協力共奏膚公允宜一體施恩以彰勞勩將軍金順助攻肅州已加恩開復革職處分著再賞還黃馬掛花翎清字勇號以示鼓勵穆圖善前署陝

甘總督統兵勦賊懋著勤勞此次移紮涇州扼賊紛竄亦屬得力著賞給雲騎尉世職提督宋慶駐軍陝西邊境屢挫賊鋒調赴甘肅合攻肅州尤爲奮勇張曜扼紮甯夏郡城勦辦王家疇等處踞匪地方得以安謐近由涼州馳赴肅州勇往可嘉宋慶張曜均著賞戴雙眼花翎副都統銜西甯辦事大臣豫師會同左宗棠辦理西甯招撫事宜復在平番防勦得力著賞給頭品頂戴其辦理西征糧臺之二品頂戴詹事府詹事袁保恆籌解軍餉始終無誤亦著賞給頭品頂戴現在關內肅清急應乘此聲威將關外各處竄匪次第掃除著金

順督率所部迅赴古城會同景廉進剿穆圖善著卽督隊赴安西敦煌玉門一帶扼紮妥籌防剿以壯聲援哈密尙未解圍張曜著與宋慶統帶所部一同馳往哈密與文麟明春會同剿賊以厚兵力該將軍等務當迅奮圖功殄除醜類用副委任所有出關各軍轉運糧餉關繫緊要著左宗棠認真督辦源源接濟毋任缺乏欽此左 追念甘肅肅清實賴劉

松山直搗金積堡劉錦棠繼之致馬化澂伏誅從此次第殲除迎刃而解其功實不可沒因奏請將所得一等輕車都尉世職合之劉松山所得二等輕車都尉世職照三河殉難撫

臣李續賓之例

追賞劉松山令其嗣子承襲以符前所奉俟甘省軍務一律
肅清屆時再降恩旨之

諭因肅州大定拜摺後遂回省城旋奉

上諭現在肅州克復關內肅清因思已故廣東陸路提督劉
松山前在甘肅督兵勦賊卓著戰功嗣因深入重險遇伏捐
軀追念前勞殊堪矜憫劉松山業經得有三等輕車都尉世
職再加賞一等輕車都尉世職令其嗣子承襲以彰忠盡欽
此

朝廷錫爵酬庸洵周且厚亦由關內肅清各直省全就安謐
宸衷悅豫也白彥虎一股現雖逋竄關外然關外原有安會
妥逆擾亂在先亦征勦所必及白逆僅二千餘人不足當斧
鉞餘威也惟河州西甯各回甫經收撫安插防軍未能遽撤
緣回情善詐多疑變亂既久野性難馴而漏網犬羊尤資偵
緝河州有劇賊楊瞎油什康七箇子等犯久未弋獲前六月
閒統領宗岳軍提督張仲春偵知該匪由董家山竄入大東
鄉卽自率馬隊及各營往捕跟踪追至那勒寺川遇之該匪
等盤馬開弓都司劉煥章中鎗而殞張仲春憤甚驟馬而前

撞楊瞎油什墜馬官軍卽奪其馬該匪躍他馬飛駛張仲春
騎賊馬緊追前阻深澗該匪所騎生馬不能躍過張仲春追
及之適副白旗馬隊亦至陣斬多名立將楊瞎油什康七箇
子馬照清三犯擒獲張仲春以馬照清交沈玉遂作眼線而
解楊瞎油什康七箇子赴蘭州訊明盡法處死沈玉遂因馬
照清指認續獲賊黨馬成明卽金句滿拉馬朶五十馬喜兒
馬兒洒馬勒黑馬主麻馬阿力木馬力木馬梁成卽馬合合
馬瞎箇馬祿祿馬雙箇金如林等訊明斬決劇賊始除卽撫
回亦爲之大快自是羣安生業漸釋驚疑而河州城南三十

里鋪撫回閔殿臣與西北鄉撫回馬占鼇馬永瑞東鄉撫回馬悟真等素不相能蓋因從前阻撓撫議直撲省城燒搶廟宇民房馬占鼇等會斥其罪犯不赦十一年就撫時閔殿臣父子心懷猶豫馬占鼇馬永瑞又會將其父子綑辱之迨撫局大定閔殿臣與其同教族黨受官司約束外極馴順馬占鼇等奉檄挑選壯丁七百餘名扼積石關閔殿臣之子閔福一投馬占鼇處充哨長因不守營規被革因此益恨馬占鼇並疑馬永瑞有意陷之閔殿臣有子四人均鷲很異常其至戚黑里布兄弟及同教馬八蓋馬克力王有才馬油奴亦皆

南鄉回中著名兇悍閔殿臣恃爲心腹報怨之志益堅同治十三年十一月間其黨糾眾做會私造軍械漸露奸謀河州鎮總兵沈玉遂署河州知州潘效蘇遣人偵察在回民馬成家中起獲新製黑洋布包方旗刀矛等件比傳閔殿臣察訊不到十一日有客商經過該處忽被刦殺沈玉遂等選派弁勇二十名前往查拏閔殿臣竟率黨圍殺斃勇丁二名其餘受傷逃歸該匪等聲稱拚死與馬占鰲等報復從三十里鋪赴各處逼脅回民從亂兩三日閒聚眾已近千餘突於十四夜悄撲甯河官營當經駐防該處之宗岳營營官總兵黃添

泰偵知憑壘固守斬撲壘悍賊甚多賊仍退伏原巢十五日賊遣南鄉回民赴城申訴賊黨新集無多懇乘其未集派兵速捕沈玉遂不疑其詐遽率所部馬步四百餘名直抵三十里鋪見前山有賊數百沈玉遂督隊奮擊斃賊數十名忽後面各山伏賊齊起四面包裹幫帶官總兵傅永達哨官總兵馮永祥千總彭大發等奮勇鏖戰力竭陣亡沈玉遂率隊突圍回城稟請調兵會勦乃飛飭各路均由防地進紮力遏奔衝其地段綿遠派撥不敷者由後路各營加隊填接以資聯絡裏賊中央一面調署西甯道劉錦棠帶所部九營旗隊伍

自西甯出大河家口由河州西北入會督各營直擣南鄉賊巢剋期蕝事馬占鰲馬永瑞聞閔逆復叛由積石關率左右兩旗勇丁赴河州請於沈玉遂潘效蘇願赴南鄉派門戶丁勦賊十八日出隊分道進勦則賊已傾巢翻山向西馬連灘繞竄河州城下猛撲西南兩關舉火焚馬永瑞住屋沈玉遂率所部憑城開鎗轟擊馬占鰲馬永瑞聞警馳回助勦賊仍由小西鄉韓家集竄去十九日至摸泥溝燒馬占鰲住屋並擄脅西鄉回眾其時提督張仲春總兵凌春臺等各率所部赴河州援勦賊聞官軍大至二十一日退回三十里鋪老巢

二十二日張仲春凌春臺率隊回甯河行近三十里鋪忽麻木溝一帶伏賊齊出官軍整隊接戰忽賊中拋擲火包適中藥桶火藥轟發西風猛起延燒鎗隊藥袋官軍陣腳忽動總兵黃添泰凌默發副將李福星督隊衝殺同時殞於陣前士卒從死者甚眾張仲春凌春臺乃收隊退保甯河二十四日賊率大股復撲河州城沈玉遂憑城固守派馬占鰲馬永瑞率左右兩旗出擊賊退撒拉崖二十五日賊眾數千齊撲甯河城踞城外東西北三面峯巔俯瞰城中悍賊蛇行伏逼城下焚燒西關遍穿地洞積薪焚門張仲春凌春臺與甯河防

營副將邊得貴各率所部堵禦斬上城悍賊百數十名昇大石堆砌城洞於石罅發鎗禦賊賊晝夜環攻不得入城十二月初一日張仲春凌春臺邊得貴等見賊攻稍懈派各哨隊伍分三路出城奮擊賊亦三路迎拒交戰約兩時許賊中路先敗官軍分三路齊逼壓勦克獲大捷生擒馬由立五名賊鋒稍挫是日劉錦棠等率所部由積石關至河州察看賊踪與沈玉遂會商初二日各率所部馬步進駐河州城南二十里鋪正築壘閒逆眾列隊山前搦戰劉錦棠令步軍整隊勿動飭提督黃萬鵬督旌善馬隊崔偉禹得彥畢大才等四百

騎總兵陶鼎金守備沈福田及馬占鼇馬永瑞所帶各馬隊
向前衝擊佯敗以誘之賊下山猛撲黃萬鵬且戰且退甫近
步軍列隊之前旌善馬隊張兩翼斜鈔迅進以其半下馬開
鎗賊仍敗竄歸巢初三日辰刻賊傾巢排列山梁綿亙數里
劉錦棠列陣以待約兩時許賊不下山劉錦棠沈玉遂商令
馬隊仍由中路平川徐進親率步軍各分三枝上山搦戰將
近山頂賊始猛撲而下官軍齊開鎗礮繼以刀矛陣斬閔逆
長子閔福一及悍目黑里布兄弟賊大敗漫山潰走官軍乘
勢合追斬戮千計初四日大雪停隊偵賊仍收集麻木溝一

帶初五日提督劉端冕總兵張福齊率所部進甯河前五里之李家坪偵賊數百護輜重麕聚下趕坡分路進擊略有擒斬少頃山間有賊二千餘突至官軍分路抵擊正交綏間劉錦棠聞鎗礮聲震知山前有戰事遣馬隊橫出截之賊見官軍兩面夾擊慌懼不知所爲斬馘無算生擒王有才等六十餘名正法軍前初七日劉端冕張福齊率隊抵拉力寺劉錦棠沈玉遂率隊至鎖南壩追賊積海石賊棄眷向南而奔初八日偵賊由三十里鋪竄買家集築卡於打鼓臺劉錦棠飛飭各軍合力圍攻初九日黎明各率馬步由姚家嶺上山見

山頭賊隊林立劉錦棠由左路分支而進沈玉遂由右路分支而進賊見官軍大至蜂擁下山猛撲右路勢甚兇悍沈玉遂領隊奮擊賊以長矛指刺沈玉遂捩斷矛頭還以撞賊親軍環刺斃賊多名劉錦棠見賊趨重右路飭馬步翻山橫衝賊隊提督譚和義參將張俊大呼陷陣各營號鼓齊鳴士氣百倍搶上山頂總兵戴清輝朱華祥率隊繼進賊見官軍逼近復回頭抗拒黃萬鵬飭旌善及河鎮各馬隊由山梁下馬開鎗轟擊賊棄卡下山向買家集郭家嘴等處狂奔劉錦棠揮馬步各隊下山緊躡其後張仲春凌春臺在臺子街聞打

鼓臺鎗聲甚緊率所部各營急進行近買家集遇劉錦棠已出賊前步隊佈滿西北張仲春凌春臺乃以所部分布東南賊見竄路已絕縮入買家集郭家嘴各莊堡拚死抗拒劉錦棠令各軍步隊圍攻莊堡馬隊分列平川防其竄逸部署既定各營取薪舉火焚各莊堡悍賊猶於火中開鎗轟傷官軍亦有冒煙衝出者比經截殺無遺其未著火各莊堡又經次第攻破擒斬淨盡時已二更夜深月黑各營環立待旦未令撤隊初十日黎明驗視賊屍枕藉約略指數二千數百餘具或焦黑不能辨認或血污塵糊無從識別據生擒各賊供聞

逆之弟閔朶七次子閔朶木買家集回目馬福林東鄉四大
又回目三師務西鄉回目馬八馬老師務等實已陣斬其焚
死者不能確指也閔殿臣之弟與子俱陣斬外餘逆均報捕
獲逆眷均已焚斃助逆之黨亦無噍類惟閔逆是否焚死其
屍莫能確指但距起事未及一月而其亂已平功亦速矣其
徒眾原不甚多軍火器械亦未及備同類相戕原不足與於
叛亂之數第以人係回族事適起於肅清之次年附錄於此
亦可見回性桀驁撫馭之不易耳

平定關隴紀略卷十二終

平定關隴紀略卷十三

行師之要籌餉爲先此兵家定法凡擁纛專征無不先事以圖之者也顧邊省與中原地異久役與始師時異負隅之寇與剽疾之賊敵異野荒民散與田疇廣闢人民聚處又異故始則籌餉繼必籌糧終且籌糧於遠鄰而轉運與寄頓備極經營而猶虞不足事勢至此有不智勇俱困者乎秦中自同治元年遭髮逆之擾大荔渭南之回乘機殺掠是年冬甘回亦變民間之藏粟半爲回有矣而是年秋成未穫越明年民多死徙新穀復未播逆回初恃多儲以爲可以持久也不意

巢破而儲亦空官軍每破賊巢輒得盜糧以爲足以贍軍也
未幾賊徙而巢亦盡大吏方憂餉匱因思以糧抵餉於是有
捐糧之議行之既久糧餉交乏回之搜括益厲兵之譁潰相
尋楊岳斌繼督陝甘師非不武也卒以餉與糧不繼而功弗
克成惟左 深明本末成算在胸同治六年正月初八日
由湖北行營奉

命督辦陝甘軍務卽奏陳籌辦情形疏中有云臣由閩啟行
所攜同行者僅三千人幫辦軍務臣劉典選募舊部亦止三
千人初意南人用之西北本非所宜祇可多挑營官哨長之

才入秦後將陝甘現存兵勇分別汰留而勻撥膽技素優兵
勇充當親兵護哨以倡勇敢之氣庶行糧可資節省而陝甘
饑軍亦可漸有位置又云一面開設屯田總局相度秦隴緊
接要隘有水草可田可牧者開設屯田一面汰遣陝甘各營
去疲冗省軍食爲久遠之規模其願留屯田者編入冊籍指
地屯牧庶軍制明而內訌可免屯事起而軍食漸裕是已早
籌軍糈矣又以餉械重寄籌運需才復奏明於湖北省城內
設立陝甘後路糧臺而以湖南補用道王加敏湖北漢黃德
道江漢關監督王文韶總司其事而後路之轉運無虞然後

通盤籌算廣濬餉源以舒各省之力而用求實濟其疏略云
各省欠解甘餉爲數甚鉅諸臣同任封圻豈有坐視西陲危
急不思拯救之理細察彼此形情實亦有自顧不遑協濟過
多難於兼顧者請

飭令各就本省情形籌擬實解確數按月委解以期實濟其
用兵省分時艱同值固難責其舍己芸人其協濟過多省分
勻撥維艱亦難挹彼注茲合毋仰懇

天恩勅下欠解甘餉督撫令其各就本省情形悉心籌議協
甘的餉其用兵省分照該省軍營人數餉數暫時勻出十成

之一協濟甘餉責成各藩司關道按月委解由該督撫臣按季奏報其協撥軍餉無軍務省分准各督撫察酌各軍得力與否酌擬減撤其所減撤之項仍卽按月勻加甘餉至捻回竄聚省分如河南陝西則自顧不遑應停其報解以昭核實至於滇黔兩省援師其餉源專在蜀湘亦請

勅令川督湘撫分別撤減以收餉節兵精實效其甘肅口外各軍此時陝甘軍事方殷無論力難及遠卽有餘餉足以撥濟亦虞道梗不前應請

勅部察明業經出塞各軍固應照常設法解濟其尙未出塞

各軍應暫停前進改所撥之餉暫解甘肅糧臺以資分勻撥解至隴外地畝荒蕪軍食無從採購查漢中採米入甘陸路亦頗迂阻訪聞川北嘉陵江白水江上下游一帶素稱產米之區四川廣元昭化兩縣水道與甘肅鞏秦所轄相通若於保甯順慶兩府設立米局採米雇船運送廣元昭化再行剝換船筏溯流而上或另雇駱駝腳夫剋期運解擇地存儲轉解軍前取攜自便應請

勅下四川督臣四川藩司悉心集議以期運濟甘軍較漢中尤爲便速凡所敷陳均經奉

諭允行由是各省無推諉之弊然籌餉尙須按月而軍無巨款撥濟難敷也復請寬籌餉項以支危局援從前關督出印票督撫加印向洋商借銀充餉成案籌借現銀一百二十萬兩內由閩海關代借二十四萬兩粵海關代借二十四萬兩浙海關代借二十四萬兩江漢關代借十二萬兩江海關代借十八萬兩均由各關監督出付印票並由各督撫加蓋關防給洋商收執在本年七八九十一十二等月各關稅項下撥還除江海關係本關應協甘餉外其餘各關代借銀兩仍由各該省藩司按月撥支交各關以清款項雖奉

諭旨准行而往返咨覆猶未能速也復請

勅下兩江督臣江蘇撫臣飭江海關監督照原撥續撥甘餉
共銀三萬兩之數按月全解並照數先向洋商指借每月三
萬兩如江蘇一時不能遵撥則江甯協甘月餉內尙有應解
甯夏將軍餉銀一萬兩陝甘督臣餉銀一萬兩亦可按月撥
交江海關抵還欠款亦蒙

諭旨准行始克督師疾進由德安樊城取道人關是年五月
間署陝甘總督穆圖善以甘省軍餉奇絀請將各省協餉變
通辦理具奏陝西布政使林壽圖亦以甘省慶涇等營餉無

可措具奏賴籌借洋款已定奉

上諭本年七月以後各省協甘之餉已歸左宗棠收款此後甘省軍餉左宗棠卽當遵照前旨酌定數目按月撥給以資接濟是先事之防已見效當時矣八月師次臨潼再行核計軍餉不敷之數甚鉅而捻回並勦戰事方殷復援案請辦米捐以資接濟疏言先後入秦及續募馬步各營之在途者併計步隊四十餘營馬隊三千餘騎綜核各項經費每月不下三十萬兩從前但擬帶數千人過征入陝約計各省協餉十餘萬兩暫可敷衍而行至鄂豫適當捻逆披狂因添集舊部

趕購馬匹洋鎗戰事雖少餉需已增入陝之後陝甘餉事兵
事均應通盤籌算查酌濟取戰各軍資遣可撤各營議墾無
主荒業皆需巨款而所借洋商銀兩以山西票商無可匯兌
逐批轉運九月內尙難到齊卽到齊亦易告罄擬援照前在
浙撫任內辦理米捐及撫臣喬松年現請推廣陝省米捐各
案於秦楚蜀產米之區及河南山西兩省勸辦甘肅米捐以
濟軍食第陝省旣辦米捐湖廣亦辦麥捐以懸釜待炊之眾
盼彼此相爭之捐項與購運極難之軍米何能稍濟急需惟
有願懇

皇上逾格恩施俯念甘肅糧餉之艱准將京銅局專收各條酌歸甘肅米捐局收捐一年卽行停止以顧京餉他省皆不得援以爲例庶陝甘兩省餉事軍事均有裨益此預籌冬春之餉也而其時署陝甘督臣穆圖善屢以軍餉奇絀入奏又飭林壽圖撤罷西安糧臺悉以餉事歸秦安糧臺又撥山西河東協餉歸雷正綰委員守催而令曹克忠舊部張在山一軍仰給於雷正綰於是涇軍頓生疑慮而慶涇各軍取餉於秦安亦多阻礙慶涇各軍亦將渙散

朝廷勢難遙度一切悉令查奏於是縷晰敷陳厯言自六月

入秦之後共撥解甘餉三十八萬而漢中糧臺陳丕業西安糧臺林壽圖前後所解綜計約六十餘萬甘省前數年所得協餉尙未必如此之多猶思竭力籌畫俟三批洋款到日再撥濟五萬兩一面飛咨四川督臣於代辦軍米內先儘署督臣提用將來米捐如有起色亦就近於四川捐局隨時酌撥濟甘督臣總制陝甘當籌兩省全局甘省此時之患在兵多而不能戰或被甘回軟困或與土匪勾連如胡世英所部十營其逃勇之從賊抗拒官軍者曾爲劉厚基所擒斬欲撤則欠餉已巨督戰則挫衄無疑請

勅下署督臣穆圖善將甘軍屢經譁潰有名無實各營覈實
綜計每月樽節支用實需餉銀若干咨會商辦然後議立分
總兩省糧臺酌量緩急分別撥濟斯爲正辦等情

朝廷始知籌餉雖多分潤不少而欲歸實用必杜漏卮旋奉
上諭以所籌深中窳要悉如議行並著穆圖善俟左宗棠入
甘後卽將總督關防委員齎送該督軍營自是籌軍籌餉益
有把握而所致穆圖善甘省籌餉難於籌兵籌糧難於籌餉
一緘亦已鈔呈

御覽卽前所請勸辦米捐亦奏明以設局之日起限值是年

秋霖霑足陝地荒蕪旣多歲復收歉米粟每斗價需二千麵價每筋百三十文若復加採軍糧勢必日增昂貴因預爲籌備奏請於湖南湖北協餉內提銀六萬兩交湖北省城陝甘後路糧臺採辦軍米分批轉運由漢江泝流而上入甲河至山陽之漫川關陸運西安以供軍食此籌糧難於籌餉之一端也况其時餉項又將告罄復請

勅河南遵部原議每月協撥銀一萬五千兩庶軌轍易通轉運尤速並催提江南等省七年正二兩月並本年未解協餉復援案擬借洋商銀二百萬兩以資來春接濟奉

旨俞允然其酌濟苦心雖蒙

聖明洞察當時固未能共喻也適戶部有統籌財用源流請嚴飭將帥迅速平賊之奏奉

上諭著據實具覆因得以備述時艱縷晰籌辦情形其略云竊臣所收的餉及洋商借款除酌撥甘省津貼陝軍及慶涇一帶甘軍並酌濟客軍外以之散放臣軍餉項本不能敷年終之用計新舊各營餉項已積欠三四月不等近派馬隊赴晉省東路發給兩月行糧驟提銀五萬餘兩所存已無幾矣而需用繁亟歲歉糧貴不得不預爲廣購來春楚米未至

以前秦糧騰貴欲購更難以此存項購糧則各營鹽菜銀兩無從籌發況師行人晉則糧價運腳所費尤鉅此來年春季需用所以迫切也回之求撫雖屬實情但陝回與漢民仇隙既深自無准其回籍之理計惟於近陝之甘境或陝省北山一帶徙漢置回方可以規久遠則移徙漢民有費安插降回有費饑民相率爲盜股數眾多進勦則環跪乞命情實可矜亦須安插則收撫又有費勦撫若能得手正宜籌發牛具籽種開墾荒地則興辦屯田又有費甘省之兵須及時裁撤卽陝軍亦有可撤者均以積欠太巨欲撤不能徒增積欠若再

因循將愈不可收拾則遣撤營勇又需鉅費此餉項必須寬籌也本年各省協餉各督撫臣力顧西陲危局源源接濟實深賴之惟需用浩繁若仍俟按月解濟則隨到隨盡必無應手巨款擬援案再由道員胡光墉籌借洋商銀二百萬兩由江甯浙江福建湖北廣東各藩司於同治七年三月至十一月連閏十箇月應協甘餉項下按月撥解各海關發還洋商清款至臣軍迫需之款則洋款尙恐不能濟急惟有仰懇天恩勅下江南浙江湖北廣東各省撫臣將同治七年正二兩月協餉及本年未解協餉於明春正二兩月之交迅爲籌

解以支危局疏入奉

旨勅總理各國事務衙門妥籌辦理故雖督師追捻由晉赴直往返十月有餘而陝甘無停兵待餉之患誠賴圖之於早也嗣經總理大臣議覆以洋商取息一分五釐若照案借二百萬兩則行息太重未免過於喫虧擬令江蘇浙江福建湖北廣東各海關照左宗棠原擬代借之數劃分爲二一半由應解部庫四成洋稅項下先行提出飛速解運一半由各海關出具印票各督撫臣加蓋關防交胡光墉向洋商借用雖所議稍有變通而原數仍無短省移緩就急所濟實多同治

七年二月內師次蠡縣值行糧已罄深念陝甘餉絀之苦不
遑運濟行營顛懇

天恩勅部籌撥現銀五萬兩以資接濟俟異日分別歸款以
免陝甘分解之煩三月師次大名值侍衛陳國瑞由神機營
改隸前敵奉

上諭歸左宗棠節制並著該大臣諭令將神機營鈐記繳回
由左宗棠派員解交神機營查銷照前敵各將領之例另給
木記該侍衛所部勇丁不得逾三千之數其營中軍餉軍械
卽由左宗棠隨時撥給此中輕重機宜諒該大臣自能斟酌

辦理也欽此四月師次大名復奉

上諭據穆圖善奏甘省需餉甚急請飭各省督撫將協甘專餉徑解甘肅等語左宗棠身任甘督本屬責無旁貸豈得坐視甘餉缺乏置之不問著於前項借款解到時飭令糧臺酌度分撥穆圖善所部軍士尙有一百數十營杯水車薪斷難有濟所有山西山東河南等省應解月餉著鄭敦謹丁寶楨李鶴年查照穆圖善原奏分給一半徑解甘肅湖南江西兩省餉銀著劉焜劉坤一分給一半解由穆圖善新設糧臺轉解署湖北布政使王文韶原兼甘肅後路糧臺著何璟傳知

該員分投催提趕緊督解蓋從穆圖善之請也是時
任遇日隆而餉項之分耗則日重督師直境心繫陝甘種種
焦勞殊難筆罄幸七月初旬捻逆蕩平餘匪撲滅入
覲後將轉旆西旋壹意籌勦回匪八月十六日因再備陳陝
甘糧餉極艱情形請

旨飭下軍機大臣會同戶部籌議指撥實餉以奠危疆疏云
竊陝甘籌餉之艱天下共知其所異於諸省者地方荒瘠
物產非饒一也舟楫不通懋遷非便二也各省雖遭髮逆捻
逆之害然或旋擾旋復或腴區被擾瘠地猶得苟全或衝途

二 卷之三
被擾僻鄉猶能自固陝甘則漢回錯處互相仇殺六七年來
並無甯宇新疇已廢舊藏旋空搜掠既頻避移無所三也變
亂以來漢回民人空亡大半牲畜掠食鮮存種藝既乏壯丁
耕墾並少牛馬生穀無資利源遂塞四也兵勇餉數各省雖
贏縮不同然日食尙易點綴以糧價平減購致非難故也陝
甘則食物翔貴數倍他方兵勇日啖細糧二筋卽需銀一錢
有奇卽按日給予實銀一飽之外並無存留鹽菜衣履復將
安出五也各省地丁錢糧之外均有牙釐雜稅捐輸各項勉
供挹注陝西釐稅每年尙可得十萬兩內外甘省則併此無

之捐輸則兩省均難籌辦軍興既久公私交困六也各省轉運雖極繁重然陸有車馱水有舟楫又有民夫足供雇運陝甘則山徑犖确沙磧荒遠所恃以轉饋者惟馱與夫馱則騾馬難供夫則催覓不出且糗糧麩料事事艱難勞費倍常七也用兵之道勦撫兼施撫之爲難尤甚於勦勦者戰勝之後別無籌畫撫則受降之後更費躊躇各省受降惟籌給資遣散令其各歸原籍而已陝甘則斃由內作漢回皆是土著散遣無歸非籌安插之地給牲畜籽種不可其未及安插之先非酌籌口食之資不可用費浩繁難以數計八也陝甘用兵

頗多爲時又久亂後荒瘠殊常購糧不易各軍每於人烟稍密種植稍多地方隨時安紮營壘始猶藉稱保護莊稼給錢辦糧繼則捐派民間不給價值甚且搜括殆盡民不敢爭以致轉徙流離變而爲匪或被逆回畜養苟且偷生甘爲從教之人黨惡助逆章奏中所稱甘省饑民土匪大率此類若不將營勇及早覈實汰存予以實餉俾其有所藉口則軍令有所不行垂盡之殘黎將靡有孑遺未荒之土地盡成榛莽而西陲之事不可復問矣臣之立意仿漢趙充國議開屯田以省轉饋撫輯以業災民且防且勦且戰且耕奠此一方永弭

後慮固不敢急旦夕之效而忘遠大之規也通計陝省每年缺餉一百五六十萬兩甘省每年缺餉二百餘萬兩而屯田之資撫輯之費不與焉茲幸捻逆蕩平海內兵事漸息餉事藉資周轉合無仰懇

天恩飭下軍機大臣會同戶部酌議籌撥陝甘的餉則陝甘軍民共戴

皇仁於無窮矣另片陳釐金一項曾奉

諭旨量爲裁減酌留大宗爲數尙鉅似可移作西征軍餉臣軍除前奉部撥各餉外此次江蘇江西湖北四川等省復有

請

旨加撥之餉應如何按月提撥妥爲經理抑仍准照上年成案酌借洋款由各省釐金項下歸還俾西行可無顧慮之處伏乞

勅部一併會同速爲議覆當經戶部奏

准於各海關六成洋稅項下指撥左 軍餉一百萬兩旋

因穆圖善奏奉

旨分半解甘所得僅五十萬兩九月二十四日復於孟縣途次詳細聲明部撥六成洋稅項下之一百萬兩爲臣西征實

餉由臣酌撥甘肅自本年十二月起按月協解爲數本不爲少惟臣親軍各營五千餘外開馬隊九營挑留吉林馬隊三起此外劉松山新增步隊三營馬隊一營郭運昌新增馬隊一營又全福增募吉林民勇馬隊三百皆踰於常額計日授食每月卽需八九萬兩何有贏餘分撥甘肅且此項餉銀旣自十二月起算非俟明年春夏之交頭批不能抵陝此數月閒懸軍待餉遇有調發何以應之尤可惜者秦中軍事大有轉機觀回逆之紛議移巢土回之款營乞撫可見其震懼兵威茲復聞臣弭節西旋軍容甚盛其恟懼實在意中無如兵

力雖屬有餘餉事無從取給事勢如此安能枵腹忍饑遠待數千里外隔年之協餉以舉火哉合無仰懇

天恩勅下兩廣督臣江蘇撫臣湖北撫臣粵海關監督將各海關六成洋稅原撥之一百萬兩提前協解務於今臘明正到陝以應急需如一時未能湊集卽由上海轉運局福建道員胡光墉再借洋款以期捷速此項未到之前遇有緊要機宜陝西無款可籌並懇

天恩勅下山西撫臣於河南鹽課項下提撥二十萬兩四川督臣於鹽釐項下提撥二十萬兩迅速解陝庶幾掣肘無虞

至陝甘全局頭緒紛繁刻難就理一面用兵卽一面籌辦善後仍懇

天恩勅下軍機大臣會同戶部妥籌解甘常年實餉自明年伊始至事定而止每歲於各海關洋稅各省釐金項下劃提實銀四百萬兩分給陝甘酌時勢之緩急定協餉之多寡臣當率在事諸臣黽勉圖維不敢或作或輟虛負

恩知亦不敢以餘粟餘財自污素節區區愚悃冀荷

鑒原是年十月抵陝至十二月閒營中支發已罄各營請餉彌急岌岌之勢將在旦夕查部撥之一百萬兩僅江漢關八

萬兩到陝此外僅閩之十萬兩浙之五萬兩定於十二月內起解計期明正可到其餘均無可望而河東鹽餉之二十萬兩除抵山西常年應解之陝餉河東應解慶陽之協餉共十九萬兩外僅實得一萬兩四川鹽課之二十萬兩甫經吳棠准撥三萬兩而陝甘委員在蜀勸捐已發各州縣之貢監從九各執照五千餘張計銀二十餘萬兩則已經吳棠奏請併歸成都重慶兩局餘均飭令撤繳計所得僅三萬兩而所失之捐項則二十餘萬維時欠餉已十餘月潰裂堪虞因瀝陳餉項之艱與目前危殆之勢其末云臣計無復生一死曷足塞

責不得不瀝陳哀懇

君父之前萬一陝甘危局得以瓦全臣可稍延殘喘

國家之福陝甘之幸亦臣之幸也倘陝甘將來或因無餉而致決裂臣固無所逃罪而內外諸臣謀

國之疏容有不能無遺議者伏念臣初次請撥西徃實餉部臣以六成洋稅應夫豈不知各海關六成洋稅之早已提空也嗣請撥常年實餉四百萬兩部臣緩俟各省奏到之日始議劃撥夫豈不知各省釐稅千數百萬兩本爲

國家固有之款各省可撥之款也臣原奏據陝西撫臣署陝

甘督臣陳明短缺實餉四百餘萬兩其各省現協之款本不在內部臣又誤將現協之餉歸併臣續請之四百萬兩計算夫豈不知陝軍常年應撥之餉本不止四百萬兩也部臣爲肅清之各省籌應留之款獨不當爲陝甘籌應撥之款乎各省均專籌本省撤兵留兵之餉獨不當爲陝甘籌用兵之餉乎至於安徽撫臣英翰署撫臣吳坤修奏增郭寶昌馬步隊三千五百名合之該軍入陝者共七千有奇不過藉西征之名以留皖餉安插皖勇各爲協陝實則無益於陝西之兵事而有損於陝西之餉事又無論也應否請

旨飭下部臣籌撥陝甘實餉

飭催各省督撫海關諸臣速撥陝甘實餉彼此至誠許與急救危疆之處出自

宸衷獨斷臣之愚誠已盡於此讀其疏詞似近激烈然細考當時事勢誠有不可以終日者老成悲憤豈得已哉適總統長江水師兵部侍郎彭玉麟聞之憂甚卽以水師月餉節縮贏餘項下所存銀二萬兩提交湖北省城陝甘後路糧臺催令迅速解陝以資接濟其關心時事維持全局如此情乎不在其位不得與於籌議之列而其誼則堪千古視左

前

駐鄂時漢陽府知府鍾謙鈞捐養廉銀三千兩助餉數愈多而時愈切矣無何甯夏副都統金順緘來極言軍餉奇絀迫懇通融接濟左 復念大局攸關卽於河東鹽課二十萬兩內劃留一萬兩解赴綏德州交成定康收存聽候金順提取同此一時之閒而一得友誼之助一濟友誼之急要皆根於報

國之誠存心至公者動念關天下國家君子觀於此時當亦知所擇矣維時劉松山一軍勦賊於北山屢獲大勝賊勢窮蹙臘月十八日將鎮靖堡靖邊縣城攻克斬馘極多前後拔

出難民無數土匪董福祥之父董世有及董福祿全股投誠
造具冊籍呈核訴稱黨眾之畏誅者或竄榆林米脂或竄延
長董福祥尙率三四千人不知竄往何處現已崙人喚回等
語其另股土匪扈彰雖於七年就撫其餘黨尙多至是亦詣
靖邊造冊乞撫惟是軍行千餘里所歷皆荒墟廢井人烟斷
絕深入賊窟前無可因之糧餉饋復不能繼軍中宰騾馬雜
煮充饑餓斃之運糧騾馬亦資之以果腹而受撫之土匪及
拔出難民正在急籌賑撫而餉源早涸計無所施不得已截
提江南解到劉松山專餉五萬兩交金順成定康採糧賑濟

再行奏懇

天恩迅撥庫銀十萬兩飭綏遠城將軍定安於邊外代籌糧食交副都統金順轉輸入邊以資接濟凡此籌畫之苦實皆度越尋常賴

聖主視民如傷悉如所請從此難民土匪皆慶再生時同治八年春也但軍事日有起色餉項尙無頭緒歷年相沿承辦經手不一值林壽圖又將交卸爰疏陳督師西行日遠一日各省協餉有遲有速有應有不應有能匯兌不能匯兌有宜用贖催宜用緘懇人地各殊情事亦異若必待行營陳奏必

致多延時日轉誤戎機現在藩司林壽圖已蒙

恩准乞養而西征糧臺不可無大員經理有三品銜翰林院侍講袁保恆係奉

旨交臣差委之員上年十一月來營朝夕晤對知其器識恢宏遇事能見其大其人又夙歷戎行日見臣軍苦絀情形亟圖共紓籌策臣擬請其督辦西征糧臺以裨軍務竊計袁保恆以侍從清秩總理軍儲遇有催提餉需緊要之件既以緘牘遍抵協餉各省將軍督撫海關亦可將臣軍餉需緩急上塵

清聽俾臣得以一意馳驅而於緩急機宜得以及時斟酌咨商各省辦理實於臣軍大有裨益奉

旨准行是爲哀保恆督辦駐陝西征糧臺之始是年二月戶部覆奏遵查各省釐金酌定添撥西征軍餉並請飭各省整頓釐金摺內議定安徽除協濟郭寶昌全軍外每年添協二十四萬兩浙江每年添協六十萬兩湖北每年添協四十八萬兩江西每年添協四十八萬兩福建每年添協四十八萬兩江蘇除會國藩前奏每年添協一百二十萬兩外馬新貽丁日昌每年再添協三十六萬兩廣東每年添協三十六萬

兩奉

旨著照戶部所議該督撫自本年正月爲始一律照數籌撥
遇閏加算按月解交湖北省陝甘後路糧臺交收均不准稍
分畛域偶有蒂欠致誤要需該督撫等總當顧全大局妥速
籌解左宗棠於接到餉銀時著按照陝甘兩省缺餉多寡分
別接濟勻撥以昭公允其各省原協陝甘各路軍營餉項均
著照舊支應毋稍牽混各該省報解陝甘新舊撥款及左宗
棠劉典穆圖善等營收到各省撥款並各路捐局所收捐款
均著隨時奏報以憑查覈西征軍餉竭各省之力以供應用

左宗棠當樽節支發毋稍糜費該大臣前請撥四百萬兩現已酌撥至三百萬兩不爲不多合之原協各款及收捐款目每年統計九百五十餘萬兩該大臣原請銀數能否覈減卽著迅速復奏並將各營需餉數目分別詳細奏聞

朝廷軫念西陲不惜重餉軍中騰飽有資矣乃上年所撥六成洋稅之一百萬兩至是已閱六月而江南尙欠解四十萬兩海關尙欠解八萬兩是添協之餉尙無解期而舊撥之銀半無實獲復經據實請

旨飭催又上年所開米捐經部議算作實餉亦不得不奏請

展限矣所幸軍心踴躍陝境將次肅清已飭各營一律屯墾而收撫之士匪董福祥李雙良張萬會扈良儒梁植劉文誥劉永春等眾安插於瓦窰堡老君殿周家嶺等處分給牛具籽種墾荒種植秋成之後糧運可期稍鬆五月中旬出乾州移節甘境督辦甘肅軍務正各軍奮進之時而餉項奇絀前敵諸軍不能領一月之餉通查各省新舊應協之款自正月以來解到並在途僅七十餘萬以全數按月扣算尙未及三分之一不得不據實請

旨飭催蓋必有餉可給方能責其力戰也然協餉之所以遲

延則自有說一由應協之省以薄餉給勇丁令赴他省之援
於本地可省安集之勞於他省可居援勦之名實一舉而兩
得而本省之餉不敷則又資鄰省之協是添一援軍而費兩
省之協餉而又有急公之名如安徽之郭軍添至七千餘人
河南之張軍宋軍人數更多安徽河南應協之餉不敷該客
軍支發其由陝甘補足者皆他省所解之協餉也而山東藩
司潘鼎新復奉

旨赴陝甘所部人數四千月餉需二萬數千山西已革臬司
陳澍亦奉

旨西來立功贖罪所部九千餘人月餉在六萬以外山西既須籌陳湜之餉轉瞬河冰漸合又須早籌防河之軍而山東山西應協之餉又無望其批解矣在各省各爲協撥在陝甘並無實濟其弊一也一出各省之籌協餉厚於淮軍而薄於楚軍遂坐視陝甘之危急其弊二也二弊不明餉終無著因切實指陳疏云臣愚竊謂用東南之財賦贍西北之甲兵本古今不易之局若責西北以兵事而復責以籌餉責東南以餉事而復責以籌兵則兩勞而兩失陝甘雖拮据不遑實未嘗多藉客軍之助臣亦未敢藉口兵力單弱求助於各省蓋

陝甘所急在餉各省既以兵助陝甘必不肯再以餉資陝甘也各省之軍已來陝者如郭寶昌張曜宋慶本是勁旅然約略計之每月已需餉十萬上下如今河南照舊供張宋兩軍而令張宋兩軍將現存馬步營數挑汰歸併或萬人或七八千人則餉愈足而兵愈精河南卽不再協陝甘而陝甘亦受其實惠而山西又可騰出月協張宋兩軍之二萬兩以協陝甘矣安徽照舊供郭軍而令郭寶昌撤減營數共留馬步四五千仍留七千人月餉爲該軍購糧轉運之費則陝甘不必兼顧該軍並可得安徽月餉二萬兩以資實濟此兩得之道

也其尙未到之潘鼎新陳湜兩軍每月需餉十萬以外如停撤潘軍以其餉協陝甘月可得二萬餘兩停止陳軍留防山西應撤遣者仍令撤遣則山西防河仍資熟手無須另籌防河之軍與餉於陝甘亦無所損如此籌辦庶協餉皆歸實濟上年勦捻事畢楚軍西行所指爲贍軍之資者洋稅淮軍東下所指爲撤軍之資者釐金然楚軍所得不及淮軍三之一也曾國藩借浙江釐金十萬兩而一月之間浙江解至三十萬兩原應解陝甘七萬兩嗣奉

旨加協五萬兩浙江乃先將舊協臣軍之二萬兩停止查浙

江此項協餉卽臣由浙赴閩粵時奏協臣軍每月之十四萬兩也臣由粵東凱旋時奏請一併停解而每月但以五萬兩協陝甘嗣臣調督陝甘復奏提浙江應協馬德順一萬輪船經費一萬共二萬兩合成七萬兩較原數十四萬兩僅及其半現雖加協五萬亦祇每月十二萬兩尙非浙江所難江南除照舊應解劉松山六萬兩外僅協臣二萬劉典一萬穆圖善一萬共十萬兩而協淮軍則每月二十萬兩多寡若是懸殊楚軍籌措之難甚於淮軍楚軍需用之繁且急甚於淮軍而浙江江南所以應之者多寡緩急一皆反是亦大違

朝廷兵事責西北餉事責東南之

旨矣凡此協餉遲延不實之故恐部臣尙未探其底蘊仰祈
天恩飭下部臣察閱分別催提至西北餉源素絀自來籌餉
之才每多取資鹽務就陝甘而論陝食河東之鹽甘食花馬
池之鹽寇亂以來花馬池之鹽不能暢銷而鹽價日貴俟北
路之進兵至花定卽當妥爲辦理河東鹽政日弛鹽價亦貴
經理苟得其人則浮費必裁正課必裕效可逆睹而陝甘亦
並得其益此疏上後

朝廷始知協餉未必悉能應手局中之苦洵有非楮墨所能

盡者是年八月戶部奏覆奉

上諭指名催解如有仍前玩誤及欠解最多者著左宗棠查明將該省之藩司等指名嚴參等因至是年十月南北兩路每戰皆捷苦於無餉總理駐陝糧臺袁保恆同殷焦灼奏明協餉不敷請提款補撥並另請雷正綰一軍專餉奉

上諭著戶部行知各該督撫監督凜遵措補雷正綰一軍由閩海關六成洋稅項下每月撥銀二萬兩爲該營專餉著文煜英桂卞寶第隨時派員解赴陝西糧臺毋稍延緩欽此

上諭雖嚴而餉項之不足仍如故同治九年正月劉松山進

攻金積堡遇害湘卓兩軍糧運亦竭時軍民屯墾雖多而運
濟雷正綰張福齊周蘭亭黃鼎諸軍已形短絀力實未遑兼
濟乃援購買蒙糧之例奏請

飭定安速籌採運金順先將所部封存之糧暫爲借濟俾湘
卓兩軍不至因飢潰散並請

飭山西撫臣傳諭郭寶昌於河冰銷化晉防解嚴之時迅卽
渡河將吳堡存糧百數十萬飭解赴花馬池以資接濟故兩
軍竭力攻勦卒破堅巢而運籌軍食固亦不遺餘力矣是時
甘省制兵本多缺額而糧餉則仍照全數支放因奏請汰弱

留強擇荒絕之地撥爲兵屯慎選將領督令墾種卽以所穫作爲名糧以其餘照時價估作餉項其各屬額徵丁糧其銀兩擬提充客軍月餉以歸實濟而省採運經費甘南鞏秦階所屬較爲完善諭令全完本色不准折收銀兩以便勻撥各營支領其餘各府州縣亦令遵照籌辦自是就地採糧無隔省購運之煩旣而回勢漸衰被脅而從之者收撫漸眾復劃荒絕地畝稍成片段之處將收撫之陝回給以籽種課其耕作並飭湘卓兩軍盡收金積回眾之麥而作踐其秋稼故回愈困而糧亦愈充惟餉項仍虞不足特求請已窮無從設措

計惟益加撙節而已不意是年七月閒豫撫李鶴年以河東鹽課二萬兩前由鄭敦謹議准協豫省之張宋兩軍中經袁保恆奏改協甘至是奏奉

上諭飭河東鹽道照舊按月撥解豫軍俾資周轉不得稍有遲誤等因陝甘協餉原患不足今忽月失二萬歲計則二十四萬是不能不急辨者也因疏陳云臣謹查河東鹽課自雍正二年奉

旨全數撥充甘餉百數十年未之有改上年豫軍入晉前署山西撫臣鄭敦謹奏將河東鹽課每月撥濟豫軍張曜宋慶

兩軍二萬兩意謂豫軍有功於晉宜爲其謀餉耳實則甘肅百數十年前應得之款忽於時危餉迫之時停其協濟本非正辦袁保恆籍隸河南因河南奉撥甘餉屢催不應不得已奏將河東常年甘餉內撥濟豫章之餉仍歸甘軍是以甘肅自有之餉還之甘軍非與河南爭餉也明矣河南不惟不解甘餉復將甘肅舊有之餉奪歸豫軍豈現時河南餉事更窘迫於甘肅乎無論豫省兵事已息餉事宜資周轉卽令豫軍之餉亦應另請籌撥乃欲損甘軍之餉以益豫軍是猶奪餓夫之食爲重餐也且其原奏稱豫省籌解臣營暨穆圖善豫

師兩營共月餉三萬五千兩似河南實已解過甘肅軍餉八十萬兩而臣遍查河南協甘餉卷除撥臣營與豫師軍餉各五千兩外兩年以來該省並無續解分釐之案不知何指豈未解之懸款亦可列入河南銷冊耶至原奏所稱協解甘餉共有十餘省似河東鹽課每月二萬兩在甘肅視之無足輕重不知河東歲課照舊全協甘省僅祇五十二萬兩若除去豫省二十四萬兩尙有幾何協解甘餉雖有十餘省其實在解到者究有幾何倘各省盡如河南之不解甘餉而又奪取甘餉是新協之餉無望而舊有之餉亦無望也同一國帑同

一用兵同一西征本無畛域可分但令稍可支持何敢上瀆
聖聰無如甘肅雖有協餉八萬餘兩之名實則解不過半惟
河東相距較近又係先課後鹽現成之款非尋常無著可比
乃奏奉

諭旨於八月內提解之十八萬兩迄今尙祇報解四萬兩情
形可想臣自度隴後因餉項艱窘不得已與各營約除月給
鹽菜米糧銀兩外准於三節籌給一月足餉以固軍心較之
豫軍之充裕本已苦樂不均今則時已十月而中秋應發一
月滿餉尙無從取給轉瞬年節又至四顧茫然不知所措可

否請

旨飭下戶部秉公酌議或另爲豫軍籌撥而以河東甘餉仍歸甘軍抑或竟以甘餉改畀豫軍而爲甘軍另籌有著之款統候部臣酌議以憑遵照自有此疏而陝甘籌餉之艱兵勇從征之苦始得達諸

天聽而或以好爭疑之則過矣况協餉終仍虛懸解到之銀無幾袁保恆身任轉運敷衍無術爰於閏十月內據實陳奏奉

上諭前據袁保恆奏各省關應協陝甘軍餉截至十月止積

欠一千三十餘萬請飭飛速籌解並請於各省京餉項下暫行通挪或於海關洋稅內酌提協濟以敷一月足餉之用等語當交戶部速議具奏茲據奏稱部庫正項無存需用甚急京餉勢難通挪洋稅專濟要需亦難動撥擬於各省積欠軍餉內先行提撥山西十萬兩河南十萬兩四川十萬兩兩廣十萬兩山東五萬兩湖北五萬兩江蘇五萬兩浙江五萬兩卽照所議著各省督撫嚴飭藩司迅速如數籌撥限於年內解交西征糧臺此係立候應用之款倘逾限不解卽由左宗棠指名嚴叅陝甘軍餉緊要各省關於撥定之數竟至積欠

如許之多嗣後務須按月如數報解不准延欠其以前欠解月餉仍著陸續補解以資接濟欽此自是指催之餉不敢再延而軍民屯種日廣糧價平減適金積堡回逆困極自投左駐節平涼籌兵籌餉並籌運儲靜甯較從前稍爲得手同治十年秋移節靜甯州遂進安定督軍進勦河州正一意籌兵不遑他顧袁保恆身任轉饋值協餉中斷恐有誤戎機復先行據實陳奏奉

上諭前因袁保恆奏西征全軍盼餉甚急懇請速籌撥濟並請借撥洋稅當交戶部速議具奏茲據該部奏稱西征全軍

一月滿餉需銀六十萬兩各海關四成洋稅本爲解充京餉之需屢經各省截留勢難再行指撥各省欠解西征餉銀甚鉅現擬援照上年成案仍從積欠最多之省酌量提撥河南江蘇湖北各提銀八萬兩浙江福建四川廣東各提銀五萬兩山東山西安徽湖南各提銀四萬兩共成六十萬兩之數等語卽照所議著各該督撫嚴飭藩司迅速如數籌撥限於年內解交西征糧臺以應急需現在渡洮官軍正在得手餉需自刻不容緩倘各該省逾限不解卽由左宗棠查照同治八年八月奏案指名嚴叅欽此故士馬飽騰戰攻疾利逆回

自知罪重遂於同治十一年二月詣營乞撫並先質其子弟請員查驗非

朝廷飭催嚴切餉不逾時其能臻此神速乎是時甘省向東與南北三路流亡漸復招墾益廣糧價低賤無復有乏食之虞是年六月劉錦棠由湘募新勇至甘蕭章開帶舊勇回籍值後路一律肅清遂於七月進駐省城居中籌辦商令劉錦棠率所部新舊十八營進攻西甯而肅州則自十年以來有徐占彪十二營在彼防勦各營因奉月給鹽菜銀兩章程稍資敷衍是年冬劉錦棠收復西甯同治十二年春大通巴燕

戎格循化等處勦撫就緒七月遂親赴肅州督勦九月肅州平關內於是一律肅清各營兵勇始以三節發一月足餉繼因餉項艱難改以歲終發一月足餉積欠既多而此時應辦事宜需費尤鉅前此展緩之項至此已無可再展矣不得不據實陳奏其疏云竊臣准戶部咨鈔速議西征糧臺一摺知袁保恆奏請指撥江海浙江閩海粵海江漢各關四成洋稅軍餉各二十萬兩於九十兩月內全數解運勉供邊費部臣議奏在江海閩海粵海各關六成洋稅內各提銀十萬共三十萬兩在各省積欠項下酌提三十萬以符歷次奏請一月

滿餉之數奉

旨依議欽此竊維部撥臣軍各省關協餉積欠陳陳相因截至本年九月共欠至一千七百九十六萬餘兩而臣軍近數年僅能發年終一月滿餉今歲係有閏之年出款多占一箇月加以肅州安西州糧餉轉運制兵餉乾賑濟難民安設驛站修葺城堡及各屬縣散賑購糧各難民遷徙安插發給寒衣與夫隨時遣撤傷殘兵勇等項至繁且鉅縱各省及海關照常年協解如期不敷之款已在百萬兩上下而穆圖善一軍糧價鹽菜滿餉等項不與焉此出款之無可減也以常年

經入之款而言福建輪船局每月撥去二萬兩廣東山西河
南湖北四川浙江及各省協款報解均照常年遲緩推壓一
月卽短絀一月計截至年底約欠數十萬兩此入款之無可
增也臣軍出款旣多於常年各省協款翻少於常年袁保恆
之請撥海關四成洋稅百萬兩蓋明知甘肅餉事日艱待用
甚急大局難支六成洋稅旣經提撥無存不得不請撥四成
良非得已也部臣常年奏提各省積欠甘餉六十萬兩本係
減數催取俾其輕而易舉之意而各省尙未能如數起解或
仍拖欠二十萬十餘萬兩不等前又議減半提三十萬兩果

能如數解到乎是催提積欠徒屬虛文也部撥海關六成洋稅三十萬兩江海粵海之有撥與否臣無從知若聞海之十萬兩則閩浙督臣李鶴年前奏共止一百三十五萬兩除陸續撥過外不敷銀已二十五萬兩是部撥聞海六成又虛文也六成洋稅既鮮可指四成洋稅又不准撥臣軍前此一年尙發兩月滿餉嗣後一年發一月滿餉至今則一月滿餉尙無可發軍心不問可知饑餓之際慈父不能有其子臣豈能以虛言撫慰之哉四成洋稅原備緩急之需部臣總司國計先根本而後邊疆固其宜也然耗中國以事四夷秦漢固爲

失策唐之中葉斂外藏以實京師陸贄屢疏力諍亦何常非謀國之忠乎伏乞

皇上垂念西事艱難邊軍困苦

俯准袁保恆所奏仍將四成洋稅指撥甘餉庶甫靖邊方無憂他變而軍情怙然

皇威遐暢微臣亦可幸免咎戾西陲之幸亦時局之幸也臣因時近歲暮餉事尙無可望不得已飭上海轉運局道員胡光墉向華商洋商籌借銀一百萬兩照前出備息銀如蒙天恩准撥四成洋稅則息銀亦可少減又各省協款向來正

月起解者極少恐臘盡春初餉事不能接續又飭辦理湖北後路糧臺道員王加敏向漢口各商籌借銀數十萬兩以資接濟將來卽以收到各省協款陸續抵償謹一併據實陳明夫以關內肅清之日餉之難籌尙如此則當夫擁糞專征之初局中籌辦苦心誠非尋常意計所能及所幸者朝廷軫念西陲不惜轉運以求濟故當時指請之款非其人固不敢言非

聖主亦不能允此則關隴生靈之幸而非非常之功適遇非常之人也惟其時東南粗定各省元氣亦未復陝甘協濟之殷

又或有不能盡諒迨夫大功底定嘉績昭垂薄海遂共見其
苦心亦無有非議之者知費之不可固惜而時亦不可再誤
也

平定關隴紀略卷十三終

平定關隴紀略卷十三下篇

自來將帥專征攘除兇暴而已民生疾苦地方利弊不與聞焉凡以事權不屬責有攸歸也惟我

皇朝視民如傷自咸豐以來凡

欽差大臣督辦軍務卽以其地之督撫授之俾出斯民於水火之中而登諸衽席法至良也

國運昌隆篤生賢哲承其任者罔不念切民依而懲前毖後無纖微之弗善焉陝甘自同治元年變亂以來民罹塗炭極矣迨同治五年

朝廷命閩浙總督左

移督陝甘越明年春兼

命督辦陝甘軍務左

深知陝甘之民鮮有生意而回皆

土著與漢民爲仇其間慘毒情形流離困苦誠有不堪言狀者故首陳接辦事宜疏中卽有一面進剿一面善後之言惟朝廷深韙之左復以初困於賊繼困於兵居不能安逃無可入等情縷晰入

告而凡移徙漢民有費安插降回有費收撫土匪有費興辦屯田有費裁撤冗軍遣散游勇又有費卽於籌餉疏中詳言之

朝廷鑒其苦衷亦悉如其所請於是廣宣

德意師行所至先設賑局以招之歸待其來歸卽給牛種而使之墾俟其有獲卽廣設義學散布書籍而教之讀遂其生如時雨然無怪其勃然興也而自回變以來民之強者以禦回爲名相率而爲盜誅之不可勝誅乃悉收而撫之拔其渠魁許以立功散其黨眾給以荒絕凡賑糧牛種悉視良民而軍獲鄉導之益民鮮剽掠之苦矣其平董志原也兵屯與民屯錯置取其糧足以贍軍墾其地足以助民屯營旣移繡壤遂廣其開墾倍速也其平金積堡也陝回之外一無所遷但

本方圖附錄卷一三二 篇 二
爲之區其井里使畔域各判嫌衅不生其釐定較易也及收
復狄河回旣相率來歸兼完歷年之課則誠服無疑但令還
我漢人釋其覺隙俾

朝廷厚澤一體均沾而耕鑿永安焉旣而移師西甯今新疆
巡撫劉錦棠深體此意一如平金積堡時徼其陝回而安其
土著故至今永蒙樂利惟肅州勞師日久及左 節鉞旣

臨然後就戮民之死徙旣多故招徠視他處尤嚴而其沾
皇仁也有過之無不及焉究之經費未嘗充足凡茲鉅款皆
由極力節省各營兵勇僅現支鹽菜銀兩餘皆存入檔冊故

及時舉政實惠得以徧及焉迨旋節省垣統握全籌重規久
遠除其不便咸與維新而近功小利非所計甘民洵厚幸哉
緣甘省地據上游厥土高燥生民之利耕與牧交資回亂以
來牛羊盡矣雖從前所得賊裔旣概以施諸民猶未徧及也
至是廣爲購買給之使牧俟其孳息而後取償焉而牲畜遂
蕃爰及水利甯夏有秦漢之渠甘涼有天山之雪以灌以溉
旱曠無虞二郡之外水利猶未興也乃相其陰陽觀其流泉
分飭防軍代民挑築若平涼若狄道若皋蘭金縣厥渠尤鉅
則總統定西營前福建布政使王德榜暨平慶涇道今新疆

布政使魏光燾之力居多渠成則小旱不能爲之災自今歲
其有矣而布價素昂民多衣褐祁寒怨咨由來已久維桑與
棉衣之所從出也課民種棉之政旣舉行於駐平之日至是
復講蠶桑使養老有所利賴惟鞏秦階道今甘肅布政使譚
繼洵實相之遠購桑苗於浙給之民而使之樹其始起於甘
南其次徧及各路而蠶利遂興又念山童土鹵木不自植遇
有興作取材匪易乃命防軍於官道之旁樹之嘉木數年之
閒望之蔚然而行者獲其蔭居者資其材焉自是諸利之源
罔有未開者矣特慮凶荒無備亦養生之遺憾也爰仿社倉

之法飭郡縣一律舉行由是野有儲粟而

朝廷養民之政已綜鉅細而畢舉因是而宏教澤則勸學與賢誠不容緩然六經四子之書給之已徧比閭族黨之學興設有年以言作育則膏火宜優以勵大成則課試宜急奈士子進取之志有爲經制所限者則以陝甘分省令甲略殊學政與陝西共之而歲科並行僅得三年一試闈場亦與陝西合而觀光自遠幾至萬里爲程試期疏則奮興無自程途遠斯應試維艱甘人士弗便也乃特

聖朝愛士之殷特爲分學分闈之請左

卻之弗獲始據

情而

上聞幸

聖恩高厚悉予准行從茲另

簡學政除南路之階州西路鎮迪安肅而外皆得以三年兩
試及時而獻所長另開闡場凡鎮迪極遠安肅次遠之區咸
得以三月聚糧乘時而占利見故甘省困極之後視從前未
亂之時暢尤極焉

皇恩之厚庸有加乎嗣是而稽衛民之兵則今昔勢殊昔之
患其少者今則稍患其多蓋甘省北接蒙疆西控番族提鎮

標兵星羅碁布凡以備不虞懾遠人也二百年來涵濡

德教蒙漢有親睦之風氏羌無狡啟之釁左 將裁而汰

之適奉督師出關之

命屬昌濬相助爲理昌濬忝厥幫辦所見旣同嘉謀遂決凡
奏裁馬步守兵一萬八千二百三十餘名省餉銀二十五萬
五千五百八十六兩兵糧馬料一十八萬七千一百一十五
石每石合銀二兩共合銀三十七萬四千二百三十餘兩馬
草四百四十六萬八千三百二十束每束合銀一分五釐共
合銀六萬七千零二十餘兩換防官兵行裝車輛鹽菜口食

等項省銀一十餘萬兩共節省八十餘萬兩除加增馬步守兵丁及新疆營書口糧等項銀一十五萬數千兩實省銀六十餘萬兩庶幾軍收實效餉無虛糜會疏既入

宸衷斯契凡此養民教民衛民皆

聖主御世之常經特亂久而弊叢遂時至而事起所謂變而通之以盡利鼓之舞之以盡神者非歟雖然構亂者回也處之必有其道繫回自有唐以來世居中國則回人亦吾人今雖自外

生成亦既勦而誅之矣

聖主一視同仁之衷恆以分良莠不分漢回爲訓能不委曲以全其生乎第生生之道旣荷

皇仁則生生之法宜求至當彼陝回乘機構釁仇視漢民勢不能再歸於陝矣爰度其地於平涼得化平川廣輪百有餘里泉甘而土肥兵亂之餘居民略盡於陝回爲最宜董志金積平後遂徙其人以實之不特回與漢離卽陝回與甘回亦不至與之相雜固已地與人宜矣旣而河狄西甯肅州以次平定肆赦之陝回旣眾化平之壤地難容乃分插平涼之大汧河華亭之十二堡秦安之龍山鎮旣而復患人滿始散寄

之靜甯隆德之間雖回之多寡不齊其鈐束制馭則一而釜底遊魂復安生理殘敗犬羊羣沾芻牧

皇上如天之仁不誠度越千古哉夫度地以居民者必量地以制邑參而相得有不能盡泥於古者豈惟化平一川悉居回眾鎮之以通判副之以都司爲善後所不容已乎他如金積董志皆叛回之所久踞董志原素稱饒沃地平而曠爲甯州安化鎮原所分轄莫適任患也今則添置縣丞居之適中之地金積堡兩渠夾流地深而阻與甯夏府地相隔絕鞭長莫及也今則改爲撫民廳移水利同知駐之而以靈武營參

將副焉至於固原州昔之散州也陝西提督駐焉平慶涇道亦駐焉州雖隸於平涼而幅員遼闊甌脫爲多今旣移道署於平涼矣亦遂升其州爲直隸而降鹽茶直隸廳爲海城縣與下馬關新設之平遠縣同隸焉而其中山谷盤互溝澗紛歧制馭仍虞不足復設固原州判一員治硝河城海城分縣一員治打拉池平遠巡檢一員治同心城而彈壓無嫌於隔遠指臂自效夫率從矣事雖改自今茲利實要諸久遠一勞永逸其是之謂乎

朝廷以邦本爲心封疆重臣遂得因時以制宜剔弊以興利

平定關隴紀略卷十三下篇終
不有變故無從而發其端非有大猷無術以成其務要皆由
我

皇上良法美意有以致之蓋自關隴旣平而海宇甯謐億萬
年無疆惟休決於茲矣

平定關隴紀略卷十三下篇終